

RB 283162

The

DR. H. LEONARD
AND PAM SUSSMAN
AFRICANA COLLECTION



UNIVERSITY OF TORONTO LIBRARY



DISCOVRS SVR LES
VOYAGES DE LOYS DE
BARTHEME, BOLOGNOIS.



LOYS de Bartheme, Bolognois a tant diligemmēt et par le menu traité des choses memorables, et autres singularités de l'Indie, et autres Iles produisans l'espicerie, que entre tous les antiqués ne s'en trouuera un, qui le puisse seconder: mais ses escrits corrompus par l'iniure du temps, ont été obscurcis et couuers de plusieurs erreurs et incorrections par maintes années, et là fussent encor demeurés enseuelis à l'auenir, si par la grace de Dieu ne me fût tombé entre les mains un Traité de Christofle de Larclerc de Sybilie, lequel ayant recouuert un vieil exemplaire en langue Latine, touchant iceux Voyages, dedié au reuerendissime Cardinal Caruaial de S. Croix, a prins la peine de le traduire en Espagnol. Et de cette translation me suis aydé à la correction de plusieurs endrois gâtés et corrompus en ce dit auteur: qui premierement auoit couché son Oeuure en nôtre langue Italienne, et adrecé à tresillustre Dame, ma-dame Agnesine, parangon de toutes les nobles et excellentes Dames, qui de nôtre temps se sont retrouvées en tout le païs d'Italie, fille de tresillustre Seigneur Federic, Duc d'Urbain, sœur de tresnoble Seigneur Guydocal, femme de treshaut et Trespuissant Seigneur Fabrice Collonne, mere d'excellent Seigneur Ascagne Collonne, et de Dame Victorine, Marquise du Gouast. Or le susdit Auteur a duiisé son Oeuure en six parties.


LA PREMIERE traite de son voyage en Egypte, Surie, et Arabie deserte:

LA SECONDE, de l'Arabie heureuse:

LA TROISIEME, du païs de Perse:

LA QUATRIEME, & CINQUIEME, du discours de toute l'Indie, et des Iles produisans l'espicerie:

LA SIXIEME, de son retour en Portugal, qu'il fait cotoyant la marine d'Ethiopie, et de Cap de bonne esperance, passant aussi par quelques Iles de la mer Oceane Occidentale.



A T R E S I L L V S T R E,
 E T T R E S V E R T V E V S E D A M E,
 M A D A M E L A C O N T E S S E D ' A L B I,
 & Duchesse de Talliacosse, Dame Agnesine
 Feltria Collonne,


Loys de Bartheme Bolognois desire Felicité.



PLVSIEURS auant moy se font adonnés à rechercher & remarquer les terres & païs étranges, tant que par grand & diuers estudes, ont fait leur effort de paruenir à l'accomplissement de leurs desirs. Les autres, encor de plus gétel esprit, ne se contentans de la cognoissance de la terre, & de son contenu, ont cōmencé avec certaines notes & obseruations à discourir les hautes & celestes regions, comme ont fait les Caldées & Pheniciens : lesquels de bon droit ont merité louange & honneur plus ample, que les autres, outre le plaisir & contentement de leur esprit. Or moy donq, à l'imitation de tels grans personnages, me suis ietté à decouurer quelque petite partie de cette nôtre masse terrienne, laissant aux autres la difficile inquisition des Cieux, sentant ce fardeau par trop pesant, & plus conuenable aux espauls d'Athlas, & d'Hercules, qu'aux miennes. Mais pourautant que la portée de mon esprit n'e s'étendoit iusques là, de paruenir à cette tant desirée cognoissance, par mon estude, ou par coniecture, ie determinay d'y employer ma personne mesme, & de mes propres yeux voir & cognoitre la situation des lieux, la qualité des gens y habitans, la diuersité des bestes, la varieté des arbres tant fruitiers, que autres, la douceur des fruits, & l'odeur des fleurs de toute l'Egypte, Surie, & Arabie deserte & heureuse, de la Perse, de l'Indie, & de l'Ethiopie: esperant par ce moyen en acquerir bonne & iuste cognoissance, veu mesme qu'un seul tesmoignage de la veüe, est plus à estimer, que dix ouyr dire. Apres donq auoir donné contentement

tentement à mon esprit, en discourant & traçant diuerses prouinces, & étranges nations, i'ay estimé être encor requis pour l'acquit de mon office, mettre en auant & public tout ce, que à par-moy auoys colligé & noté. Et de fait, me suis adonné à faire vn historique description de tous mes erres & voyages, selon le stil & mediocrité de mon petit esprit, me persuadant que ce sera œuvre tresfagreable à ceux, qui prendront plaisir à la lecture d'iceluy. Que si avec grand labeur, perils innumerables, facheries & difficultés indicibles, ie me suis delecté à visiter & voir plusieurs habitations; loix & coutumes cy-deuant incognues: par plus forte raison les lecteurs pourront, sans danger, gratieusement en recevoir vn mesme plaisir & profit, que moy. Or apres auoir longs temps tourné & viré en ma pensée, à qui de bon droit ie pourrois dedier mes labeurs & fatigues, entre tous autres s'est offert vôte tresnoble & haute Seigneurie, qui est vn receptacle & tresor de toutes sciences & vertus heroïques. Le ne veux icy parler de la diuine sagesse du tresillustre & tresexcellēt Seigneur Duc d'Vrbain, vôte pere, lequel nous est pour vn exemple & image, voyre vn soleil de tous ars, & faits belliques. Le me tays de vôte tresnoble frere, qui encor qu'il soit ieune, fait telle experience de foy es lettres Greques & Latines, que non sans cause il est au iourd-huy tenu & réputé, vn Demolthene, ou Ciceron. Puisque donq vôte Seigneurie est descendue de tels & si clairs fleuves redondans de toute vertu & noblesse, il est impossible, qu'elle ne se delecte à la lecture des œuvres grans & merueilleux, & aussi qu'elle ne prenne plaisir de venir à la cognoissance de cela, ou (comme l'on dit vulgairement) avec les ailes de volonté, les pieds corporels chemineroyent: mesme que ce fust vne des plus hautes louâges données à Vlysses, d'auoir veu les coutumes de diuers peuples & nations. Mais d'autant que vous êtes fort empeschée aux affaires de vôte tresnoble Seigneur & mary, non plus ny moins, que vne nouvelle Artemisie ayme & obserue deux nobles plâtes, en les nourrissant, qui sont comme vn Apollo, & Diane: & en outre occupée au gouuernement de vôte maison, laquelle maintenés en bonne reigle & police, il me suffira, si entre autres grandes œuvres, vôte plaisir est de lire quelque fois ces miens petis labeurs & discours. Car vous n'êtes du nombre de ceux, qui prestans l'oreille à foles chançons, vaines & oysiues paroles, attendent les heures, & n'ont

en aucune estimation le temps, qui est tant precieux, soudain, &
 irrecuperable: comme l'aués tousiours regardé & obserué dili-
 gemment, ne permettant passer vn seul iour sans quelque liberale
 & vtile occupation. Et d'autant que cet Oeuure n'est couché en
 l'ague friande, ny orné de telles couleurs que vôte Seigneurie le re-
 quiert, ie vous prieray excuser la petitesse de mon bas esprit, vous
 contentant de la verité y contenue. Que si mon labeur est receu gra-
 tieusement de vous, & aprouué par vôte iugement, ce me sera vn
 merueilleux cõtentement, & tresample recompense de ma longue
 peregrination, qu'à bon droit ie peu nommer horrible exil: car i'y
 ay souuentefois enduré faim, soit, froid, chaud, guerre, prison, &
 autres infinies calamités, & perils: auxquels ie suis maintenant acou-
 tumé & endurcy de telle sorte, que mon intention est, de tenter en
 brief pareils aflauts, & faire voyage es parties Septentrionales,
 moyennant l'ayde du Seigneur: puisque par sa diuine grace
 i'ay desia discouru les terres, Iles, & mers Orientales,
 & toutes les plages du Midy & Occident. Et
 puisque ie suis plus nay & enclin à cet
 estude, qu'a nul autre, i'ay aresté
 d'y employer la meilleure
 part de mes briefs,
 & fugitifs
 iours.



LES VOYAGES DE
LOYS DE BARTHEME
BOLOGNOIS.

LIURE PREMIER.

*Comment l'Auteur s'embarqua à Venise, & parvint en
Alexandrie, & de là au Caire.*



LE mesme desir, qui a meü plusieurs à discourir la diuersité des monarchies de l'Vniuers, m'a semblablement incité à cette mienne entreprinse. Mais pourautât que les autres païs ont été suffisammēt découuers par noz maieurs & ancestres, i'ay voulu tirer autre part, & visiter ce que les hommes auoyent iusques icy moins frequenté. Au moyen de quoy avec la conduite de nôtre Seigneur, ie party de Venise, faisant voyle, de forte, que par mes iournées i'arriuy en Alexandrie, cité d'Egypte, de laquelle n'est icy besoin d'en rien toucher, puisque ses qualités sont assez notoires à tous. Or desirant d'experimenter cas nouveaux, i'entray dans ce noble fleuue du Nil, & de là parvins au Caire, ou ie prins plaisir à contempler sa grandeur, qui n'étoyt toutefois si démesurée, qu'on la faisoit, & comme son renom le portoit. Car en verité, il est seulement de mesme étendue & grandeur que Romme, mais mieux peuplé, & garny de plus de gens de guerre. Plusieurs sont en cet erreur, qu'ils pensent que hors le Caire se trouue vn grand nombre de viles, qui soyent de son circuit mesme, Ce que repugne à verité, d'autant qu'elles sont loin de là, enuiron deux ou trois miles, & ne sont, à dire le vray, que simples vilages. Je ne mamuseray icy à raconter de leur religion, foy, coutume & façon de faire, puisque ces choses sont assez cognuës à vn chacun, & est notoire que le Caire est habité des Mores, & Mammeluchiens, ayans le grand Soldan pour leur Seigneur, qui est seruiteur de Mammeluch, Seigneur des Mores.

*Soldan, ser-
uiteur de
Māmluch*

*De Barut, Tripoly, Alepo, Aman, Menin, Damasc, & des singularités
& antiquités, qui s'y retrouuent encor pour le iourd-huy.*



LE ne maresteray icy à reciter les grandes richesses & beauté du Caire, & la superbité des Mammeluchiens, pour ce que chacun en est ia assez auerty. Partant donq du Caire, ie me mis de rechef

sur le Nil, reprenant mes erres en Alexandrie, & de là faisant voyle, arriuay à Barut, cité & port de la Surie, distât de là enuiron cinq cēs mile: ou ie fey long seiour. Elle est peuplée d'vn grand nombre de Mores, pour ce qu'elle est abondante en tout ce que l'homme pourroit souhaiter. Elle n'est de toutes pars enuironnée de murailles, mais seulement du côté de Ponant, & là flote la mer. Je n'y vey autre chose digne de memoire, si nō vne antiquaille, ou l'on disoit que la fille du Roy étoit mise lors que le dragō la deuoit deuorer: de quoy elle fut preseruée par S. George, & puis par lui mesme renduë au Roy son pere. Or me departant de là, ie prins la part de Leuant pour attaindre Tripoly & Surie, distantes de Barut

Tripoly. enuiron deux iournées. Tripoly, est vne cité tresabondante en tous biens, que l'on pourroit desirer: & sont les habitans tous Mahomettans, ayans pour Seigneur, le grand Soldan. Au sortir de cette vile, ie fey huit iournées sur terre ferme, & paruin à Alepo, cité tresbelle, & subiette au grand Soldā du Caire: & est assise entre la Turquie, & la Surie, les habitans sont aussi tous Mahomettans. On y trafique en toute

Alepos, sorte de marchandises, & principalement les Perfes & Assamins. De *droit chemin pour aller en Turquie.* là se prent le droit chemin pour aller en Turquie. Puis au sortir d'Alepo, ie commençay à discourrir à l'enuiron de Damasc, qui sont dix petites iournées, dont au my-lieu du chemin est assise vne cité nommée Aman, tresfertile & riche en toute sorte de bons fruits pres de Damasc, enuiron seize miles: ie trouuay vne autre vile appelée Menin, fondée à la cyme d'vne montagne, & habitée de Chrétiens, qui viuent & se gouernent selon les loyx, maniere, & coutumes des Grecs, au reste, subiets au Seigneur de Damasc. Cette vile est enrichie de deux braues & magnifiques eglises, que l'on dit auoir été bâties par S. Heleine, mere de l'Empereur Constantin. Là y a de fruits à grande foison, & principalement raisins de parfaite bonté, qui ont le grain long, & sans pepin. Outre cela, l'on y voyt de beaux iardins, & cleres fontaines. Au sortir de Menin, i'arriuay à Damasc, cité autant belle & bonne, que noble, ou ie fey quelque seiour, à l'intention d'apprendre la langue Moresque. Elle n'est habitée d'autres gens, que de Mameluchiens, & de plusieurs Chrétiens Grecs. Il me conuint enquerir & sauoir les statuz & ordonnances du Seigneur de la vile, qui est subiet au grand Soldan du Caire. Encor au iourd-huy s'y voyt vn chateau, fort, & superbe, edifié, comme l'on dit, par vn Mameluchien Florentin: & de fait, par tous les quantons d'iceluy y a vn nombre infiny de fleurs de lys de Florence, insculpées en marbre, par le commandement du susdit Florentin, & à ses propres despens aussi: qui pour lors étoyt Seigneur de ce lieu. Dauantage, il est enuironné de tous côtés, de fosses larges & profondes, fortifié de quatre grosses & hautes tours, garnies de mesme, tant d'artillerie, que de pons leuis. Et là dedans demeurent ordinairement en garnison cinquante Mameluchiens, avec bonnes munitions, aux

gages

gages du grand Soldan, duquel ce Florentin étoit Mammeluchien. Et de ce temps-là, comme le bruit est, le Soldan fut empoisonné de si étrange sorte, qu'il ne se trouua homme en tout le païs, qui luy sceût apporter antidote ou contrepoison, hors mis ce Florentin. Et pour recognoissance d'un tel benefice, le Soldan le guerdonna de grans honneurs, & entre autres liberalités, le constitua Seigneur de la cité de Damasc. Ainsi donq exalté en dignités, il feit bâtir ce château, dont est question, & demeura là iusques à la mort en grande préeminence & reputation de tout le peuple, de sorte, que iusques au iourd-huy on ne le tient en moindre veneration, que si s'estoyt vn saint homme, voyre iusques à luy faire offertes avec grand luminaire. Or depuis sa mort, le chateau est retourné es mains & puissance du Soldan: mais toutes & quantes foys qu'on vient à la creation d'un nouveau Soldan, l'un des gentils-hommes de sa Cour, que l'on appelle Admirals, luy fait requeste & supplication de luy octroyer le gouuernement & Seigneurie de Damasc, avec telles parolles: SEIGNEVR, iây par long temps été ton esclau: donne moy Damasc, & ie te rendray cent ou deux cens saraphes d'or. Ce que le Soldan acorde, mais avec telle condition, que si dans deux ans le suppliant ne luy deliure la somme promise, le Soldan luy procure sa mort par tous les moyens qu'il luy est possible, ou bien le tourmente par continuelles guerres. Et s'il luy tient promesse quant au susdit tribut, il demeure paisible en sa Seigneurie: laquelle est fort à estimer, & honorable: car le Seigneur à tousiours à son côté dix ou douze Seigneurs & Barons de la cité. Mais vn grand mal-heur est entre eux, qu'il n'y a ny police, ny iustice: ains y regnent toutes sortes de larrecins, & desordonnés arrançonemens, à cause que les Mores sont subiets aux Mammeluchiens, non plus ny moins que l'agneau au loup. Et quand le Soldan demande deux ou trois cens miles saraphes au Seigneurs, Barons, ou bien aux marchans de la cité de Damasc, il expedie deux lettres au Capitaine du chateau: Les vnes commandans d'assembler dans le chateau tels que bon luy semblera. Et incontinent l'assemblée faite, on lit les autres, lesquelles sont tout-soudain mise en execution, soyent à tort, ou à droit. Voylà les inuentions & moyens du Soldan pour recouurer deniers de son peuple. Il auient quelquefoys que le Seigneur de Damasc vse de rebellion, se fortifiant contre luy, & ne voulant se transporter au chateau: & par fois aussi les Barons ou marchans, pour euitter vne certaine enuie, montent à cheual, & se retirent deuers le Turq, ne pouuans endurer ny patir vne telle tyrannie. Je n'en diray autre chose pour l'heure, si non que touchera vn mot quand à la garde de ce chateau, qui est telle, que ceux, qui sont dedans les tours, font silence tout au long de la nuit: mais chacun d'eux a vn gros tabourin fait en mode de demye

*Harangue,
qui se fait
commune-
ment au Sol-
dan, pour
impetier la
Seigneurie
de Damasc.*

bote, & avec leur bruit & tintamarre se respondent l'un à l'autre. Que si l'un d'eux est retif à répondre, ou cesse si peu que ce soit, il est constitué prisonnier pour vn an. Or puisque i'ay assez amplement traité des loix & coutumes du Seigneur de Damasc, ne sera maintenant mal à propos parler des choses exquisés & dignes de memoire, qui se trouuent en cette cité: laquelle est fort riche en toute sorte de bleds, abondante en toutes chairs, & fertile en tous fruits, que l'on sauroit desirer, mesmement en raisins fraiz par tout le cours de l'année, ensemble grenades, & coings fort exquis, amandres, & oliues fort grosses, roses blanches & rouges, les plus belles, que l'on pourroit souhaiter. Les pommes, poyres, & peches y sont d'une desmesurée grosseur, mais le goût n'en est pas bon, pour cause, comme ie croy, que la cité est assise en lieu aquatique, & arrousee de plusieurs belles fontaines, mesme que toutes les maisons en sont quasi peuplées: dont auient, que ceste quantité d'eau cause à force nuées & broillats, qui gastent les fruits. Les Maisons sont de prime face & de montre laides, mais par dedans belles en merueilles, avec portes, & fenétrage de marbres, albastre, & porfyre, le tout en taillé fort artificiellement. Il y a plusieurs temples & mosquées, & entre autres, vn de mesme grandeur, mesure & architecture, que S. Pierre de Rome. Il est ouuert par le my-lieu, au reste, couuert de tous côtés. Là dedans repose, comme l'on dit, le corps de S. Zacharie prophete, tenu en grand honneur, veneration enuers le peuple. Ce temple est enrichy de quatre portes principales, faites toutes de metal. Au dedans courent plusieurs belles & cleres fontaines. Il s'y trouuent plusieurs monumens & reliques sentans son antiquailles, & entre autres choses, le lieu ou nôtre Seigneur dit à S. Paul: SAVL, SAVL POVRQVOY ME PERSECVTE TV: Ceste place est éloignée de la vile environ vn mile: & là pour le iourd-huy se fait la sepulture des Chrétiens qui meurent en ce pais. D'auantage, on y voit encor la tour, ou S. Paul fut detenu prisonnier, qui est pres des murs de la vile. Les Mores se sont éforcé par plusieurs fois de la ceindre de murailles mais en vain: car ce qu'ils dréçoient en vn iour, la nuit suiuant tomboit en ruine: de sorte, qu'elle demeure tousiours avec l'ouuerture que l'Ange y feit, quand il en deliura S.

Paul. I'y vey aussi la maison, ou Cain tua son frere Abel: laquelle est aussi hors de la vile par l'espace d'un mile, ou environ, assise sur vne côte pendente sur vne valée.

Des

*Singulari-
rés de Da-
masc.*

*Antiquail-
les de Da-
masc.*

Des Mammeluchiens de Damasc, & de leur grand' liberté.



LES Mammeluchiens sont Chrestiens reniés, & achetés par le Seigneur: qui sont gens studieux, & curieux d'employer le temps de leur vie ou aux bonnes lettres, ou aux armes, ou ils perseuerēt sans cesse, iusques à ce qu'ils ayent attainé le degré de maitrise & perfection es ars & sciences, auxquelles ils se sont vne fois dediés. Chacun d'eux a pour gages, six saraphes par chacun moys, étant défrayé luy, son cheual, & son seruiteur: Vray est, que tant plus sont ils experts aux armes, tant plus grans gages reçoient ils de leurs maitres. Ils ne vont iamais par vile, qu'ils ne soyent acompagnés de trois ou quatre hommes pour le moins: autrement leur seroit reputé à grand' honte, & diffame de marcher seuls. Cette maniere de gens vit en telle liberté, que si par cas fortuit il se rencontre deux ou trois femmes, ils les vont attendre en quelque lieu apparent, comme en grosses hôteleries, & soudain qu'elles passent, chacun d'eux en prend la sienne par la main, & la tire dedans le logis, & en fait à son plaisir: mais encor n'étant contans de cela, veullent saouir quelles sont: car elles ont ordinairement le visage tellement couuert, qu'il est impossible de les cognoitre. Et alors que les Mammeluchiens les interroguent d'où elles sont, qui, & quelles elles sont, elle leur respondent en cette sorte, frere, cõtente toy d'auoir prins ton plaisir de moy, sans plus t'enquerir que ie suis. En cette maniere il auient souuēt que tel cuide auoir rauy la fille de quelque grand Seigneur, qui n'a prins que sa simple chambriere ou esclau, ou bien quelque fois la femme mesme: ce qu'est auenu de mon temps. Les habis de ces femmes sont de soye, couuers & garnis d'un crespé fort delié, vsant toutes de botines blanches, & de souliers rouges, iaunes, verds, ou violets, & de plusieurs bagues, affiquets, & do-reures aux oreilles, à la teste, & es doigts. Elles se marient à leur appetit, & se démarient quand bon leur semble: de sorte, que quãd elles se fachent d'un hõme, elles se retirent deuers le Cœdi, qui est le grãd prestre de leur Loy, & allegans leurs raisons, impetrent separation de mariage: & par ce moyen leurs maris prennent d'autres femmes. Et cõbien que aucuns veulent dire & soutenir que les Mores tiennēt cinq ou six femmes: si est ce, que ie n'y vey onques homme en auoir plus de deux ou trois. Ces Mores menent vne vie merueilleusement desordonnée, mangeans brutalement par les rues & charrieres, & coutumierement deuant les portes des charcutiers & rotisseurs, qui leur acoutrent leurs viandes, qui sont, chair de cheuaux, chameaux, buffles, boucs, & chieures à foisons, outre ce; qu'ils sont abondans en fromages frais. Que si aucun veut auoir du lait, il y a gens tout aposté pour ce fait, cõduisans par la vile vn gros troupeau de chieures: & selon la quãtité de lait que demãdés, ils font mōter tant de cheures que bon vous semblera, iusques au plus haut de vōtre logis, & sur le cham en vōtre presence ils tireront de lait, tant que voudrés, dans vn vaisseau d'étain, argent, ou verre. Il s'y trouue aussi de taltufles en grande

Habis des femmes de Moritanie.

Priileges des femmes de Moritanie.

Mores combien ont coutumierement de femmes.

quantité,

quantité, de sorte, que quelque fois pour vn iour on y aporte des champs vingtinq ou trente chameaux chargés de cette marchandise, qui se vend tout sur l'heure: & s'apporte des montagnes d'Armenie, & de Turquie. Les acoutremens de ces Mores, sont, robes de soye ou de drap, grâdes, lon-

Habis & acoutrement des Mores.

Mores portent honneur aux Mammeluchiens

gues, & larges, sans ceinture. La plus part de eux ont leurs bas de chausses de futaine blanche, de haut ils n'en vsent point: leurs escarpins sont de cuir blanc, ou violet. Si vn More recontre en son chemin vn Mammeluchien, il luy fait honneur & place, à peine d'être bien étrillé à belles bastonnades, encor fût il gros & principal marchât de la vile. Là se trouuent plusieurs facteurs des Chréstiés menâs train de draps d'or, de soye, veloux, satin, tafetas, & de toutes autres marchandises: mais ils ne sont pas biē venus.

Le chemin pour aller de Damasc à Mecca. Et des coutumes des Arabes demeurans en la campagne. Et de la force & dextérité des Mammeluchiens.



PRES auoir assés amplement touché de Damasc, & des loix & coutumes y obseruées, il me conuient maintenant retourner à mes erres, & voyage, qui fut tel. Que le huitieme d'Auril 1503. la compagnie se mettoit en ordre pour aller à Mecca: & moy desirieux au possible de passer outre, & venir à la cognoissance des choses incognues, pour mieux executer mon desseing, la fortune me dit si bien, que de me donner entrée avec le Capitaine des Mammeluchiés, qui étoyt Chretien renié, de sorte, que pour l'âmitie qu'il mē portoit, il me reuestit d'un habit Mammeluchien, & me guerdonna d'un bon & braue cheual, me receuât fort humainement en sa cōpagnie, qui étoyt bien garnie d'argēt, & autres bonnes marchandises. Ordōq apres auoir cheminé par trois iourneés, arriuames en vn lieu, nōmé Mezerib, ou nous arrestames par l'espace de trois iours, afin de déplier & vendre noz marchandises, & aulsi pour acheter des chameaux pour nous seruir. Le chef & gouverneur de ce lieu s'appelle Zambei, & est Seigneur de la cāpaigne, c'est assauoir des Arabes. Il a trois freres, & quatre fils mâles. Son train est de quarante miles cheuaux, dix miles iumens, & quarante miles chameaux, qu'il tient en vn lieu de pâturage, contenant de circuit plus de deux grandes lieuës. Il est tellemēt riche & puissant, que quand bon luy semble, il fait & maintient guerre alencōtre du grand Turq du Caire, contre le Seigneur de Damasc, & de Ierusalem. Il est si caut & plein d'astuce, que quād se vient à recueillir les biēs de la terre, lors que l'on estime qu'il soit a plus de cēt miles loing de là, tout soudain des le matin se trouue aux portes de la cité, & pille tout ce qu'il rencontre, assauoir, froment, orge, & autres grains. Et en ayant chargé ses iumens, il gagne au pied avec vne telle façon de fuyte, que vous ne diriez pas qu'il court, mais qu'il vole comme le faucon. Et auient quelque fois qu'il fait course tout vn iour & vne nuit sans cesse ny repos. Et incontinent qu'ils arriuent au logis, ils donnent à boire à leurs iumens du lait de chameau, qui est fort refrigeratif. Je n'ay ouy dire cecy, mais

là y veu moymesme, pour être en leur compagnie. Ils cheuauchent la plus part sans selle, n'étans vetus d'autre habit, que de leur chemises, si ce ne sont les principaux. Leurs armes ne sont autres, qu'une grande canne d'Indie, longue de dix ou douze brasses, avec vn petit fer au bout & vn peu de tafetas en maniere de bandiere: & cela leur sert de lance. Or quand il est question de faire quelque course, il vont en troupe serrés & espés, tout ainsi que les étourneaux par les vignes. Ils sont de petite stature, de couleur tannée & obscure, les cheveux noirs, avec vne voix cassée & feminine. Ce pais est fort peuplé de gens, vians quasi continuellement en guerre & dissension. Ils habitent és montagnes, espians quand la carauanne, c'est à dire, la compagnie des étrangers, & viateurs passera, à fin de se ietter sus, & les voler, si est possible. Et pour faire nombre & escorce, ils menent quāt & eux, leurs femmes, leurs seruiteurs & domestiques, voyre leurs maisons mesmes, quils portent sur le doz des chameaux, faites en manieres d'un pauillon, ou tente d'homme d'armes, bâties de méchante & prime laine. Or l'onzieme d'Auril la carauanne partit de Mezerib, la compagnie étant de trentecinq miles chameaux, d'hommes enuiron quarante miles, sans nous conter, qui étions soyssante commis au gouvernement de la carauanne: dont le troisieme tenoit le premier rang avec la bandiere, l'autre tiers marchoit au my-lieu, & l'autre étoit à l'arrière garde. Et pour dire en peu de paroles, nôtre voyage fut conduit en cette maniere: De Damasc à Meccā font quarante iournées, & quarante nuits de chemin: Nous partimes le matin de Mezerib, cheminans en diligence iusques à vingtdeux heures. Et faut icy noter, que sur le chemin se font certains signes de main en main, par le commandement du Capitaine. Et pendant cette solennité, il conuient s'arrester tous en compagnie, tant pour décharger les chameaux, que pour boyre & māger: ce que dure enuiron deux heures, de sorte que le tout fait vingtquatre heures. Puis en apres on fait vn signe, que chacun ayt à recharger les chameaux, lesquels sont repeuz bien legeremēt: car à chacun chameau l'on ne donne que cinq pains d'orge crud, & chaque pain n'est guere plus gros qu'une pomme de grenade. Cela fait, nous cheuauchons toute la nuyt & tout le iour ensuyuant iusques aux vingtdeux heures acoutumées: puis venüē les vingtquatre heures, nous recommençons nôtre train, gardans tousiours l'ordre & coutume que dessus. Que si cas auient que l'on ne puisse trouuer des puy, pour abreuer les chameaux, il conuient tous les huit iours fouër en terre pour tirer des eaux fresches. Ces chameaux sont fors & robustes, & porte autant l'un deüx, que deux de noz mulets: combien qu'ils soyent maigrement traités, & en trois iours abreués seulement vne fois, vray est, que au bout de la huitaine, ils ont vn iour ou deux de relache & repos. Or auint que lors, que nous étions arestés pour trouuer d'eau, en faisant puy & citernes, nous conuenoit tenir sur noz gardes & defences alencontre des Arabes, qui avec vn gros amas de gens nous

*Les Arabes
de quelle
stature.*

*Arabes vo-
leurs.*

venoyent

venoyent assaillir : combien que iamais ny demeurât qu'un homme & vne femme des nôtres. Car deux mesmes, ils sont de si petit cœur, & force, que nous seulement en nombre de soysante, étions suffisans pour repousser cinquante ou soysante miles Arabes : loint aussi, qu'entre le peuple Payen ils s'en trouuent Peu qui soyent dextres aux armes, comme sont les Mammeluchiens : lesquels i'ay veu & cogneu experts & preux quant au fait des armes, & art militaire. I'ay veu vne fois en ma vie l'un d'eux mettre vne petite amandre sur la teste de son esclave, & au second cop la mettre bas avec vne flesche, sans luy toucher la teste, & si tiroit de plus de vingt, ou quinze pas loing. Vne autrefois ie vey vn autre Mammeluchien, qui courant sur son cheual, le desflangla, & luy osta la selle, & la mit sur la teste, puis se la remeit entre les iambes sur le doz de son cheual, & la resflangla de tous points, sans tomber, & sans que son cheual laissât de courir aussi viste que cheual de la compagnie, encor que les arnichemens de sa selle fussent faits d'une mesme sorte, que les nôtres.

De la cité de Sodome, & Gomorrhe.



A P R E S que nous eumes cheminé par l'espace de douze iournées, nous commençames à decouvrir la Vallée de Sodome & Gomorrhe, que nous cogneumes être ruinées par le commandement de Dieu, ainsi que tesmoignent les Escritures saintes. Et qu'il soit ainsi, nous veimes, comme c'estoyent trois cités assises au sommet de trois hautes montagnes: là ou l'on voit encor le sang entremeslé avec la terre en profondeur de trois ou quatre toyses. Dont l'on peut iuger, qu'il étoient gens vicieux, & mal versans. Le pais & son contour est sec, & sterile, voyre iusques à ce, qu'à peine y peut on recouurer d'eau: qui est vne malediction diuine, au lieu de la benediction, qu'ils auoyent coutume de recevoir. Car ce peuple viuoit premierement de la manne que le Seigneur transmettoit par sa diuine grace: de laquelle abusans sans mesure, ils sont tombés en sens reprouvé, & à la parfin ont été grieuement touché de la diuine Iustice. Or de là, nous passames les vallées dépendantes de ces montagnes, qui durent enuiron vingt miles: Et y demurerent bien trente hommes des nôtres, oppressés de soif, & plusieurs autres acablés & enseuelis dans le sable, encor qu'il ne fussent mors du tout. Puis apres vimmes à decouvrir vne petite montagne, ou il y auoit vne fosse pleine d'eau, qui nous vint fort bien à propos, pour nous rafraichir, & de fait, nous nous arestames là: mais le matin ensuyuant vingt-quatre miles Arabes commencerent à nous assaillir, & donner sur la queuë, mettant en auant, qu'eussions à leur payer l'eau, que nous auions beu. A quoy nous leur feimes responce, que l'eau, que nous auions beu, étoit de Dieu, & non d'eux, & qu'il ne falloit qu'ils esperassent autre payement de nous. Au moyen de quoy ils leuerent le combat, & nous apres de toute nôtre puissance, faisans murailles de noz chameaux, & entre ces chameaux

chameaux mettans d'hommes, & au derrier des susdits chameaux se muçoient les marchans, tout ainsi que derrier vne muraille: mais eux ayans la commodité du bas de la montagne, feirent vn tel fort que nous demeurames deux iours & deux nuits assiegés, iusques à ce, que nous n'auions déau pour boyre, eux ayans enuironné la montagne de gens, expres pour rompre nôtre carauanne. Or pour tollir toute occasion de nous cōbatre à l'auenir cōtre eux, nôtre Capitaine entra en Cōseil avec les marchâs Mores, qui a cordarēt leur bailler deux miles & cinq cēs ducats d'or: & lesquelz ils prindrent tresbien: & apres par maniere de moquerie disoyent, que dix miles ducats neüssent peu bien payer leur eau. En quoy nous cognumes qu'ils n'étoyent gens de raison ny d'équité. Et pour cette cause nôtre Capitaine, homme fort prudent, feit faire vne crie par toute nôtre compagnie, que tous ceux qui se trouueroyēt aptes pour porter les armes, qu'ils ne montassent sur les chameaux, mais que chacun misse la main aux armes pour se defendre: le lendemain matin nous feimes mettre en ordre nôtre carauanne, & marcher deuant, & noz Mammeluchiës apres, qui étoyēt en nombre de trois cens. Et ce pendant que les premiers gaignoyent chemin, nous, qui étions derriere, cōmençames des premiers à toucher, & saluer noz voyfins. En ce conflit demurerent de nôtre part cinq hommes, & deux femmes, tués à force de cops de fleches: du côté de noz ennemis il y eut défaite de plus de miles & six cens personnes, & non sans cause, d'autant qu'il n'étoyent armés, ny reuestus d'autre garde-corps que de leurs simples chemises, leurs cheuaux ausi sans selles: de sorte, qu'ils neurent plus expedient ou plus prest remede, que la fuyte: & nous à fuyure nôtre droit chemin.

*D'une montagne habitée par les Iuifs de la
cité de Medina Thalnabi.*



AINSI donq suiuant noz erres, par l'espce de huit iours, se vint offrir à nôtre veüe vne montagne, laquelle sembloit auoir de circuit dix ou douze miles, en laquelle habitēt les Iuifs en nôbre de cinq ou six miles hommes, qui vont presques tout nuds, & sont gens bas de corpulēce, n'excédans cinq ou six pieds de hauteur, avec vne couleur noire, & voix feminine. Ils n'vsent gueres d'autres viandes, que de chair de mouton: ils sont circoncis, & confessent franchement être Iuifs naturels. Que si quelque More par cas fortuit tombe entre leurs mains, ils en font boucherie, & lēscorche tout vif. Au pied de la mōtagne y a vne conserue, ou citerne des eaux, qui tombent du ciel sur leur temple: de laquelle feimes nôtre prouision, & en chargeames bien enuiron seize mile chameaux, de quoy ces Iuifs furent fort piqués, & enuenimés cōtre nous, de sorte que les eussiés veu espars de tous les côtés de la montagne, à grād' course apres nous, nō plus ny moins, que les connis par la garenne, quand ils sont pourchassés du veneur. Si est-ce, qu'ils n'eurent iamais le cœur, ny l'hardiesse d'approcher, tant peu soit il, de nous, à cause qu'ils sont enne-

*Medina
Thalnabi,
que signifie.*

mis mortels des Mores. Aupres de cette eau y a cinq ou six pieds d'arbres d'espines blanches, beaux à merueilles, & au dedans d'iceux trouuames deux tortues blanches. Ce que nous causa grand' admiration, pour autant que nous auions cheminé par l'espace de quinze ou seize iours, & autant de nuits, sans iamais voir ny rencontrer vn seul oiseau, ny beste que ce soit. Au partir de là, nous reprimmes noz erres, tendans à Medina Thalnabi, c'est à dire la cité du prophete: & à quatre miles, ou enuiron pres de la ville, nous trouuames vn puys, ou s'arresta toute nôtre compagnie par l'espace d'un iour, tant aux fins de se rafraichir, que pour se lauer, & prendre nouueaux habis, pour plus honorablement entrer dans la vile: qui contient enuiron trois cens feuz, & est ceinte de murailles faites de terre: mais les maisons de dedans sont bâties de forte pierre, avec grosses murailles. Ce pais, ensemble tout son contour, a receu malediction de Dieu, voyre si rigoureuse, que toute la terre en est demeurée sterile, excepté vn petit lieu, prochain de là, enuiron deux ou trois iets de pierre, ou l'on trouue cinquante ou soixante pieds de Palmiers dans vn iardin: & aupres y a vn conduit d'eau fresche, qui decend d'une petite montagne, coulant contre bas bien enuiron vingt quatre pieds. Là est le lieu propre,

*Le corps de
Mahomet
ne demeure
en l'air sans
soutien.*

pour reprendre ceux, qui dient & maintiennent que en Mecca le corps de Mahomet est en l'air de soy mesme, sans ayde ny suport de creature du monde. Ce qu'est faux: car i'ay veu du contraire de mes propres yeux dans cette cité, ou nous demeurames par l'espace de trois iours: & dès le premier iour, qu'y arriuay, ie fey mon effort d'entrer d'as la mosquée ou temple, mais ils nous fut dit, que si y voulions mettre le pied, ils nous conuenoit auoir autant de Mores avec nous qu'étions de cōpagnie. Ce que fut acordé, & executé: puis chacun d'eux prenoit l'un de nous par la main: & ainsi fumes conduits iusques pres le sepulchre de Mahomet. La mosquée donq, ou il est enterré, est drecée en cette forme & maniere.

*La Mosquée
ou fut enter
ré Mahom
met, & ses
compagnōs.*

La longueur est de cent pas, la largeur, de huitate. Elle a deux portes, qui seruent d'entrée, l'une deuant, l'autre derriere. La nef de dedans est cōpartie en trois allées, dont la separation est de quatre cens colonnes, toutes faites de pierres cuites, & blâchies par dessus: & à icelles sont attachées enuiron trois miles lampes. A l'entrée de la Mosquée de l'un des côtes y a vne tour contenant cinq pas de largeur en toute carreure, tapissée en magnificēce de draps d'or & de soye. Le pied d'icelle est de metal, & au contour y a vn treillis de bronze, par ou l'on peut ietter la veüe dans la tour. En apres, vn peu plus auant dans la Mosquée, à la main gauche se trouue vne petite porte, qui conduit à la susdicte tour: & tout aupres encor vne autre porte, mais plus petite. Et à l'un des côtes on y voit enuiron vingt liures, & de l'autre côté vingt cinq, reliés autāt richemēt, que sont les liures de Mahomet, & de ses cōpagnōs, & adherens. Et dans iceux liures est décrit la vie de Mahomet, ensemble tous ses commandemens, traditions & loix de sa secte. Dans cette porte y a vne sepulture, cest assauoir vne fosse

fosse souz terre, ou est enseuely Mahomet, acompagné de ses deux gendres, nommés Haly, & Othman, dont Haly fut fils du frere de Mahomet, & eut pour femme Fatma, fille dudit Mahomet. Aupres de ceux-cy sont deux peres de ses femmes, appellés Bubeclerc, & Homer. Bubeclerc est celuy, que l'on dit être venu à Rome, en esperance d'être Cardinal, mais il n'y peut auenir. Tous ces quatre furent Capitaines souz la charge de Mahomet: d'ou chacun d'eux a vn liure de ses actes & gestes, gardés en ce lieu avec grand' reuerence & veneration. Ce neantmoins ils sont fort differans & repugnans en leurs opiniões, & obstinés à merueilles en leur heresie, dont il en prouient grand' confusion, & dissension entr'eux: de sorte, que cette canaille se debat iusques aux couteaux & espées, pour autāt que l'un veut tenir l'opinion de cestuy-cy, l'autre de celui-là. Au moyen de quoy ils ne peuuent rien resoudre entre eux, qui soit certain & absolu, mais sentretuent comme bestes, à l'occalion de ces fauces & peruerfes heresies.

Herese des Mahometans.

Des propos, que tint le Capitaine de nostre compagnie au prestre de la Mosquée.



O VR plus ample declaration de la secte Mahometique, il est à noter, que au dessus de la tour, de laquelle auons ia touché, y a vne allée ou l'on peut aisément marcher tout à l'environ & aussi par dehors icelle tour. Or pour mieux cognoitre la ruse & malice des satrapes Mahometiques en nostre endroit, il faut entendre, que le premier soir, que nous allames au sepulchre de Mahomet, nostre Capitaine fait appeller le grand maitre de la Mosquée, & le pria de luy montrer le corps de Naby (c'est à dire, le grand Prophete) luy promettant de sa part trois miles saraphes d'or: mettant dauantages en auant, qu'il n'auoit ny pere, ny mere, frere ny seur, femme ny enfans, & qu'il n'étoit venu là pour acheter bagues ou autres marchandises, ains seulement par vne deuotion, & intention de sauuer son ame, & pour ce faire, vser le reste de ses iours au seruice du prophete, en son temple. L'ors le prestre touché d'un courroux & ardante furie le repoussa avec telles paroles: Comment tes yeux, qui ont commis tant de maux, sont ils dignes de voir celuy, pour qui Dieu crea le ciel & la terre? A quoy le Capitaine fait response: veritablement il est ainsi, Seigneur. Ce neantmoins, ie te prie, fais moy tant de bien de me montrer le corps du prophete. Et si tu les fais, ie te promés incontinent l'auoir veu, m'arracher les deux yeux, pour le grand & indicible amour, que ie luy porte. L'ors le prestre replica, vsant de tels propos, Ie cognois maintenant ton zele & desir, pour auquel satisfaire, ie te veux bien dōner à entendre, que nostre Prophete voulut bien mourir en ce pauvre lieu-cy, pour nous instruire, & nous laisser exēple d'endurer patiemment pauureté, combienque, si son plaisir eût été, il pouuoit finir ses iours en la noble cité de Mecca. Mais incontinent qu'il expira ça bas, il fut eleué es cieux par les Anges, & tient on pour seur qu'il est assis tout aupres de Dieu. A quoy nostre Capitaine fait response. Et Iesus Christ, fils de Marie,

Superbe response du prestre de Mahomet au Capitaine des Meluchians

ou est il? Il est assis, dit le prestre, au pied de Mahomet. Bien, bié, il me suffit, ie n'en voulois pas sauoir d'auantage, respond le Capitaine. Et tout soudain apres ces propos, nous sortimes hors de ce temple: & le Capitaine s'adreçant à nous, nous dit, Auifés ou ie voulois employer mes trois miles saphes. Le soir suiuant enuiron trois heures de la nuit, vindrent en nôtre carauane dix ou douze vieillards de cette secte, pour autât que nous étions loing des portes de la vile, enuiron deux iets de pierre. Et de prime face ces vieillards comécerēt à crier à haute voix, l'un deça, l'autre de là, Dieu fut, Dieu sera, & Mahomet messager de Dieu resuscitera. Nôtre Capitaine étonné de ce bruit, mit la main aux armes, & nous apres à les saluër assez rudement, cuidans que ce fussent les Arabes, qui nous voufissent piller: Quoy (dimes nous) quel bruit est-cecy? Que faites vous icy? A quel propos tels cris? qui étoient certes épouuantables. A quoy ils nous respondirent, ne voyés vous pas les grandes lumieres & splendeurs issans de la sepulture de Mahomet? Le Capitaine fait réponse, qu'il n'auoit rien veu: & mesme interrogea tous ceux de sa compagnie de ce fait, qui dirent pareillement n'auoir rien veu: d'ou l'un de ces vieillards tenta nôtre Capitaine en cette sorte. E' tes vous esclaves, c'est à dire, Mammeluchiens? Ouy, dit le Capitaine. Alors le vieillard aporte ses raisons avec tels propos. Seigneur, vous ne pouués voir ny cōprêdre ces œuures celestielles, pour autât que n'êtes encor cōfermés en nôtre Foy: en vôtre foy? dit le Capitaine. O poures fols, ie vous voulois dōner trois miles ducats: mais par Dieu vous ne les aurés iamais. Allés chiens, fils des chiens: nous éstimés vous tât bestes, ou hebetés, que ne cognoissons biens ces flambes, que vous faites, être artificielles, & cōposées pour tromper les simples gens? Et sur l'heure defenses furent faite par le Capitaine à tous de sa compagnie, de ne plus entrer dans cette Mosquée, & faut tenir pour certain, qu'en ce sepulchre de Mahomet, on ny voit ny chasse de fer, ny d'acier, nymôtagne aucune à plus de quatre mile loing de là. Nous demeurames en ce lieu par l'espace de trois iours, tant pour nous rafraichir que pour donner repos à noz chameaux: ou le peuple s'entretient des trafiques & marchandises venans de l'Arabie heureuse, du Caire, & de l'Ethiopie, pour ce que de là iusques à la mer rouge n'y a que quatre lieûe de chemin.

*Du chemin pour aller de Medina à Mecca. De
la mer de Rena. Et pour quoy les
Mores vont à Mecca.*



R apres nous être long temps amufés à raconter les folies, superstitions, & erreurs de ces Mahometiques, nous conuint reprendre noz erres, & retourner à nôtre voyage: lequel pouffames plus outre, suiuanz nôtre guide, qui nous conduisoit avec ie ne say quel quadran aymanté, tout ainsi, que les pilots gouernent les nauires sur la marine avec certaines cartes. Nous commençames donq à cheminer
contre

contre le midy & sur nôtre chemin trouuames vn fort beau puys, que l'on disoit auoir été fait diuinemēt par S. Luc, au temps de seicheresse extreme, qui regnoit en ce pais là: & beumes tant de léau, qui estoit dedans, que nous meimes le puys à sec. Icy ne faut obmettre la mer de sablon, ^{La mer de sablon.} (que nous rencontrames deuant, que la montagne des Iuifs:) en laquelle cheminames enuiron cinq iours, & cinq nuits en grand dangier: & ie vous diray comment: Cette mer est vne campagne fort longue, & plaine, toute réplye d'arene blanche, menue cōme farine. Que si par fortune le vēt de Midy s'y fût leué ausi bien cōme fait la Tramontane, nous étions tous depeeschés: car encor que nous eussions le vent à plaisir, si est-ce, que nous ne pouuions nous voir l'un l'autre de dix pas pres. Et faut icy noter, que ceux, qui sont montés sur les chameaux, ont des caïsses de boys, dans lesquelles ils boyuent, mangent, & dorment, prenans l'air par certains petits trous, qui y sont faits tous expres: & les pilots leur vont deuant avec vn quadran aymanté, de la sorte deceux, desquels on vse sur mer. Là moururent plusieurs de nôtre compagnie, non seulement de soif, mais ausi de ce, qu'ils beurent tant de cette eau, qu'ils en creuerent. Or quand il auient que la Tramontane tire, cette arene s'assemble en vne grand' montagne, qui fait vn quanton du mont Sinaï, ou étans arriués, nous y trouuames vne fort belle colonne faite de brique, & enrichie d'un magnifique ouvrage, que l'on appelle porte, ou côte gauche. Il y a ausi sur cette montagne, vne cauerne fort longue, qui a vne porte de fer, ou selon le bruit de pardelà, Mahōmet se retiroit pour faire ses saintes & deuotes oraisons, & en la porte on entēd encor au iourd'hui vn grād bruit, semblable à celuy qui prouient de l'eau, tombant de quelque lieu haut en bas: & passant cette montagne, nous nous trouuames en tel destroit & peril, que n'esperions iamais en sortir sains & sauues. Or apres étres partis du puys, dont auons touché cy dessus, nous feimes beaucoup de chemin par l'espace de dix iournées (ayant eu par deux fois cōbat avec cinquante miles Arabes) de sorte, que par noz grandes iournées paruimmes à la cité de Mecca: ou il y auoit grosse guerre entre deux freres, à cause qu'ils sōt quatre, qui ont continuellement combat les vns contre les autres, pour l'enuie & ambition de la Seigneurie de Mecca, de laquelle nous ferons maintenant mention, & descrirons particulierement, tout son cōtenu. Cette cité donq est fort belle, bien habitée, cōtenant enuiron six miles feuz. Les maisons sont bâties de mesme que les nôtres. Il s'y trouue tel edifice, qui vaut trois au quatre miles ducats: elle n'est aucunement fermée de murailles. Enuiron vn quart de mile pres se trouue vne montagne, ou il y a vn passage fait à force de mains, qui dure iusques à ce, que l'on ayt gaigné la plaine: & de là est aisé à voir, que les murs de la cité sont montagnes, qui l'enuironnent de toute pars, & ne s'y trouuent que quatre entrées. Le gouuerneur est le Soldan, & l'un des quatre freres, lequel est descendu de la lignée de Mahomet, neantmoins subiet au grand Turq du Caire:

mais les trois freres luy font continuellement la guerre, par tous les moyens & ruses qui s'offrent à eux. Or donq le dixhuitieme de May nous entrames en la cité du côté regardant vers la Tramontane: pourautant que de la part du Midy on trouue deux montagnes presque iointes ensemble, de sorte, que le passage, qui est le chemin pour venir au port, y est merueilleusement étroit. Du côté d'Orient y a vn autre quanton de montagne, composé en forme d'un fossé, lieu ordonné pour celebrer le sacrifice aux prophetes, Abraham & Isaac: & est distant de la vile huit ou dix miles, élevé en hauteur enuiron deux ou trois iets de pierre à la main. Le tout fait non de marbre, mais d'une certaine pierre retirant de couleur sur le marbre: & au desus y a le temple, qu'ils appellent en leur langage, Mosquée: lequel a trois portes. Au pied de cette montagne l'on trouue deux belles cisternes pleines d'eau, prouenant en partie des pluyes, en partie de bien loing de là: dont l'une appartient à la carauanne du Caire, l'autre de Damasc. Or nous lairrons maintenant les discours, & solennités de ces sacrifices, iusques à ce qu'il vienne mieux à propos, & parlerons maintenant de la cité. Sur l'heure donq que nous entrames en cette cité, nous trouuames la carauanne du Caire, laquelle étoit arriüée huit iours deuant nous, pourautant qu'ils prindrent vn autre chemin que n'auions fait. Cette compagnie étoit de soysstante quatre miles chameaux, & de cent Mameluchiens. Mais en premier lieu il conuient noter, que cette cité a receu la malediction de Dieu, d'autant que la terre n'y produit ny arbres, herbes, ny fruits, ou autres choses necessaires à la vie de l'homme: & y a si grand' faute & necessité d'eau, que qui en voudroit boyre à plaisir & son saoul, il n'en seroit quite pour deux escuz par iour. Tous les viures, dont ils vsent, viennent du Caire, transmis par la mer rouge, ou il y a vn port, nommé Ziden, distant de cette cité enuiron quarante miles. On y aporte aussi vne grand' quantité de viure, de l'Arabie heureuse, ensemble de l'Ethiopie. Nous rencontrames des pelerins en grand nombre, les vns venans d'Ethiopie, les autres des Indes, tant maieur, que mineur, aucuns de Perse, quelques vns aussi de la Surie, somme, que de ma vie ie ne vey tels amas & troupeaux de gens pour vn cop, qui arriuerent là, par l'espace de vingt iours, que ie m'y arrestay. Aucuns deux étoient venus pour marchandise, les autres pour gagner les pardons, & acomplir leur vœuz, desquels nous parlerons tantôt,

*Sacrifice
aux prophètes
Abraham
& Isaac.*

*Mecca,
& son contour
sterile
par malediction
de Dieu.*

*Ziden,
port sur la
mer rouge.*

Des marchandises venans en la cité de Mecca : Des pardons d'icelle : Des sacrifices, qui se font à Abraham & Isâac.



A cité de Mecca a grand aport de marchandises de plusieurs lieux, & diuerses nations, mais principalement de l'Indie maieur située pardela le fleue Gangés, d'ou viennent de perles & autres pierres precieuses, en grande quantité: & aussi de l'Indie mineur, mesmement d'une vile nommée Banghalla, de laquelle on amene à foison de draps tant de futaine, que de soye. Pareillement de l'Ethiopie on y aporte plusieurs sortes d'espiceries. Au moyen de quoy en cette cité y a tresgrande trafique de toutes marchandises, & mesmement d'espiceries, & drogues odorantes, pierres precieuses, & autres singularités. Or pour reuenir aux pardons des pelerins, desquels auons touché cy dessus, il conuient sauoir, qu'au my-lieu de cette cité y a vn temple, tant en longueur que hauteur eleué en forme du Collisée de Romme, non toutefois bäté de grosses pierres, mais tout de briques au reste, tout rond, ayant en son contour enuiron nonante ou cent portes, & à l'entrée d'yceluy faut descendre dix ou douze degrés. Il y a aussi à chacune porte gens de diuerses & étranges nations, qui ne vendent autres marchandises, que bagues & pierres precieuses, mais en grande quantité, comme en tesmoigne la montre qui en est admirable. Or apres qu'on est descédu dans ce temple, on vient à descouurir à force peintures braues & superbes, enrichies de toutes couleurs, & mesmement entrelacées de fin or & azur. Là dedäs se trouuent plus de quatre ou cinq miles hommes, vendans de parfuns & autres choses odoriferantes, tellement que de ce temple vous eussies dit être vne boutique pleine de muz, cyuette, benioin, starax, & autres pareilles senteurs. Le vingtroisieme de May les pardons commencerent & furent ouuers en ce temple, avec magnificence, pompes, & solennités indicibles. Or il faut entendre, qu'au my-lieu de ce dit temple il y a vn lieu ouuert, assez grand, & au desouz diceluy y a vne tour de cinq ou six pas de largeur en toute carreure: laquelle est reuestuë tout à l'enuiron d'un beau drap de soye de l'hauteur de quatre brasses: avec vne porte toute d'argët, de l'hauteur d'un homme, qui donne l'entrée däs cette tour estät, comme ils dient, garnie de grans vaisseaux pleins de pur baume: desquels on a la veüë seulement le iour de la Pentecôte. Et afferment les habitans, être la plus part du tresor du Soldan, Seigneur de Mecca. Cette tour est enuironnée de toutes pars de treillis de fer, tant gros, que menus: & y a telle obscurité, qu'on n'y peut mettre le pied sans lumiere. D'auantage, il y a vne autre tour distante de cette-cy dix ou douze pas, faite en forme de noz chapelles, ayant trois ou quatre portes, & au my-lieu vn puis profond de soiffante brasses, dont sept ou huit hommes commis expres ne cessent de tirer d'eau pour la distribuer au peuple, qui est cöuenü

là, pour faire ses deuotions, qui sont telles: le vingt & troisieme de May tout le peuple s'assemble de bon matin dans ce temple, voyre deuant le poinct du iour: puis faut, que chacun enuirone & circuiffe sept fois cette tour, en baissant tous les côtés d'icelle. En-apres s'approchans du puy de la chapelle, ils manient la chaine, & s'apuyent sur le bord, prononçans telles paroles: tout cecy soit à lhonneur de Dieu, Dieu par sa grace me pardonne mes pechés. Et incontinent ceux qui ont charge de tirer l'eau, leur en iettent trois ou quatre grãs seaux sur la teste, les arrosans iusques à la plante des piedz, sans auoir égard, si leurs robes sont de foye, ou de veloux. Ces poures fols & idiots estiment être purifiés par ce moyen, & que leurs pechés & offenses leur soyent remis, voyre qu'ils descendent au fond du puy avec l'eau. Les habitans tiennent pour seur, que la place, ou est bâtie cette tour, est là, ou le Prophete Abraham edifia sa premiere maison. Or ces poures gens ainsi laués & trempés s'en vont au mon s'usdit, prenans leur chemin par la vallée, pour y faire le sacrifice. Mais puisque les propos delectables ont continué d'apporter plaisir aux nobles esprits, ie m'efforceray d'expedier en peu de paroles les moyens & obseruations gardées en ce sacrifice. Premieremēt donq, chacū d'eux tue pour le moins deux, trois, ou quatre moutons, tel y a, qui en tue six: de sorte, que pour le premier iour il se trouue vne boucherie de plus de trēte miles moutons, que chacun d'eux en particulier met en pieces, puis les distribue aux poures pour l'amour de Dieu. Le nōbre de ces mendiās montoit plus de trente ou quarante miles: qui étoient cōtrains de faire vne petite fosse en terre, à fin de cuyre & routir leur chair, n'ayans autre chose pour faire du feu, que la fiante des chameaux: puis mangeoyent cette chair à demy-cuite, chose pitoyable à voyr. Que me fait iuger, que tel amas de poures gens ne vient là, tant pour gagner les pardons, que pour remplir leurs ventres opprésés par famine. Ioint aussi, que nous auions quelque peu des coucourdes de l'Arabie heureuse, desquelles nous vsions, puis iettions là l'escorce: & soudain ces poures gens avec impetuosité se ruoyent dessus, & se combatoyent à qui les auroit, puis les mangeoyent, encor qu'elles fussent pleines de poudre ou de terre. Le second iour l'un de leurs predicateurs, qu'ils appellent Cœdi de la foy, monta à la cyme de la montagne, & leur fit vn presche, qui dura pres d'vne heure, contenant en somme, plusieurs exhortations, qu'il faisoit au peuple, pour plorer, gemir, & prier Dieu, qu'il leur pardonnât leurs pechés: & aussi, qu'il eussent à faire penitence, en se frapant par plusieurs fois contre l'estomac. Apres toutes ces remonstrances, il commença à crier à haute voix.

*Oraison du
predicāt és
sacrifices de
Mecca.*

O' Abraham, bien aymé de Dieu, bien voulu de Dieu: O' Isaac eleu de Dieu, amy de Dieu: priés Dieu pour le peuple de Nabi. En prononçant ces paroles, on l'entendoit ietter grans souspirs & gemissemans. Ce sermō paracheué, quelcun fit bruit, que les Arabes venoyent: nouvelle, qui étonna tellement tous les asistans, que, comme esprins d'vne furie, ils gainerent

ils gaignerent au pied, se retirans dans la cité. Et de fait, les Arabes en nombre de plus de vingt miles étoient ia approchés de six miles pres de Mecca, tout expres pour rober & piler les carauānes des étrangers. Quāt à nous, nous arriuames de bonne heure, & en assurece dans la vile: mais quand nous fumes entre la vile & la môtagne des sacrifices, nous vimmes à trouuer vne muraille ayant quatre toyses d'hauteur, ou enuiron. Et au pied d'icelle y auoit vn nôbre infiny de petites pierres, que tout le peuple leuoit, puis les iettoit là, pour certain respet, qui est tel, comme ils dient, que quand Dieu commanda à Abraham de luy immoler son fils, il s'en
 22 alla le premier sur cette montagne, & dit à son fils, que pour obeir à
 22 Dieu, il vint apres luy, A quoy il feit responce: Je suis tout prest d'acom-
 22 plir le commandement de Dieu. Et lors que Isaac aprocha de ce mur,
 22 le Diable s'aparut à luy en forme d'un sien amy, disant: Ou vas-tu mon
 22 amy Isaac? A'quoy Isaac respondit: ie m'en vay sur cette montagne, ou
 22 mon pere m'attend. Garde toy bien, d'y aller, dit le diable, car ton pere
 22 te veut immoler à Dieu, & te faire mourir. A'quoy Isaac replica: En
 22 bonne heure, laissez-le faire, si la volonté de Dieu est telle, qu'elle soit
 22 accomplie, à moy ne tienne. Et soudain le diable se disparut. Mais Isaac
 ayant passé vn peu plus outre, le rencontre de-rechef en forme d'un au-
 tre sien amy, qui luy vfa de semblabes paroles, desquelles Isaac irrité, cō-
 me l'on dit, print vne pierre, & luy ietta contre le visage, avec vn cou-
 roux, & grāde furie. Or depuis pour cette cause le peuple passant au pres
 de ce mur, y iette vne pierre, pour faire despit au diable. Nous trouua-
 mes aussi à l'enuiron de la cité, vingt cinq ou trente miles colombes,
 qu'ils dient être de la race de celle, qui venoit manger dans l'oreille de
 Mahomet: laquelle, pour abuser le peuple, il disoit être le S.esprit.
 Elles volent par toute la terre en grande liberté: car il n'y a homme du
 monde si hardy soit il, qui ose les prendre, toucher, ou chasser de là,
 ou elles auront mis le pied: qui est cause, qu'elles portent grands dom-
 mages en plusieurs lieux, mesmemēt es boutiques, ou l'on vend les bleds,
 & au temple, ou est le marché des espiceries.

Nouvelles.

*Des licornes que l'on trouue à l'enuiron de Mecca. Comme
 l'Auteur fut reconnu à Mecca: & de son retour
 avec la compagnie des Indiens.*

DV côte du temple y a vne grande cour fermée de murailles, ou nous veimes vne licorne, que l'on montroit pour chose admirable, & non sans cause, car l'vne, qui étoyt la plus grāde, auoit la forme d'un poulain de dix huit moys, vne corne au my-lieu du front, & la lāgue de trois brāsées: l'autre, moindre, étoyt de la grādeur d'un poulain d'un an, avec sa corne lōgue enuirō de quatre coudées. Le corps & la couleur de cet animal, est comme d'un cheual grison obscur, ayant la teste comme vn cerf, le col de mediocre longueur, avec peu de cheueux,
 & courts,

Description
de la Licor-
ne.

*Nouvelles
de l'An-
teur, et d'un
More.*

& courts, pendans tous d'un côté, les iambes primes & longues comme vn cheureil, les pieds quelque peu fendus deuant, l'ongle comme vne cheure, chargé de plusieurs poils sur le derriere des iambes, qui le fait montrer fier & superbe, combien que par ce il denote vne grande familiarité aux hommes. Ces deux animaux furent donnés au Soldan de Mecca (pour vn present fort precieux & riche) par vn Roy d'Ethiope, à fin de traiter paix avec luy. On dit en vn cōmun & ancien prouerbe, que la necessité contraint l'homme à montrer ce, qu'il a d'esprit, & vous assure qu'il est vray: car ie l'ay experimenté en moymesme, le cas fortuit m'auenant en la sorte, que ie vous le conteray: De fortune en achetant quelques pierreries pour mon Capitaine, voicy vn More, qui vient à me recognoitre, & en speculant ma physionomie, me demande d'ou i'estois. A' quoy ie luy respondy, que i'étoys More. Il n'est pas vray, dit il. Ie commence à luy dire, ie vous iure par la teste de Mahomet, que ie suis More. L'ors il m'invita d'aller en sa maison, ce que ie fey: là ou étant, il me commence à parler Italien, m'interrogeant d'ou i'étoys: & protestant qu'il cognoissoit bien, que ie n'étoys point More, quoy que ie disse: & que mesme il m'auoit veu tant à Genes, qu'à Venise, & de fait me donnoit telles enseignes, que ie cognoissois bien être vrayes. Me voyant ainsi pressé par ce More, ie luy confessay que i'étoys Romain, mais que ie métoys fait Mammeluchien au Caire. Au moyen de quoy il me fait caresse & honneur, me donnant à entendre par plusieurs signes, qu'il en étoyt fort ioyeux. Or pourautant que i'auoys proposé de passer plus outre, ie m'hazarday à m'informer de luy, des richesses de la ville, & des especeries, qui s'y trouuent en telle, ou plus grande abondance, que le bruit en est espandu par tous païs. Il me dit, pour tout certain, que les especeries ny venoyent en si grande quantité, comme elles souloyēt le temps passé, pourautant que le Roy de Portugal s'étoyt fait Seigneur de toute la mer Oceane, & du golfe tāt Persique, qu'Arabique: & commença à me conter de point en point la cause, pourquoy les marchandises ne venoyent à Mecca, cōme elles auoyent de coutume, sans se prédre garde à ma cautelle: pour laquelle mieux & plus subtilement demener, incontinent qu'il dit que le Roy de Portugal étoyt cause de ce malheur, ie commençay à dire mille maux & méchancetés de luy: de sorte que quand il me veit ainsi enuenimé cōtre les Chrétiens, il me montra encor plus beau semblant, en me descourant tous les secrets de la trafique des marchandises de ce païs. A cause de quoy ie le priay de me donner les moyēs pour me deffaire secretemēt de cette cōpagnie des Mammeluchiés, & me dōner l'adresse de me trāsporter deuers les Roys, qu'il cognoitroit être les plus grās ennemis des Chrétiens. L'ors m'interrogea, que ie sauois faire. Ie luy fey dire, dy-ie, de grosses bombardes & autres picces d'artillerie, & n'en crains homme du monde. Esmeu & ioyeux de tels propos, il commence à dire: Loué soit le grand prophete Mahomet, qui ma
adrefsé

adrefsé tel personnage. De là ce More me print en tel amour, qu'il me retint, & ferra en fa maison, avec fa femme, me priant luy donner le moyen, & faire tant enuers le Capitaine de nôtre compagnie, qu'il luy feist sortir hors de la vile de Mecca, avec ses gés quinze chameaux chargez d'espicerie: ce que fut mis en effet: & par cette pratique il sauua trête faraphes de gabelle, qui venoyent au Soldan. Ce pendant il me muça en fa maison en me montrant les moyens pour madresser à vn Roy demeurant és parties de l'Indie mateur, nommé le Roy de Decan, duquel nous parlerons cy-apres. Or le matin ensuyuant fut faite crie à son de trompe, par tous les quarres de Mecca, que tous Mammeluchiens eussent à vuidier la vile, à peine de perdre la vie. Ce que me donna grand terreur & crainte, voyant qu'il étoyt question de la vie. Sur l'heure ie priay Dieu, qu'il luy pleût par sa diuine puissance me deliurer de ce dangier: me recommandant en outre à la bonne grace de la dame de mon logis, femme de nôtre More. Le mardy donq ensuyuant, la compagnie des Mammeluchiens departit, & mon hoste quand & quand, conduisant les quinze chameaux chargez d'espicerie, me laissant en fa maison avec fa femme: à laquelle il donna charge de me bien traiter, & de me faire conduyre le vendredy suiuant iusques à la carauanne des Indiens, qui s'en alloit à Ziden, port de Mecca, distant de là enuiron quarente miles. Il me seroit impossible de raconter la bonne compagnie & careffe que me feist cette noble dame, outre la bonne grace & courtoysie d'une sienne niece, belle au possible, & ieune de quinze ans: de sorte, que pour le bon contentement que ie receu d'elles, il ne fut en moy mien departir, sans grand regret, dueil & lamétations. Estant donq entré en la compagnie des Indiens le vendredy suiuant, enuiron la my-nuit arriuames en vne petite vile d'Arabie, où nous arrestames iusques à Midy du iour ensuyuant, qui fut le samedi: lequel iour nous cheminames pareillement iusques à la my-nuit, & paruimmes à la cité de Ziden.


De Ziden, port de Mecca, & de la mer rouge.



Ette cité n'est point fermée de murailles, ny de fossés, mais neantmoins braue en maisons bâties à la mode d'Italie, au reste, y a de grandes trafiques, à cause que c'est vn aport de toutes les nations du monde, excepté des Chrétiens & des Iuifs, auxquels est defendu d'y venir, à peine de la vie. Incontinent que i'arriuay là, ie mien allay à la Mosquée, où il y auoit bien vintcinq miles pources, attendans l'adresse de quelque nauire, pour retorner en leurs pais. Le mientremeslay par my eux, me serrant en vn carre du temple, d'ou ie ne bougeay de quatorze iours, incessamment couché cõtre terre, couuert de mes habillemens, me plaignant avec gros souspirs, comme si i'eusse été bien fort malade: vray est, que sur le soir ie me leuois, & sortois dehors, à fin d'acheter quelques viures.

viures. En cela ie iouy si bien mon personnage, que les marchans m'ouyās ainsi lamenter, demandoyent, Qui est celuy, qui se plaint si fort? Mes cōpagnons, qui étoyent pres de moy, respondoyent, C'est vn poure More, qui se meurt, ie vous laisse à penser comment ie me portois, à ne manger qu'vne fois le iour, & encor bien legerement. Les Seigneurs du Caire sont gouverneurs de cette cité, mais pour l'ors en étoyt Seigneur vn frere du Soldan de Mecca : étant toutefois subiets au grand Soldan du Caire: le terroir y est sterile, ne produisant aucun fruit, & y a grande cherté d'eau douce. La mer flote contre les murailles des maisons. Si est-ce, que non obstant la sterilité du terroir, on y trouue de toutes choses necessaires pour la vie de l'homme, qui viennent partie de l'Arabie fertile, partie du Caire, & autres lieux circonuoyés. L'air y est de mauuaise temperature, causant plusieurs maladies aux habitans, qui sont environ nombre de cinq cens maisons. Or apres m'être arresté là par l'espace de quatorze iours, ie conuins avec le Pilot d'une nauire, qui alloit en Perse, qui feit voyle trois iours apres, & nauigeames sur la mer rouge, ainsi appellée, pourautant que le terroir & sablon, qui la soutiennent, sont aucunemēt rouges. Nous ne cessames d'aller iusques à soleil couchant, pourautant que la nuit on n'y peut nauiger, à cause de plusieurs petites Iles & Rochers, que l'on y rencontre en diuers lieux : de sorte, qu'en tout temps, tant calme soit il, il conuient auoir vn homme à la gabie pour preuoir le chemin : ce que ne se peut faire la nuit, mesmement depuis le port, que nous primmes, iusques à l'Ile nommée Chamaran, à la quelle nous arriuames le quatrieme iour : vray est, que passée cette Ile on peut nauiger en assurance, autant la nuit, que le iour.

FIN DV PREMIER LIVRE.



LES VOYAGES DE
LOYS DE BARTHÈME BO-
LOGNOIS, TOUCHANT DE
l'Arabie heureuse, &
de la Perse.

LIURE SECONDE.

Le pourtrait de L'arabie, retiré de la medalle antique d'Adrian, qui est entre
les mains de monsieur le bailly des montagnes.



De la situation de Gezan, & de sa fertilité. Du peuple, nommé Baduin. De Aden, & des coutumes gardées entre les marchans. Comme l'Auteur fut prisonnier, & mené devant le Soldan de Rhada. De l'armée du susdit, & des guerres qu'il eut a'encontre d'un autre Soldan.



PR ES auoir discoursu les lieux, cités, loix, & coutumes des païs de l'Arabie deserte, selon la portée de mon petit esprit, & la commodité qui m'a été donnée pour le voir, me semble maintenant être bien à propos, de racôter par le menu ce que plus heureusemēt nous auons experimenté par le païs de l'Ara

bie heureuse. Nous feimes donq telle diligence , que dans six iours nous paruimmes à Gezan, cité tresriche, ayāt vn tresbeau port, garny pour lors de quarantecinq nauires , venans de diuers païs, étant située au riuage de la mer, souz la puissance d'un Seigneur More, ayant son terroir fort propice à porter fruits en abōdance, & autres choses necessaires pour l'usage des Chrétiēs, cōme, raisins, péches, figues, coucōbres, citrons; limons, oranges, amandres, auelanes, aulx, porreaux, oignons fort gros, & fauoureux à merueille, de chair en abōdance, orge, & millet blanc, qu'ils appellēt Dora, duquel on fait du pain: de sorte , qu'à bon droit l'on peut appeler ce païs, vn vray paradis, à comparaisō de la sterilité de l'autre Arabie. Les habitans vont communément presque tout nuds, viuant à la Moresque. Nous seiournames là par l'espace de trois iours , à fin de faire prouision de viures, puis reprimmes noz erres, nauigeās cinq iours à veüe de terre, que laissons à la main gauche: vray est, que quand nous approchions de quelque vile pres de la marine, nous décédiōns en terre, pour faire prouision de viures : en quoy fumes mal fortunés, d'autāt qu'en presentāt d'argent, on nous saluoit à grās cops de pierres, mesmemēt entre autres, ceux de Baduin, peuple étrange , qui avec vn amas de plus de cent personnes neurent honte de nous assaillir: veu le peu de nombre que nous étions: assauoir seulement quatorze personnes: neantmoins eumes cōbat avec eux enuirō vne heure durāt, avec telle virilité, courage, & faueur de ma Dame la fortune, q̄ vingt quatre de leur côte furent défaits , les autres tous mis en fuyte, tout nuds, & sans armes, exceptés leurs frōdes. Au moyen de quoy nous pillames tout ce que peumes trouuer, comme veaux, moutōs, beufs, gelines, chapons, & autres semblables danrées: lesquelles à peine eumes chargés, que les voicy venir cōme mouches, en fureur, & nombre de plus de six cens hommes, & nous de gagner la barque. Ce iour même nous primmes nôtre chemin du côté d'une Ile nōmée Chamaran, contenāt de circuit dix ou douze miles , ou il y a vne vile qui fait enuiron deux cens feuz, habitée des Mores: ayant à force eau douce, bonne chair, & le meilleur sel, que ie vey onques, ensemble vn port deuers la terre ferme pres de huit miles, estant souz le gouuernement du Soldan de l'Arabie heureuse. Apres auoir là seiourné deux iours, nous reprimmes nôtre chemin, tirās à la bouche & entrée de la mer rouge, ou nous paruimmes dās deux iours: & incontinant qu'y fumes entrés , nous sembla que fussions ferrés dans vne maison, tant est petite cette bouche, contenant seulement de largeur & étendue deux ou trois miles: ayant à la main droite vne vile deshabetée, & sterile, à ce que l'on peut iuger à la voir de loing: à la fenestre vne grande & haute montagne, & au my-lieu vne petite Ile deshabetée, nōmée Babel mendel: mais le droit chemin pour aller à Zeilla, est à la main droite, pour aller à Aden , à la gauche , lequel nous primmes , nauigeans tousiours à veüe de terre, & y arriuames en moins de deux iours & demy. Ceste cité d'Aden est la plus forte , que i'aye iamais veu en campagne,

ceinte

ceinte de grosses murailles, de deux côtés, & d'autre part defendue de deux hautes montagnes, ou il y a cinq braues chateaux: n'étant icelle de trop grande étendue, ains peut faire seulement environ cinq ou six milles feuz: s'i faisant le marché de nuit, pour cause de la grâde chaleur, qui y regne sur le iour: & à vn iet de pierre pres la vile y a vne montagne, sur la quelle il y a vn chateau: & au pied d'icelle, là ou la mer flote, y a vn port, ou arriuent les nauires. Au reste, cette cité est la plus belle, & mieux bâtie de toute l'Arabie heureuse, mesme que c'est le port de toutes les nauires qui viennent des Indes tant maieur, que mineur, de l'Ethiopic, de la Perse: & mesmes celles qui vont à Mecca, viennent là prendre port. Mais tout aussi-toft, qu'vne nauire est arriuée, les commissaires de la doyne du Soldan y acourent, pour fauoir d'ou ils sont, d'ou ils viennent, que c'est qu'ils portent, de puis quel temps ils sont departis de leur terre, combien de personnes sont en chacune nauire: & apres auoir tiré des poures marchans tout ce qu'ils veulent, encor suiuant l'ordonnance du païs, ils pillent les mas, le timon, les voyles, ancres, & en somme, toutes garnitures des nauires, & les emportent dans la cité, iusques à ce qu'ils ayent payé la gabelle au Soldan: & de fait ie vous conteray icy le mal-heur qui m'auint le second iour que i'y arriuay, à l'occasion d'un mien compaignon fort malin, qui m'appela, Chien, fils de chien. Ces paroles entendues par aucuns Mores, ie fu soudain constitué prisonnier, & mis es fers, avec mondit compaignon, de sorte, que fumes tous deux menés au palais du Vicefoldan, d'ou incontinent apres le conseil tenu, fumes condamnés à la mort: pour autant que l'on nous mettoit sus, que nous étions espies des Chrétiens. Toutefois ils eurent égard à ce, que le Soldan de cette terre (qui n'étoit pour lors en la vile) n'auoit iamais fait mourir Chrétien, & nous garderent, attendant sa venue, bien ferrés, par l'espace de soiffantecinq iours, avec des lourds fers es pieds, pesans quarantetrois liures. Le troisieme iour de nôtre emprisonnement, cinquante ou soiffante hommes Mores (qui étoient de deux ou trois galeres prises vn peu au parauant par les Portugués) lesquels s'étoient sauués à la nage, vindrent à grande course au palais, avec armes au poing, à fin de nous défaire, protestans contre nous qu'étions espies des Portugués: mais Dieu voulut que le Geolier ferra la porte de derriere sur nous: ce que causa vn grand trouble & emotion entre le commun peuple, les vns mettens en auât, que nous deuions mourir, les autres, que nô: en fin, le Vicefoldan pour toute conclusion arresta, que fussions deliurés. En quoy la fortune nous dit si mal, que soiffantecinq iours apres cette sentence, voicy venir letres patentes du Soldan, par lesquelles il commandoit que liés & garotés nous fussions menés deuant sa Maiesté. Pour donq executer ce commandement, nous fumes tous deux chargés sur vn chameau, & dans huit iours présentés à luy, étant pour l'ors en vne vile nommée Rhada, ou il faisoit sa montre de trente mil hommes, pour aller liurer la bataille

*L'Auteur
est fait pri-
sonnier, en
danger de
perdre la
vie.*

*L'Auteur,
prisonnier,
est présenté
au Soldan,
& défend
sa cause.*

à vn autre Soldan, Seigneur d'une vile appelée Sana, distante de Rhada enuiron trois iournées, située partie sur vne montagne, & partie en la plaine, riche, belle, antique, & fort peuplée. Estant donq présenté au Soldan, il m'interrogea de toute ma vie, me demandant d'ou i'etoys, & que ie faisoys courant par les pais. A'quoy ie fey responce, Seigneur, ie suis de nation Romaine, mais depuis fait Mammeluchien au Caire: en apres m'en allay à Medine, ou est la sepulture de Nabi, le grand Prophete en terre: depuis suis venu à Mecca, & de là icy, expressement pour voyr vôte Seigneurie, autant magnifique & superbe, que renommée par tout l'vniuers, outre vôte sainteté tant celebrée par toute la Surie, & es pais & terres de Mecca: quant au reste, ie suis bon More, & vôte esclau: & d'autant Seigneur, que vous êtes saint hōme, & que pour tel ie vous tiens, vous poués bien cognoitre que ie ne suis point espie, comme l'on m'en accuse deuant vôte sainte Maiesté. Lors me dit le Soldan, Dis donq, la Ilache Illach Muchemmedun reful' allach. Qu'est à dire en leur iargon & maniere de parler, Il n'est Dieu, si non le Dieu. Mahomet est messenger de Dieu. Ces paroles-cy donnent à entendre que celuy qui les prononce, est More. Mais ie ne les peu onques prononcer, ou (comme ie pense) pource qu'il ne plaisoit pas à Dieu, ou bien d'autāt que i'etoys espris d'une grande crainte. Qui fut cause, que le Soldan commāda que ie fusse ramené es prisons de son chateau, & là gardé par commissaires tout expres à ce deputés, ou ie fu étroitement reserré par l'espace de trois moys, sans iamais voyr l'air, & traité de mesme, assauoir d'un pain de millet du matin, & vn du soir, qui étoyēt tels, que cinq ou six neussent étés suffisans pour faire vn bon repas: mais i'eusse été plus content, si on m'eust fait ce bien de me donner au moins à boyre mon saoul d'eau. Deux iours apres que ces menées furent faites, le Soldan s'en alla voir son camp, qui étoit deuant la cité de Sana: auquel y auoit entre tous autres, quatre miles cheualiers tous fils de Chrétiens, noirs cōme Mores, natifs de la terre de Prete-Ian, achetés des l'âge de dix ou douze ans, & depuis tousiours exercités aux armes, etans ceux-cy de la garde dudit Seigneur, gens braues, & plus redoutés que tous les autres de son armée, d'autāt que ceux-là étoyēt tout-nuds, excepté vn méchant demy linceul, qu'ils portēt sur leur doz, en lieu d'une cape, ou manteau: & quand il est question de liurer la bataille, leurs armes sont certaines rōdelles faites de deux peaux de vache, ou de beuf, tellement chargées de couleurs, & peintures, qu'à les voir de loin, elles semblēt quelque chose bien riche, ayans au dedās trois ou quatre petis batons, qui les tiennent roides le mäche pour les tenir à la main, & fait d'une piece de boys, attachées avec deux clous, au reste, autāt grandes, que le fond d'une bote. Ils portent aussi vn dard à la main, avec vne espée large & courte, ensemble vn acoutrement de toyle rouge ou de quelque autre couleur, barrée de plusieurs lambeaux copés menus, voylà leurs armes, pour se defendre des mouches, & de tous leurs ennemis,

*Acoutre-
mēt des Mo
res quād ils
vculent li-
urer la ba-
taille,*

Vray est, qu'ils vsent tous de frondes à ietter pierres, les portās entortillées en leurs testtes, & en chacun des bouts vne petite broche liée pour se net-



toyer les dens. Tous ieunes depuis quarante ou cinquante ans en desouz, portent deux cornes sur leurs testtes, faites de leurs propres cheueux, de sorte, qu'il semblent des cheureils: & quant à l'armée du Soldan, il a tousiours cinq miles chameaux ou enuiron, chargés de paillions, faits de cotton, & les cordes de mesme.

*Comment la Royne, femme du Soldan, fut rauie de l'amour de
l'Auteur, feignant être fol. Et de ses auentures. Des paro-
les qu'il eut avec la Royne, & comme il fut deliuré
de prison, avec puissance d'aller
par la cité d'Aden.*



V palais, ou nous étions prisonniers, la Royne (l'une des trois femmes du Soldan) faisoit résidence, acompagnée de douze ou treize damoyelles fort belles, combien qu'elles fussent de couleur noire. Cette Royne vſa d'une grande careſſe & humanité en nôtre endroit, nous faiſant ouurir la maiſon, nous permettant ſortir dehors, avec touteſoys les fers es pieds, & ſouz la conduite des cômiffaires deputés à nous garder. Or donq moy, mon compagnon, & vn More prisonnier enſemble, nous voyans ainſi vn peu elargis, deliberames chercher les moyens de venir en pleine liberté, & pour ce faire, fut arreſté que l'un de nous contreferoit le fol, faiſans vn ſort pour voir ſur qui il tomberoit: lequel tomba de fortune ſur moy: & pour bien executer mon deſſein, il me conuint garder les ceremonies, contenances, & geſtes dun fol, en quoy ie trauaillay tant, qu'au bout des trois premiers iours de mes badinages, ie me trouuay plus que ne fey onques, pourautant que continuellement i'auoys à l'entour de moy cinquante ou ſoiſſante garçons, qui me rôpoient les oreilles, avec leurs cris, fol, fol, en me iettât des pierres, & moy de me defendre, les ſaluant de meſme, & pour mieux iouer mon perſonnage, ie remply le deuant de ma chemiſe de pierres, les ruant contre eux, eux contre moy, crians touſiours apres moy, fol, fol, & moy de preter l'oreille à ce nom: de ſorte que uſſiés dit à me voir, que i'étoys naturellement fol. Ce pendant la Royne, acompagnée de ſes Damoyelles, demeura depuis le matin iuſques au ſoir à la fenestre, me regardant, & me parlant: laquelle me voyant en ce train mis & expoſé à la riſée & moquerie de tout le monde, pour encor mieux faire foy de ma folie, ie depouillay ma chemiſe, & couru tout nud deuant la Royne: qui y prenoit ſi grand plaisir, que quand elle me parloit, elle ne permettoit que ie me detournaffe de ſa veüe, en me traitant fort bien de toutes bonnes viandes, de ſorte, que ie triomphois en menant cette vie: meſme que cette Royne me voyant ainſi perſequuté de cette canaille d'enfans, elle me diſoit, frape, frape deſus hardiment, à peine d'entuer quelcun, ton pardon eſt tout preſt. Il auint qu'il y auoit vn mouton en la cour du Soldan, avec vne queüe peſant quatorze liures: ie prins ce mouton, & luy parlay en cette ſorte: Es tu Chreſtien ou More? Dy moy, parle moy, es tu Chréſtien, ou More? Iuiſ, ou Mammeluchien? Dy moy qui es tu? d'ou es tu? Apres luy auoir par pluſieurs fois repliqué ces propos, ie luy diſ, fais toy More. Dy apres moy ces paroles, La Illache Ill' allach Muchem medum reſul' allach. Ie fey à ce poure mouton, patient comme porte
la nature

*L'Auteur
contrefait
le fol.*

la nature de cette beste, miles maux, iusques à prendre vn baton & luy rompre les quatre iambes, pourautant que ie voyois la Royne prendre plaisir à tous mes ieux. Qui fut cause, que trois iours apres on me donna à manger de sa chair, qui étoit la meilleure, que ie mangey onques. Trois iours apres ie traitay de mesme vn asne, qui portoit leau au palais, pource qu'il ne se vouloit faire More. I'en fey autant d'un Iuif, auquel ie donnay plusieurs cops, & entre autre vn, que ie pensois lauoir assommé, toutefois il n'en morut pas. Mais vn iour auint, que pensant faire comme de coutume, & vser tousiours de ma liberté, ie rencontray vn, de ceux, qui nous auoyent en garde, qui étoit plus fol, que moy, & m'appella Chien Chrétien, fils de Chrétien: ie luy iettay quelque pierre: mais il m'en rua vne contre l'estomac, qui métonna en telle sorte, que i'en tombey par terre: & d'autant que ie ne pouuois le fuiure, ayant les fers es pieds, ie me retiray en la prison, quoy faisant, auant que ieusse gaigné la porte, il me frapa de rechef contre le côté, encor plus lourdement que la premiere fois: & ainsi pourement acoutré, me ferray dans la prison, avec mes pierres, fermant les portes apres moy: ou ie demeuray deux iours sans boyre ny manger, ny sans vouloir ouvrir les portes: de sorte, que la Royne & tous ceux de sa Cour tenans pour seur que i'étois mort, feirent rompre les portes: & ces canailles de m'apporter de pieces de marbre blanc, disans, Mange. Mange, c'est sucre, & les autres, de grains de raisins pleins de terre, disans, que c'étoit de sel, & moy de manger le marbre, le raisins, & autres choses ensemble. Ce iour mesme quelques marchans feirent venir deux hommes saints & réputés entre eux, comme seroyent deux hermites, austeres & demeurans aux montagnes, auxquels étant présenté, les marchans feignans me vouloir acheter, leur demandoyent si i'étois sain, ou fol. A quoy l'un d'eux respondit, il me semble, qu'il est sain, l'autre, ie ne say qu'en dire, mais il me semble qu'il n'est pas trop fol. L'un me interrogeoit d'un côté, l'autre me demandoit miles raisons, l'un disoit d'un, l'autre ie ne say quoy, de sorte, qu'ils demurerent long temps aupres de moy, me tentans & rompans la teste avec leurs interrogats: & encor ne fusse ie fortly d'entre leurs mains, si ie n'eusse leué le deuant de ma chemise, & pissé sur eux: car alors ils commencerent à me laisser en paix, & s'enfuyr en criant. Il est fol, Il est fol, pour certain il n'est pas sain, Il est naturellement fol. La Royne & ses Damoyelles tousiours aux fenestres, ne se pouuoient saouler de rire, iurans par leur grand Dieu, & la teste de Mahommet, que i'étois le meilleur homme du monde. Auint, que le matin ensuiuant ie vins à la cour, & trouuay dormét mon galand, qui m'auoit si lourdemét frappe avec deux grands cops de pierres, & moy de l'empoigner par les deux cornes de ses cheueux, le commençant à tripiller avec les pieds, & luy tabuter l'estomac, en le chargeant de beaux cops de poing sur le museau, sur le nez, & sur les oreilles, si brauement avec ma follie, que le sang en sortoit de tous

côtés. La Royne voyant cela des fenestres, s'écrioit Frappe, Frappe, assomme cette bête, tue ce forfant, ce méchant, & ainsi acoutré de toute mode le laiffay là, iufques à ce que à mon depart, ie ne fay qu'il deuint. Le gouuerneur de la cité fut aduertty que mes deux compagnons auoyent fait vn trou en la muraille de la prison, & s'étoyēt déferrés pour s'en fuir secretement, & moy non. Au moyen de quoy ils furent referrés plus étroitement que de coutume : mais moy, qui n'auois attenté telle chose, voyant aussi que la Royne prenoit plaisir à mes yeux, ne me voulu aucunement molester, que premier elle ne m'eust parlé: & de fait, me fait conduire en vne chambre basse du palais, (toutefois tousiours les fers es pieds) ou il étoit impossible trouuer ouuerture pour sortir: mais la nuit ensuiuant la Royne acompagnée de cinq ou six Damoiselles me vint là trouuer, me commençant à interroger, & moy de luy répondre, luy donnant à entendre par le menu, que ie n'étois fol, cōme l'on me reputoit. Elle, qui étoit femme prudente, cogneut incontinent que i'étois sage homme, me commençant à entretenir avec grandes careffes, commandent m'apréter vn bon lit à leur mode, me bien traiter, & le lendemain ensuiuant de me faire vn bain avec bonnes herbes, & parfuns selon la coutume du país. Après auoir continué ces careffes par l'espace de douze iours entiers, elle commença à descendre en ma chambre tous les soirs, enuiron les trois ou quatre heures de nuit, me faisant apporter tousiours à manger quelque chose de bon, en m'vnt de telles paroles, Loys vien-ça : as tu faim? Le luy respondi Ouy, pour la faim, qui est à venir: & me leuant tout droit, allay vers elle en chemise, faisant tousiours quelques mines. Elle de me dire, Non non, ne vien pas ainsi, oste ta chemise: & moy de luy répondre, O ma Dame, ie ne suis maintenant fol. Le le fay bien, me dit elle, en se iouant: Par Dieu, tu es le plus sage homme, que ie vey iamais. Et sur l'heure pour la contenter, ie depouille ma chemise, la mettant par honesteté deuant mon estomac. Elle de me faire tenir long temps tout droit deuant ses yeux, & me contempler tout ainsi que si i'eusse été quelque nymphe, faisant vne grande lamentation à Dieu en cette sorte. O Dieu, qui as fait cet homme blanc comme le Soleil, & créé mon mary noir, mon fils noir, & moy encor noir, ie voudrois, mon Dieu, que cettuy-cy fût mon mary: Je voudrois qu'il te pleût me faire tant de grace de me donner vn fils aussi blanc que cettuy-cy. Ces paroles étoient acompagnées de grans pleurs, regrets, & gemissemēs, en maniant tout mon corps, & me promettant que incontinent le Roy venu, ie serois déferré. La seconde nuit ensuiuant, elle retourne vers moy, m'aportant à force viures, acompagnée seulement de deux de ses plus secretes Damoiselles, avec tels propos: viença Loys, veux tu que ie vienne icy vn peu demeurer avec toy? A quoy ie respond, Helas, Ma Dame, non: Il me suffit d'auoir les pieds es fers, sans que l'on me tranche la teste. Elle piquée de ces paroles, me replique, Loys, n'aye peur de ce cop, ie

tén respond sur ma vie. Que si tu ne te contente de ma personne, ie t'en-
 uoiray Gazella, ou Tegia, ou biē Calcerana, (les Damoyelles) mufant de
 ces propos, pour sentir de moy, celle que mieux ieusse aymé, à fin de ve-
 nir elle mesme en sa place. Mais considerant le danger, & grand scan-
 dale, qui en pouuoit auenir, ie fey tousiours refus, qui luy causa accrois-
 sement de ses douleurs & passions, si ardentes, qu'elle ne les pouuoit ce-
 ler, de sorte, qu'elle me promit, (apres auoir receu son cōtēmēt de moy)
 or, argent, cheuaux, & compagnie de dix ou douze esclaves Noirs, pour
 sortir en seurté du pais, mais pourautant que le bruit de moy, étoit par
 toute l'Arabie épandu, si ieusse étéve fois fugitif, ie me pouuois assurez,
 ou de la mort, ou de prison à iamais avec les fers es pieds, ie ne voulu ia-
 mais consentir à ses requestes: ains craignāt de perdre l'ame avec le corps,
 ne cessay toute la nuit de plorer, me recommandant par affection à la
 grace de Dieu. Entre ces menées suruint le Soldan, venant des champs: &
 soudain elle me mande, que si ie voulois demeurer avec elle, qu'elle me
 chargeroit de richesses. A quoy, pour toute resolution, ie respondi, quel-
 le me feît premierement ietter hors des fers, & que puis apres ie feroy
 tout ce que bon luy sembleroit, accomplissant la promesse qu'elle auoit
 fait à Dieu, & à Mahomet: laquelle quelques iours apres trouua les
 moyens de me faire presenter deuant le Soldan à certaine heure, qu'elle
 s'y trouueroit. Le Soldan me demanda, ou ie pretendois aller, étant deli-
 uré de ces fers. A quoy ie luy respondi. O Seigneur ie n'ay ny pere ny
 mere, frere ny seur, femme ny enfans, ny personne qui m'ayde, si ce n'est
 Dieu, le prophete, & ta Seigneurie. Que s'il te plait me faire donner à
 manger, ie veux demeurer ton esclave toute ma vie: étans ces paroles
 acompagnées de souspirs, & lamentions, la Royne là presente, prend la
 querelle pour moy, s'adressant au Soldan avec tels propos. Que veux
 tu faire de ce poure homme, qui sans iuste cause des si long temps a de-
 meuré en tes prisons les fers es pieds? Tu en rendras conte deuant Dieu:
 donne toy garde d'encourir son indignation. Le Soldan esmeu de ces
 remonstrances, me commence à dire, Va, ou tu voudras: ie te donne
 liberté. Et tout soudain me fait ôter les fers des pieds. Et moy de me
 ietter à genoils, luy baissant les mains, & à la Royne aussi: laquelle me
 prenant par la main, me dit, Vien poure homme, vien avec moy.
 le suis assurée que tu es en extreme necessité de boire & de man-
 ger. Vien seulement, vien en assurance, vien avec moy, ce que ie
 fey: & incontinent que fu entré en sa chambre, elle me commence
 à embrasser & baïser à bon escient, commandant m'apporter de plusieurs
 viandes fort friandes & delicates: mais quelques mines qu'elle feît, ie
 n'osay iamais me fier en elle, n'ayant appetit de boyre ny manger, pour-
 autant que ie l'auois veu tenir quelques propos en secret avec le Soldan:
 de sorte, que ie luy dy, Ma Dame, ie ne pourrois boyre ny manger
 que premierement ie ne me voye restitué en ma plaine liberté. Tays
 toy,

*L'Auteur
 presenté de-
 uant le Sol-
 dan, luy fait
 harangue.*

toy fol, dit elle : Tu ne fays que Dieu te garde: foyes feule-
 de bien: le te feray des plus auant de ma Cour: Laisse moy faire feule-
 ment. l'entendois bien quelle vouloit dire par ces propos. Pour ce luy re-
 spondy-ie, Ma Dame, Laisés moy, ie vous prie, vn peu reuenir, & recou-
 urer mes forces, que la poureté, les malheurs, la prison, & la faim m'ont
 oté. Vrayement, dit elle, tu as raison. Sur l'heure mesme me promit, de
 me donner tous les iours des œufs frais, poulailles, pigeons, poyure, ca-
 nelle, girofle, nois muscade, & autres viandes semblables, à fin de me
 restaurer. A quoy elle ne fait faute, me traitant ainsi mignonement
 dans son palais par l'espace de vingtdeux iours : lesquels expirés, elle
 minuita à aller à la chasse avec foy, ce que ie fey: mais au retour ie
 contrefey le malade pour auoir trop couru apres le cerf, & demeuray
 en cette fiction plus de huit iours, pendans lesquels elle ne failloit de
 me faire visiter par ses plus secrets messagers. Me voyant donq tant fa-
 uorit de cette Royne, ie me hazardy vn iour de luy faire entendre,
 comme i'auois fait vn veu à Dieu & à Mahomet, d'aller visiter vn saint
 homme, qui étoit en la cité d'Aden, faisant (comme l'on disoit) mi-
 racle, pour cause de sa sainte vie & conuersation: ce que moy mesme con-
 firmois être ainsi, à fin d'impetrer plus aisément ma requeste: à laquel-
 le elle ne fait refus: ains commanda me deliurer vn chameau & cin-
 quante saraphes d'or pour executer ce mien voyage: que ie commen-
 çay des le iour ensuiuant, faisant tant par mes diligences, que dedans
 huit iours i'arriuy à Aden, ou ie trouuay mon saint homme, que le
 peuple auoit en grand estime, pourautant qu'il viuoit en poureté &
 chasteté comme vn vray hermite: combien que en ce pais-là l'on en y
 trouue asses, qui menent vne vie fort austere: mais tout cela ne leur sert
 en rien, d'autant qu'ils ne reçoient ny le Batefme, ny l'Euangile, ne vou-
 lans aucunement croire au vray fils de Dieu, ioint aussi que plusieurs le
 font ou par vne ambition d'honneur mondain, ou bien pour viure
 sans rien faire. Apres auoir fait mon oraison, le second iour ie fei-
 gny être guery par la vertu de ce saint homme, faisant écrire à la
 Royne, comme par la vertu de Dieu, & de ce saint homme i'auois
 recouré ma santé: & puis que Dieu mauoit fait tant de grace, que
 mon intention étoit de discourir tous les pais de son Royaume. Je
 faisoy cette feintise, pourautant que l'armée du Roy tenoit presque
 tout ce pais, & n'en deuoit partir de long temps - apres. Je

madressay donq à vn Capitaine d'une nauire, luy promet-
 tant le guerdonner d'un beau present, s'il me vouloit
 conduire en Indie. A quoy il me respondit,
 que premierement que passer en Indie
 il deuoit aller à Perse, dont
 ie fus pareillement
 fort content.

*De Lagi , cité d'Arabie heureuse : De Hiaz, & du
marché d'icelle. De Dante chateau. De Alma-
charana. De Reame, De Sana, De Taesa,
Zibit, & Damar, cités d'Arabie.*



LE iour ensuiuant ie montay sur mon chameau, & ayant cheuauché enuiron quinze miles, iàrriuay à Lagi, cité assise en vne plaine, sans qu'on y trouue aucune montagne à l'entour, bien peuplée, riche en datiles (qui y croissent) en chair, & bled, selon nostre usage : mais le bois y est fort cher, & ne s'y trouue point de raisins. étans les habitans de là, Arabes, gens rustiques, & pures au possible. Au partir de là, ie vins à Hiaz, cité distante de cette-cy enuiron vne iournée, située entre deux petites montagnes, ayans entre my vne vallée merveilleusement fertile, arrosée d'une belle fontaine : ou se tient le marché de ce peuple habitant es deux montagnes : mais on ne voit gueres passer iour de marché, qu'il n'y ait grand noise & debat, à cause de ceux de la montagne du côté de Tramontane qui veulent que les habitans de la montagne du Midy, croyent avec eux en Mahomet, & en tous ses compagnons : qui quant à Mahomet, y acorde, mais quant à ses compagnons, non, excepté Haly, disans que les autres sont faux. Et de cette variété d'opinions se meuent grandes querelles entr'eux, iusques à se combattre, & tuer comme de bestes. Ie vey en ce marché vne grande quantité de toutes sortes d'espices, tant grosses, que menues, ensemble à force parfums & senteurs, draps de cotton, & de soye, fruits bons en toute perfection, comme perses, pommes de grenades, coings, figues, amandres, & sur tout, de fort bons raisins : & ne faut obmettre, que sur chacune de ces deux montagnes, y a vn fort & puissant chateau. Apres auoir veu toutes ces choses, ie m'en allay à Dante, cité distante de cette-cy enuiron deux iournées, qui est aussi eleuée à la cime d'une haute & grande montagne, habitée des Arabes, gens presque tous pures, pour autant que ce terroir est fort sterile : & suiuant nostre entreprise, & desir de venir à la cognoissance des choses nouvelles, au partir de Dante, apres auoir cheuauché deux iournées, iàrriuay à Almacharana, cité assise au plus haut d'une montagne, ayant sept miles de montée, avec vn chemin si difficile & étroit, qu'on n'y pouuoit passer que deux personnes de front : & au plus haut de cette montagne y a vne plaine fort belle, bonne, fertile & abondante en tous biens, mesmement pour recueillir tout ce, qui est necessaire pour la vie des habitans : outre ce, qu'ils sont bien fortunez à auoir bonne eau, & vne citerne pour en fournir tant qu'en pourroyent boire cent miles personnes. La cité est ceinte de si fortes murailles, que le Soldan y tient son tresor, tant gros & riche, que cent chameaux ne le pourroyent porter : ioint aussi, que sa natiuité & origine est de là, y tenant ordinairement l'une de ses femmes : outre ce, que le terroir y est si heureux & fertile, qu'il produit de toutes sortes de fruits, que l'on sauroit desirer, mesme que

me que l'air est fort temperé, les gens tenans plus de blanc, que d'autre couleur. Je passay là mon temps pour quelques iours, puis m'en allay à Reame, (qui n'en est loing, que d'une iournée) cité riche quant aux viures, hors mis de bois, peuplé de gens Noirs, menans grand train de marchandise: ayant d'un côté vne montagne, & au sommet vn chateau, ou l'on nourrist des moutons, qui n'ont point de cornes, mais s'en trouuent tels, qui on la queue pesante quarante quatre liures, de si haute gresse, qu'ils ne peuuent cheminer. Il s'y trouue aussi de raisins blancs, bons en toute perfection, n'ayans point de pepin au dedans: & outre ce, on y trouue de toute sorte de bons fruits en abondance, avec ce, que l'air y est le meilleur que l'on pourroit souhaiter pour viure long temps: de sorte, que ie parlay à aucuns, qui se disoyent auoir cent & vingt-cinq ans, les autres cent & trente, neantmoins iolis & alaires vieillards. L'habit des gens d'estat, est vne seule chemise: ceux de basse condition, portent vn petit linge, pour leur couvrir le col, à la mode apostolique, allans toutefois la plus part tous nuds par l'Arabie: les hommes aussi portans sur la teste des cornes faites de leurs cheveux mesmes: mais les femmes portent de haut de chausses avec la brayette, à la mode des mariniers. Suiuans mes terres, ie parvins à Sana, cité tres forte, assise au plus haut d'une montagne: qui fut vne fois assiegée par le Soldan (acompanyé de huitante mille hommes) par l'espace de huit mois, aux fins de la prendre, mais il n'y peut iamais auenir, sinon par apointement: car elle est merueilleusement forte, enuironnée de murailles, contenant dix brasses de hauteur, & de largeur vingt: de sorte, que huit chevaux y peuuent cheminer de front. Cette cité est autant abondante en fruits, comme nôtre pais riche en fontaines, qui luy cause vn beau lieu desbat: au moyen de quoy le Soldan y fait sa demeure: lequel a quatorze fils, dont l'un, nommé Mahomet, est si cruel, qu'il tue les gens, puis use de leur chair iusques à s'enfouler: homme puissant, & de quatre brasses de hauteur, proportionné à l'equipolent, noir de couleur, exceptés les dents & les yeux. Ce terroir a quelque peu de menues especes, vignes, prez, iardins en abondance. On y peut nombrer quatre miles feuz, les maisons y étans bâties comme celles de ce pais. Depuis ie prins le chemin pour venir à Taësa, distante de Sana enuiron trois iournées, située aussi à la cime d'une montagne, belle, riche, en toute gentillesse, mesme en eau rose distillée, fort antique, anoblée d'un temple fait à la mode de celui de S. Marie ronde, étant à Rome, avec plusieurs autres palais tresantiques, esquels habitent vn grand nombre de marchans Noirs. Au partir de là, ie m'en vins à Zibit, distante de Taësa enuiron trois iournées, cité prochaine de la mer rouge, enuiron demye iournée, qui luy cause vne grande trafique, mesmement de sucres fins, & autres bons fruits, au reste située entre deux montagnes, qui luy seruent de murailles, l'enuironnans tout au tour. Les especes,

& autres

& autres fenteurs de toutes sortes abordent premierement en cette cité: puis se distribuent par tout l'vniuers. Les habitans n'usent d'autre sorte d'habis, que ceux desvilles susdites. Apres auoir seiourné là quelque temps ie me transportay à Damar, cité lointaine de Zibit, enuiron vne *Damar.* journée, habitée des Mores, menans vn grand train de marchandise, avec vne maniere de viures comme les autres susdits.

Du Soldan, & pour quoy l'on l'appelle Sechamir. Des chats sauvages, marmots, Lyons, & autres bestes ennemies de l'homme. De la fortune marine. De Zeila, cité d'Ethiopie. De l'ile Barbe, & de son peuple.



TOVTES ces cités susdites sont subiettes au Soldan de l'Arabie heureuse, nommée Sechamir: car ce mot Sech, veut à dire, Saint, & Amir, Seigneur: étant dit saint, pourautant qu'il ne fait iamais mourir personne, sinon en fait de guerre: de sorte, que si quelcun de ses subiets auoit merité la mort, il le tenoit es fers iusques à ce qu'il morût de sa mort naturelle, luy commandant être deliuré tous les iours deux quatrins pour se nourrir: lequel i'ay veu de mon temps auoir plus de quinze miles prisonniers: desquels n'en fait iamais mourir vn seul, ains plutôt leur donnoit argent pour viure: mesmement qu'il tient en sa Cour plus de soixante miles esclaves tant hommes, que femmes, à ses propres frais & despens. De là reprenans noz erres du côté de la cité d'Aden, à l'intention de passer outre, & decouurer choses incognues, apres auoir cheminé enuiron cinq journées, trouuames à la moitie de nôtre chemin vne haute & horrible montagne, pleine d'un nombre infiny de singes, chats sauvages, marmots, courans ça & là, sans rien s'espouuanter de nous, encor que fussions en grande cōpagnie, ensemble de Lyons d'un ideux & horrible regard: qui fut cause, que ie retournay en arriere attendant renfort de compagnie: laquelle en peu d'heure suruint, de sorte, que nous trouuames en troupe, enuiron cent hommes, les vns garnis d'arcs, & d'ardes, les autres de frondes, ainsi bien equipés, nous meimes en defense contre ces animaux, desquels en tuames assez grande quantité, mettans les autres en fuite, nous faisans passage par ce moyen. Incontinent qu'arriuay à Aden, ie me retiray au temple, avec les pources, feignant être malade: & la nuit m'en allay secrettemēt vers le patron de la nauire pour acorder avec luy, qui me promit de me receuoir. Ainsi donq avec deliberation de passer outre à fin de rechercher, & voir autres païs, nous feimes voiles, mais la fortune, dame inconstante, acoutumée de montrer sa varieté principalement sur leau, nous empescha de venir soudain à chef de nôtre entreprinse: pourautant qu'apres auoir nauigé sept iours vers la Perse, suruint vne tempeste marine, qui nous ietta iusques en Ethiopie, avec toutes les autres naus de nôtre compagnie, chargées de scarlate pour teindre les draps:

Sechamir, que signifie.

Humanité, & liberalité du Soldā Sechamir, enuers les prisonniers & esclaves.

Zeila.

qui croît en l'Arabie heureuse : de laquelle s'en leue tous les ans en Aden vingt cinq grandes nauires chargées. Nous prîmes port à Zeila, avec grand' peine, y demeurans par l'espace de cinq iours, tant à fin de voir, que pour attendre vn temps plus commode. Cette cité est assise sur terre seche, & ferme, ceinte de basses & foibles murailles, mais tresopulente, à cause de la trafique de plusieurs marchandises, côme d'or, dens d'Elephans, esclaves, mesmement de ceux, que l'on y ameine de la terre de Prete-ian, que les Mores conquestent en guerre, de là les conduisant en Perse, en Arabie, à Mecca, au Caire, ou aux Indes, les viures y sont aussi à bon marché, tant pour raison de la iustice, & police, qui y regnēt, que pour la grande abondance de toutes choses necessaires à la vie de l'homme, côme grains, huyle, miel, cyre, chair, mesme de moutons, qui s'y trouuent merueilleusement beaux, & tels, que leur queüe pese vingt cinq ou vingt six liures, ayant le col, & la teste tous noirs, du reste tout blanc, combien qu'il y en ait de tout blancs, avec la queüe longue d'une brasses, retorte tout ainsi que la seppe d'une vigne, la peau du gosier pendant en bas pardeuant, comme les bœufs, presque iusques à terre. D'auantage on y trouue en grande quantité de deux sortes de vaches, les vnes sauuages, ayans les cornes non plus ny moins qu'un cerf : les autres avec vne seule corne au front, de la longueur d'un grand pied & demy : mais cette corne se iette plus sur son échine, que sur le deuant. Le Roy de Zeila, est More, ayant en sa Cour vn grand nombre de gens, tous Mahometans, de couleur tannée, fort belliqueux tant à pied, qu'à cheual, combien qu'ils soyent legerement armés. Incontinent que nous eumes le vent en poupe nous feimes voile, nauigeans iusques à l'Isle Barbe, laquelle est gouvernée par vn Seigneur More, & habitée aussi par de Mores, étant de petite étendue, mais bonne & riche, principalement en bétail : qui cause, que l'on y trouue tousiours à force viures, & à bon marché, comme nous auons sceu, y demeurans seulement vn iour, & de là tirans en Perse,

*Vaches sau-
uages, &
d'étrange
sorte.*

*L'Isle Bar-
be.*

De la Perse.

De Diuoban de Rumi, De Goa, Guilfar & Meschet ports de la Perse. De Ormus, Ile, ou l'on pesche les perles. Du Soldan & de la cruauté de son fils aisné.



A P R E S qu'eumes nauigé enuiron l'espace de douze iours, nous arriuames en vne cité nommée Diuoban de Rumi, cet à dire, Port des Turcs, peu distante de terre ferme, couuerte d'eau, quand la mer croît, mais quand elle est basse, on y peut aller à pied sec, ceinte de bonnes murailles, & au dedans bien munie d'artillerie, riche en trafique de marchandise, de sorte, que quatre cens marchans Turcs y font continuellement leur residence : au reste, subiette au Soldan de Cambaia, y tenant pour le iourd-huy vn Capitaine appellé Menacheas. Les habitans vsent de certaines nauires, qu'ils

qu'ils nomment Thalac, qui sont presque d'une mesme grandeur, que les fustes de ce païs. Nous y arrestames par l'espace de deux iours pour contempler son assiette, beauté, richesses, & trafiques, de là venans en vne vile nommée Goa, distante trois iournées de la susdite, riche à cause qu'il s'y meine vn grand train de marchandises, entre les étrangers, & les habitans, qui sont tous Turcs & Mahomettans. Au partir de là vimmes à Giulfar, vile tresbonne, & abondante en tous fruits, enrichie d'un gros port de mer: duquel nous partimes ayant le vent en poupe, tirans à vn autre port appellé Meschet, ou nous feimes quelque seiour: puis nous en allames à la noble cité d'Ormus, qui est vne Ile tresbelle, principale, soit par terre, soit par mer, en trafique de toutes riches marchandises, & intaigne de terre ferme enuiron dix ou douze miles: au moyen de quoy ne s'y trouuent ny eau, ny viures à suffisance pour nourrir les habitans: mais il y en vient en abondance des autres païs circonuoisins assis en terre ferme. A trois iournées pres de cette Ile, ou enuiron, on pesche des perles, les plus belles, & plus grosses qui se trouuēt par tout l'vniuers, en cette sorte: Les pescheurs ont de petites barquettes, pour lesquelles arrester ils iettent vne grosse pierre liée avec trois cordes, vne du côté de la poupe, & vne du côté du deuant de la nauire; & lautre au my-lieu de la barquette: puis l'un d'eux pend à son col deux bissacs, s'attachant es pieds vne grosse pierre, & descend le long de la corde du my-lieu, iusques au profond de l'eau quatorze au quinze brasses, ou il demeure le plus qu'il peut, cherchant les petites cauernes, ou les perles se tiennēt: desquelles il emplist les bissacs, puis laschāt la pierre de ses pieds, il remōte par l'vne de ces cordes, & ainsi consequemment font les autres, de sorte, que vous y verriez plus de trois cens nacelles venues de diuers païs pour cet effet. Le Soldan de la cité, est Mahomettan: qui pour l'ors que i'y étoy, auoit onze fils mâles: dont le plus ieune d'eux étoit tenu pour simple, & quasi demy fol, mais au contraire son frere laïsné pour vn diable dechainé, comme vous donneray à entendre par le menu. Le Soldan donq auoit nourry deux esclaves dès leurs ieune aage, étans du païs de Prete-Ian: qui s'andonnans aux armes deuidrent preux & vaillans cheualiers, prenans tel credit enuers leurs Seigneurs, qu'il leur donna certains chateaux: de quoy étant fort piqué le fils aïsné, cercha les moyens de se venger de cette iniure, tellement que pour vne nuit il creua les yeux à son pere, à sa mere, & à tous ses freres, hormis au petit: puis les ayans tous ietté dans vne chambre, y meit le feu: incontinant que le bruit fut espendu par toute la vile, le peuple se met en armes contre luy: lequel commence à se fortifier & tenir bon dans le chateau, se disant être Soldan: dont son ieune frere, que l'on estimoit simple, ne se montra pas si fol, qu'il ne gagnāt au pied, en se sauuant dans vn temple des Mores, faisant tel écri. O Dieu, mon frere est vn diable: il a tué & brulé mon pere, ma mere, & tous mes freres: Ton plaisir soit de me garder de ses cruelles mains, & d'en prendre la vengeance.

*Goa.**Giulfar.**Meschet
Ormus.**La manie-
re de pes-
cher les per-
les.**Cruauté
grande de
l'aïsné fils
du Soldan
d'Ormus
enuers son
pere, sa me-
re et freres.
Desolation
d'un des en-
fans du Sol-
dan d'Or-
mus pour la
cruauté de
son frere
aïsné.*

Ce tumulte dura environ quinze iours, lesquels expirés le peuple s'apaisa, laissant regner ce tirant: qui se voyant Seigneur de tout ce qu'il pretendoit, feit venir parler à soy l'un des susdits esclaves, nommé Mahomet, luy vsant de tels propos: Maintenant suis-ie Soldan? A quoy il respond: Ouy vrayement tu es Soldan. Lors le print par la main, luy faisant miles careffes, avec grandes promesses: Va, dit il, tue ton compagnon, & ie te feray tout seul Seigneur des chateaux. Mahomet luy feit response: Seigneur, i'ay vescu trente ans avec luy, hantant, & trafiquant tousiours ensemble: parquoy ie ne veux auoir maintenant le cœur si desloyal pour commettre telle meschanceté. Or bien, laisse-le ainsi, replique le Soldan: lequel quatre iours apres commande venir parler à soy l'autre esclave, nommé Cayn, luy tenant mesmes propos, qu'à Mahomet son compagnon, qui luy conseilla le mettre à mort aux fins que dessus. A quoy Cayn luy presta l'oreille, promettant executer cette desloyauté: & de fait incontinent s'étant armé secretement, vient droit à son compagnon pour luy oter la vie, mais soudain que Mahomet l'eut apperceu avec les yeux ardans & enflambés, commença à luy parler en cette sorte: O meschant: pourrois tu maintenant nier que ne soyes traître? viens tu pas pour me tuer? Attens, laisse moy prendre mes armes: car i'ayme trop mieux te mettre au fil de l'épée, que si tu me faisois terminer mes iours. Lors Cayn voyant ses menées être descouuertes, tire son poignard, & le iette aux pieds de Mahomet, se iettant deuant luy à genoils, vsant de telles paroles. O Seigneur, pardonne moy sil te plait, encor pour cette fois: i'ay merité la mort. Tien, pren mes armes, & m'en tue, si bon te semble: car pour certain ie suis icy venu à fin de te tuer à la persuasion du Soldan. A quoy de rechef luy respond Mahomet: Tu ne peux nier à cette heure, que tu ne soyes traître, d'auoir beu, mangé & pratiqué avec moy par l'espace de trente ans, & à la parfin me vouloir tuer à la suasion de celuy mesme, qui ma sollicité de te faire mourir, ce que n'ay onques voulu attenter ny entreprendre. Ne vois tu pas bien que c'est vn diable? mais neantmoins ie te pardonne, sus, sus, leue toy. Il ma par trois iours durant suadé & incité à te tuer: à quoy n'ay voulu cōsentir. Or sus, laisse faire à Dieu: Va, & fais ce que ie te diray. Retires toy deuers luy, & luy affermes que tu mas mis à mort. Cayn étant leué, va en diligence vers le Soldan, qui ne l'eut pas plutôt aperceu, qu'il luy dit. Et bien, as tu depeché ton compagnon? Ouy par Dieu, respond Cayn. C'est bien fait, replique le Soldan, approche toy de moy. Cayn pensant que le Soldan le voulsit embrasser par maniere de gratulation, se tire pres: en quoy il fut bien deceu: car le Soldan le salua à grans cops de dague, de sorte, que sur l'heure il le laissa mort en la place. Trois iours apres Mahomet armé secretement, trouua moyen d'entrer iusques dans la chambre du Soldan, qui l'apperceuant encor en vie, fut fort étonné, d'autant qu'il pensoit que son compa-

Cayn compaignon de Mahomet esclave occis par l'ainé fils du Soldan d'Ormus & en fin luy mesme tué par Mahomet.

gnon

gnon l'eût mis à mort. En quoy se voyant deceu, fort indigné s'adressant à luy, vîa de tels propos: O chien, fils de chien, vistu encores? Es tu encores icy? Ouy, respond Mahomet, en despit de toy, tâssurant que ie te feray receuoir le guerdon mesme, que tu m'as procuré: car tu as attenté ma mort: mais l'heure est venue qu'il te conuient finir tes iours, toy, qui es pire qu'un chien, plus cruel que tous les diables d'enfer. Le Soldan fort piqué de ces paroles, meit la main aux armes, de sorte, qu'ils commencerent à se charpiller à bon escient: mais apres braues escarmouches ce defastre tomba sur le Soldan, qu'il fut vaincu, & à la parfin contraint de finir miserablement ses derniers iours par les mains de Mahomet: lequel au sortir de cette victoire renforça sa garde, se retirant dans le Palais: ou tout le peuple, qui luy fauorisoit, pour sa victoire commença à lapludir, luy gratifiant, souhaitant honneur & accroissement, avec vne ioye indicible acompagné de tels écrits: Viue, viue Mahomet le vaillant Soldan, & à tousiours-mais soit il. Mais luy touché d'un remord de conscience, ne voulut longuement occuper ce degré Royal: ains enuiron vingt iours apres, commanda être faite vne assemblée des principaux Seigneurs, chefs, & marchans de la vile: ou il confessa que par droite raison la Seigneurie appartenoit au fils aîné du Soldan, qu'il auoit saccagé, vsant en cecy de si grande remonstrance, que l'assemblée luy acorda son dire, de sorte, que le ieune enfant, que l'on reputoit idiot, paruint à la couronne de Soldan: combien que ce pendant il ne fut demis de l'administration & gouvernement de la cité, & autres principaux affaires: mesme, que pour s'être acquis vne grande reputation enuers tout le peuple, il fut eleu Lieutenant du Soldan, & gouverneur de la vile: en laquelle sont ordinairement quatre ou cinq cens marchans étrangers, menans vn grand train de foyes, perles, pierres precieuses, & autres choses semblables: qui viuent communement de riz cuit, de pain bien peu, pourautant que le terroir n'y produit point de bleds.

*Ioye & écrits
du peuple
pour la victoire
de
Mahomet
contre le
Soldan.*

*Equité de
Mahomet
nouveau
Soldan
quand à la
restitution
du Royau-
me qu'il au-
oit occupé
par force.*

*De la cité d'Eri au pais de Corasam, que l'on estime être
de Parthe. De ses richesses, mesmement de Rhubarbe,
& de la cité de Sammarcante.*



P R E S auoir en partie ouy, en partie veu ces miserables auentures, ensemble les coutumes de la cité d'Ormus, ie passay outre pour aller en Perse, de sorte, que suiuant mes erres, & ayant cheminé douze iournées, ie trouuay vne cité, nommée Eri, au pais de Corasam, ou le Roy faisoit sa residence. Elle est abondante en biens & marchandises, principalement en draps de foyes, en si grand quantité, que par vn iour on y entrouuera à vendre trois ou quatre milles chameaux tous chargés: au moyen de quoy, tant en la vile, qu'au contour il y a à force viures, & rhubarbe à foison, laquelle se donne

à si vil pris, que i'en vey deliurer six liures pour vn ducat, à douze onces pour liure:contenât cette cité enuiron de six ou sept miles feuz : les habitans sont tous Mahomettans. Au departir de là, ie cheminay bien vingt iournées par terre ferme,rencontrant plusieurs viles & cités:esquelles neantmoins ie ne m'arrestay,encor qu'elles fussent riches,& bien peuplées : ains allans tousiours sans rompre mon chemin, i'aborday aupres d'une grande riuere nommée par les habitans du païs Eufra : qui est à mon iugement,Eufrates,selon ce que ie peu colliger de la largeur,& grandeur de sa bouche:lequel côtoyât par l'espâce de trois iours du côté de la main gauche , i'arriuy à vne vile appelée Siras, qui est à vn Seigneur particulier,Perfian & Mahomettan.Cette cité est riche en pierres precieuses, comme Turquoises, & Rubis, combien qu'elles ne croissent pas là,mais on les y aporte de la cité de Balasam : & ausi en Azur, que l'on y amene de delà la mer,aussi de musc bon en toute perfection,differant de cettuy cy que nous auous par deça,qui est faux & contrefait,côme ie lay bien aperceu,car i'en ay veu faire l'expérience en la sorte,que ie vous diray:Vn matin trois ou quatre hommes prindrent à ieun vne vescie de musc , en la brisant,& soudain elle feit sortir le sang du nez à tous quatre,qui est signe d'un bon muic,pur,& non mistionné. Encor pour mieux en sauoir la verité,ie m'informay des marchans combien pourroit durer vn bon musc:qui me resdirerēt qu'il dureroit en sa bonté dix ans,moyenât qu'il ne fût falsifié. En quoy ie cognoy apertement , que celuy,qui se vend en nôtre païs est corrompu par les Perfians , qui sont plus fins & rusés pour falsifier quelque chose,que tous les gens du monde : en quoy faut dire le semblable deus,qu'ils sont gens priués,de bonne compagnie,vsans plus de liberalité qu'autres de tout l'vniuers. Ce qu'ay experimenté d'un Perfien, mesme dans la cité de Siras en Corasam, me cognoissant des lors, que ie fu à Mecca,lequel pour l'amour qu'il me portoit , musoit de ces propos. Loys, que fais tu icy ? Ne t'ay-ie pas autrefois veu à Mecca ? A quoy ie luy respond,Que ouy,& que i'étoy venu en ces quartiers,à fin de voir du monde,& cognoitre les choses cachées & incognues. Vrayement, dit il,ie aproue grandement tes entreprinſes, louant Dieu, de ce que i'ay rencontré vn homme de si gentil esprit,affin de me tenir compagnie. Au moyen de quoy nous nous associames,demeurans quinze iours dans Siras,ou nous feimes promesses mutuelles,de n'abandonner l'un l'autre:& de là primmes le chemin de Sammarcante, laquelle, au raport des marchās,est vne cité du Caire,souz la puissance d'un Roy Mahometan,ayant ordinairement de compagnie soissante miles hommes de cheual,tous blancs , & fort belliqueux. Nous ne passames pas plus auant , pourautant que le Sophi couroit tout ce païs,mettant à feu,& à sang tout ce , qu'il trouuoit , mesmement ceux , qui tenoyent la loy de Bubecher, Othman , & Homar, iadis compagnons de Mahomet , les faisant tous passer au fil de l'épée : pardonnant à ceux , qui croyent à Mahomet.

Lors

*Turquoises,
& rubis.**Musc bon,
pur,& sans
miston.**Sam -
marcan
te.*

L'ors mon compagnon me dit, vien-ça Loys, à fin que tu cognoisse combien ie te fauorise , procurant ton bien en tout ce que ma puissance portera , desirant de ma part te donner par effet, à entendre que ta compagnie me plait , ie te veux donner vne mienne niece à femme, appelleé Samis, c'est à dire le Soleil : laquelle certainement (ainsi comme ie cognu apres) auoit ce nom bien seant & respondant à sa grande beauté. En ce cy il se montra fort modeste, m'vsant de tels propos: Soyés assureé que ie ne vay point errant par l'vniuers , par faute ou souhait de biens: mais seulement mon plaisir , & appetit de voir choses incognues iusque icy , m'a causé cette peregrination. Continuans ces propos , nous feimes tant par noz iournées, que paruimmes à Eri: ou étoyt sa maison, en la quelle soudain que fumes arriués, il me meit, pour obiet, sa niece deuant les yeux: à laquelle ie fey caresse , montrant assez bon semblant, encor que mon cœur ne fût logé là. Huit iours apres ces menées nous retornames à la cité d'Ormus, ou étās embarquez, nous feimes voyles ten dans de la part de l'Indie , de sorte, que arriuames à vn port, qui se nommoit Cheul.

FIN DV SECOND LIVRE.



LES VOYAGES DE
 LOYS DE BARTHEME
 BOLOGNOIS, OV IL EST
 traité de la premiere partie des Indes.

LIURE TROISIEME.

De Cambaia, cité de l'Indie, riche en toutes choses.



*Indo, riuie-
 re.*

*Eaux crois-
 sans au de-
 faut de la
 Lune.*

*Cornalines,
 calcidoynes
 & diamâs
 d'ou prouie-
 nent.*

*Guzerates,
 quel peuple*

Ourautant que i'ay promis des le commence-
 ment de mon œuure (si bien m'ensouuiēt) d'expé-
 dier en peu de paroles toutes choses, pour peur
 d'étré trouué facheux en mes propos, ie conti-
 nueray mon stile, touchant brieuement les cho-
 ses memorables, & dignes d'admiration, princi-
 palement des Indes. Aupres donq du port de
 Cheul y a vne tresgrande riuere, nommée In-
 do, qui passe aupres de Cambaia, cité alsise du côté de Midy, trois
 miles dans terre ferme, dans laquelle on ne peut nauiger avec grands
 nauires, si non au temps que l'eau est grosse, pourautant que lors la
 riuere s'estend bien trois ou quatre miles de largeur: & conuiet icy
 noter, que les eaux y croissent tout au contraire de celles de pardeça:
 pource que noz riuieres d'Italie croissent au plain de la Lune, celles-là
 au defaut. Cette cité est forte, close de murailles à nôtre mode, abon-
 dante en toutes sortes de grains, riche de huit ou dix especes de menues
 especes, comme Turbith Galanga, Spica nardi, Assa fœtida, Lacca, & plu-
 sieurs autres, lesquelles ne me souuient pour l'heure comment se nom-
 ment. Outre ce, l'on y fait la futaine & le cotton, qui y causent vne
 grande trafique, de sorte, que tous les ans on y charge bien quaran-
 te ou cinquante nauires de draps, tant de futaine, que de soye, pour
 conduyre en diuers pais. Ce Royaume aussi a deux montagnes distan-
 tes de Cambaia enuiron six iournées, en l'une desquelles l'on tire les
 cornalines, en l'autre, les calcidoynes, & à vne iournée pardela se
 trouue encor vne autre montagne, d'ou prouiennent les diamans.
 Quant à la Seigneurie de cette cité, ell'est souz la main du Sol-
 dan nommé Machamuth: lequel depuis quarante ans ença rait
 ce Royaume des Guzerates, qui sont vne maniere de gens ne
 mangeans rien, qui ait sang, ny ne tuans rien qui ait vie, n'étans
 encor Mores, ny Gentils, mais viuans en gens de bien, de sorte que
 s'ils

s'ils étoient baptizés, ie croy qu'ils seroyent sauués: car il ne font à autruy ce qu'ils ne voudroyent être fait à eux mesmes, vsans d'habits fort à la legere, les vns en chemise, les autres tout nuds, hormis vn petit drap pour couvrir leurs parties honteuses, sans rien porter ny aux pieds, ny aux iambes, la teste enuelopée d'une petite toile rouge: au reste, tant simples & iustes, que pour leur bonté ils ont été depouillés de leur Royaume par le Soldan Machamurh: lequel est Mahomettan, ensemble tout son peuple, tenant ordinairement vne cour de vingt-cinq miles hommes de cheual: & du matin on amenant cinquante Elephans dans le palais, ayant chacun d'eux vn homme sur son doz, lesquels font la reuerence au Soldan à son leuer: ne seruans à autre office, que à cettuy-cy, lequel il font semblablement, apres que ledit Seigneur est habillé, & aussi à l'entrée & yssue de sa table: qui est tousiours acompagnée de cinquante ou soissante sortes de tous instrumens, comme trompettes, tympanes, taborins, fifres, fleutes, hauboyes, & autres sortes, que ie ne nommeray, pour eiter prolixité. Le Soldan porte des mostaches si grands souz le nez, qu'il les lie au dessus de sa teste, non plus ny moins qu'une femme ses cheueux, portât vne barbe blanche étendue iusques à la ceinture. Il vse tous les iours de poyson, non pas pour s'en saouler, mais en la sorte, que ie vous diray. Quand il veut faire mourir quelcun, il le foit venir deuant soy tout nud, & prent en sa bouche certaines herbes, & autres fortes de fruitz semblables à noix muscades lesquelles il masche fort, puis les iette contre le patient, tellement qu'il tombe incontinent mort deuant luy. Mon compagnon tout étonné de voir cette maniere de faire, demandoit, pourquoy il faisoit cela. A quoy quelques marchās luy respondirēt, que des son ieune aage son pere l'auoit nourry de poyson. Outre ce il entretient, comme par force, trois ou quatre miles femmes: & toutes les fois qu'il couche avec l'une d'elles, le matin on la trouue morte, dont nous fusmes fort hebais. Il est fort delicat & somptueux en habits, de sorte qu'il change tous les iours de nouveaux, iettant les autres là, iusques mesme à sa chemise, laquelle iamais personne ne porte, depuis qu'il l'a portée vne fois. Le ne pourroy icy descrire à la verité la fertilité & bonté de ce païs, qui est si demesurée, qu'il s'y trouuent plus de trois cens nauires venans là de plusieurs païs étranges pour pratiquer & acheter viures, draps de soye, futaines, qui puis se transportent en Perse, Tartarie, Turquie, Surie, Barbarie, Afrique, Arabie, Ethiopie, Indie, & plusieurs autres terres, Isles, viles & cités: de sorte, que le Soldan en retire de reuenus admirables, qui luy seruent pour l'entretien de sa grāde pompe, & des guerres qu'il a à l'encontre du Roy de Ioghe, qui est son voysin de quinze iournées pres, grād Seigneur, pouuāt faire enuiron trēte miles hommes: & combien que luy & son peuple soyent Payans, si est-ce qu'ils sont tenus pour saints, à cause de leur maniere de faire, qui est telle, que le Roy a acoutumé d'aller de trois en trois ans à certain pelerinage,

*Royaume
de Ioghe.*

rinagé, accompagné de trois ou quatre miles hommes, avec leurs femmes, enfans, ensemble quatre ou cinq cens courfaires, & de Chats faifans la cyuette, Marmots, Papegaux, Leopards, Faucons, & Tiercelles, le tout en magnifique pompe, habillé d'une peau de chameau, vne partie deuant, l'autre derriere, & le poil au dehors. Les habitans de cette plage, plus noirs, que blancs, portent sur eux grande quantité de perles, pierreries & autres richesses, pendans à leurs oreilles, vêtus à l'Apostolique avec leurs chemises: mais le Roy & plusieurs autres de sa cour vont par my la vile le visage, les bras, les iambes, & toutes les parties du corps teintes de sangdar mâché avec plusieurs autres odeurs fort precieuses: au reste, regnent entre eux de grandes superstitions, de sorte, qu'aucuns font conscience de se seoir en lieu haut, les autres de s'asseoir contre terre, les vns de s'estendre ou coucher en terre, les autres font vœu de ne parler iamais à homme, ayans ceux-cy tousiours gens expres au pres d'eux pour leur seruir & donner tout ce qu'ils demandent par signes: tous en general portent vn cornet pendu au col, lequel ils sonnent quand ils vont de compagnie en quelque cité, principalement quand ilz demandent l'aumosne: Et ce pendant que leur Roy arreste ou se repose en quelque lieu, deux ou trois cens d'entr'eux se mettent deuant, pour prouoir aux viures, & autres choses necessaires: ayant coutume de demeurer trois iours en chaque lieu, ou ils arriuent, à la mode des Cingles, que nous appellons Bomiens, ou Egyptiens: dont aucuns d'eux portent des batons armés d'un cercle de fer à chacun bout, les autres de rondeaux de fer tranchans comme vn rasoyr: lequel, avec vne fronde, ils iettent contre ceux, qu'ils assaillent, viuans en telle liberté, que si de fortune ils tuoyent les plus grands de la vile, ils n'en seroyent repris en sorte, que ce soit, à cause que l'on les tien pour saints, & leur fait on place, avec honneur, par tous lieux, ou ils passent. Le païs pour sa sterilité endure grande cherté de viures, à cause qu'ils consiste plus en montagnes, qu'en plaine, ne se soucians les habitans de bâtir braues maisons, ny de faire murailles à leurs viles: ains s'adonnent à amener plusieurs riches pierreries en noz quarties, pourautant qu'ils ont liberté de passer iusques au propre païs, ou les pierres fines naissent, & de les transporter là ou bon leur semble: ce qu'ils font sans despenfe. Voylà leurs estudes, occupations & trafiques: vray est, que pourautant que leur païs est fort sterile, ils maintiennēt presque continuellement guerre contre le Soldan Machamuth.

De la cité de Ceuul: des coutumes, habits, & armes du peuple.



V departir de Cambaia, nous vimmes à Ceuul, distante de cette-cy, douze iournées, étant entremy les deux vn païs nommé Guzarat. Elle est souz la puissance d'un Roy Gentil: les habitans sont de couleur quasi noyre, les vns portés de simples chemises, les autres allés tout nuds

nuds excepté quelque petit drap pour couvrir leurs parties hôteuses: gēs vfans de grāde iustice, & belliqueux, ayāt pour leurs armes, espēs, rondelles, arcs, lāces ou piques de boys, ou cannes ferrées au bout, & à force artillerie. La vile est forte, fermée de bonne murailles, enrichie d'une belle riuere, & distante seulement de la mer enuiron deux miles: au moyen de quoy il y a vn merueilleux aport de toutes marchandises venans par nauires des estranges pais: ioint ausi, que le terroir est bien fertile, produisant à foison de bleds, d'orge, mais peu de raisins, de nois, figues, & amā dres: d'auantage là se font à force draps de futaine. Je ne parleray icy de leur foy, pourautant qu'elle est de mesme que celle du Roy de Calicut: duquel nous ferons mention cy apres: & quant à l'air, il y est ordinairement plus chaud que froid. Leur Roy n'a pas grand nombre de gens de guerre, mais ceux qu'il a sont fort dextres aux armes, bien armés, & montés de mesme, comme ayans à souhait tant cheuaux, & iumens, que beufs, & vaches. Apres donq auoir fait quelque seiour a Ceuul, en contemplant son asiette, coutumes & loix, ie m'en allay à Dabuli distante de là enuiron deux iournées, assise sur le riuage d'une grande riuere, fermée de grosses murailles de toutes pars, ayant vn terroir fertile au possible: au moyen de quoy les Mores y hantent & trafiquent. Leur Roy est Gentil & Payan, lequel peut faire vingt miles hommes combatans, gardant en son Royaume vne bonne iustice enuers tous: leurs maniere de viure, habits, coutumes & loix sont mesmes, que celles de Ceuul. Au sortir de terre ferme, i'arriuay en vne Ile nommée Goga: laquelle est tributaire au Roy de Decan, luy rendant tous les ans dix miles ducats d'or, qu'on appelle Pardai, presque semblables aux saraphes du Caire, mais plus estroits & espēs, ayāt pour figure deux diables d'un côté, & de l'autre côté certains charatteres. Cette Ile est puissante par le moyen d'une grosse forteresse ceinte de murailles à nôtre mode, regardant sur la mer: en laquelle par fois fait residence vn Capitaine nommé Sabain Mamme luchien, tenant là garnison, acompagné de quatre cens Mammeluchiēs, lequel si d'auenture peut rencontrer quelque hōme blanc, il luy fait bon party, luy donnāt de gage quinze ou vingt ducas par chacun moys: mais premier que le mettre au roolle des gens de guerre, il le garde quelques moys pour voir l'essay de sa force & dexterité: que sil ne se trouue suffisant pour tel degré, il l'employe à quelque exercice mecanique. Ce Capitaine, avec ces Mammeluchiēs, fait grand guerre au Roy de Narsingua: duquel nous parlerons en temps & lieu. Au sortir de Goga, ie me remis sur terre ferme: ou ie cheminay sept iournées, puis arriuay à Decan, cité étant souz la main d'un Roy Mahometan: qui tient à ses gages le Capitaine, & ses Soldats, (desquels auons parlé) en la forteresse de Goga: & peut faire trente miles combatans, tāt à pied, qu'à cheual: ayant vn palais ou il loge, merueilleusement braue & superbe, de sorte qu'auant que gagner la Sale de ce Seigneur, il faut premierement passer par vingt quatre

*Dabuli.**Goga,
Ile.**Decan.*

chambres.

chambres. Cette vile outre sa beauté & bonté, a de bâtimens faits à l'équipolent, à la mode des Chrétiens, ensemble quelle est ceinte de belles & puissantes murailles, esquelles y a bonne garde. Les habitans de ce Royaume abondant en toutes richesses, sont Mahommetans, vêtus de foye ou bien de chemises fort blâches, portans es pieds de soliers, ou bien brodequins, & de chausses à la mode des mariniers: les femmes vont toutes couvertes, cōme font celles de Damasc. Leur Roy a tousiours guerres à lencontre du Roy de Narfinga, ayant de Soldats la plus part étrangers, & blancs: mais ceux, qui sont natifs du lieu mesme, sont de couleur tannée. Il n'est moins liberal, que riche & puissant, entretenât sur mer vn grand nombre de nauires, au reste, ennemy mortel des Chrétiens. De là m'en vins à Batechale, cité d'Indie, distante de Decan, cinquante iournées, souz le gouuernement d'un Roy Payan, subiet neantmoins au Roy de Narfinga, étant cette cité tresnoble, belle, ceinte de bōnes murailles, prochaine de la mer enuirō vn mile, combien qu'il n'y ait point de port, mais on y a entrée par vne petite riuere flotant contre les murailles. Les marchans Mores y hante fort pour les grandes trafiques & marchādises que l'on y trouue, mesmement de riz, & sucre candy, duquel nous vsons, de figues, de nois pareilles à celles de Calicut: de sorte, que tout y abonde: mais vn seul malheur y regne, que ce sont tous idolatres, ausi bien que ceux de Calicut, exceptés les Mores, qui son Mahommetans. Ils ne se feruent point de cheuaux, ny de mulets, ny d'asnes: mais en recompense y a à force beufs, vaches, buffles & cheures: tout ainsi qu'il auiet que le terroir n'y produit point de froment, ny d'orge, ou autre sorte de legumage, mais bien à foison de tous fruits d'arbres. De là ie party, & m'en allay à vne Ile nōmée Amiadiua (habitée d'une maniere de gens, qui sont Mores & Payans) lointaine de terre ferme enuiron demy mile, contenant de circuit enuiron vingt miles: mais elle n'est pas trop fertile, ny en bon air: vray est, qu'il s'y trouue de tresbonne eau, & entre cette Ile & la terre ferme, y a vn tresbon port de mer. Apres auoir cheminé vne iournée, ie arriuay à vne vile, appelée Centacola, riche & abondāte en chair, en riz, & en toute sorte de bons fruits selon l'usage de l'Indie, étant ausi peuplée de plusieurs marchans Mores: mais leur Seigneur (subiet au Roy de Batechale) ensemble tout le peuple, sont Payans, de couleur tannée, tout nuds, sans chausses, ny fouliers, la teste nue. De là, suiuanz noz erres, dans deux iournées nous paruinmes à vne vile nommée Onor, ayant vn Roy Gentil, subiet au Roy de Narfinga: qui est bon compagnon, tenant sept ou huit nauires, courant tousiours pour piller ceux, qui se trouuent des plus foybles, & est grand amy du Roy de Portugal. Ses gens vont tout nuds, hormis quelque petit drap, pour cacher leur parties honteuses. Il y a assez grande quantité de riz, à l'usage des Indes: & a force bestes différentes aux nôtres, comme porcs sangliers, cerfs, ours, lyons, avec vn grād nōbre d'oyseaux difformes ausi aux nôtres, plusieurs papegaux, vaches

vaches rouges, & moutons en abondance: roses, fleurs, & fruits tresodorans, qui se gardent tout le long de l'année, pourautant que l'air y est fort bon: qui cause, que l'on y vit plus longuement que pardeça. Au pres de cette vile s'en trouueve une autre nommée Mangolor, ou l'on charge tous les ans cinquante ou soixante nauires de riz: étans les habitans d'icelles Mores, viuans par mesmes moyens, cōme les susdits. Au partir de là, nous allames à Canonor, cité belle & grande: ou le Roy de Portugal a vn tresfort chateau, mesme quil est grādemēt amy du Roy de cette vile, encor quil soit Payā. Là est le port ou se fait la charge des cheuaux, qui viennent de Perse, & faut que chaque cheual paye vingt cinq ducats de gabelle, de là passant à Narsinga, sur terre ferme. Cette cité est peuplée de plusieurs marchans Mores, combien quil n'y croist ny bled, ny raisins, ny autre fruit qui soyt à nostre vsage, hormis des citrons, avec quelques oranges: de sorte, quil n'y a que ceux de la vile, qui vsent de pain: les étrangers ne mangent que de chair, poisson, & nois croissans au pais. Quant à leur foy, coutumes, & pourquoy ils viuent à la mode de Calicut, nous en parlerons en temps & lieu. Icy cōmençames à trouuer les espiceries, Gingembre, Cynamome, Myrabolan, & quelque peu de Casse. La vile n'est ceinte de murailles, ny les maisons bien bâties, ny autrement garnie de viures, excepté, quil s'y trouuent quelques fruits differans aux nôtres, meilleurs toutefois en quelques qualitez. Ce pais seroit de mal assaillir, encor plus difficile à combatre, pourautant quil est tout plein de cauernes & fosses faites souz terre, & au dedans des montagnes, par l'industrie des Antiques. Le Roy a vne cour de cinquante miles Naeri, c'est à dire gentilhommes, lesquels n'vsent d'autres armes que d'espées, rondelles, lances, arcs & artillerie, allans la plus part tous nuds, sans chausses ny soliers, avec seulement de simples brayes, la teste nue: hormis que lors quil vont en guerre, ils portent vn petit drap rouge, attaché avec vne cheueliere, faisant deux tours tout à l'environ de la teste: ayans leur ligature d'une mesme sorte, & n'ont toutefois le moyen de se seruir de cheuaux, mulets, asnes, ou chameaux: mais quelque fois vsent d'Elephans, non pas toutefois quand vient à se combatre. Vne autre fois, quand ce sera mieux à propos, ie parleray de la victoire que obtint le Roy de Canonor contre le Roy de Portugal. Or apres auoir seiourné par l'espace de quinze iours dans Canonor, primmes notre chemin du côté du Royaume de Narsinga, cheminans iusques à ce, quarriames en vne vile nommée Bisinagar, qui apartiēt au domaine du Roy de Narsinga: & est grande, fermée de grosses murailles, située sur la côte d'une montagne, côte nāt de circuit sept miles, ayāt vn merueilleux aport de toutes marchandises, pourautāt quelle est fort fertile, produisant tout ce que l'on pourroit souhaiter en ce mōde: ioint aussi que sa situation est la mieux acōmodée nō seulement quāt à l'air, mais aussi pour auoir plusieurs lieux d'esbat, & de chasse. Le Roy est Payan & idolatre, au reste riche & puissant, ayant tousiours de compagnie quarāte miles homes de cheual, & cōuiēt sauoir

*Mangolor.**Canonor**Espiceries.**Bisinagar.*

que chaque cheual est estimé trois, quatre, ou cinq cēs Pardei, voyre qu'il s'en trouue tel, qui en vaut huit cēs: la cherté prouenāt de ce, qu'ils ne naissent point en ce país, & encor moins de iumēs: ioint aussi que les Roys qui tiennēt les ports de mer, ne les laissent passer, si nō avec grād dāger, tenāt ce Roy-cy ordinairement pour se seruir en guerre, quatre cens elephans, outre le grand nōbre de chameaux, & dromadaires, fort cōmodes pour les expeditions de ses affaires.

De la nature des Elephans.



Aintenant il vient bien à propos, suiuañt la promesse que i'ay faite cy desus, de dire quelque chose de la nature des Elephans: lesquels i'ose bien affermer être douez d'un si bon esprit, discretion & memoire que peu s'en faut, qu'il soit au nōbre des animaux irraisonnables, veu mesme qu'il ne s'en trouue vn plus fort sur la terre. Les Indiens allans à la guerre, mettent sur le doz de cet animal vn bas, à la mode des mulets du Reaume de Naple, lié estroitement avec deux chaines de fer, puis assiegent sur ce bas deux grandes caisses de boys, assauoir, l'une d'un côté, l'autre d'autre, logeans dans chacune caisses trois hommes, & entre les caisses & le col de l'Elephant mettēt vne tablette grosse de demy pied, sur laquelle est assis vn hōme à cheual, parlant à cet animal, pour autant qu'il a plus d'entendement & de memoire, que toutes les autres bestes qui se trouuent souz le ciel: de sorte, qu'il entend tout ce, qu'on luy dit, prenāt grand plaisir à ouyr parler de ses louanges: & tout ainsi que ceux qui sont dans ces caisses sur son doz, sont equipés de toutes pieces, assauoir de cote de maille, d'arcs, lances, espées, & rondelles, semblablement il veut être armé, d'une maille, principalement par la teste, & par sa trompe, à laquelle on attache vne espée longue de deux brasses, grosse & large comme la main d'un homme, & ainsi se combattent: mais celui, qui est sur son col, luy commande, va ainsi, ou, tourne deça, va de là, demeure icy & retourne en arriere, entend ces paroles non plus ny moins que si c'étoyt vne personne. Mais sil auieñt vne fois qu'il prenne sa course, il est impossible de le retenir, sinon par le feu artificiel, lequel cette maniere de gens fait fort bien faire: tellement, que incontinent qu'il l'apperçoit, il se met en route, pource qu'il le craint sur toutes choses, comme ie l'ay veu de mes propres yeux: au reste, c'est vn animal le plus entendu, sage, & puissant qui soit au Monde. I'ay aussi veu trois elephās tirer vne nauire de la mer, & la metre en terre en la sorte, que ie vous cōteray. Du temps que i'étoy à Canonor, quelques marchans Mores tiroyēt vne nauire de la mer en terre à la mode des Chrétiens, faisans premierement sortir le deuant de la nauire, qui apres la tournerent à côté, en mettans de souz icelle trois grandes pieces de boys: & vey ces trois elephans s'agenoiller en terre, au bord de la mer, & avec la teste ietter la nauire à sec. Quant à ceux donq qui dient que les Elephans n'ont point de iointures es iambes, & que pour cette cause ils ne se peuuent

*Elephant,
animal glorieux,
& sa
memoire.*

*Force de
l'Elephant.*

se peüuēt agenoiller, ie veux maintenir du contraire: car ils ont iointures autant bien que les autres bestes, vray est quils les ont au plus bas de la iābe, & quand à la femelle est sans cōparaison plus fiere & superbe, que n'est le mâle, étans aucunes d'icelles fort lunatiques. L'elephant est plus gros que trois buffles, combien quil tiēne de leur poil, ayant les yeux faits comme ceux des porceaux, la trompe pēdant iusques à terre, laquelle luy sert de main pour porter son viure à la bouche, tant le boyre que le manger, pour autāt que sa bouche ressemble à celle d'un porceau, ou bien d'un esturgion: la trompe creuse au dedans avec laquelle ie leur ay veu par plusieurs fois leuer vn liard de terre, voyre rōpre vne branche d'un arbre, qui étoyt si grosse & lourde, que vingt quatre hommes que nous étions, ne la peumes iamais arracher de l'arbre, encor que eussions vne corde, & cet Elephant à trois cops de sa trompe la mit bas. Les deux grands dens, que l'on leur voit, sont enracinées en la machoire de dessus: leurs oreilles sont larges de deux palmes de tous côtés, à d'aucuns plus, à d'autres moins: les iambes quasi autant grandes desouz, comme les cuysses par dessus: les ongles (en nombre cinq tout au tour du pied) sont ronds & larges comme vn tranchoir: la queüe longue, de trois palmes, comme celle d'un buffle: le poil court, & clair semé. Les femelles sont plus petites, que les mâles, lesquels se trouuent autāt differans en hauteur, comme sont les cheuaux. I'en ay cheuauché de treize & de quatorze pieds: & ay entendu dire, quil s'en trouue de quinze pieds, ou d'auantage d'hauteur. Leur cheminer est fort lourd, & encor plus facheux à ceux, qui ne l'ont acoutumé, il rompt l'estomac, le prouocant à vomir, tout ainsi que la marine tormenté ceux, qui commencent à y entrer: mais au contraire, il fait bon cheuaucher vn petit elephant, pource que son cheminer est aussi doux que celuy d'une mule, vous assurant, qu'il ya grand passetemps à les cheuaucher. C'est vn indice admirable d'une grande cognoissance en ces animaux, que quand ou leur veut monter dessus, ils baissent vne iambe de derriere pour seruir de montoir, aussi quil faut que le cheuauteur s'y ayde. Et contient icy noter, que cet animal ne porte ne bride, ny licol, ny chose que ce soit en la teste: & quand il se veut ioindre avec la femelle, ils se retirent ensemble es lieux desers & cachés, comme es bois, ou marécages: se couplans à la mode des hommes, la femelle couchée desouz, & à la renuerse, combien qu'aucuns tiennent du contraire. I'ay experimenté en plusieurs lieux quil n'y a plus riche don pour presenter à vn Roy, que la verge d'un Elephant: laquelle le Roy mange, cōme vne viande delicate & precieuse: & de fait elle se vend en d'aucuns païs cinq cens, en d'autre miles, & deux miles ducats. Parquoy ie dy pour cōclusion, que i'ay veu tel Elephant, qui auoyt plus de cognoissance, de sagesse, de sens & d'esprit, que plusieurs manières de gens qui se trouuent en l'vniuers.

*Descriptiō
de l'Ele-
phāt, de tou-
tes les par-
ties de son
corps, & de
son usage.*

*Quel est le
cheminer
de l'Ele-
phant.*

Du Roy de Narsinga: des monnoyes qu'il fait battre: des coutumes de ses subiets. De Tromopatan, Pandarane, & Capogatto, citez d'Indie.



LE Roy de Narsinga, est le plus grand Prince, de qui iàye iamais ouy parler, soit en richesses & thresors, en Royaumes & Seigneuries, qu'ils tient souz sa main, vnis & ioints tout en vn monceau: tout ainli que les viles du Royaume de Naples sont toutes à l'environ assises, & autant à Venise, de sorte, que la mer la cloist de deux côtés. Et n'est cette-cy gueres moindre en beauté & grandeur, que Milan, excepté que Milan est en vne plaine, & Narsinga sur la côte d'une montagne, riche, braue, enrichie d'être le siege Royal. Les Bramines, qui sont les Prestres, disent, que le Roy a tous les iours douze miles Pardai de rente, tenant ordinairement vn grand nombre de gens d'ordonnance, pourautant qu'il fait grosses guerres aux Roys des Mores, & autres Princes Payans: adonné, avec tout son peuple, à l'Idolatrie, adorant les diables, & ayant foy aux Idoles, comme font les habitans de Calicut: desquels, ensemble de leur religion & secte ie parleray cy-apres. Quant aux habits, les gens d'état portent vne chemise courte, sur la teste vne toque à la Moresque, bigarrée de diuerses couleurs, les pieds nus. Le commun peuple va tout nud, hormis vn petit drap couurant les parties honteuses: le Roy porte vn bonnet de drap d'or, long de deux palmes, mais quand il va en guerre, il prend vne robe rambourrée de cotton, la courant d'une autre toute chargée de medailles d'or, & les bords garnis de bagues, & riches pierreries tenant ordinairement vne grande cour, tellemét, que s'il s'en va au chaps pour s'ébatre, ou à la chasse, il a tousiours à son côté trois ou quatre Roys, acōpagnés de plusieurs autres grans Seigneurs, avec vn braue train de cinq à six miles cheuaux: pour plus euidemment montrer sa magnifique puissance, il fait battre monnoye d'or, qu'ils appellent Pardai, qui vaut vn ducat pour piece: ensemble de monnoye d'argent, qu'ils nōment Fanon, valant demy Iulle ou enuiron, & ausi monnoye de cuiure, les seize valās vn Fanon, qui est vn quattrin d'Italie. La iustice est tant diligēment gardée par tout ce Royaume, qu'on y peut aller, & trafiquer en assurance, moyennant que l'on ne tombe entre les grifes des lyons, qui vont courans par my les champs. Ce Roy est grand amy des Chrétiens, mesmement du Roy de Portugal, pource qu'il n'a encor autre cognoissance des autres Roy Chrétiēs, qui cause que le peuple de ce pais-cy reçoit les Portugés avec grand' careffe. Or apres auoir visité & cōtemplé l'assiete, richesses & noblesse de cette magnifique vile, nous reprimmes noz erres deuers Canonor, ou feimes quelque seiour, de là nous meimes sur terre ferme, pour aller à Tromopatan, distante de Canonor douze miles, & de la mer, vn mile, enrichie d'une petite riuere, qui descend de la mer, ou il y a grād aport de nauires appartenās aux marchans Mores, qui s'y trouuēt en nombre

Habis du Royaume de Narsinga.

Habis cours & monnoye du Roy de Narsinga, & sa brauerie & puissance.

Pardai monnoye. Fanon monnoye.

Tromopatan.

en nombre d'environ quinze miles, subiets au Soldan, ou bien à quelque Seigneur Payan. Là ne faut demāder autres richesses, que de nois Indiennes, desquelles ilz mangent avec vn peu de riz, & soutiennent leur vie en grande misere & calamité · vray est, qu'ils ont à force bois tout propre pour fabriquer des nauires: au reste, ils tiennent vne mesme foy, & mēnent vne mesme vie, que ceux de Calicut: mais sont fort differans quant aux richesses, & brauetés de vile: car les maisons de cette-cy sont bâties à la legere, de sorte, qu'vne maison n'est estimée qu'vn ducat, comme vous feray entendre cy-apres. Et pour cette cause n'y prenant pas grād plaisir, n'y demeurames que deux iours, nous en allans droit à Pandarane, cité Pandarane loingtaine de cette-cy deux iournées: laquelle est poure, melancolique, sans aucun port, ayant seulement en front vne petite Ile deshâbitée: ou nous ne feimes non plus grand seiour, qu'à Tromapatan, & passans outre, paruimmes à Capogatto, cité subiette au Roy de Calicut, distante de là, Capogatto environ quatre lieues, enrichie non seulement d'un beau palais fait à l'antique, ains aussi d'une petite riuere trauerfant le mylieu de la cité, & courante contre le Midy. Mais pourautant que n'y veimes autres singularités, mesme qu'ils vivent selon les coutumes & loix de Calicut, nous passames outre pour venir au dit Calicut: qu'est l'une des plus nobles cité, de tout l'vniuers. Je ne me suis voulu amuser, pour peur de vous facher, à raconter les moyens de viure, les coutumes, la foy, la police, & les habis des païs de Ceul, Dabul, & Batticala, ny du Roy d'Onor, Mangalor, Cannon, moins encor des Roys de Cocchin, de Caicolon, Colan, & Narfinga: mais en recompense de cela, ie vous deduiray par le menu ce qu'ay veu en Calicut, n'obmettant à parler de son Roy, qui est le plus haut & puissant de tous ceux, desquels auons touché cy dessus: & pour cette raison est appellé Samorin, c'est adire selon leur baragouin, Dieu en terre.

Le Roy de Calicut, appellé Dieu en terre.

Seconde partie de l'Indie.

P R O E M E.



Ourfuiuans donq noz erres, nous arriuames à Calicut, qui est le chef de l'Indie, c'est à dire, le lieu, ou gist la principale dignité de toute l'Indie. Et pour cette cause m'assemblé bon de mettre fin à la premiere partie, & cōmancer la Seconde par ce braue cōmencement: duquel le beneuole Lecteur pourra colliger choses admirables & plus hautes que tout ce qu'auons traité auparauant, avec vn grand plaisir & contentement de son esprit, moyennant que de sa grace il preste faueur & ayde, pour plus aisement mettre fin à l'entreprinse des voyages: priant aussi Dieu qu'il luy plaise m'en donner heureux acomplissement: soumettant mon dire, au iugement de ceux, qui ont plus discouru de païs que moy.

De Calicut tresgrande cité d'Indie. Des ceremonies, & repas du Roy de Calicut. Des Bramines, & sortes de gens de Calicut. Des habits du Roy & de la Reyne.



Alicut est vne tresrenomée vile de l'Indie, située en terre ferme, la mer flotant contre les murailles des maisons, n'ayant toutefois aucun port, ains du côté de Midy, à vn mile pres de la vile y a vne riuere, fort étroite, n'ayant d'eau que de l'hauteur de cinq ou six palmes, pourautant qu'au desus elle est diuisée en plusieurs bras, qui s'écoulent pour arouser les prairies, sauzayes, & iardins tant dedans la vile, que de-hors: puis vient à se ietter dans la mer. Cette cité n'est aucunement ceinte de murailles: mais les maisons sont étroites & serrées par l'espace d'un mile, en-apres mises au large, ainsi separées, ou pour crainte du feu, ou bien pour n'auoir le moyen de les bâtir autrement: lesquelles durēt en cette sorte enuiron cinq ou six miles, faites à la grosse mode & mal façonnées, car les murs dicelles de tous côtés ne sont gueres plus haut, qu'un homme de cheual, au reste couuertes seulement de fueilles, sans auoir vn seul estage: pourautant que, quand ils veulent fouyr profond pour faire bon fondement, ils trouuent tout incontinent l'eau, qui les empesche: toutefois que les maisons des marchans s'y louēt quinze ou vingt ducats par an, & les maisons des gens de basse condition vn, ou deux ducats pour le plus. Le Roy est Gentil & Payan, adorant les diables, à la mode que ie vous diray: Il confesse, ensemble tout le peuple, qu'un seul Dieu a créé le ciel & la terre, & tout le monde, & qu'il est la premiere cause de toutes choses: mais, dient ilz, si Dieu auoit à iuger vous & moy, cettuy-cy, & celuy-là, il ne prendroit pas plaisir à être Seigneur, mais pour se défaire de cette charge & fatigue, il a enuoyé cet esprit, qui est le diable, en ce mode, avec plaine puissance de faire iustice, & de faire bien à celuy, qui bien fera, & mal, à celuy qui mal versera, l'appellans entr'eux le Diable Deumo, & Dieu, Tameran. Le Roy tiēt en sa chapelle ce Deumo en la sorte, que ie vous conteray: Sa chapelle est large de deux pas en toute carreure, haute de quatre pas, avec vne porte de bois toute figurée de diables. Au my-lieu y'en a vn fait de Lethon, assis aussi en vne chaire de Lethon, portāt sur sa teste, vne corōne faite cōme le tiare du pape avec trois coronnes, tenāt aussi quatre cornes, & quatre dens, avec vne grāde bouche ouuerte, vn nez de merueilleuse façon, les yeux de mesme, les mains, cōme vn singe, les pieds tout ainsi cōme vn poulet: tellemēt, que c'est chose espouventable de le voir, meismement que cette chapelle est tout à l'entour chargée de peintures de diables, ayāt par tous les quarres vn Satan assis dans vne chaire enuironnée de feu, tenant d'une main vne ame, qu'il mange: de la gauche en tire vne autre de celles, qui sont au dessous. Les Bramines, c'est assauoir les prestres, lauent cet idole avec d'eau odoriferante, puis la parfume. En-apres là dorans, & luy faisans sacrifice quelques

La foy du Roy & des habitans de Calicut: & là forme de lidolle qu'il adore.

quelques iours de la semaine, comme sensuit: Ils ont vne certaine petite table faite en forme d'un autel, haute de terre enuiron trois palmes, large de quatre, & longue de cinq: laquelle ils parent de roses, de fleurs, & d'autres bonnes senteurs, puis espanse dessus le sang d'un poulet, avec de charbons allumés dans vn vaisseau d'argent couuert de plusieurs parfums: & prennent vn encensoir, avec lequel ils enuironnent & parfument tout cet autel: ayans aussi vne petite clochette qu'ils sonnent par l'espace de quelque temps, tenans en la main le couteau d'argent, duquel ils ont tué le poulet, le baignans dans le sang du sacrifice, le mettans aussi quelque fois sur le feu, aucune fois le prenans, avec tels gestes, que vous diries qu'ils iouent à l'escrime: & à la parfin peu à peu ils brulent tout le sang du poulet: durant lequel sacrifice, ils ont tous de chandelles de cyre ardantes en la main: mais le prestre qui doit faire ce sacrifice porte en ses bras, en ses mains, & en ses pieds certains anneaux d'argent, desquels il fait vn aussi grand bruit, que si s'étoyent sonnettes: se mettant au col v. grand colier. Apres auoir acheué son sacrifice, il emplist ses deux mains de bled, lequel il va sement ça & là, mesmement sur vn grand arbre, & en y allant, il a tousiours l'oeil sur cette chapelle: & quand il est pres, il iette ces grains de bled par dessus sa teste, le plus haut qu'il luy est possible: puis retourne dans sa chapelle, & serre tout son bagage. Le Roy lors qu'il veut prendre son repas, obserue telles cerimonies. Quatre principaux de ses Bramines le portent deuant l'Idole du diable, mais premierement ils adorent en cette sorte: Ils mettent tous quatre les mains sur sa teste, puis les retirent à eux, en les serrant, & leuant en sus le pouce de la main, & inuitent l'Idole à manger des viandes que le Roy luy presente, demeurans à faire ces cerimonies autant comme vn homme feroit à prendre son repas: cela fait ils presentent la viande au Roy: gardās ces solennités en portant honneur à l'Idole, à celle fin, que le peuple voye, comme le Roy ne veut rien manger, que premieremēt ne soit présenté à icelle. L'on porte ces viandes dans vn bafsin de bois, en mettant au fond vne grande fueille d'arbre, sur laquelle est mis la viande comme riz, & autres choses. Le Roy māge couché contre terre, ayant à trois ou quatre pas pres de sa Maiesté les Bramines, demeurāt tout droits, sans mot dire, encor que le Roy parle: lequel ils escoute avec vne grande reuerence: & soudain qu'il a prins son repas, ces Bramines leuent le reste des viandes, & les portent dans vn iardin, ou ils les posent contre terre: puis se batent les mains l'üne contre l'autre par trois ou quatre fois, & au son de ce bruit vient vne grande quantité de corneilles noires toutes faites à cela, lesquelles mangent ce reliqua, puis s'en volent ou bon leur semble: car elles sont en cette liberté, qu'il n'y a homme du mode qui les ose toucher, ou leur faire mal. Or pourautāt que nous auons cy dessus fait mētion des Bramines, il me semble bien cōuenable de dire quels gēs se sont, quel est leur office & état. Il sont dōq les principaux chefs de la Loy, cōme sōt entre nous les prestres. Et quād le Roy se

marie, il fait chercher le plus honorable d'entr'eux, le faisant dormir la première nuit avec la Royne, à fin qu'il la dépucelle: Ce que ce Bramine ne fera pas, si le Roy ne luy donne quatre ou cinq cens ducats: mais cette coutume est seulement obseruée par le Roy. Il conuient maintenât dire, combien de sortes de gens se trouuent en Calicut. Entre tous les habitans de Calicut, les Bramines tiennent le premier rang quant aux honneurs, apres viennent les Naëri, tenus là en telle reputation, que nous auons noz gentilhommes pardeça, qui sont contrains de porter par la vile léspee, la rondelle, les arcs, la lance, & autres semblables armes: autrement perdroyent le nom & priuilege de noblesse. La troisième sorte de gens appellés Tiua, sont artisans: La quatrième, sont pescheurs, appellés en leur langage Mecor: La cinquième, Paliar, qui recueillent le poyure, le vin, & les noix: La sixième, est Hitana, qui sement & recueillent le riz, & autres grains. Ces deux dernières manieres de gens sont en petite estime, n'ayant le credit d'aprocher des Naëri, ny des Bramines, sinon à cinquante ou soixante pas pres, s'ils ne sont appellés d'eux, tellement, qu'ils vont presque tousiours errans par les desers, comme gens sauuages, crians à haute voix par les champs, pour peur de ne rencontrer les Bramines, ou Naëri, nations ayans puissance de les tuer, en cas qu'ils les rencontrent par les chemins. Maintenant, suiuant ma promesse, le lieu s'offre de toucher des

*Habis du
Royet Roy
ne de Cali-
cut.*

habis du Roy & de la Royne de Calicut: lesquels vont tous nuds & déchaux, sans rien porter en la teste, ny autre part, excepté vn petit drap de cotton, ou de soye deuant leurs parties honteuses: Vray est, que certains marchans Mores portent vne chemisole venant seulement iusques à la ceinture: Les femmes aussi vont toutes nues, portans leurs cheueux espan dus sur leurs espaules. Le Roy, ny les gentilhommes de sa cour ne mangēt de chair sans la licence des Bramines, ce que neantmoins est libre aux autres sortes de gens, excepté la chair de vache: mais ceux, que l'on appelle Hitana, & Paliar, vsent de harans forets, & de poissons sechez au Soleil.

*De ceux, qui succedent au Royaume, apres le deces du Roy,
& des ceremonies que l'on y obserue. De la liberte
des Payans & changer leurs femmes.*



QUAND il auient, que le Roy va de vie à trepas, encor qu'il ait des enfans mâles, ou des neueux du côté de son frere, si est-ce que l'un ny l'autre ne succedera au Royaume, ains le fils de sa seur: que s'il n'a aucun neueu de la part de sa seur, le plus prochain du sang Royal, viendra à la couronne. La raison de cecy est grande, qui est telle, pourautant que le Bramine à eu la virginité, & premiers embrassemens de la Royne, il est dangereux, que le fils n'aissant d'elle, ne soit plutôt du Bramine que du Roy, mesmes, que toutesfois & quantes que le Roy va dehors, ce gentil Bramine demeure gardiateur

de

de la Royne luy tenant compagnie là, ou bon luy semble: & pour cette cause l'assurance est beaucoup plus grande des enfans de la seur, que du frere: ioint aussi, que le frere & la seur sont yssus tout d'un mesme corps, parquoy les enfans de la seur sont preferés aux enfans de son frere, & aux siens propres. Dauantage à la mort du Roy ils gardent ces ceremonies, que tous ceux du Royaume se font raser la barbe, & vne grande partie de leurs cheueux, laissant aussi quelque peu de la barbe, l'un plus l'autre moins, selon la discretion d'un chacun: avec vne defense & prohibition aux poissonniers de ne pescher poissons dans huit iours. Ce que s'obserue aussi quand se vient à la mort de quelque prochain parent du Roy: lequel apres ces solennités gardées, se met en deuotion, faisant vœu de ne coucher avec sa femme d'un an entier, ou bien de ne manger betoles, qui sont certaines herbes semblans à la fueille de l'orangier, viande royale, prouocant fort à la paillardise: desquelles il mange avec vn fruit, appellé par eux, Coflo, produit d'un arbre, nommé Arecha, qui semble à vn palmier, & le fruit à la date: meslant aussi avec ces fueilles, vn compost fait de l'escorce d'Astrige, qu'ils appellent Cionama. La coutume entre les gentilhommes & marchans est de toute ancienneté, de changer leurs femmes toutesfois & quantes que bon leur semble. Ce que auient presque en cette mode. Si deux marchans grans amis, se trouuent mariés, & que l'un d'eux se fache de sa femme, il dira franchement à son amy: N'auons nous pas été grans amis au temps passé? Ouy, respond l'autre. A quoy cettuy-cy replique: mais ne m'aymes tu pas autant que iamais? Ouy dit l'autre. Or bien, conclud le premier, fais moy tant de bien de prendre ma femme, & me donner la tienne. Respond l'autre, Dis-tu à bon escient? Ouy certainement, dit le premier: Je le dy à bon escient, & d'affection. Vien donq, dit l'autre, avec moy iusques en ma maison. Là ou étant arriué, il appelle sa femme, avec tels propos, Viença, va t'en avec cettuy-cy en son logis, car il est ton mary. Ouy! dit elle, est-ce pour vray? Pour vray, afferment ils tous deux: nous auons fait le marché ainsi. Bien, i'en suis contente, dit elle. Et sur l'heure ils s'en vont ensemble au logis de l'amy: lequel vse de mesmes paroles à sa femme, laquelle y consent pareillement: & par ce moyen ils font eschange de leurs femmes: mais si elles ont denfans, ils demeurent à leurs peres. Entre ces Payans se trouuera femme ayant deux, trois, quatre, cinq, six, voire iusques à sept ou huit maris, & dormira au iourd-huy avec l'un, demain avec l'autre, & ainsi consequemment. Et si elle fait denfans, elle les donnera à celuy que bon luy semble: lequel est contraint de croire à sa simple parole, receuoir l'enfant, & le faire nourrir. Quant à leur maniere de viure, ils mangent sur la terre, mettans leurs viandes dans vn bassin de cuyure, & au lieu d'une cuilliere, ils vsent des fueilles d'un arbre, & communement leurs viandes ordinaires sont, riz, poissons, espices, fruits:

*Liberté de
changer des
femmes en
Calicut.*

les deux sortes de vilains ne obseruent telle ciuilité : mais mettent les mains iusques au fond du pot, & les emplissent de riz, puis le iettent dans leurs gorges. Au reste, ils font Iustice avec grand' rigueur, tellement, que si quelcun a tué vn autre, le Roy fait prendre vn bois long de quatre brasses, bien pointu par la cyme, faisant mettre à deux pieds pres de la dite cyme, deux batons en maniere de croix, puis fait passer ce pax pointu par dedans les eschines du mal-facteur, lequel on laisse ainsi languir iusques à la mort: appellans entre eux cette maniere de iustice, Vncaluer. Si quelcun frape vn autre avec glaiue, moyenant que mort ne s'ensuiue, le Roy le condanne à certaine somme de deniers. Quant au debtes, si vn marchand doit à vn autre quelque argent, de quoy il conste par cedula, ou autres escrits, on y procede en cette sorte: que si vn marchand doit à vn autre quelque somme d'argent, & que le creditur ne les puissent auoir, encor qu'il luy aye demandé plusieurs fois, & il s'en va au Prince des Bramines du Roy, qui sont ordinairement cent : lesquels apres auoir été bien informé de la verité, luy donne en la main vne petite verge de bois verd, puis s'en va pas à pas vers son debiteur, & de la dite verge fait vn cercle rond en terre tout au tour de luy, & sil le peut enfermer dans ce cercle, il luy dit: Je te commande par la teste du Prince des Bramines, & du Roy, que tu ne partes de ce lieu, que premierement ne m'ayes payé ce que tu me dois. A ces paroles faut qu'il demeure, & qu'il le contante, autrement est contraint de morir de faim en ce lieu, pourautant qu'il est defendu à tout homme, de luy rien porter ny pour boire, ny pour manger: ioint aussi, que s'il sortoit de ce cercle, auant que l'auoir payé, il seroit condanne à la mort suiuant les ordonances Royaux. Ces Payans

*A doration
des Payans* vsent d'une maniere d'adoration, qui est telle. Le matin de bonne heure ils s'en vont lauer en vne certaine fosse pleine d'eau morte: & étans laués ils n'oseroyent toucher personne que ce soit, que preallablement ils n'ayent acóply leur adoration, laquelle ils font secretement en leur maison, ainsi: Ils s'étendent le corps en terre sur vn côté, faisans certains signes diaboliques, des yeux, & de la bouche, avec autres actes épouuentables & execrables, continuans ces cerimonies par l'espace d'un quart d'heure. Apres vient l'heure du repas: & étant pres de macher, si les viandes ne sont aprestées par vn gentilhomme, ils ne mangeront point, car les femmes n'y font point la cuisine, si ce n'est pour elles mesmes, ioint qu'elles ne font autre chose, que se lauer, & parfumer pour se trouuer plus plaisantes deuant les hommes: lesquels toutesfois & quantes qu'ils ont à faire à elles, vous les verries se farder de bains & parfuns fort exquis, encor que d'elles mesmes elles soyent odorantes, & chargées de bagues & pierreries, tant par la teste, oreilles, bras, mains, que par les doigts, iambes, & arteils, de sorte, que cest merueille de voir leur pompe.

De l'exercice des habitans de Calicut: & de leurs coutumes. Des diuerſes nations des marchans qui y habitent. Des nauires de Calicut, du temps de nauiger. De la diuerſité des ſaiſons de l'année. Du palais du Roy, & de ſon tresor.



A coutume eſt de toute ancienneté gardée iuſques au iourd'uy entre les habitans de Calicut, de ne paſſer iour ſans eſcrimer avec eſpées, rondelles, & lances: tellement, qu'ils ſont preſques tous gens de guerre, ayans tout expreſ pour ce fait, les plus ſauans & ſubtils maîtres qui ſe peuſſent trouuer en l'vniuers: & quand le Roy va en guerre, il eſt touſiours aſſeuré de leuer cent miles hommes de pied bien combatans: portans pour liurée, vne bande de ſoye rouge liée alentour de la teſte, armés deſpées, rondelles, lances, & arcs, & au lieu d'un eſtandart ou banniere du Roy, ils ont ie ne ſay quelle choſe ronde faite de fueilles d'arbre tiffues enſemble en forme d'un fond de boite, puis l'attache au plus haut d'une canne, portans cela deuant le Roy, comme pour donner ombrage à ſa teſte. Et quand ſe vient à approcher du camp des ennemis, environ deux trais d'arbalètes, le Roy cōmande aux Bramines d'aller au camp des ennemis, & dire au Roy, qu'il viēne avec cens de ſes Naëri, & qu'il ſ'y trouuera avec cens de ſiens: Et par ce moyen l'un & l'autre ſauance iuſques à my chemin, & là commencent à ſe bien froter à beaux cops de tailles, pour autant qu'ils n'vſent iamais d'eſtoc, encor que la bataille durât trois iours entiers: mais ils tirent deux cops de la main droite contre la teſte, & vn contre les iambes: & ſi toſt que quatre ou ſix ſont mors tant d'un côté que d'autre, les Bramines ſe mettent entre deux, & les ſeparent, commandans que chacun ait à ſe retirer à ſon camp: auquel ils vont eux meſmes, vſans de tels propos. En voulés vous plus? Non, reſpond le Roy: & autant en fait la partie aduerſe. Voylà les moyens de ſe combatre entr'eux, cent contre cent. Le Roy va quelque fois ſébatre en la campagne, monté ſur de chameaux, d'autre fois porté par ſes Naëri, leſquels vont touſiours courans: ayant gage de luy en temps de paix, quarante Carlins par mois, en guerre, deux ducats: & deuant le Roy marchent les Muſiciens avec leurs inſtrumens & harmonies. Ces Naëri ont les dens noires, à cauſe de l'herbe de Bethole, qu'ils mangent, comme auons ia dit cy deſus: & quand ils ſont morts, on les brule dans vne foſſe faite avec grandes ſolennités, meſmes qu'aucuns gardent leurs cendres: mais quand au commun peuple, ſ'il y a quelcun de mort, il eſt enterré au dedans, ou deuant la porte de ſa maiſon, ou en la rue, ou en leurs caues, ou bien au plus beau iardin qu'ils ayent. La monnoye y eſt batue, nō plus ny moins que à Narſinga: qui cauſe avec les autres trafiques, qu'il y a grāde quantité de marchans étrangers, de diuers Royaumes, & nations, cōme l'ay veu, en mēquerant dont venoit ſi grand nombre de marchans, à quoy ont me fait reſponſe, que c'étoit lordinaire

de voir à Calicut innumerables marchans Mores tant de Malacca, Banghella, Tarnasseri, Pego, Giormandel, & Zeilam, que de l'Isle Sinaatra, de Colon, Caicolon, Bathacala, Dabuli, Ceul, Cambaia, Guzerati, Ormus, & de la Mecca: outre ceux, qui viennent de Perse, de l'Arabie heureuse, de Surie, Turquie, & quelques vns de l'Ethiopie, & de Narfinga: desquelles nations & Royaumes se trouuerent à force marchans dans Calicut, pour lors que i'y étoy, mesmement de Mores, qui faisoient bien en nombre de quinze miles hommes, y trafiquans en fait de marchandise: vray est, que les gens de ce pais ne sortent volontiers hors de leurs limites: & ne fera mal à propos de vous declarer la mode de nauiger des peuples tant habitans que circonuofins de Calicut, en quel temps de l'année, ils se mettent sur mer, & de la façon de leurs nauires: qui portent chacune quatre ou cinq cens botes: & lors qu'ils les fabriquent, ils sont à decouuert, ne mettans entre les aiz ny estoupes, ny mouce, comme nous faisons pardeça: mais ils ioignent si bien les pieces, que leau n'y peut entrer, & appliquent la poix par dehors, les serrant avec force clous. Les voiles de leurs nauires sont faites de futaine, & y a au pied de chacune voile vne autre antene, de laquelle ils se seruent pour mieux auoir le vent en poupe, quand il est besoing, combien que nous n'vsions ordinairement que d'une seule: & ont aussi leurs ancres faites d'une piece de marbre long de huit pieds, & d'une palme en carreure de tous côtés, dont chacun marbre est attaché à deux grosses cordes, pour plus aisément les manier. Quant à leur nauigation, elle est telle, que de Perse iusques au Cap de Cumeri, distant huit iournées de Calicut: on peut nauiger par huit mois de l'année, assauoir depuis le commencement de Septembre iusques à la fin d'Auril par la côte du Midy: mais depuis le premier de May iusques à la fin d'Aoust ne faut suiure cette côte, pour ce qu'en ce temps là il regne grand' tempeste sur la mer, dont auient souvent merueilleuses defortunes. En ce pais là, les saisons du temps sont toutes contraires à celles de nôtre pais, tellement, que lors que nous sommes batus de si ardens chaleurs, que les herbes en sont routies, en ce pais-là elles sont verdes & fresches, pour cause des grandes eaux, qui y tombent la nuit par interualles, es mois de May, Iuin, Iuillet, & Aoust, le Soleil ne se monstrant point pour ce temps-là: mais durant les autres six mois il n'y pleut point. A là fin donq d'Auril ils partent de la côte de Calicut, & outrepassent le Cap de Cumeri, & entrent en vne autre nauigation, qui est fort seure pour ces quatres mois, se seruans de petites nauires, lesquelles ils chargent de menues espices: & ont plusieurs sortes de nauires, appellans les vnes Zambuchi, qui sont planes par desouz: les autres Campanes, faites à nôtre vsage: aucunes sappellent Parao, qui sont bateaux longs de dix pas, faits tous d'une piece, conduits avec rames faites de Cannes: combien

qu'ils

qu'il s'y en trouuent d'autres semblablement d'une piece, de la longueur de quinze, ou seize pas, nommées Almadies: esquelles on vse de voyles, & de rames. D'autres s'appellent Cathuri, faites aussi d'une piece, conduites par voyles, & rames, étans de la longueur de douze ou treize pas, mais tât étroites de bouche, que deux hommes n'y peuuent aller de front: & sont fort agues des deux côtés, tranchans mieux l'eau, que galere, fuste, ou brigantin que l'on sceût trouuer: & se font par les Corsaires de mer en vne Ile prochaine de Calicut, nommée Porcay. Auant que passer outre, il faut icy noter, que le Roy de Calicut a vn fort magnifique, & braue palais cō tenāt vn mille de circuit, ceint de basses murailles, pour la raison que vous ay dit cy dessus: enrichy de belles chambres, & sales, ou il ya de superbes & riches trauerriers chargés deffigies de diables, entretailés de relief: la plaine pauée de grandes pierres de diuerses couleurs. J'ay desia touché cy dessus pourquoy c'est, que les edifices ne sont eleués plus haut, qui est pour ce que en voulant sonder plus bas pour faire les fondemens, l'on trouue incōtinēt l'eau: mais sans cela les murailles de ce chateau ne laissent d'être bien estimées, encor qu'elles soyēt basses. Ce Roy se charge tāt de bagues, & pierreries, que l'on ne sauroit estimer le thresor, qu'il porte ordinairement: & cōbien que du temps que ie le vey il fut fort déplaisant de quelque differāt qu'il auoit avec le Roy de Portugal, & outre le mal de Naple qui le tormentoit: si ne laissoit il pas de garnir sa teste, ses oreilles, ses bras, doigts, pieds & iambes de pierres, & perles fines. Son thresor est dans deux magasins, pleins d'or, & de monnoye batue, en si grande quantité, que selon le raport de ses financiers, cent mulets ne les pourroyent porter: ayant le sus dit Seigneur, outre cela, vn coffre de trois pieds de long, & d'un & demy de hauteur, remply de bagues, & pierreries, tellement que l'on ne sauroit estimer la valeur. Voila les thresors de ce Roy, qui sont venus en partie de dix ou douze Roys ses predecesseurs, qui y ont tousiours fait vn fond d'or & d'argent, à fin de suruenir à la Republique, & au Royau me, quand besoin seroit.

*Le palais
du Roy de
Calicut.*

*Du poyure, gingembre, & myrabolan
croissant à Calicut.*



V D I T Royaume de Calicut se trouuent plusieurs arbres produifans le poyure, lesquels ont leur pied ressemblant à la seppe d'une vigne, pource que on les plante aupres de quelque arbre, ou bien met on vne piece de bois aupres, tant à fin de se soutenir, que pour ce qu'ils montent iusques au plus haut de l'arbre, ou ils sont appuyés, tout ainsi que fait le lierre. La premiere branche de cet arbre produit vn grand amas d'autres branches, longues de deux ou de trois palmes. La fueille étant comme celle de cheneue, avec plusieurs menues veines, & entre les branches sortent certaines petites grapes lōgues comme le doigt d'un homme, produifans quelques petites fleurs de couleur azurée, dans lesquelles croist le poyure en petis grains, de couleur tannée & blanchatre,

qui se recueil es moys d'Octobre, & Novembre, puis on le seiche au Soleil iusques à ce, qu'il deuiet noir, ainsi comme nous le voyons icy, mais il faut icy noter, que iamais on ne taille cet arbre. En ceterroir mesme naist le gingembre, qui est vne racine, pesante quatre, huit, ou douze onces, ayant deux ou trois palmes de longueur: & pour l'entretenir l'on prent le ietton, & le plante on au lieu de l'autre, en le courant de la terre mesme: puis en l'an suiuant on le trouue fort multiplié. Cette racine demande vne terre rouge, croissant aussi bien es montagnes, comme en pais plat, comme font les Myrabolans, desquels l'on trouue en aussi grande abondance, comme de poyure. D'auantage, ie trouuay en Calicut vne autre sorte de fruit, nommé Cicara, ayant le pied comme vne espine, & le fruit presque aussi gros, que la cuisse d'un homme, long d'une palme: & croist dans le tronc de l'arbre, entre la fueille & l'espine, étant au commencement de couleur verte, puis à la fin deuenant violette, & noire, mais soudain qu'il est meur, il se corrompt: & a vne fort bõne odeur, & au manger ressemble les melons muscats, au reste, fort doux: & parmy le pepin se trouuent de petites toilettes, delicates & menues comme celles, qui sont dans la pomme de grenade: & selon mon iugement cest le meilleur fruit, que ie mangey onques: lequel est appellé en Indie, pigne, en France, pommes d'Amours. On y trouue aussi vn autre fruit, nommé Amba, & son pied, Manga. Cet arbre ressemble vn poyrier de nôtre pais, & le fruit est semblable à noz noix, gardant cette forme deuant le moys d'Aoult, mais quand il est meur, il deuiet doux, & reluyfant; & est de meilleur goût que n'est la pomme Damascene, outre ce, qu'au dedans y a vn bon noyau sec, comme d'une amandre: de sorte, que tant du fruit, que du noyau, l'on fait de compost non plus ny moins que d'oliues. Ce pais produit aussi vn autre fruit ressemblant au melon, ayant au dedans cinq ou six gros grains, qui ressemblent aux grumes de raisin. L'arbre est de la grosseur, & hauteur d'un coingnier, & de fueilles semblables: produisant vn fruit bon à manger, & encor meilleur à apliquer en medicine, lequel on appelle communément Corcoxal. I' y trouuay encor vn autre fruit, qui étoit, à dire vray comme vne mesple, mais de couleur ressemblant à vne pomme blanche, il ne me souuiet de son nom: combien que ie n'aye oblié sa bonne faueur. I' y vey d'auantage vn autre sorte de fruit, de la couleur d'une courle, ayant deux pieds de long, toutesfois à manger plus delicat, que la courle: laquelle on appelle Comolanga, croissant dans terre à la mode des melons. Il s'y voit aussi vn autre fruit tres singulier, appellé Melapolanda. Cette plante est de l'hauteur d'un homme, ou vn peu d'auantage, faisant quatre ou cinq fueilles si grande, qu'elles peuuent couvrir & garder vn homme de la pluye & du Soleil: & de là vient à sortir vn rameau qui rend les fleurs semblables à ceux d'une Feue: produisant en apres son fruit, long d'un pied & demy, & plus gros que le bras d'un homme: en telle abondance, que chacune branche porte bien cent ou deux cens de

ces fruits : lesquels il faut cueillir à demy verds, pourautant qu'ils viennent à leur maturité, étans dans la maison. Et se trouuent trois especes de ce fruit, dont les vns s'appellent Ciamcapalon, qui sont fort cordials à manger, ayans la couleur vermeille, l'escorce delicate: l'autre espece s'appelle Cadelapolon, étant ce fruit encor meilleur, que le premier: la troisieme sorte, n'est pareille aux deux precedentes quand à la bonté, ressemblant à la figue de nôtre país: mais sont plus exquisés en toute perfection: & la plante d'iceux porte vne fois par an, puis deuient seiche, & fait trente ou quarante iettons tout à l'entour de foy, que les laboureurs replantent pour en auoir des nouveaux tous les ans: & en taillant les rameaux, qui sont encor tous verds, ils mettent vn peu de chaux dessus le fruit, pour l'auancer de meurir, qui est cause qu'on y trouue de ces fruits par toute l'année en telle abondance, que l'on en baille vingt pour vn quatin. & semblablement est de toutes autres petites singularités, comme fleurs, roses blanches, rouges, & vermeilles, d'une tresbonne senteur.

Ciamcapalon fruit.

Du Cochos, qui porte les nois d'Inde, arbre le plus frutier qui soit au Monde. La maniere de semer le riz à Calicut:

Et la mode de visiter les malades. Et comment on nourrist les petis enfans.



P R E S auoir descrit par le menu des sortes d'arbres & fruits, qui se retrouuent en Calicut, ie ne veux mettre en arriere le Tenga, qui est le meilleur arbre de tout le Monde, ressemblant par le pied, au datier, duquel on reçoit miles commodités: car s'il auient qu'allés sur mer, ce fruit est fort propre pour donner bon cœur, outre ce, que l'on en fait de si bonne teinture, que les draps semblét après être de foye, & est cette nois fort delicate au manger, le vin aussi, l'eau, l'huyle, & le sucre, & des fueilles on en couure les maisons, pourautant qu'elles portent l'eau vn demy an. Si ie vouloy vous dechiffrer par le menu toutes les grandes commodités prouenant tant de cet arbre, que de son fruit, à peine me croiriés vous, & encor ne me pourriés entédre. Il produit plusieurs branches, & chacune branche porte cent ou deux cens nois avec vne escorce iettant à force cheueux, comme d'un homme en maniere de lin ou de cheneue, que les maitres ouuriers acoutre: La fleur sert, comme auons ia dit, pour teindre les draps en foye: mais du gros fil, que l'on y trouue, on en fait de petites cordes, & du delié, on en fait de grosses, lesquelles seruent sur mer. Il y a encor vne autre escorce, qui est propre à faire de charbon: & apres auoir leué cette escorce, on trouue la nois, qui est vn singulier manger, & plus delicat que l'amandre, étant de la grosseur du petit doigt de la main: & quand se vient quelle commence à croistre, vous trouuerés au dedans vn peu d'eau, laquelle y croist tousiours iusques à ce que la nois soit en sa perfection, alors sera pleine d'eau, de sorte, qu'il y en a telle, qui porte plus de deux verres d'eau, qui est douce à merueille, & se fait de cette nois d'huyle bonne en toute perfection, par ainsi vous

Tenga arbre.

aués sept grandes commodités de cet arbre:lequel, quand il est grand, & chargé de plusieurs branches, on ne le laisse porter entierement, mais on le taille par le my-lieu, en faisant vne fente avec vn couteau: puis met on au desouz vn petit vaisseau pour en receuoir la liqueur, qui en iette telle abondance, que tant la nuit que le iour on en peut leuer vne bouchée, laquelle est fort odoriferante, & bonne à boire, & aucuns la chaufent au feu pour la rēdre encor plus delicate, & apres qu'elle a passé deux ou trois fois par le feu, elle semble d'eau viue, bonne seulement au sentir, pource que quand l'on en boit en quantité, elle trouble le cerueau de l'homme. D'une autre branche on extrait semblablement le ius, lequel avec le feu se conuertist en sucre, mais il n'est guere bon. Cet arbre n'est iamais sans fruit, ou meur, ou verd, commençant à porter dans cinq ans: & y en a plus de deux cens miles en ce pais-là, appartenans tous à diuers maitres: & quād les Roys font guerre les vns contre les autres, tant cruelles soit elle, voire iusques à tuer leurs enfans, ils sont conuertis en paix par la vertu & excellence de cet arbre: mais sil auenoit qu'un Roy copât vne seule branche d'un d'yeux appartenans à vn autre Roy, guerre immortelle seroit ouuerte, sans espoir d'auoir iamais paix. Il croist en lieu areneux: & apres que l'on a planté la nois, & qu'elle commence à germer, on la tient couuerte tout le lōg du iour pour la defendre du Soleil: mais sur la nuit on la découure, à fin de receuoir la rosée, & puis des le matin on la recouure, & par ce moyen croist, & deuiet vn grand arbre. Dauantage, on trouue en ce pais de Calicut vne grande quantité d'arbres, qu'ils appellent Zerzelin, du quel ils font de tresbon huile. Les habitans voulant semer le riz, gardent cette façon de faire. Premièrement ils labourent la terre avec de beufs, tout ainsi que nous faisons: en apres ils le sement avec grande solennité, ayans incessammēt à force tabourins, fleutes, violons, & haubois, sonnans sans cesse, avec dix ou douze hommes habillés en diables, dançans, sautās, menans grande lieffe, à celle fin, que le diable produise grād fruit de cette semence. Ce que aussi a lieu entre les mediciens: car quand quelque marchand ou autre est malade, iusques à l'extremité, quelques vns à ce députés les vont visiter, habillés en diables, & acompagnés de tous ces susdits instrumens, appellans entr'eux cette maniere de gens, mediciens: lesquels ainsi acoutrés partent à deux ou trois heures de la nuit, portans le feu en la bouche, qui leur reluist par les yeux & narilles, crians & bramans avec vn grand tintamarre au son de ces instrumēs, de sorte, que tel qui ne seroit point malade, à les voir seulement ainsi coifés, tomberoit en acces de la mort. Et quād il auient qu'aucuns d'eux se sentent replets iusques à la gorge, ils prennēt trois ou quatre racines de gimgēbre, qu'ils broyent, puis le boyuent, étans assurés d'être gueris dans trois iours, & par ainsi ils viuēt tous ny plus ny moins que les bestes. Les banquiers & chāgeurs de Calicut vsent d'un si petit poids, que la boite, ou l'on tient le trebuchet, ou balance, avec tous les poids ensemble ne pese pas vne once: ioint que le poids est si iuste,

*Zerzelin
arbre.*

*La mode de
semer le riz
au pais de
Calicut.*

*Medicins
d'étrāge fa-
con en Cali-
cut.*

*Banquiers
de Calicut.*

iuste, que pour vn cheueu de teste il trebuche: & quand ils veulēt toucher quelque poids d'or, ils le font avec carras d'or comme nous, ayant aussi les parangons de telle sorte, desquels ils se seruent, & ensemble de la touche, tout ainsi que nous faisons, & en iugent de mesme, vray est, que les changeurs sont fort subtils en leur art. Les marchans ont coutume de vendre en gros leurs marchandises, par le moyen des corratiers, ce qui se fait en cette maniere. Quand l'acheteur, & le vendeur veulent acorder du pris, ils se mettent tous deux dans vn cercle rond: Lors le corratier prend vne seruiete la tenant d'une main publiquement deuant le monde, & de l'autre main, il prend les deux doigts prochains du pouce du vendeur, puis il couure de la seruiete sa main, & celle du vendeur: lesquels tous deux ensemble sans dire vn seul mot se manient les iointes des doigts, & par ce manierement content en secret de puis vn ducat, iusques à cens miles, sans dire, ien veul tant, & tant: ains en touchant seulement leurs iointures, ils sentent du pris, disans ouy, ou non: Et le corratier respond, ouy, ou nō: lequel apres auoir sceu la volonte du vendeur, s'en va vers l'acheteur, & pareillemēt prend ses doigts, les courant de sa seruiette, & par semblables touchemens, luy donne à entendre, que le vendeur veut auoir autant de sa marchandise: à quoy l'acheteur luy fait responce par mesmes signes, qu'il n'en veut donner que tant: & par ces moyens demenent leurs marchandises. Si la marchandise est espices, ils parlēt à Bahar, qui est vn poids pesant six cens quarantes liures à la façon de Venise, & vne farazole pese trentedeux liures de Venise, faisant vingt farazoles vne Bahar. Les fēmes de ces deux nations, assauoir Poliares, & Hitanes, allaitent elles mesmes leurs enfans par l'espace d'environ trois moys, les nourrissans en-apres de lait de vache, ou de cheure: puis quand ils ont le ventre, & l'estomac bien remplis au lieu de leur lauer le visage, les mains, & autres parties du corps, elles les couchent dans l'areine, la face contre bas, leur couurant vne partie du corps avec de sable: dans laquelle ils se vautrillent, de sorte, que vous iugeriez que ce sont de petis loups, ou de petis ours, ou bien vne chose contrefaite & bâtie en depot de nature, mesmement qu'ils sont plus noirs, qu' autrement: car l'on diroit, que le diable les a nourris. Apres qu'ils ont demeuré là tout au long du iour, quand la nuit approche, leurs meres viennent les visiter, leurs aportans à manger. Ceux, qui sont nourris en cette maniere, se trouuent les plus dextres, tant pour courir, sauter, & dancier, que pour cheuaucher, que l'on sache trouuer en tout l'vniuers.

Etrange maniere de nourrir les petis enfans dans le sable.

*Des bestes & oyseaux, que l'on trouue en Calicut,
& les diuerses sortes de serpens.*



MAINTENANT me semble venir bien à propos, de parler de la variété des bestes & oyseaux, qui se trouuent au pais de Calicut en vne infinie quantité, mesmement de porcs sangliers, Cheureils, Loups, Beufs, Vaches, Beufles, Cerfs, Biches, Cheures, & Elephās: lesquels neantmoins ne naissent au pais, mais y sont amenés de diuers lieux

& Royaumes, avec vn grand nombre de pauons sauuages, papegaux, les vns escartelés de rouge, & d'azur, les autres gris, qui sont si drus, que l'on est contraint de garder le riz semé en terre, autrement ils le mangeroyēt: qui est cause qu'ils sont à si vil pris, que la piece de ceux, qui chatent formellement bien, se donne pour deux quatrins. I'y vey aussi vne autre sorte d'oiseaux, qu'ils appellent Saru, lesquels chantent encor mieux que les Papegaux, combien qu'ils soyent plus petis: & outre ceux-cy il y a vn nombre infiny de toutes sortes differans à ceux de pardeça, qui font vne telle & si douce harmonie de leur chant, qu'il n'y a plus grand plaisir au Monde, que de les ouyr seulement vne heure du matin, & autant du soir. D'auantage, il conuient noter, que ce país est enrichy de plusieurs & diuers arbres, les vns verds, les autres fleuris, les autres chargés de fruits, cela provenant de la bonté de l'air, qui y est si temperé en tout temps, que l'on ny sent iamais ny trop grand froid, ny extreme chaleur. Ce país aussi a grande quantité de chats, & marmots, lesquels ne se vendēt que quatre casses la piece, qui vallent chacune, vn quattrin d'Italie: mais cette vermine porte grand dōmage aux habitans, qui font les vins des arbres, dou auons parlé cy desus, qui ressemblent au datille: pour autant que ces bestes montēt au sommet de l'arbre, & apres qu'ils ont beu le vin, ils réuersent le pot, & espāchent ce, qu'ils n'ont sceu boyre. On y trouue aussi de serpens d'étrange façon, naissans dans certains marefcages, estans de l'hauteur & du corps d'un gros porceau, avec vne teste plus grosse & plus laide, que d'un porceau, & quatre pieds, longs chacū de quatre brasses: n'étās toutesfois venimeux, mais au reste fort dangereux, & dommageables aux habitans, cōme ils en font raport: & encor outre ceux-cy, se trouuent trois autres sortes de serpens si venimeux, que d'une morsure iusques au sang, l'homme tombe tout mort par terre: Ce qu'est auenu de mon tēps par plusieurs fois à diuerses personnes touchées de ces bestes, desquels on conte trois especes: Les vns sont aspics sourds, les autres scoursions, le autres trois fois plus grans que scoursions: & de ceux-cy y en a en grande quantité, pour autāt que quand le Roy sçait pour vray ou est leur habitation, il leur fait bâtir vne petite maison pour se retirer, lors que les eaux croissent ou par pluye, ou par autre inondation, ioint aussi, que si quelcun auoit tué vne de ces bestes, le Roy le feroit mourir tout sur l'heure, tout ainsi, que s'il auoit occis vn homme: & autant en feroit il, si quelcun se trouue auoir tué vne vache. Le habitans de ce país ont vne fole, & supersticieuse opinion de ces bestes, estimās qu'ils soyent les esprits de Dieu: Que si ainsi n'étoit ils n'auoyent la puissance de mettre vn homme à mort par leur simple morsure: de sorte, que ces animaux ont le credit de se promener par my la ville, cognoissans bien ceux, qui ne les craignent pas, auxquels ne font mal quelconque: combien que de mon temps il soit auenu, que par vne nuit l'un de ces animaux entra dans vne maison, ou il mordit neuf personnes, que l'on trouua le matin ensuiuant tous mors & enflés,

*Des serpens
de Calicut.*

*Punition
par le Roy
de Calicut,
a ceux qui
font mal
aux serpens.*

& non

& nonobstant cela, ils ne laissent de les auoir en admiration, tellement, que si en allant en quelque voyage ils rencontrent vne de ces bestes, ils le reputent à bon heur, esperans de cela, que leur affaire & entreprinse ne peut venir, qu'à bon port.

Des lumieres du Roy de Calicut: Des ceremonies gardées aux trepassés: & du grand nombre de peuple qui vient à Calicut pour gagner les pardons.



A maison du Roy de Calicut a plusieurs sales & chambres, dans lesquelles, principalement la nuit, il ya vn nombre infiny de lampes ardantes, & specialement en la sale du Roy ou y a dix ou douze grans vaisseaux de Lethon faits en mode de fontaines, de l'hautteur d'un homme: dont chacun d'eux a trois lampes eleuées en haut environ vn pied pour tenir l'huyle, avec des méches de cotton flamboyantes tout au tour: & au dessus de ceux sont aussi trois plus petis & étroits vaisseaux, remplis semblablement d'huyle comme les autres, en apres au troisieme étage y a encor vne autre lampe equipée de mesme que les autres. Le pied de ce grand vaisseau est fait en triangle, étant sur la face de chacun pied, vn diable tant subtilement fait en relief, que c'est chose espouventable à voir: auquel les escuyers du Roy allument. Ce Roy a de coutume, quand quelcun de ses prochains parens est mort, apres l'an reuolu, inuiter tous ses alliés, amis, & principaux Bramines de son Royaume, & par fois, les étrangers, leur faisant vn magnifique festin par trois iours durans avec superbes & Royaux appareils, qui sont, du riz acoutré en diuerses sortes, chair de sanglier, de cerf, de biche, vache à foison, & au bout des trois iours le Roy fait present à chacun, de trois, quatre, ou cinq ducats, dont apres on se retire en sa maison: & ceux du país pour signe de ioye, se font raser vne partie de leur barbe. Et conuient icy noter, qu'aupres de Calicut y a vn temple assis au my-lieu d'un estang, bâti à l'antique avec deux rangs de colonnes, comme est saint lean dans Romme, & au dedans y a vn grand autel de pierre, ou se font les sacrifices, & au pied de chacune colonne sont deux pierres creusées, faites en mode de petites nauires distantes deux pas l'une de l'autre, pleines dun certain huyle, qu'on appelle Enna: & autour du riuage dudit estang y a vne grande quantité d'arbres tous d'une espece, ou sont attachées des lampes ardantes en nombre infiny, & autour du temple sont allumés à force feuz. Et quand se vient au vingt & cinquieme de Decembre, qui est le iour de Noël, tous les gentils hommes & Bramines de vingtinq iournées à l'environ s'assemblent là pour faire sacrifice, étans aussi acompagnés de tout le menu peuple, qui y est venu, pour gagner les pardons: mais premier que faire le sacrifice, ils se lauent tous dans l'estang, & puis les principaux Bramines du Roy montent à cheual sur les pierres susdi-

tes pleines d'huyle, s'aprouchant le peuple de ces Bramines, qui leur oignent à tous la teste de cet huyle, & apres s'en vont faire leur sacrifice sur l'autel de pierre, lequel a au defus, à côté, vn grand Satan avec sa face laide & espouventable: lequel tout ce peuple adore, en se prosternant contre terre: puis cela fait, chacun s'en retourne en sa maison: & durans ces trois iours, il y a si grande liberté & franchise par toute la terre, que tous, mesmes les bannis & mal-fauteurs peuuent venir en assurance à ce pardon, ioint qu'il n'est permis de se venger l'un cõtre l'autre. En verité ie ne vey iamais pour vne fois telle assemblée de gens, excepté lors que i'étoy à Mecca. Il me semble auoir assés amplemēt escrit des coutumes, de la mode de viure, de la religion & sacrifices de Calicut: maintenant donq ie passeray outre, descruant le reste de mon voyage, avec les auentures, qui m'y sont suruenues.

Troisieme partie de l'Indie.

*De la cité de Caicolon, Colon, Chail, Cholmendel,
& Zeilan, Citez d'Indie.*



On compaignon nommé Cazazionor, voyant qu'il ne pouuoit vendre sa marchandise, pourautant que Calicut étoit en partie défait par le Roy de Portugal, de sorte, que les marchans acoutumés n'y venoyent plus, fut d'auis de prendre vn autre chemin. La cause de cette ruine, & du débauchement des marchans, vint de là, que le Roy de Calicut donna congé à certains Mores, de tuer quarantefix Portugés, lesquels ie vey tous mors: de quoy le Roy de Portugal se sentant fort offensé, a tousiours depuis ce temps là fait la guerre aux habitans de Calicut: desquels en a fait mourir & fait tuer tous les iours en grande quantité: au moyen de quoy la cité en est grãdement dépeuplée, ioint aussi, que plusieurs des habitans se sont retirez autre part: & nous mesmes primmes nôtre chemin par vne riuere, la plus belle, que ie vey

Caicolõ. onques, & vimmes arriuer à Caicolon distante cinquante lieues de Calicut: laquelle a vn Roy Payan, homme de petite puissance: au reste, leur maniere de viure, les habits & coutume, l'assiete de la ville, & la temperature de l'air mesmes, qu'à Calicut. Il y a grãd aport de plusieurs marchandises, principalemēt à l'occasiõ du poyure, qui y croist: entre autres, nous y trouuames quelques Chrétiens habitãs de l'Île S. Thomas, qui sont marchãs, croyãs en Dieu, cõme nous, & disēt, que de trois en trois ans il y viēt vn prestre pour les batizer, passant de là, iusques en Babylone. Ces Chrétiens ieunēt la carefme, faisāt Pasques, & gardãs toutes les solénités & festes des saints & saintes, comme nous: mais ils celebrent la messe à la Greque, ayans

ayans sur tout en reuerence , quatre saints , assauoir S. Jean , S. Iaques , S. Matthieu , & S. Thomas. Apres auoir là demeuré par l'espace de trois iours , pour sui uans noz erres , nous paruimmes à Colon , cité distante de *Colon.* la sus dite , enuiron vingt cinq milles , gouuernée par vn Roy Payan , riche & puissant , faisant ordinairement train de vingt cinq miles hommes de cheual , avec grand nombre d'archiers , se tenant tousiours sur ses gardes , à cause qu'il a incessamment guerre contre les autres Roys. Cette vile est enrichie d'un beau port prochain de la marine , mais il y a vn mal , qu'on n'y recueille point de grains , combien quelle soit tresopulente en toutes sortes de fruits , qui se retrouuent à Calicut , mesme-ment en poyure : les habitans ne sont differans en rien à ceux de Calicut , quât à la couleur , habit , coutumes , & maniere de viure. Et encor que du temps , que i'y étoy , le Roy s'estoit fait grand amy du Roy de Portugal , si est-ce , qu'il auoit plusieurs grosses guerres avec d'autres Roys : qui nous causa ne faire là plus long seiour , ains faisans voyles , vimmes à vne autre vile nommée Chail , appartenante au Roy de Colon : là ou nous *Chail.* veimes pescher les perles comme nous auons dit cy dessus d'Ormus. Passans plus outre , nous arriuames dans Cholmendel , vile marine , di-*Cholmē del.* stante sept iournées de Colon , ou enuiron , selon que le vent est en poupe , ou autrement : étant de grande étendue , sans murailles , souz la puissance du Roy de Narsinga , située à l'opposite de Zeilan , apres que l'on a passé le Cap de Cumeri : laquelle est le droit chemin pour aller en diuers païs , & est l'aport de plusieurs marchans Mores , y trafiquans. Elle est principalement abondante en riz , & en toutes sortes de grains desquels on vse à Calicut , mais n'y naissent aucunes espices. I'y trouuay quelques Chrétiens , qui affermerent que le corps de S. Thomas n'étoyt que de douze miles loing de là , gardé par des Chrétiens , qui neantmoins avec grand peine , & danger viuoyent en ces païs , pourautant que le Roy de Portugal auoit tué plusieurs de ces Mores , lesquels depuis lors ont tousiours eu vne dent de lait contre les Chrétiens , ne les voulans endurer au païs , ains en tous lieux ou ils pouuoient mettre la main de sus , ils les mettoyent à sac , moyennant que ce fût en secret : autrement y auoit danger pour eux , si les affaires fussent venus iusques à l'oreille du Roy de Narsinga , qui porte grand faueur aux Chrétiens principalement aux Portugés. Ils me racontèrent vn grand miracle adueni depuis cinq ans , du temps que les Mores entrerent en combat avec les Chrétiens , ou il y eut tell' escarmouche , que d'un côté & d'autre plusieurs furent blessés , & entr'autres vn Chrétien lourdement frappé au bras , lequel se retira soudain à la sepulture de S. Thomas , laquelle il neut pas plustost touchée , qu'il fut guery : qui fut cause de la grand' amitié que le Roy de Narsinga porte au Chrétiens. Mon compa-
gnon y déploya quelque peu de sa marchandise : mais ne y feimes long seiour , pourautant que ceux de Cholmendel étoient batus de guer-
re par

*Zeilan
Ile.*

re par le Roy de Tarnassari, & par ainsi nous meimes de cōpagnie avec quelques marchans dans vne petite nauire, de celles que l'on appelle Cāpanes, plates par desouz, à cause que nos demandions peu d'eau, encor que fusions assez chargés de marchandises: mais cela nous causa vn grand danger en passant vn golfe long de douze ou quinze lieûes, lequel trauerçant, nous rencontrames plusieurs rochers & lieux sablonneux, toutefois nous en sortimes sauues, gagnans à la parfin vne Ile nommée Zeilan, contenant, selon le dire des habitans, cinq lieûes de circuit: en laquelle y a quatre Roys payans, qui ont grand guerre ensemble: ce que nous feit auancer nôtre depart, n'ayant loysir de visiter les choses memorables, toutefois vous en conteray ce que i'en ay veu: il y a grande quantité d'Elephans tant grans que petis, lesquels y naissent, & enuiron deux milles pres la marine à force rubis, comme l'on nous donna à entendre, qui se trouuent, au pied d'une grande & longue montagne: mais il n'est loysible d'y chercher sans le congé du Roy, lequel vend cette terre à belles brasées en toute carreure qu'ils appellent vn molar, & coute chacun molar cinq ducas, tellemēt que vous en pouués acheter vn, deux, ou trois, selon que bon vous semble: puis faites chauer la terre, parmy laquelle vous trouués à force pierres fines & riches: mais ce pendant que cerchés, il y a en personne vn commissaire estably de par le Roy, qui leue tout ce qui passe le pris de dix carats, le reste demeurant franc au marchand. Il court encor au pres de cette montagne vn autre riuere, sablonneuse, ou l'on trouue grande quantité de Grenats, Rubis, Saphis, Iacintes, & Topases. Cette Ile, outre ces singularités, est riche en fruits de parfaite bonté, mesmement en oranges douces, les meilleures, qui soyent en tout l'vniuers, & autres fruits semblables à ceux de Calicut, mais sans comparaison, plus souuerains.

De labre portant la Cannelle. De la montagne, ou Adam feit penitence. Des Roys de Zeilan & leurs coutumes. De Paleachale, Tarnassari, & la coutume des habitans à faire depuceler leurs femmes.



Arbre de la Cannelle ressemble proprement au Laurier, principalement quant à la fueille, & aux grains qu'il porte, vray est, qu'ils sont plus petis, & plus blancs, n'étans ladite Cānelle, ou cynnamome, autre choses, que l'escorce de cet arbre, extraite par tel moyen: De trois en trois ans on taille les branches de cet arbre, desquelles on en leue l'escorce, qui n'a pour lors aucune bonne senteur, si on dans vn moys apres. Vn More nous dit, que au sommet de la montagne y a vne grande & profonde cauerne, ou descendoient vne fois l'an tous les habitans de ce pais, pour y faire leur oraison, pour autāt que nôtre premier pere Adā demeura là dedans pour plorer ses pechés, depuis qu'il eut offensé Dieu, iusques à ce qu'il en obtint pardon, & que pour tesmoignage
de cela

de cela, les marques de ses pieds y sont encor aujourd-huy visibles & apparentes, cōtenans de longueur environ deux pieds. Le riz ne croist en toute cette Ile, mais on l'y aporte des autres païs: qui cause, que ces Roys sont tributaires au Roy de Narsinga, d'ou vient le riz. L'air y est fort doux, n'aportant ny trop grand, chaleur, ny extreme froid, pource que ce lieu n'est éloigné de la ligne Equinoctiale, que de sept ou huit degrez. Les habitans sont de couleur tannée obscur, & vsent d'habits trossés à l'apostolique, faits de certains draps de coton, ou de soye, allans les iambes & pieds tous nuds: n'étans de leur naturel gens trop belliqueux, ny qui ayent la cognoissance de l'artillerie, ains se seruent d'espées, & de lances faites de cannes, & combien que avec ces armes ils ayent guerres les vns contre les autres, si est-ce qu'ils n'en tuent ny blessent guere, à cause que ce ne sont que canailles. Estans vn soir dans nôtre nauire, voicy venir vn huysfier, commandant à mon compagnon qu'il eust à porter au Roy son corail, & son safran, pource qu'il n'étoyt bien garny ny de l'un ny de l'autre. Ce que entendant vn marchand de nôtre compagnie, qui étoyt More, luy dit, n'y allés pas, car il vous payera à son plaisir, disant cecy par vne cautelle, à fin que mon compagnon s'en allât, pource qu'il auoit de cette mesme marchandise. Neantmoins mon compagnon ne s'arrestant à ses paroles, feit responce à l'huysfier, que le iour ensuyuant il obeyroit au commandement du Roy: & des le bon matin prenans vne frigate, à force d'auirons nous passames la mer, & paruimmes en terre ferme, arriuans dans trois iours au port de Paleachate, vile subiette au Roy de Narsinga, laquelle est riche en trafique de toutes marchandises, principalement en pierres, que lon y a porte de Zeilan & de Pegu, outre les marchans Mores, y faisans grand train d'espicerie. Nous logeames en la maison d'un des susdits marchans, auquel nous dimes d'ou nous venions, & que ne demandions qu'à nous defaire du corail & safran, que auions en grande quantité, ensemble du velous figuré, & à force de couteaux: à quoy nostre marchand print grand plaisir, entendant que nous étions chargés de telles marchandises. La vile est abondante en tout ce que concerne l'usage & coutume de l'Indie, & ny croist autre grain, que de riz, lequel y est à foison: la loy, la mode de viure, les habits & coutumes sont mesme, qu'à Calicut, étans les habitans belliqueux, encor qu'ils soyent destitués d'artillerie. Or pour ce que la vile menoit guerre alencontre du Roy des Tarnasari, il nous sembla bon de n'y arrester longuement: & ainsi apres y auoir passé quelques iours, nous reprimmes noz erres, tirás à Tarnasari distâte de là, cent miles: à laquelle nous paruimmes dans quatorze iours: qui est vne cité assise pres de la mer, en païs plat, close de bonnes murailles, avec vn gros port, à sauoir vne riuere du côté de la Tramontane, étant souz la main d'un Roy Gentil, puissant Seigneur, qui maintient ordinairement la guerre contre les Roys de Narsinga, & de Bâghalla, menât vn train de cens Elephans armés de toutes pieces, les plus grans, & mieux en ordre,

*Palea-
chate.*

*Tarnas-
sari.*

que ie

que ie vey iamais, pouuant leuer cent miles combatans tant à pied, comme à cheual : lesquels n'vnt d'autres armes que de certaines petites espées, petites rondelles, les vnes faites de coquilles de grosses tortues, les autres à la mode de celles de Calicut : s'aidans, outre cela, d'arcs, & lances de cannes, & de bois aussi : & quand il est question d'aller en guerre, ils portent vn gipon cotonné, rébourré encor de coton bien pressé & cousu. Cette vile est de bonne asiette, & garnie de braues maisons, ceintes de bones murailles selon l'usage des Chrétiens, au reste, riche en bled, cotō, soye, bresil, fruits, dont les vns ressemblent à noz pommes, poyres, orāges, citrons & limons : ayant aussi plusieurs iardins reuestus de magnifiques gētilleses. Par tout ce païs de Tarnassari l'on trouue en quātité de beufz, vaches, moutons, cheures, porcs sangliers, cerfs, biches, cheureils, loups, chats faifans la cyuette, leons, pauons, faucons, vautours, papegaux blācs, & d'autres autant beaux, bigarés de sept couleurs, lieures tous differans aux nôtres, excepté le goût, oyseaux de proye plus grans que l'aigle, avec leur bec gros & pointu, qui sert pour faire des poignées d'espées, & couteaux, étans de plumage noyre, rouge, & blanc, & aussi de poulets, & poulaillies les plus grandes que i'aye iamais veu, tellemēt qu'elles surmontent en grosseur les nôtres de la troisieme partie. En peu de iours que nous demeurames là, nous veimes miles passe-temps, qui se font par my les rues, mesmement les combats des poulets, que les marchans Mores font iouter l'un contre l'autre, avec gageure, de cinquante, cent, & deux cens ducats : & entre autres, ils s'en trouua deux, lesquels se cōbatirent si à bon escient, par l'espace de cinq heures, sans iamais cesser, que l'un & l'autre tomba mort en la place. L'on y voit aussi de cheures plus belles, & plus grādes que les nôtres, qui font quatre cabrils à chacune ventrée : les moutons y sont en telle abondance, que l'on en donne dix ou douze gros & gras pour vn ducat : entre lesquels s'en trouuent, qui ont les cornes comme daims, se combatans fort dépiteusement les vns contre les autres, & aussi des bufles difformes aux nôtres : mais leur poisson est de mesme usage que le nôtre, excepté qu'il est plus gros, & plus pesant. La mode de viure de ces Payans, est de manger de toute sorte de chair, si non de beuf, prenans leur repas couchés cōtre terre, sans nape ny seruiette, tenās leurs viandes dans vn plat de boys fort beau : beuans d'eau simple, ou bien sucrée ceux qui ont la puissance : ayans leurs lits eleués haut de terre, faits de bon coton, la couuerture de soye ou de futaine, habillés à l'Apostolique avec vn drap rembourré de coton ou de soye : aucuns marchans portent chemises de soye ou de futaine : mais tous en general vont la teste nue exceptés les Bramines, qui ont vn bonnet de soye, ou de camelot, long de deux palmes, enuironné d'une ceinture ouurée d'or : portans aussi deux eguillettes, plus larges que les nôtres, qui leur pendent sur les espaules, leurs oreilles garnies de perles & autres fines pierreries, mais non point es doigts. Leur couleur, est à de-my blanc, pour autant que l'air y est
plus

plus frais, qu'à Calicut: les faisons & tēps de recueillir les biens de la terre, ne sont differās aux nôtres. Le Roy de cette cité ne fait dépuceler sa femme par les Bramines, selon la coutume du Roy de Calicut: mais la fait dépuceler par des hommes blancs, soyent Chrétiens ou Mores, moyennant qu'ils ne soyent Payās ou Gentils: lesquels Gentils auant que mener la femme en leurs maisons, font diligēce de trouuer vn homme blanc de quelque langue, ou nation qu'il soit, le receuant expressement chez soy à fin de dépuceler leurs femmes. Ce que nous auint ainsi que arriuames là, de cas fortuit nous rencontrames trois ou quatre marchans, lesquels cōmencerent à s'acointer & parler avec mon compagnon, s'enquerans si nous étions étrāgers, & depuis quel temps nous étions arriués en la ville: à quoy il fait responce, qu'il étions étrāgers, arriués là depuis quatre iours. A cette parole le marchāt fut bien aise, & nous fait grādes careffes, mettant en auant qu'il fauorisoit fort aux étrāgers, & qu'il eussions à le suyure en sa maison. Ce que nous feimes: & luy de nous recueillir fort humainemēt, nous faisant vne braue collation, puis commença à nous vler de tels propos: Mes amis, il vous faut entendre, que j'ay proposé de prendre vne femme dans quinze iours, par quoy l'un de vous couchera avec elle la premiere nuyt, à fin de me la rēdre dépucelée, si luy vous plait me faire ce bien. Nous de prime face fumes étonnés de ces paroles: mais nōtre truchement nous dit, n'ayés honte de cette requeste, car c'est la coutume du païs. Lors mon compagnon sauāça, disant ainsi: l'en suis content, moyennant que mal ne m'en auienne: A quoy le marchand, cognoissant que nous refusions ce party craignans quelquinconuenient, repliqua tels propos: Mes amis n'ayés crainte, ny facheries, telle est la coutume de cette ville. Somme, qu'il fait tant par son beau dire, & promesses, qu'il nous atira cinq, qui étions de compagnie, en sa maison, avec toutes noz hardes, & marchādises, ou nous demeurames quinze iours, au bout desquelz voy cy venir sa femme, belle fille, ieune de quinze ans, avec laquelle mon cōpagnon coucha la premiere nuyt, seruant le marchand de tout ce, qu'il auoit requis: mais le dāgier de la vie y étoyt tant pour luy, que pour elle, si la nuyt ensuiuant il fut retourné au nid: vray est, que les femmes voudroyent bien que cette premiere nuyt durāt vn mois. Le marchand ayāt receu ce seruice de nous, desiroit fort nous entretenir encor cinq ou six mois, tant pource que les viures y sont à bon pris, que aussi ils sont gens fort plaifans & liberaux de leur naturel: & depuis ce temps-là nous fumes tousiours requis & employés à telles commissions. La coutume est en cette cité apres le trepas des Roys & des Bramines de bruler leurs corps, en faisant magnifique sacrifice au diable durāt le temps de ce brullement: puis prêt on les cendres ainsi deliées & subtiles, les mettās dans vn pot de terre vernicé, & bien bouché, qui a la gueule autant étroite par le desus, cōme vne petite escuelle, lequel en-apres ainsi auancé on fourre bien profond en terre dans les maisons des trepassés: faisant ce sacrifice

*Ancienne
coutume de
bruler les
corps apres
leur mort.*

fouz vn arbre à la mode de Calicut, avec vn feu subtil, des plus odorantes herbes, boys, fleurs & gommés que l'on peut trouuer, comme font le boys d'Aloës, bresil, sandal, storax, ambre gris, espie de Narthe, Benioin, Lagdanum, brâches de corail, & autres choses semblables, metant le tout ensemble, puis l'appliquent sur ce corps, lequel ainsi aromatisé ils brulét iufques à ce qu'il soit deuenu en cendres, avec grande pompe, & harmonie des Musiciens, qui ce pendant sonnent de leurs instrumens: au son desquels vingt cinq ou trente hommes acoutrés en diable, dancent, sautent, & courent à l'enuiron du feu, menans vne vie ioyeuse: étant là present (sans cōpagnie d'autres) la femme du trepassé, pleurant, & gemissant avec profonds souspirs, en se batant l'estomac: & se fait ce mistere enuiron à vne, ou deux heures de nuyt. Or quinze iours apres la mort du mary, la femme fait vn grand banquet, ou elle inuite tous les parens & amis tant de la part de son mary que de la sienne, puis apres leur auoir fait grand chere, elle s'acoutre de ses plus riches habits, ornemens, doreures, & affiquets: & acompagnée de tous les inuités, de tabourins, & autres ioyeux instrumens, avec les diables harnachés de mesme, sort du logis à l'heure susdite, pour s'en aller au lieu ou son mary fut brulé: & fait on vn puis de l'hauteur de la femme, mettant tout à l'enuiron cinq ou six cannes, quils couurēt d'un drap de soye en mode de cortines: en apres font vn feu dans ce puis, de tous les plus riches & odoriferans boys, qu'il est possible de trouuer, cōme auons ia dit cy desus. Ce pendant il y a gens deputés tout expres, qui donnent à manger à la femme quelques poisons, si quelle pert tout sentiment: laquelle ne prenant la matiere à cœur, ne cesse de sauter & dancer avec ses autres voyfines & parêtes, au son des tabourins & instrumens harmonieux, ioint que les hōmes habillés en diable iouant leurs personages, ainsi qu'auons ia dit cy desus en parlant de Calicut: la dame se recommande à eux, à fin quils prient Satan, qu'il l'a vueille receuoir pour sienne, & autant en font ses prochaines parentes & amies, qui luy tiennent compagnie. Etant donq en tel état, elle prend sa course avec vne furie, & va donner des mains contre le drap de soye, qui cache le feu, dās lequel elle se iette a legrement, esperant par ce moyen mōter es cieux: & tout soudain ses plus prochains parens à beaux cops de bastonnades sur la teste, sur les bras, à fin de luy faire plustost terminer ses iours: les autres de luy ietter de grosses poignées de poix pour la suffoquer par la force de la fumée. Cette coutume est entre eux tant reputée de toute ancienneté, que si la femme, tāt peu soit elle, refuse d'accomplir ces mysteres, elle est tenue pour méchante, tellement que ses parens en étans indignés, la font mourir en apres secretemēt. Le Roy est tousiours presens à ces solēnités, lesquelles ne sont gardées que de la part des plus nobles de la ville: le menu peuple n'étant obligé à cela, à cause des grans frais, qu'il y conuient faire. Ils ont encor vne autre coutume, qui n'est moins étrange que cette-cy, que quand quelque ieune homme est amoureux d'une

Les femmes nobles de Tarnasari se font bruler pour faire honneur à leur mary.

Maniere étrange pour mentir & signifier ses amours.

dame, &

dame, & qu'il desire luy faire entendre le feu de ses amours, il prend vne piece de drap trampée dans l'huyle, y mettans le feu, puis la couche sur son bras tout nud, & endure cette flambe iusques à ce que la piece soit toute consommée, sans montrer signe ou indice de douleur: c'est pour testifier qu'il est tellement embrasé des amours de la dame, qu'il n'y a torment souz le Ciel, qu'il ne vousist patir pour elle. Quand à la police & iustice de Tarnassari, elle est bien administrée, en cette mode, que si quelcun tue vn autre, il est condamné à la mort, suyuant l'ordonnance de Calicut: du payé & du receu faut qu'il conste par escrit ou par tesmoings: les escritures se font en papier comme en nostre país, non en feuilles d'arbre, comme à Calicut: le tout executé diligemment & sommairement par le gouuerneur de la ville: mais quand vn marchand étranger vient à mourir, sans femme ou enfans, l'heritage appartient au Roy, sans que le testateur en puisse elire vn autre à sa volente: mais ceux, qui sont natifs du lieu, commençant au Roy, tousiours en descendant, laissent leur enfans heritiers. Et quand quelque marchand More va de vie à trepas, on fait de grás frais en espiceries, pour embaumer son corps, lequel on clost dans vne caisse de bois, qu'ils mettēt assez profond souz terre, la teste regardant deuers Mecca, qui est du côté du Ponant. Que si le marchand auoit d'enfans, ils succedent à l'heritage. Les nauires de ce país sont fort grandes faites de diuerses sortes: les vnes toutes plates par desouz, qui seruent es eaux basses, ayans le deuant & le derriere tout semblables, avec deux tymons, deux arbres, sans aucune cōuerture: & outre ceuxcy il y en a encor de plus grandes, appellées Giunchi, de dix milles botes, l'une dans lesquelles y a certaines petites fragates, propres pour aller en vne cité nommée Malacha, ou l'on leue les menues espèces, de quoy nous parlerons cy apres en temps & lieu.

Police de Tarnassari tant au criminel, que au ciuil.

Nauires de Tarnassari cōment sont faites, & cō bien y en a d'espices.

Menues espices.

De la cité de Banghalla: & de ses marchandises. De la cité de Pegu, & maniere de faire du Roy d'icelle.



R maintenant pour reuenir à mon propos, & à la deliberation de moy & de mon compaignon, (qui étoyt de discourir encor dauantage de país, pour voir les tresors & singularités de l'uniuers) apres que nous eumes quelque peu seiourné à Tarnassari, & vendu vne partie de nôtre marchandise, ja fachés d'employer noz personnes à seruir ce peuple en ce qu'il nous requeroit, comme vous aués entendu cy desus, nous primmes le chemin de Banghalla, ayans le vent si bien à souhait, qu'y arriuames dans onze iours, encor quelle soit distante de Tarnassari, sept cens miles, cité autant belle, & riche, que ién aye iamais veu: laquelle a vn Soldan More, tenant ordinairement deux cens miles combatans, tant à pied, qu'à cheual, (qui viuent selon la loy de Mahomet) maintenant continuelle guerre contre le Roy de Narsinga. Ce Royaume est de grand' estendue, & le plus

Les habitans, et religion des habitans de Banghalla.

abondant du monde en bleds, & chairs de toute sorte, en sucre, gimgembre, coton, foyes : qui cause que les marchans sont merueilleusement riches, menans si grand train, que tous les ans on leue plus de cinquante nauires de draps de foye & coton, qu'ils appellent en leur langue, Bairami, Namone, Lizari, Ciantari, Doazar, & Sinabaffi : lesquels draps se distribuent par toute la Turquie, Surie, Perse, Arabie, heureuse, & toute l'Indie : sans conter les autres marchans de pierres, qui viennent d'autres païs. Nous y trouuames encor certains marchans Chrétiens, se disans être d'une cité appelée Sarnau, là venus tout expres pour vendre de draps de foye, du bois d'Aloës, & de musc, étans vestus de grandes robes de camelot, avec les manches rembourrées de coton, le bonnet rouge, long d'une palme & demye, blanc cōme nous, confessans la Trinité, la natiuité, passion & resurrection de Iesus Christ, & pour cette cause se disent Chrétiens, mesmement pour ce qu'ils reçoient le baptesme, les epistres & Euangiles, comme nous, gardans le Carefme, & plusieurs autres vigiles de lan : mais ils escriuent au contraire de nous, assauoir à la mode d'Armenie, ne portans point de souliers de cuyr, mais certains chaufsons de foye enrichis de pierreries, les doigts armés de braues anneaux garnis de pierres fines, mangeans à table, & vsans de toutes chairs non plus ny moins que nous. Ils nous disoyent d'auantage, qu'à l'enuiron du païs, du Turq se trouue vn grand nombre de Chrétiens gouuernés aussi par Roys & Princes Chrétiens, tous subiets au grand Can de Cathaio. Apres que nous eumes longuement parlementé avec eux, tenans diuers propos, mon compagnon leur déplia sa marchandise, leur faisans montre, entre autres choses, de certaines branches de corail non moins belles, que grandes, lesquelles se trouuerent tant à leur gré, qu'ils nous promirent de nous en faire donner mille ducats, si nous voulions aller avec eux en vne ville, à laquelle ils nous conduiroient, ou bien qu'ils troqueroient cōtre tāt de rubis, qu'en retirerions en Turquie dix miles ducats. A quoy mon compagnon s'accorda, moyennant que nous partissions en brief : ce qu'ils conclurent, promettans de nous embarquer dans deux iours, & nous conduyre sains & sauues dans vne fort bonne nauire, en laquelle nous entrames acompagnés d'eux, & de certains autres marchans de Perse, gens de bien & fideles, selon ce, que l'on nous en auoit fait rapport : & pour cette cause nous primmes grand' acointance avec eux : si est-ce que auant que bouger de là, mon compagnon se défeit de toute sa marchandise, hors mis les susdites branches de corail, le safran, & deux pieces de velous rouge de Florence. Nous laissames donq à la parfin Banghalla, cité autant bonne, quant au moyen de viure, que i'en vey iamais : dās laquelle ny les femmes ny les filles, mais les hommes filēt le coton & la foye, de quoy on fait les draps sus nommés : & soudain que fumes embarqués, nous tēdimes les voyles & le trinquet, passans

par

par vn golfe fort dangereux du côté de Midy, & ainsi arriuames à Pegu *Pegu.* distante de Banghalla mille miles, cité assise en terre ferme, prochaine de la mer, ayant à la main gauche, vne belle riuere portant vn nombre infiny de bateaux, étant souz la main d'un Roy Gentil, le peuple vsant de mesme loy, coutumes, habits & moyens de viure, que ceux de Tarnassari, combien qu'ils soyent de couleur, quelque peu plus blancs, iouyssans aussi d'un air plus frais. Les maisons y sont bâties de pierres & de mortier à nôtre vsage, les murailles aussi de la ville, faites comme les nôtres. Le Roy est riche & puissant, tenant ordinairement plus de miles hommes Chrétiens des païs susdits, tant à pied qu'à cheual, d'onnant gage à chacun d'eux six Parday par moys, & bouche à cour: sans conter son autre gendarmerie, qui est en nombre infiny. Le païs est abondant en toutes sortes de grains, chairs, & fruits selon l'vsage de Calicut, vray est, qu'il n'y a pas guere de chameaux, mais en recompense, on y trouue de toutes les autres bestes & oyseaux autant qu'à Calicut, & spécialement les plus beaux papegaux, que ie vey onques. Les arbres aussi y sont les plus grâds, plus haut, & plus droits, que i'aye iamais veu: & encor les cânes les plus grosses qui soyent au monde: car sans mentir i'en ay veu telle aussi grosse, comme vn baril de harans. Il y a dauantage vn tel nombre de chats *Chats faisans la cyuette, sans la cyuette à Pegu.* sans la cyuette, que les quatre se donnét pour vn ducat: & aussi à force rubis, que l'on y aporte d'une ville distante de là, trente iournées, non pas pour l'auoir veu, mais pour l'auoir ouy dire: si ne laissent ils d'être de requeste, tellement qu'un diamant, perle ou emeraude y est plus chere, qu'en noz quarties. Pour l'hors que nous arriuames en cette ville, le Roy en étoyt loing de quinze iournées, menant guerre contre le Roy d'Aua: auquel lieu nous l'allames chercher, nous embarquans d'as vne petite nauire faite toute d'une piece, longue de quinze ou seize pas, les auirons de cannes, qui est fendue par le bout, duquel on bat l'eau, & d'as la fente y a vn ais de boys attachée avec de cordes en diuers lieux: de sorte, quelle alloit plus beau train, que neut fait vn brigantin: & de fait, dans trois iours nous gagnames vn certain vilage, ou nous trouuames de marchans, qui nous affermerent n'auoir peu entrer dans Aua, à cause de l'armée du Roy, parquoy nous en retornames avec eux en Pegu, ou, apres y auoir demeuré cinq iours, le Roy arriua, rapportant la victoire de ses ennemis: & au second iour de son retour, les susdits Chrétiens nous presenterent à sa Maiesté: lequel ne tient telle grauité que le Roy de Calicut: mais est tant familier & humain, qu'il parleroit à vn ieune enfant: combien que tout son corps soit si bien garny de pierres precieuses, quelles valent plus que la richesse d'un Royaume: car, comme chacun peut voir, il porte es doigts, pieds, mains, bras, & iambes de gros cercles & anneaux d'or, enrichis de rubis, de perles, diamans, & autres magnifiques pierreries, tellement chargé depuis les pieds, iusques à la teste, que ses oreilles pressées de la pesantur, pendent con-

trebas, & à le voir la nuyt à la chandelle, il reluit de tout font corps, non plus ny moins que fait le Soleil, orné des étoyles. Les marchans, qui nous auoyent là cōduit, luy tindrēt propos de nôtre marchādise, auxquels il feit responce, quil ny pouuoit entendre pour l'heure, étant empêché au sacrifice quil faisoit au diable, pour recognoissance de la victoire obtenuē contre ses ennemis, & quilz reuinssent le iour ensuyuāt: tellement, que le lendemain au sortir de son disner, il enuoya querir les susdits marchans, & mon compagnon quand & quand, qui luy déplia

L'Auteur, & son cōpagnō sont presentés au Roy de Pegu, & recēuz humainement de luy.

sa marchandise, laquelle se trouua de belle montre, principalement quāt au corail, qui étoyt tāt riche, que le Roy s'ēbaissoit de le voir, mesmement certaines branches, si demesurement longues, quil n'en auoit iamais veu leurs pareilles en toute l'Indie: & pour cette cause il demanda quels gens nous étions. A quoy ces marchans Chrétiens feirent responce, Seigneur, ils sont Persians. Alors le Roy commanda au Truchement de nous demander si nous voulions vendre cette marchandise. Mon compagnon prenant la parole, respondit, que la marchandise étoyt à son commandement. Le Roy desirant fort se voir Seigneur de telles estofes, nous feit entendre, comment il étoyt pour l'heure court d'argent à cause des grans guerres quil auoit maintenu, par l'espace de deux ans alencontre du Roy d'Aua, mais que si nous voulions troquer contre de rubis, quil étoyt prest d'acheter nôtre marchandise. A quoy respondimes par le moyen de ce truchement, que ne demandions autre chose, que sa grace: & que nôtre marchandise étoit à son commandement, luy en baillant pouuoir d'en disposer ainsi que bon luy sembleroit, ne demandans de nôtre part, or, ny argent, ny au-

Le Roy de Pegu est gaigné par la liberalité du cōpagnō de l'Auteur.

tre eschange. Le Roy esmerueillé de tels propos, vrayement, dit il, de toute ancienneté i'ay bien ouy dire, que les Persians étoient gens libe-
raux de leur naturel, mais ie n'en vey onques vn si liberal que cettuy-
cy: & par Dieu, & par le Diable, i'experimenteray maintenant, qui se
trouuera plus liberal le Persian, ou moymesme: commandant sur
l'hure à vn sien esclauē quil luy aportāt vne certaine caissē longue &
large de deux pieds dorée tout au tour, enrichie de braues rubis tant
par dehors, qu'au dedans, & cōmanda icelle ouurir en la quelle veimes
six étages tous pleins de fins rubis tant grans, que petis: ledit Sei-
gneur nous offrant le chois, avec tels propos: Prenés ce, que vous
voudrés. O Seigneur, respond mon compagnon, ta grande noblesse
excede la valeur de ma marchandise, & pour cause de ta grande
magnanimité, ie t'en fay vn present de bon cœur: te priant, Sei-
gneur, tenir tant de moy, que ie n'ay entrepris ces voyages par le
Monde, aux fins d'acquérir biens ou richesses, ains seulement pour
vn grand zele, que i'ay de voir la diuersité, coutumes, & loix des
païs étrangères. A ce propos le Roy commença à dire: ie confesse main-
tenant, que ie ne te saurois vaincre par liberalité: mais tien, ie te
donne

donne cela , mettant ses mains dans sa caisse, les chargeant toutes deux de rubis , en nombre de deux cens , tant grans, moyens , que petis: lesquels il donna à mon compagnon, reiterans ces mesmes propos: Tien, voila que ie te donne , pour guerdonner la grande liberalité, de laquelle tu as vſé en mon endroit. Et aux susdits marchans Chrétiens , qui nous auoyent présenté à sa Maieſté, il fait present de deux rubis à chacun d'eux, qui étoient estimés miles ducats, & ceux de mon compagnon cent miles ducats. De cecy l'on peut iuger de la magnificence de ce Roy, lequel de bon droit on doit estimer le plus liberal de tout le Monde: mesmement de ce, que son reuenu, qui est vn milion d'or, par an, se distribue par son commandemēt à ses soldats: prouenant telle richesse de là, qu'en son païs, on trouue grand quantité d'azur, de vermillon, sandal, coton, & de foye à foison: mais les habitâs sont fort luxurieux. Apres que eumes fait là quelque seiour, les Chrétiens prindrent congé du Roy, pour eux, & pour nous, lequel ordonna nous être baillé vn logis garny de toutes pieces, ou nous demeurerions tant que bon nous sembleroit: cōbien que n'y arrestames que cinq iours. Et ce temps pendant voicy venir les nouvelles, que le Roy d'Aua descendoit avec vne grosse armée , pour donner l'assaut au Roy de Pegu, lequel proposa luy aller au deuant acompagné d'un grand nombre de gens tant de pied, que de cheual: & le iour ensuiuant nous veimes bruler deux femmes pour l'amour de leurs maris trepassés , à la mode que nous auons dit cy desus parlans de Tarnassari.

*Liberalité
Royale.*

De Malacha, cité. Du Fleuve de Gaza, que les vns estiment être Ganges: & la cruauté de ce peuple. De Sumatra, Ile anciennement appelée Taprobana. Du Poyure croissant à Pedir: & de trois sortes du bois d'Aloës.



Le second iour nous embarquames pour aller à Malacha, cité assise du côté de Syroc leuant, à laquelle nous paruimmes dans huit iours, & trouuames vne riuierie tout apres, nommée Gaza, la plus grande, plus large, & plus profonde que ie vey iamais: car elle fait montre de plus de quinze miles de largeur: ayant pour son obiet, vne grande Ile appelée Sumatra, contenant de circuit quatre ou cinq cens miles. Incontinent que y fumes arriués nous fumes présentés deuant la Maieſté du Soldan, qui est More, & aussi tout le peuple du Royaume. Cette cité est assise en terre ferme, payant tribut au Roy des Cines, qu'il a fait edifier depuis septante ans ença, voyant que ce port est le principal de la mer Oceane, auquel arriuent (comme ie croy) plus de nauires, qu'en port du Monde, mesmement chargés de toute sorte d'espiceries, & autres marchandises fort exquises: & encor que le païs ne soit autrement fertile, si est-ce qu'on y trouue aussi grande abondance de grains, chairs, & oyseaux,

*Sumatra,
Ile.*

*Richesses,
trafiques,
habis, & des
loyauté des
habitans de
l'Isle Mala-
cha.*

quien Calicut: excepté qu'il y a peu de bois: mais à force sandal, estain, elephans, cheuaux, beufs, vaches, buffles, brebis, & pauons: mais tous fruits y sont aussi rares qu'à Zeilam: & n'y a autre trafique de marchandise, sinon despiceries, & draps de soye. Les habitans de ce pais, sont de couleur tannée, portans de grans chapeaux, au reste, habillés comme ceux du Caire: car ils ont le visage large, les yeux gros, le nez camus, viuans deordonnéement en leur liberté, tellement qu'ils n'est loisible aux marchans aller de nuit par my la ville, pour peur d'être tués, ains sont contrains de coucher dans leurs nauires: & combien que le Roy y ait constitué vn gouverneur pour administrer iustice aux étrangers, si ne laissent ils à se tuer par my les rues, comme de chiens, faisans vne boucherie deus mesmes, autāt à tort, qu'à droit: tant est malheureuse cette generation, plus abondante en meschancetés que null'autre qui soit souz le Ciel, tant orgueilleuse, & superbe, que si le Roy veut faire iustice d'aucun dentre eux, ils vsent de rebellion, avec grosses menaces de le mettre à sac, ensemble la ville, & tout le pais: ce qu'ils pourroyent aisément faire, d'autant qu'ils sont gens mariniers, ayans le moyen, apres auoir fait le cop, de se retirer en quelque Ile. L'air de cette Ile est assez temperé: encor que les Chrétiens étans en nôtre compagnie nous donnassent à entendre, que le plus seur étoit, de ny guere sejourner: à cause des meschans gens, qui y regnoyent, qui fut cause que nous primmes vne fragate, tirans à la volte de la susdite Ile Sumatra, & vimmes à descendre à Pedir, ville distante de terre ferme enuiron huitante lieûs: laquelle est le meilleur port qui soit en toute cette Ile, contenant, comme auons ia dit, de circuit de quatre à cinq cens miles. Cette Ile, selon mon iugement, & au raport de plusieurs, fut anciennement appelée Taprobana, dans laquelle y a trois Roys Gentils, portans tous coronne, lesquels tiennent vne mesme loy coutumes, & maniere de viure, que ceux de Tarnassari, mesmement que les femmes s'y brulent toutes viues apres la mort de leurs maris. Quant aux habitans, ils sont de petite stature, de couleur, plutôt blancs, qu'autremēt: le visage large, les yeux ronds, & verds, les cheueux longs, le nez gros, & camus, gens s'adonnans plus à trafiquer marchandise, qu'aux armes: receuans fort humainement les étrangers. La Iustice y est étroitement gardée contre les delinquans, non plus, ny moins, qu'à Calicut. Leurs monnoyes sont d'or, d'argent, & d'estain, toutes forgées au coing, celle d'or d'un côté leffigie d'un diable, de l'autre côté, vn chariot tiré par quatre elephans: étant tout ainsi marquées, celle d'argent, & d'estain: mais le pris est bien diuers: car les dix d'argent, valent vn ducat: & les vingt cinq d'estain, autant: & sont les Elephans, qui naissent en ce pais, les plus grans que ie vey onques. Il y croist vne grand' quantité de Poyure, qu'ils appellent Molaga, long, plus grand, & plus gros que celuy que nous auons par deça, creux au dedans, aussi fort de goût, comme le nôtre, mais vn peu plus pesant, & se vend à mesure comme nous vendons icy le bled: & conuient icy noter, qu'en

*Pedir
cité.*

*La monnoye
de Pedir.*

*Poyure
long.*

quien ce port s'en charge tous les ans dixhuit ou vingt nauires, pour conduire au pais de Cataio, ou il se vèd fort bien: pour ce qu'en ces quartiers là regne vne grand' froidure, ainsi que le bruit est. L'arbre, qui produit ce poyure long, à la seppe assez lōgue, mais les fucilles plus pourpues, & plus larges, que ne sont celles de poyure noir, qui croist en Calicut. Ce pais aussi est abundant en soye tresfine, mesme que par les bois les arbres sont chargés de vers, qui la font de leur propre industrie, sans être nourris de personne, combien qu'il s'en trouue de plus exquisite, que celle-la. En outre, il y a quantité de Benioin, qui est vne gomme coulant des arbres, neantmoins qu'aucuns veulent dire (car quāt à moy ie ne l'ay pas veu) qu'il croist en terre ferme, assez loin de la mer. Or pource qu'il n'y a rien qui delecte plus l'homme, & qui lincite plus à lire, & à bien entendre ce qu'il list, que la verité, il m'a semblé bon de coucher par escrit ce que i'ay autrefois veu par experience, assauoir, que le bon bresil, ny le vray bois d'aloës ne vient iusques au pais des Chrétiens, attendu mesmement qu'il se trouuent trois fortes d'aloës: dont l'une, qui est la plus parfaite, est nommée Calampat, ne croissant là, mais aportée d'une autre Ile, appellée Sarnau, prochaine de la cité des Chrétiens, qui étoient avec nous, comme ils nous donnerent à entendre. La seconde espece de ce bois, se nomme Laban, prouenāt d'une riuere. La tierce, s'appelle Bochor. Outre ce, nous dirent ces Crétiens, que la cause pourquoy ce bois ne venoit en noz quartiers, est, pour autāt qu'au grand Cataio, es Royaumes du Caire, des Cines, de Macin, Sarnau, & Giaua y a plus grande abondance d'or, qu'en nôtre pais, & par mesme moyen les Roys, & Seigneurs y sont plus opulens, que les nôtres, se delectans aussi plus que nous, de ces deux sortes de parfuns, & bois odorans: tellement, qu'ils employent grans deniers à en faire prouision, tant pour s'en seruir durāt leur vie, qu'après la mort, ne promettans qu'ils sortent du pais, joint, qu'il est si cher, que la liure se vend dix ducats, pour autāt qu'il ne s'en trouue gueres de cette sorte. Les susdits Chrétiens nous feirent voir l'experience de ces deux especes de parfuns, (qui se ressemblent presque quant à la couleur) l'un d'eux print environ deux onces de Calampat, lesquelles il mit dans la main de mon cōpagnō, bien serrées, par l'espace environ d'une demye heure: apres luy fait ouurir la main, d'où en sortit vne odeur tant suaue, qu'elle surmōtoit tous les parfuns de noz quartiers, puis il print de bresil environ le gros d'une nois, & demye liure de celui, qui croist en Sarnau, & les fait mettre separément chacū en vne chābre dans de vases, avec du feu tout à lentour: ie vous assure, que ce peu de feu qu'il y meit, rendit plus grand' odeur, que ne feroyēt trois liures de l'autre espece. Il y a d'auātage en ce pais abōdāce de lacca, qui sert pour faire la couleur rouge: l'arbre étāt de la grosseur des noyers de pardeça. Nous veimes en cette ville les pl⁹ beaux ouurages en orfeurerie, que l'on sauroit souhaiter, mesmement de cofres couuers d'or, qui se donnoyēt pour deux ducats la piece: lesquels on estimeroit en ce pais-cy plus de cent escus. Je me tay

*Aloes de
trois especes.*

*Changeurs
de Sumatra.*

des lits, des bancs, des chaires, des bufets, & autres vtensiles de maisons, qui sont tant exquis & precieux, que seroit temps perdu à moy de vouloir de- duire par le menu leur indicible excellence, mesme qu'à grand' peine ad- iouteriés vous foy à mes paroles. Il y a tant de chāgeurs en cette ville, que en vne seule rue, i'en contay plus de cinq cens, establis tout expres pour respondre aux marchans de diuers païs, residans là, à cause de la grand' trafique des marchandises, qui y arriuēt de toutes pars. Les lits de ce païs, sont de cotton, ensemble les linceus, & les couuertes de soye. Il y a aussi quātité de hautes fustes, desquelles ils font de grās nauires, appellées entre eux Giunchi, garnies de trois arbres, & de deux timons au deuāt, & autant au derriere, avec deux proes, l'vne au premier bout, l'autre au second: que si lors qu'ils vsent de voile, le vent se change, soudain ils plient la voile tendue, & en déplient vne autre pour receuoir le vent en l'un de autres arbres, par ce moyen retournans aisément en arriere, sans danger que ce soit. En cecy & autres choses ils se montrēt fort dextres, grans nageurs, & fort industrieux à faire de feu artificiel. Leurs maisons sont bâties de pier- res, & de mortier tout ainsi que les nôtres, mais ne sont guerres hautes, ny couuertes d'autre chose, sinon de grande coquilles de tortue de mer, qu'ils ont à foison: desquelles en ay veu telle, qui pesoit cent trois liures: & de dens d'Elephans pesant trois cens vingtcinq liures: n'étans au reste dé garnis des serpens, encor plus grans que ceux de Calicut. Ainsi donq con- duits iusques là avec telle auenture, que vous ay raconté, noz marchans Chrétiens desirās plustost se retirer en leur païs, que passer outre, nous de- manderent qu'auions deliberé de faire, demeurer là, retourner en arrie- re, ou bien poursuyure noz erres. A quoy mon compagnon fait responce, que puis que il étoit venu iusques au païs ou croissent les espiceries, qu'il auoit grand appetit d'en cognoitre quelque chose d'auantage, auant que rompre son voyage: lesquels s'adressans à moy, vsèrent presque de mesme propos, me donnans à entendre, que ie ne trouueroy autre espices, que cel les, que i'auoy veu. Lors ie commençay à leur demander, ou donq crois- soient les nois muscades, & girofles: C'est, disent ils, à plus de cent miles loin d'icy. Y peut on, repliquay-ie, aller en assurece, sans dāger de tomber es mains des Pirates, & coursaïres de mer? Ouy bien, dirēt ils, car le danger n'est quant aux Pirates, mais quant à la fureur marine, & n'est possible d'y alier avec grans nauires, me donnans à entendre par cecy, que si ie pre- tendoï y passer, il métoit necessaire d'acheter vne Chiampana, qui est vne petite nauire, desquelles s'en trouuoit assez. Lors mon compagnon les pria d'en recouurer deux, ce qu'ils feirent incōtinent, & en trouuerēt deux toutes garnies de cordes, voiles, auiros, & de gens pour les cōduire, avec les quels ils conuindrēt de pris, qui étoit quatre cēs parday, que mon cōpagnō débourça sur l'heure, leur vīant de tels ppos. Mes treschiers amis, cōbien que ie ne soye de vōtre natiō, ne sommes nous pas neātmoins tous enfans d'Adam, & d'Eue? Me voulés vous maintenant delaisser, & mō cōpagnon

*Coquilles de
tortues ser-
uans pour
couvrir les
maisons en
l'île de Su-
matra.*

que

que voicy, qui est autre fois venu & né de vôtre foy? Comment de nôtre foy? dirent ils. Vôtre compagnon n'est il pas de Perse? Ouy bien de present, respond il: mais il a esté acheté dans Ierusalem. Alors entendans ce mot Ierusalem, ils leuerent les mains au Ciel, rendās grace à Dieu, & baïsans par trois fois la terre, me demandant, depuis quel temps iauois été vendu en Ierusalem, ie leur fey responce que c'estoit depuis quinze ans, ou enuiron. Lors dirent ils entr'eux, il peut auoir souuenance de son país. Ouy bien, dit mon compagnon, i'en suis bien records, & n'eu iamais plus grand plaisir, que de luy ouir raconter les cas merueilleux de son país, & m'a enseigné comment les Chrétiens appellent toutes les parties du corps humain, & toutes autres choses necessaires à la vie de l'homme. Les Chrétiens émeuz de ces propos, commencerent à condescendre, disans en cette sorte. Vrayement nous auions conclud de retourner en nôtre

» país, distant d'icy, de trois mile miles: mais pour l'amour de vous, & de vô-

» tre compagnon, nous sommes contans d'aller là, ou bon vous semblera.

» Et en cas que vôtre compagnon veule demeurer avec nous, nous le

» ferons riche homme, luy permettans viure selon les loix des Perfes, si

» bon luy semble. A quoy respōdit mon compagnon, Messieurs, vôtre com-

» pagnie nous plait bien: mais il n'y a ordre, que cestuy cy s'arreste avec

» vous: car pour le grand amour, que ie luy porte, ie luy ay baillé à fem-

» me vne mienne niece: & si vous voulés venir en nôtre compagnie, ie vous

» prie de prendre de moy ce petit present: autrement ie ne seray con-

» tent de vous. Ces bonnes gens nous respondirent: Vrayement nous le re-

» ceurons, puis qu'il vous plait ainsi, à fin de vous contenter, & ainsi leur

» donna demye once de rubis, entre lesquels y en auoit dix fort beaux

» estimés cinq cens parday. A deux iours de là noz barquettes furent

» prestes, lesquelles nous garnimes de viures, mesmement de fruits bons

» en toute perfection: Et par ainsi primmes nôtre chemin du côté de Le-

» uant, tirans à vne Ile nommée Bandan.

*De l'Isle de Bandan, ou croissent les noix muscades, & le
macis. De l'Isle de Maluch, d'ou viennent
les clous de girofles: & de
l'Isle de Bornei.*



DO V R S V Y V A N T noz erres, nous trouuames enuiron dixhuit ou vingt Iles, partie habitées parties desertes: tellement, que dans quinze iours nous arriuames à Bandan, Ile fort melancolique, & mal plaisante, contenant en rondeur cent miles, n'étant garnie que de ie ne say quelles maisons faites de bois, basses, & laides au possible: & les habitans de mesme, gens ruraux, & bestiaux, sans entendement ou grace, viuans sans loy, & sans gouuerneur, vetus de simples chemises, les pieds, les iambes, & la teste nuds, exceptés quelques cheueux longs qu'ils portent, le visage plat, & rond, la couleur

blanche,

Nois muscades.

blanche, de petite stature, viuans selon la loy des Gentils, & à la mode de ceux qui sont estimés les plus meschans dans Calicut, nommés Paliar, & Hirana, n'ayans ny esprit, ny force. Il n'y a rien en ce pais là, sinon vn arbre produisant les nois Muscades, lequel ressemble par le pied vn Persier, faisant la fueille d'une mesme sorte, excepté que cettcs cy sont vn peu plus étroites, mais premier que la nois vienne en perfection, les macis se trouuent tout autour, de la mode que sont les fueilles d'une rose ouuerte: tellement que quand la nois est meure, les macis l'envelopent & embrassent, puis on les cueil au moys de Septembre, pource que là les moys & la saison se suiuent, tout ainsi qu'à nôtre vsage. Quand se vient à les recueillir, chacun en prend tant, que bon luy semble, ou bien tant qu'il peut, pourautant qu'ils sont communs à tous, croissans lesdits fruits deùx mesmes, sans rien cultiuier l'arbre. Ces nois se vèdent en-apres à la mesure, qui pese vingt six liures des nôtres, & se vent demy carlin: la monnoye y étant toute pareille qu'à Calicut. Il n'est ia besoin là de faire Iustice, à cause que le peuple est tant rude, ignare, & beste, que quãd il voudroit, na lesprit de mal faire: & de là à six iournées pres s'en trouuent encor d'autres plus ruraux, que ceux-cy, qui est à l'Isle Maluch, ou croissent les clous de girofles, ainsi que mon compagnon en fut asser tené par ces Chrétiens. ce nonobstant la bêtise de habitans, il fut arresté entre nous d'y aller, & de fait, nous feimes tant, qu'y arriuames dans douze iours: laquelle trouuames être plus petite que Bandan: mais le peuple y est pire, encor qu'ils ayent vn mesme moyen de viure. Ils sont aussi plus blancs à raison de l'air, qui n'y est pas si chaud, qu'à Bandan. Là naissent les clous de girofle, comme aussi en plusieurs autres Isles cirouoyfines petites & inhabitées. Cet arbre est semblable à vn Laurier, ayant les fueilles comme les cannes, mais vn peu plus rondes, comme ie vous ay ia dit en parlant de Zeilan: & quand les girofles sont meurs, on bat les branches de l'arbre avec de cannes pour les faire tomber, en estendant quelque tapis sur la terre, à fin de les receuoir: la terre ou croist cet arbre, est de la couleur de sable, encor qu'elle ne soit sablonneuse. Ce pais regarde contre le Midy: & de là ne voyent l'estoile Tramontane. Or apres auoir contemplé ces arbres, & la maniere de cueillir son fruit, nous commençames à interroguer noz marchans, sil n'y auoit plus rien à voir, qui fût digne de memoire: à quoy nous respondirent, qu'il nous conuenoit encor voir le marché de ce fruit, lequel se vendoit la moitié plus que les nois muscades, toutesfois à belle mesure, pourautant qu'ils ne sauent que cest de poids ny de balances. Nous étions sur le point de changer de pais, pour tousiours voir quelque nouueautés, lors que les Chrétiens nous dirent, Messieurs, puis que Dieu nous a fait tant de grace de nous conduire iusques icy à bon port, sil vous plait, nous irons voir la plus belle, la plus ample, & la plus riche Ile de tout le monde, ou vous viendrés à decouurir de choses, que ne veites onques, mais premier que prendre ce chemin, il

Clous de Girofle ou naissent.

nous

nous faut aller en vne autre Ile, appellée Bornei, à fin de nous mettre en *Bornei.* vne plus grand nauire, d'autant que la mer y est plus haute. A quoy s'accordant mon compagnon, & moy aussi, nous primmes le chemin de la dite Ile, tirans tousiours du côté de Midy: mais sur ce chemin, les marchans Chrétiens ne cessoient ny nuit ny iour de m'interroguer de la maniere de viure des Chrétiens, & de nôtre foy. Pour mieux donc les saouler, ie commençay à leur faire vn grans discours des voyages qui se font à Saint Pierre de Rome, des festes de Saint Pierre, & de S. Paul, ensemble de plusieurs autres Saints de pardeça: deduisant ainsi toutes ces choses par le menu, ie leur donnay tel contentement desprit, qu'ils me dirent secretement, que si ie les voulois suyure, que ie serois tenu en grand' reputation pour auoir veu de si grans & merueilleux cas. Lequel offre ie refusay, doutant que, si iallois avec eux, le retour en mon pais ne me fust clos pour iamais. Apres être arriues en cette Ile de Bornei, distante de Maluch enuiron deux cens miles, mon compagnon acheta vne nauire cent ducats, & cogneumes que cette Ile étoit quelque peu plus grande que Maluch, habitée par de Payans, & Gentils, neantmoins gens de bien, asses blancs, habillés les vns d'une simple chemise de coton, les autres de camelot, quelques vns aussi portans de bonnets rouges, administrans iustice fort étroitement. Tous les ans se charge icy vne grande quantité de Camphora, lequel (comme l'on dit) croist là, qui est vne gomme d'arbre, nonobstant que ie ne veux rien affermer, pource que (encore que ie leusse ouy dire) ie ne l'ay pas veu.

Comment les mariniers se gouvernent pour aller à l'Ile de Giana.

De la loy des habitans, & de la richesse d'icelle. Comment les ieunes y vendent les vieux, & les enfans leurs peres. Et de l'ombre du Soleil en Giana au moys de Iuin.



APRES auoir bien garny nôtre nauire de tout ce, qui nous étoit necessaire, nous feimes voiles tirans à la belle & riche Ile de Giana, laquelle nous gaigneames dans cinq iours, nauigeans tousiours du côté de Midy, conduits par vn patron fort expert sur la marine: lequel auoit vn quadran fait à nôtre vsage, avec vne grande carte entrelacée de lignes, & de caracteres, comme nous dirons cy-apres. Lors mon compagnon fort curieux d'apprendre & cognoitre les causes des choses naturelles, sauança de demander aux Chrétiens, & au patron, par quel moyen ils se gouernoient, de puis qu'ils viennent à perdre de veüe de l'étoile Tramontane: & sil y auoit vne autre Tramontane par laquelle nous conduisions nôtre nauire. Le patron nous montra sur l'heure, cinq ou six belles étoiles entre lesquelles y en auoit vne plus reluisante que les autres, qu'il disoit être tout à l'opposite de la Tramontane, & par cette-cy il conduisoit la nauire,

pour ce que son quadran étoit acoutré & tiroit à nôtre Tramontane : mettant d'auantage en auant , que de l'autre côté de la dite Ile vers le Midy y a certains peuples , qui nauigent par la conduite des dites quatre ou cinq étoiles , qui sont enuiron de nôtre Tramontane : disant encor outre cela , que depuis la dite Ile on passe si auant , que l'on vient au lieu , ou le iour n'a que quatre heures , avec vn froid le plus étrange qui soit au monde : lesquels propos nous donnerent vn grand contentement d'esprit. Pursuyuans donq noz erres , dans cinq iours nous arriuames dans cette Ile , en laquelle y a plusieurs Roys tous Payans , & Gentils , repugnans fort l'un à l'autre quant à leur religion , d'autant que les vns adorent les Idoles , comme l'on fait à Calicut : les autres le Soleil , quelques vns la Lune : vne grande partie adorent ce , que premierement ils rencontrent du matin : sans conter ceux-là , qui adorent le diable , comme vous ay dit cy dessus. Cette Ile produit grand' quantité de foye , prouenant vne partie des vers nourris à nôtre mode , partie des arbres sauages , qui sont parmy les forests. On y trouue aussi si les plus fines , & meilleures Emeraudes du Monde , d'or aussi , & de lethon à foison : ensemble de harans semblables aux nôtres : de fruits aussi fort bons , comme à Calicut : pareillement de toute sorte de chair en grand' abondance. Je vous peux bien icy asseurer , que ces habitans sont les plus loyaux , & plus fideles de toute la terre : étans blancs comme nous , & aussi de mesme hauteur : excepté qu'ils ont le visage plus large que nous , les yeux plus grans , & plus verds , le nez camu , les cheveux longs , espendus sur les épaules. Il y a d'auantage à force oyseaux , qui ne ressemblent en rien aux nôtres , exceptés les pauons , tourterelies , & corneilles qui y sont de trois sortes. La iustice y est fort étroitement gardée. Les habitans s'habillent à l'Apostolique , de draps de foye , de camelot , & de futaine : n'usans guere d'armeures , pour ce qu'ils ne se combattent , que par mer : en quoy ils se seruent d'arcs , & de flèches faites la plus part de canne , ensemble aussi de Sarbatannes , avec lesquelles ils iettent de fleches si viuement empoisonnées , que tant peu qu'elles touchent l'homme , il tombe subitement mort contre terre , ou bien tost apres. L'artillerie n'y est point en vsage , pour ce qu'ils n'ont pas l'esprit de la faire. Leur manger , est pain de froment , ensemble de toutes autres chairs , & poissons selon qu'il plait à vn chacun. Et entre autres , y a de gens qui viuent de chair humaine , ayans de toute acieneté vne sauage coutume , que quand leurs peres deuiennent vieux , de sorte qu'ils ne peuuent plus rien faire , les fils , ou les parens les meinent au marché , & les vendent , dont ceux qui les ont acheté , les tuent , & les mangent tous cuits. Que si mesme quelque ieune homme tombe en maladie , de laquelle on ne l'espere iamais sortir bagues sauues , on n'attend pas qu'il soit trespassé : ains ses parens , seruiteurs , ou alliés le tuent , & apres le vendent à de gens , qui apres en font leur refection . Et pourautant que nous étions

étions tous étonnés de voir vne si cruelle façon de faire, ils commencerent à s'en scandaliser, iusques à nous vser de tels propos: O poures Persians, comme laissez vous manger cette beile chair, aux vers de la terre? Mon compagnon émeu de telles parolles, commença à dire, Sus, sus, retirons nous soudain en nôtre nauire, en bonne foy ces canailles ne me tiendront iamais plus en terre. A quoy luy respondirent les Chrétiens, Mon amy, portés ces nouuelles cruelles en vôtre país, & encor ceux cy d'auantage, que ie vous enseigneray: Tenés regardés qu'à l'heure presente il est Midy, voyés ou transmonte le Soleil. Leuans donq les yeux en haut, nous veimes, que le Soleil ne faisoit point plus d'un pied d'ombre du côté de la main fenestre, cognoissans par cela, que nous étions fort éloignés de nôtre país, étans pour lors le moys de Iuin, ainsi que disoit mon compagnon: car quant à moy ie n'y cognoissois ny moys ny iours, bien que le chaut, & le froid ny soyent guere differens de nôtre vsage. Or apres auoir veu quelque peu les coutumes, & maniere de faire de ce peuple, nous fumes tous dauis de ne plus arrester là, pourautant que nous estions contrains de faire le guet toutes les nuits, de peur que ces meschans ne nous vinssent défai-
re pour en apres nous manger, comme les autres. Parquoy nous persuadames à noz Chrétiens de nous retirer le plutôt que faire se pour-
roit: combien que mon compagnon auant que partir, achetât deux

Emeraudes, desquelles il donna milles Parday, & deux cens pour
deux enfans, qu'il auoit pareillement acheté, lesquels
étoient sans genitoires, à cause qu'il y a gens en cet-
te Ile, qui ne font autre train de marchan-
dise, que d'acheter de petis enfans mâ-
les, lesquels ils font tailler des leur
ieune aages, demeurant ainsi
le reste de leur vie
comme vne
femme.

*Vendition
des enfans
males sans
genitoires.*



LES VOYAGES DE
 LOYS DE BARTHE-
 ME BOLOGNOIS,
 LIVRE QUATRIEME:

Ou il est fait mention du retour en son pais par le Cap de bonne esperance, avec brieve declaration de l'Ethiopie & de ses aduentures.

L'Auteur ayant fait depart de l'Isle Giaua vint à Malacha, ou il print congé des Chrétiens ses compagnons: puis departant de là, & apres auoir veu plusieurs lieux estranges, arriua à Calicut, ou il trouua deux marchans Millannois, faisans Artilleries pour le Roy, ausquels il persuada s'en fuir: & comment il faignoit estre un saint homme.



P R E S auoir demeuré quatorze iours à l'Isle de Giaua, tant pour la crainte que nous auions de passer par la main de ces bouchers, que peur de trouuer extreme froidure, si nous eussions nauigé plus outre, ioint aussi que noz Chrétiens cōmençoient à perdre la cognoissance des lieux, nous deliberames de reculer en arriere, à cette cause montans dans vne plus grand nauire, de ceux, que l'on appelle Giunci, laissames les Isles, tirans contre le Leuant, pourautant que de ce côté ne se trouue aucun admiral, qui cause que l'on y passe plus seurement. Nauigeans donq ainsi par l'espace de quinze iournees, vimmes à descendre à Malacha, ou arrestames trois iours, prenans là congé de noz marchans Chrétiens: que ne fut sans grâdes plaintes, regrets & lamentations, si ameres, que ne seroit possible de les exprimer, ny de les croire: tellement, que ie les eusse suiuy, neût été, que i'auoy femme, & enfans dans Bologne: & eux en cas pareil protestoyent de venir avec moy s'ils eussent pensé retourner en seurté. Vray est, que mon compagnon les en diuertissoit, craignant que s'ils venoyent avec nous, qu'ils ne publiassent aux Chrétiens, les richesses de ces pais. qui fut cause, qu'ils ne passerent outre avec nous, disant qu'ils prétendoient retourner en Sarnau, & de là començames à faire voiles iusques à Coromandel, ou nous primmes port, dechargeans les Giunci, qu'auions prins en Giaua: apres auoir demeuré vingt iours en cette ville, nous primmes vne autre barquette, qui nous porta

porta iufques à Colon: ou ie trouuay douze Chrétiens Portugés, qui me cauferent vn grand appetit de me dérober de mon compaignon: lequel neantmoins ie fu contraint de fuyure pour la crainte que i'auoy des Mores, car certains marchans de nôtre compagnie, mauoyent veu à Mecca, qui meuffent peu mettre à fac, craignans que ie ne vinffe à découuir leur hypocrisie: & ainfi de là à douze iours primmes nôtre chemin tirant à Calicut, affauoir par la riuere: laquelle nous y porta dans douze autres iours. Veule long discours de tant, & fi diuers païs, defquels auons touché cy defus, le benin Lecteur peut affurément croire, que ie me commençoy

*Fafchemēt
de l'Auteur
pour auoir
demeuré ſi
long temps
en païs étrā
ge, & ſon
excufe.*

à facher, d'être entré ſi auant es païs étranges, tant pour caufe des diuerſes intemperatures de l'air, que pour les variables, & ſauuages coutumes des peuples que nous auons frequenté, meſmement de ceux, qui ſont tant cruels, & barbares qu'ils ſe mangent les vns les autres, en cela ne differans rien aux beſtes: tellement que mon cōpaignon & moy, nous cōtentans d'auoir fait tels discours par le païs, en quoy auions plus enduré de peine, que receu de profit, nous deliberames tourner bride, & reprendre le chemin de nôtre quartier. Et pour autāt qu'en mon retour i'ay decouuert pluſieurs choſes notables, ne ſera hors de propos, ſi brieuement, i'en racôte quelque partie, eſtimant que la narration de mes trauaux ne ſera inutile, tant pour refrener l'inſaciabſe deſir de pluſieurs, qui à la volée, & ſans imaginer les dangers aprestés aux viateurs, ſoit par mer, ſoit par terre, entreprennent voyages en pluſieurs, & diuers lieux pour voir la varieté des regions de ce Monde: que auſſi pour donner à entendre à ceux, qui ſe trouuerōt en tels ſoudains euenemens, & cas fortuits, cōment ils ſ'y doyuēt gouverner ſagement, à fin de reuenir en aſſeurāce au lieu, dou ils ſeront partiz. Lors donq que fumes arriués en Calicut, pour le ſecond retour, nous y trouuames deux marchās, Millanois de nation, dont l'un ſ'appelloit Iean Marie, l'autre Pierre Antoine, venus là dās la nauire des Portugés, pour acheter de pierrieres par le cōmādemēt du Roy: leſquels incontinent eſtre arriués à Cochin, ſ'en fuirent en Calicut, & étant fort ioyeux de les voir, allans eux, & moy auſſi, tous nuds à mode de Calicut, ie leur demāday ſ'ils étoyēt Chrétiens. Ouy, nous ſommes Chrétiēs, reſpōd Iean Marie, Mais toy es tu Chrétien? me dit Pierre Antoine. A quoy ie reſpōdy que ouy. Loué ſoit Dieu, dirēt ils par enſemble. A lors Pierre Antoine me print par la main, & me mena en ſa maiſon, ou il me receut avec telles careſſes, & ſi alegrement, qu'il me ſeroit impoſſible de le racōter, avec vne ſi demeſurée ioye, que nul de nous trois ne ſauoit ſ'il deuoit plorer ou rire: car quant à moy, ie ne pouoy parler le langage Chrétien, ayāt la langue tellemēt groſſe & empeſchée, qu'il n'étoit en moy de proferer vn ſeul mot: ioint auſſi, qu'il y auoit quatre ans paſſés, que ie nauoy parlé à vn ſeul Chrétien. Ie demeuray dōq cette nuit en leur maiſon: en laquelle ne me fut poſſible de boire, ny manger, & encor moins de dormir, & ce neātmoins euſſions voulu, quā la nuit eût duré vn an à fin de deuifer enſemble. Or entr'autres propos, que nous

eumes ensemble, ie leur demanday sil étoyēt en grace du Roy de Calicut, Ouy, dirēt ils, voire des premiers de son palais, ayāns le credit de parler à luy toutesfois & quantes, que bon nous semble. Ie les azarday encor, iufques à leur demander, quelle étoit leur intention, & qu'ils auoyēt proposé de faire. Nous retourneriōs volōtiers en nôtre païs, dirēt ils: mais nous n'en pouons trouuer le chemin. Que ne retournés vous, leur dy-ie, par le chemin, que vous êtes venus? A quoy ils me respōdirent: qu'ils ne leur étoit loisible, d'autāt qu'ils étoient fugitifs de Portugal, & que le Roy de Calicut leur auoit cōmandé de fondre vne grāde quātité d'artillerie, contre leur vouloir: & pour cette cause ne vouloyēt prēdre le chemin par ou ils étoyēt venus: disāns d'auātage, que l'on attendoit en brief l'armée du Roy de Portugal. Ie leur promis de ma part, que si Dieu me faisoit la grace de retourner à Canonor, & de venir au cāp des Portugués, que ie ferois tant enuers leur Capitaine, qu'il auoyent grace & sauconduit: & qu'il leur étoit impossible de trouuer autre chemin que celui-là, veu mesmes qu'ils étoient ia assez cogneuz par diuers Royaumes, & que chacun sauoit bien qu'ils étoient fondeur d'artillerie: & qu'ils étoient bien cogneuz ça, & là, & que plusieurs Roys auoyēt prins peine de les attirer à soy pour ce fait: lesquels trouuerent mon dire fort bon, mais d'autāt que par leur moyen le Roy de Calicut étoit garny de quatre ou cinq cens pieces d'artilleries tant grosses, que petites, leur cōclusion fut, qu'il n'y auoit ordre de se fier aux Portugués nō sans cause indignés cōtre eux, nō seulement pour auoir fondu l'artillerie de leur ennemy mortel, mais encor d'auoir aprins cet art aux Gentils & Payās: & outre cela, qu'ils auoyēt mōtré à vingt cinq seruiteurs du Roy cōment il faut tirer de l'arquebuse. I'aioutay foy facilement à ces propos: car ie vey moy mesme, ce pendāt que j'étoy là, qu'ils enseignerēt à vn Payan la mode de faire vne bōbarde du poids de cent cinquāte quintaux de fonte: & là se rencōtra vn Iuif, qui feit vne galere belle en perfection, garnie au dedans, de quatre bōbardes de fer: mais vn mal-heur luy auint, qu'en se lauant les mains dans vne fosse pleine d'eau, il tōba dedās, & se noya. Quant aux susdits Milānois, Dieu fait, cōmēt ie leur lauay la teste, nō à autre fin, que à les diuertir de prêter la main, aide ou faueur au Payās pour nuire aux Chrétiens: tellemēt que Pierre Antoine se sentant fort piqué de telles paroles, cōmença à gemir & soupirer: mais Jean Marie ne print autrement la matiere à cœur, disant qu'il aimoit autāt mourir en Calicut, que dedās Rome, & que Dieu auoit predestiné de luy tout ce, qu'en deuoit aduenir. Le matin ensuyuant ie m'en allay trouuer mon compagnon, qui se lamentoit merueilleusement, craignant que l'on meût tué la nuit: mais pour l'apaiser, ie luy dōnay à entēdre, que j'auoy couché dans vn tēple des Mores, à fin de rendre grace à Dieu, & à Mahōmet, de ce que nous étions venus sains, & sauues à bon port: & que ie nauoy deliberé de dormir cy apres en autre lieu qu'estēples, pour sauoir aisēmēt tout ce, qui se faisoit par la ville, ne me souciāt en riē d'en amasser, aimāt trop mieux poureté que richesses.

Et pour

Et pour plus facilement eschaper des mains de ces Mores, ie ne trouuay meilleur moyé de lestrôper, q̄ par dissimulation, car ils croyēt plus legieremēt que gens du mōde. Ce que mō cōpagnō trouua tresbō estāt fait au badinage ausi biē que moy, à fin d'auoir plus grāde liberté de parler souuēt à ces Chrétiēs, qui hātoyent la cour du Roy, & par ce moyé sauoient tout ce qui se faisoit de iour en iour: or ie cōrefaisois fort bien vn More saint, faisant la chatemite, ne voulāt iamais māger de chair: sinon en cachette chez Iean Marie: là ou tous les soirs nous trouuiōs pour l'ordinaire quatre grosses poulailles grasses: mais au reste, ie faisois du solitaire, ne voulāt pratiquer ny hāter avec les marchās, faisant tāt bōne mine, que hōme viuāt ne me veit iamais rire, demeurāt tout le lōg du iour en la Moschée, excepté lors, que mon cōpagnon mēnuoyoit querir pour bāqueter avec luy: lequel souuētefois se courrouçoit cōtre moy, de ce q̄ ie ne uolois māger de chair: à quoy ie luy respōdois fort modestemēt, mon amy, le trop māger chair, cōduit l'hōme à diuers pechés, tellement que iouāt ainsi brauemēt mō persōnage, i' étois estimé vn saint More, & se reputoit biē heureux celuy, q̄ me pouuoit baiser la main, ou le genoil. Or il auint, q̄ vn marchāt More tōba. en si grosse maladie, qu'il ne se pouuoit ayder de tout son corps, enuoya querir mō cōpagnon, qui étoit son grand amy, pour en auoir vn mot de cōseil de luy, s'il y sauoit point quelque remede, ou quelcun, q̄ luy sceût secourir: parquoy mō cōpagnō l'allauisiter me menāt avec soy, en la maison du patient, là ou incōtinent que fumes arriués, mōdit cōpagnon cōmença à s'enquerir de sa maladie: auquel il respond, Je me sen fort empesché de l'estomac, & de toute ma personne. Aués vous, replique mō cōpagnon, enduré froidure, qui vous eūt causé ce mal? Je ne say, respōd il, d'ou pourroit venir cela: neantmoins ie suis seur que ie n'ay pas gaigné cela de froidure. Lors mon hōme, iettāt l'œil sur moy, me cōmence à interroger en cette sorte: Loys, sauriés vous point quelque remede pour ce miē bō amy? vrayemēt, dy-ie, mō pere étoit medecin: mais ce que i'en tiē, est plus par pratique que par theorique. Or fus donq, dit il, voyons si pourrés trouuer quelque remede à cette maladie. A ce propos ie m'aproche, le prenāt par la main, commençāt à luy toucher le poux, & trouuay qu'il étoit en tresgrosse fieure, luy demādant si la teste luy faisoit point mal, helas, dit il, elle me fait grand' douleur. Lors ie luy demāde s'il auoit bō vêtre: il me fait respōce, qu'il y auoit trois iours qu'il n'auoit été à selle. Entēdāt ces propos, ie pēsay en moymesme, cet hōme doit auoir l'estomac chargé par trop māger, il seroit bō de luy faire vn Seruicial. Et en auerty mō cōpagnon qui trouua cela être fort expediāt: à quoy le patiēt en me regardāt, dit, faites seulemēt ce q̄ vous voudrés, moyennāt que me guerissiés. Et par ainsi ie me mey apres, & luy fey vn Seruicial en cette sorte. Je prin de sucre, d'œufs, & de sel, le tout fort batu ensemble: puis, pour la decoction, ie prin les premieres herbes que ie trouuay (étāt assure, quel les luy feroyēt pl⁹ de mal, q̄ de biē) q̄ ressembloyent à la fueille d'un noyer

*L'Autcur
cōrefait le
More.*

*Apophthe
gme de
l'Autcur.*

*L'Autcur
cōrefait le
Medecin.*

*Cōposition
d'un Serui-
cial fait à
la bōne foy.*

& de tout cet amas luy en fey prédre cinq clysteres, tât le iour, que la nuit, fans que iamais mon homme peût rié faire: ains mótoit tousiours en plus grosse fieure. Ce que voyât, ie prin vne brasée de pourpier, & en fey enuiron demye pinte de ius, y entremeslant autât d'huyle, & à force sel, & de sucre, puis le colay fort bié: & en cecy ie fey encor vne grâde faute: car ie deuoy chauffer le tout: mais ie luy mey tout froid dâs le vêtre: cela fait, ie luy attachay vne corde par les pieds, luy tirât tellemēt les iâbes cōtremōt que les mains & les pieds touchoyēt sa teste, le tenâs ainsi guindé enuiron vn bō quart d'heure. Lors mon cōpagnon cōmēce à me dire, O Loys, Est ce la coutume de vōtre païs de bailler ainsi les clysteres? Ouy, dy-ie, quād on desespere de la vie du paciēt. Le poure malade ce pendât endurent le tout paciēmēt, disoit par fois, ha là ! c'est bié ainsi: car il en fera meilleure operatiō: puis apres il crioyt à haute voix, Nō plus nō plus, c'est assez, c'est asses, hélas ie suis mort. Et soudain quil fut décēdu, nous étiōs apres à le cōforter, & à l'exhorter à paciēce. A la parfin, Dieu ou Nature voulut, quil cōmença tellemēt à vuyder, que vous eussiez dit que c'étoit proprement vne fontaine débordée, & sortit de son vêtre plus de demy barrau de matiere fecale: de quoy il demeura fort cōtent, ne sentât le iour enfuyuât ny fieure, ny douleur de teste, encor moins mal d'estomac, & quât au benefice du vêtre, se portât assez bien: mais le iour d'apres il se sentoit quelque douleur aux cōtés: lesquels ie luy fey fort engraisser de beurre de vache, puis couvrir avec d'estoupes de chenefue, en le bien bendât. Et pour toute resolutiō ie luy dy, que s'il vouloit être guery, quil ne luy cōuenoit māger que deux fois le iour, & deuant son repas quil cheminât demy mile à pied. Mais il trouua fort étrange ce regime, me disant, que si ie luy ordonois ne māger que deux fois le iour, que soudain il étoit mort: car ils ont acoutumé en ce païs-là de faire sept ou huit repas par iour. Si est-ce, qu'à la parfin il recouura sa santé: ce que dōna grād' couleur à mō badinage, & fait qu'ils mēurēt tous en merueilleuse reputatiō, tenans pour leur que i'étois grād amy de Dieu. Ce marchât ne se mōtrât ingrat en mō endroit, pour auoir recouré sa santé par mon moyē, me voulut guerdonner de dix ducats, desquels ie fey refus: ains plutōt pour acroitre l'opinion q̄ tout le mōde auoit de ma prudhōmie & sainteté, & pour mōtrer que ie nétoy subiet ny à or, ny à argent, ie prins trois ducas de ma bourse, & publique mēt les distribuay aux poures: tellemēt, quil mēurēt tous en telle reputation, q̄ bié heureux étoit celuy qui me pouoit receuoir en sa maison pour me festoyer, ou baiser les mains & les pieds: en quoy ie iouoy fort brauement mō personnage, me tenât tout droit, quand quelcun me baisoit les mains, avec vne bōne morgue, & graue contenance, montrât quil ne faisoit que son deuoir: portât cet honneur à ma Sainteté: mais sur tout mon compagnon me donnoit grand bruit, montrant le chemin aux autres, & ayant luy mesme cette opinion, assēurât tout le peuple que pour certain ie ne mangeois point de chair, mettant aussi en auant, quil māuoit veu

*L'Auteur
est tenu
pour saint
homme.*

à Mecca

à Mecca, tousiours en la cōpagnie de Mahomet, & qu'il fauoit fort biē mon naturel, & que indubitablement i'étois saint hōme: mesme que me cognoissant de bōne & sainte vie, il m'auoit donné sa mere pour femme. Les choses furent tāt bien & dextrement conduites, que tout le monde me portoit amour, faueur, & honneur: durant lequel temps ie ne failloy toutes les nuys d'aller à la desrobée visiter mes Milannois: qui me dirent vne fois que douze nauires des Portugués étoyēt arriuées au port de Canonor: alors ie dy, voicy l'heure qu'il faut eschaper des mains des chiens: & auifames huit iours durans les moyens pour ce faire le mieux que seroit possible, eux me conseillans de m'en aller par terre: ce que ie ne uia- mais l'hardiesse de faire, craignant d'être sacagé par les Mores, pourau- tant que i'étois blanc, & eux noirs.

Des nouvelles de douze nauires Portugués qui arriuerent à Calicut: la mode des Mores à appeller le peuple à la Mosquée pour faire oraison: & du peril on l'Auteur se trouua venant de Calicut à Canonor.



MN iour que ie dinoy avec mon compagnon, se vindrent abor- der à luy deux marchans Persians, venans tout de frais de Ca- nonor: lesquels de prime face inuita à bāqueter, mais ils respon- dirēt qu'ils n'auoyēt nul appetit de māger, pour auoir receu de tresmau- uaises nouvelles. Comment donq? quelles nouvelles? dit mon compagnō. Pour tout seur, dirent ils, douze nauires Portugués sont arriuées, & les auōs veūes de noz propres yeux, estās toutes armées de blanc, ayant desia commencé à faire vn fort chateau à Canonor. Mon compagnon tout étonné de telles nouvelles, se tournant deuers moy, me dit, O Loys, qui sont ces Portugués? quels gens sont-ce? Mon amy, luy dy-ie, ne me parles iamais de ces gens, c'est la pire nation du Monde: ils sont larrons, brigans, corsaires, & escumeurs de mer. Je les voudrois voir tous conuer- ty à la loy de Mahomet: dont il fut aussi déplaisant d'entendre ces propos, comme ie prenoy plaisir à les prononcer. Or le iour ensuyuāt, ces nouvelles publiées, tous les Mores s'assemblerent au Temple pour faire prieres & oraisons: mais premierement aucuns d'iceux à ce de- putés; monterent quatre ou cinq fois le iour, sur les tours d'iceluy tem- ple, selon leur coutume entretenue de toute ancienneté, & à haute voix, en lieu de cloches, appelloyēt tout le peuple pour venir à l'oraison, en te- nant vn doigt à l'oreille, & criant, Dieu est grand, Dieu est grād, Venés au temple, venés au tēple pour louer Dieu, venés louer Dieu, Dieu est grād, Dieu est grād, Dieu a été, Dieu a été: Mahōmet messager de Dieu resusci- tera. Tous les Mores y acouroyēt de tous côtés, & me menerēt avec eux, en disant, viē, viē avec nous prier Dieu pour les Mores. ce q̄ ie fey, me mé- lāt parmy eux en leurs prieres, qu'ils font publiquement tout ainsi q̄ nous faisons icy du Pater, & de l'Aue Maria, étans tous les Mores mis par ordre, mais ya plusieurs rangs entre eux, avec vn Rabbi qui preside, cōme nous auons icy le prétre: & faut icy noter, que tout ce peuple ainsi
assemblée,

*L'Auteur
cōtrefait le
malade.*

assemblé, on se laue premierement bien, puis fait on l'oraison à la mode acoutumée, à laquelle ie m'accommoday en public, cōme ie vey q̄ les autres faisoÿēt, en apres me retiray au logis de mō cōpagnon: là ou ie cōmēçay des le lēdemain à cōtrefaire le malade, demeurant l'espace de huit iours, sans manger en sa presence: mais ie me sauuoys à la derobée au logis de mes Milānois, avec lesquels ie me pensoye fort biē. Mō cōpagnon étonné de me voir endurer si lōguemēt, si paciēment, si constāment & si alaigrement la faim, cōmença vn iour à me dire. Loys, pourquoy ne veux-tu māger? Helas, luy respōdy-ie, ie me sen fort mal de ma personne, il me semble que i'ay la teste demesurémēt grosse & ausi l'estomac, estimant que cela prouiet de cet air gros & intēperé, qui m'est contraire. Certes il étoit tant bon diable, & me portoit tel amour, quil eût fait pour moy tout ce que ie luy eusse peu cōmander, mesmemēt pour la conseruation de ma personne: & de fait croyāt fermemēt que cet air ne m'étoit bō, Allés vous en, me dit il, tenir à Calicut, iusques à ce, que la cōmodité vienne de nous en retourner en Perse: ie vous y adresseray vn mien bon amy, qui ne vous lairra auoir faute. A quoy ie luy respōdy, que ie ne voulois aller à Canonor, craignāt ces Chrétiēs & Portugués. Non, non, ne craignés cela, me repliqua il: ie vous ose biē asseurer qu'ils ne vous ferōt mal ny dommage en forte que ce soit: ne doutés point d'eux: vous serés en seurté, moyennant que ne sortés point de la cité. A la parfin donq apres auoir bien veu & cōsideré toute l'armée, la munition de l'artillerie, & les armes que les Mores preparoyēt alencōtre des Chrétiēs, ie me hazarday de me mettre en chemin, afin de m'acoutumer avec ces Portugués, & de me sauuer des mains des Chiēs: mais ce ne fut sans grād dāger, cōme ie vous feray entēdre par le menu: vn iour auāt que departir de Calicut, ie donnay ordre à tout ce, que i'auois affaire avec mes Milānois: puis mō cōpagnō me meit en cōpagnie de ces deux Persiās, qui luy auoyēt aporté les nouvelles cōment l'armée des Portugués étoit arriuée à Canonor: ainsi primmes vne petite barquette pour y aller: mais le dāger, ou ie me mettois, étoit grād, pourautāt que là étoÿēt vingtquatre marchās, Persiās, Sorains, & Turcs, lesquels me cognoissoÿēt fort biē, & de leur grace me portoyēt grād' amitié: sachāt la portée de l'esprit des Chrétiens, ie me trouois là en telle perplexité, que ie ne sauoy bōnement que faire, pensant en moymesme, que si ie prenois cōgé d'eux, qu'ils ne se doutassent que ie me voussisse retirer avec les Portugués: d'autre côté ie regardois, que si ie fusse party sans leur parler, & que par cas fortuit i'eusse été decouuert, ils meussent peu dire, Tu ne deuois pas t'en aller sans nous parler. Ces doutes me tindrēt long temps suspend: mais à la parfin ie cōclud de me sauuer sans dire mot à hōme du mōde, si nō à mon cōpagnon, me mettāt sur mer avec les deux Portugués, le troisieme iour de Decēbre: & incōtinēt q̄ fumes dās mer enuirō vn trait d'arc, voicy venir sur le port, quatre officiers du Roy, cōmādāt au patrō de nôtre barquette, de retourner en terre, auquel ils vserēt de tels rigoureux pro-

*L'Auteur
depart de
Calicut
pour aller à
Canonor,
mettant en
grand dan-
ger sa per-
sonne.*

pos:

pos: Pourquoi meines tu cet hōme hors de la ville sans la licēce du Roy? Les Persiās prindrēt la parole pour moy, difans que i'estoisvn saint hōme, allāt avec eux à Canonor. Nous sauons biē, dirēt ils, qu'il est vn saint More, mais le danger est, d'autāt qu'il entēd la langue Portuguēse, qu'il ne dēceuvre aux Portugués ce que nous faisons icy, & les secrets de nôtre armée, laquelle étoyt d'un merueilleux appareil, & de haute entreprinse. Nous commandons de par le Roy au patron, qu'il ne l'ait à charger, lequel obeissant à ce commandement, nous remeit sur le riuage, & les officiers se retirèrent chez le Roy. Alors l'un de ces Persians commença à dire, retournons en nôtre logis. Donnés vous en garde, leur dy-ie: car si vous entrés dans la ville, ces cinq pieces de toyles, que vous portés, seront confisquées, pourautant que les aués sorties, sans payer la gabelle du Roy. L'autre Persian me dit, O Seigneur, que ferōs nous donq? Aquoy ie respondy, Allons nous en par le long de ce riuage de mer, iusques à ce, que nous ayons trouué quelqu'autre petite barque: eux étans de cet acord, nous cheminames enuiron douze miles par terre, lourdemēt chargés de la susdite marchandise: & vous laisse maintenant à penser en quel être étoyt mon esprit, de se voir ainsi pourement acoutré, avec le danger d'y laisser la vie: mais à la parfin, Dieu voulut, que nous trouuames vn Parao, estant vn petit esquif, qui nous porta iusques à Canonor, ou nous arriuames le samedy au soir: & soudain que ie fu là, ie portay les lettres, que mon compagnon escriuoit à vn marchāt, sien amy, desquelles la teneur étoit, qu'il me recommandoit à luy, & qu'il eût à me traiter, comme si c'étoit sa propre personne, iusques à ce qu'il viendroit là luy mesme: l'asseurant que i'étoy saint homme, ioint aussi, que i'étoy de son parantage. Le marchant incontinent auoir leu ces lettres, les meit sur sa teste, me promettant sur sa vie, que ie serois en seureté dans sa maison: commandant sur l'heure le souper être appareillé magnifiquement à belles poulailles, poulets, & pigeons. Et quand mes Persians veirent mettre sur table ces poulailles, commencerent à s'escrier en cette sorte: Seigneur, que voulés vous faire de cecy? cet homme ne mange point de chair: & encore que pour cela ne laissast d'aporter d'autres viādes. Apres souper les Persiās me feirēt requeste de nous en aller vn peu à l'esbat, iusques à la marine: ce que leur acorday, venant ensemble iusques au lieu, ou étoient les nauires des Portugués: & Dieu fait, quelle aligreté & plaisir ie receu en mon cœur détre arriué à si bon port. Nous passames encor quelque peu plus auant, ou ie vey à la porte d'une petite maison basse, trois bouteilles vuydes, pensant que là fût la retraite des Chrétiens: de quoy encor plus ioyeux qu'au parauant, il me print enuie d'entrer dedans, combien que ie me garday bien de le faire, dissimulant deuant eux ma ioye, étant assuré, que si i'eusse attenté cela, s'étoyt assez pour émouuoir toute la cité, & la terre n'eust été assez grande, pour me sauuer, parquoy ie me contentay pour ce iour là, de noter le lieu,

*Parao, est
vn petit
esquif.*

*L'Auteur
s'en fuit de
Canonor, et
se retire a-
vec les Chré-
tiens.*

le lieu, ou se faisoit la forteresse des Chrétiens, differant d'y aller iusques au lendemain. Le dimanche donq ie me leuay de bon matin, donnant entendre à mes compagnons que ie m'enallois à l'esbat: lesquels me dirēt, Allés ou il vous plaira: ce que ie fey, tirant droit là, ou se batissoit la forteresse des Chrétiens. Et quand ie fu vn peu loin du lieu ou iauois laissé mes compagnons, en cheminant sur le riuage de la mer, ie rencontray deux Chrétiens Portugés: auxquels ie demanday, Seigneur ou est la forteresse des Portugés? Lesquels me dirent en premier lieu, Es-tu Chrétien, toy? Ouy, dy-ie, messeigneurs, Loué soit Dieu dirēt ils. Dòu viés tu? Ie vié de Calicut, mes Sieurs, leur respòdy-ie. Lors l'un d'eux dit à son còpagnon, Allés vous en deuât à l'hoteilerie, ie veux conduyre cet homme-cy au Seigneur Laurent, qui étoit le fils du Viceroy. & ainsi me mena iusques au chateau distant de la ville demy mile, ou nous trouuames à table

*L'Auteur
se prosternant
deuât
le Seigneur
Laurent fils
du Viceroy
de Portu-
gal.*

ledit Seigneur Laurēt, aux pieds duquel ie me prosternay, les genoils mis contre terre, en luy faisant telle harangue: Mon Seigneur, ie me recomande à vous, & vous supplie de me faire tant de grace de me sauuer la vie, car ie suis Chrétien. Si tôt que ie arriuay là, le bruit fut que toute la ville étoit en trouble de ce que ie métoy fuy: & sur l'heure feit on appeller tous le Canonniers pour charger l'artillerie, craignant que les Portugés ne vinsent à donner l'assaut à la ville. Or ce Capitaine me print par la main, & me tira dans vne sale, s'enquerant de point en point de tout ce qui se faisoit à Calicut, ne me tenant autre propos par l'espace de trois iours, que de m'interroguer du secret des ennemis, & de leurs entreprinse. Moy desirant sur toutes choses la victoire des Chrétiés, luy fey vn discours par le menu de toute l'armée du Roy de Calicut: & apres être bien informé de toutes les menées, il m'enuoya dans vne galere pardeuers son pere, le Viceroy, qui étoit en Cochin: de laquelle étoyt Capitaine vn Cheualier nommé Iean Serrano: le sus-dit Viceroy print grád plaisir de me voir, pource principalement que ie luy donnay auertissement de tous les desseins du Roy de Calicut. Et voyant le grand acueil & honneur qu'il me faisoit, ie me hazarday de luy dire, que sil vouloit donner pardon à Iean Marie, & à Pierre Antoine, fondeurs de l'artillerie de Calicut, & m'asseurer de leur grace, que ie me tenois fort de les faire reuenir, & les débaucher de faire telle playe aux Chrétiens, combien que ce qu'ils en faisoient, fût par vne contrainte, & force, ayant grand'enuie d'en sortir: mais craignans d'être saccagés par les Chrétiens, ils ne s'osent hazarder de reuenir sans saufconduit. Le Roy print si grand plaisir d'ouyr ces propos, qu'il condescendit à me donner saufconduit des susdits: & pour plus grande assurance, le Capitaine de la galere m'en respondit, me faisant ausi bon, pour la part du Viceroy: tellement, que trois iours en apres il m'enuoya pour ce fait, dans vne galere à Canonor, avec ce, que le Viceroy mandoit par lettres patentes à son fils, qu'il eût à me fournir deniers pour executer cette mienne entreprinse. Incontinent que

que i' arriuy à Canonor, ie trouuay vn homme du païs, qui m'obligea sa femme & ses enfans pour assurance de porter mes lettres en Calicut à Iean Marie, & Pierre Antoine: auxquels iescriuois que le Viceroy leur auoit pardonné, & qu'ils vinssent en assurance: auxquels i' enuoyay par cinq fois vne espie, les auertissant que sur tout, ils se donnassent garde de leurs femmes & de leur esclaves: car chacū d'eux auoit vne femme, & Iean Marie auoit vn fils & vn esclave: par toutes leurs lettres responsiues ils m'asseuroyent de venir, iusques à la cinquieme fois, qu'ils me madoyent, que sur la nuit ie me trouasse avec vn brigatin au riuage, ou se tiennēt les pecheurs, là ou on ne faisoit point de guet, & que ie les prēdrois là, m'escruians dauantage, qu'ils auoyēt baillé tous leurs meubles au porteur de la lettre, qui étoit espie. Or leur auoys- ie mādē qu'ils vinssent seuls, laissant là, leur enfans, & leur esclave, sauans seulement leurs personnes, & ce peu qu'ils pourroyēt du principal de leurs biēs: mais ils ne me voulurēt croire: car ils auoyēt vn diamāt qui pesoit trentedeux carats, état estimē quinze miles ducats, & vne perle pesant trente quatre carats, & deux miles rubis, pesant vn carat & demy la piece, sans cōter soiffante quatre anneaux d'or enrichis de toutes sortes de pierreries, & trois chats faisans la cyuette, trois marmots, & vne couē, faite tout expres pour polir les pierres precieuses. L'appetit de sauuer toutes ces choses, fut cause de malheur & de la mort de ces deux personnages: pour autāt q̄ leur esclave, natif de Calicut, voyāt qu'ils se preparoyēt pour s'en aller, se retira deuers le Roy, luy denōçant la fuyte de ses deux artilliers: & cōbien que le Roy n'adioutāt foy au dire de cet esclave, ne pouant se persuader, qu'eux voussissent iamais attenter cela, si est-ce, qu'il enuoya cinq de ses officiers en leur maison pour les garder. Ce peruers esclave, voyant que le Roy ne les vouloit faire mourir, s'en va au Cadi de la foy des Mores, vsant de mesmes propos qu'il auoit fait au Roy, mettāt encor en auāt, qu'ils auoyēt reuelé aux Chrétiens tous les secrets de l'armée de Calicut: dont le Cadi émeu par le raport de cet esclave, cōmandē être faite vne assemblée de tous les marchās Mores, les quels d'un acord firēt cens ducats, & les porterent au Roy de Giogha, qui pour lors étoit dans Calicut avec trois miles hōmes de sa nation: auquel ils firent telle harāgue: Seigneur, tu fais que de tout tēps tu nous as trou-

*Diamant
du pris de
quinze mi-
les ducats.*

*Harangue
des mar-
chans Mo-
res, au Roy
de Giogha.*

,, ué prests & appareillés à te faire seruice & hōneur de tout nôtre pouoir,
,, toutesfois & quātes que tu es venu icy, maintenant nous te voulons prier
,, de nous faire tant de bien, que de mettre à sac deux Chrétiens, qui sont
,, en cette ville, ennemis de nôtre foy, & qui reuelent tous les affaires & se-
,, crets de nôtre Republique, aux Portugués, qui de toute ancienneté sont
,, noz ennemis capitaux: & en ce faisant, nous te donnons ces cens ducats, le
Roy vaincu tant par leur requeste, que par l'argent, enuoye deux cens hōmes tout expres pour défaire ces poures Milānois: & soudain que cēs cōmis cōmencerent d'aprocher de leurs maisons, ils se meirent dix à dix, sonnās de leurs cornets, & faignās de demāder l'aumosne: mais incontinet

Iean Marie & Pierre Antoine occis par les Mores.

que les Milannois les virent en si grand' compagnie, ils sentirēt bien qui'l demandoient autre chose que l'aumosne, & de fait, meirent la main aux armes, se defendās si vaillamment, que de cette grand' troupe ils en dēfirerent six, & en blessèrent plus de quarante: mais à la parfin ces Gioghes tirerent contr'eux vne maniere de leurs armes, qui est vn cercle de fert, large de deux doigs, tranchant de tous côtés, comme vn rasoir, & en touchèrent si lourdement Iean Marie en la teste, & Pierre Antoine en la cuysse, que tous deux tomberent ius par terre: puis ces canailles se ruant sauterent sur leurs corps, & leur coperent la gorge. Ce pendant la femme de Iean Marie se sauua avec son fils, & sen vint à Canonor, ou i'achetay son fils huit ducats, & le fey batizer, le nommant Laurent, pourautant que ce iour là étoit la feste de S. Laurent: & le mesme iour apres l'an reuolu il morut du mal de Naple: duquel i'en ay veu dans Calicut plus de trois miles miliers entachés, tant hommes, que femmes: on appelle cette maladie en leur langage, Pua, qui a commencé seulement à regner en ce païs-là depuis dixset ans ença: mais y est par trop plus aspre, qu'en noz quartiers.

Mal de Naple, fréquent en Calicut, & depuis quand.

De l'armée de ceux de Calicut, qui vindrent assaillir les Portugués, & de la cruelle bataille qu'ils eurent ensemble.



Armée de deux cēs & neuf voyles.

LE douzieme de Mars 1506 les nouvelles vindrent de la mort de ces deux pures Milannois, & aussi, que ce iour mesme se partit l'armée des Pannaniens, de Calicut, de Capogat, de Pandarane, & de Tromapatar, contenant en tout deux cens & neuf voyles, desquelles y en auoit huitante quatre grosses, le reste étoyēt barques à rames & auirons, comme sont Parao. En icelle étoit vn nombre infiny de Mores tous armés, portās certains habis faits de toyle rouge, rembourrés de cotton, avec de bonnets semblablemēt tous cottonnés, les mains couuertes de gantelets & brasselets fourrés de mesme, au reste bien equipés d'armes, cōme arcs, lances, espées, rōdelles, artillerie grosse & petite à nôtre vsage. Quand nous vimmes à decouurir cette armée, qui fut le seizieme du moys susdit, nous sembloit (à voir tant de nauires & autres vaisseaux ensemble) que ce fût vne grand' forest à cause des grāds arbres des nauires, spectacle admirable & espouventable: mais entre nous Chrétiés nous esperions tousiours en Dieu, tenans pour seur qu'en defendāt sa foy, il nous seroit en ayde, & qu'avec sa protection nous ruinerions la loy Payanne. Le vaillant cheualier, & preux Capitaine de l'armée, fils du Seigneur Frāçois d'Almeyda, Viceroy de l'Indie, étoit là avec onze nauires, entre lesquelles y auoit deux galeres & vn brigātin: & combien qu'il veit l'ennemy venir avec toute sa puissance & force, si est-ce qu'il print cœur, ayant deuant les yeux les gestes heroïques de ses ancestres, & ne voulant abolir par sa lacheté ou autrement l'heureuse memoire de leurs vertus, feit appeler tous les Capitaines & chefs de ses nauires, lesquels il commença à exhorter prudemment, & prier, que pour l'honneur de Dieu, &

de la

de la foy Chrétienne ils ne craignassent à exposer leur vie pour la defen-
 se & protection du païs, vsant de tels propos: O Seigneurs, O mes freres,
 le iour est venu, auquel nous conuient auoir souuenance de la passion
 de nôtre Seigneur Iesus Christ, & combien de peine il a souffert pour la
 redemption de noz pechés, & pour nous racheter entre nous poures pe-
 cheurs. Au iourd-huy noz pechés nous seront effacés, au iourd-huy Dieu
 nous receura en sa tressainte gloire. Pour l'honneur donq & amour de ce
 bon Seigneur Dieu, ie vous prie que chacun de vous prenne cœur, à fin
 de virilement assaillir & repousser ces Chiens: contre lesquels il nous dô-
 nera victoire, ne voulât permettre, sa sainte foy être ruinée. Incōtinent vn
 beau pere spirituel, qui étoit sur la poupe de la nauire du Capitaine eleua
 en haut, avec vne grāde deuotion, vn crucifix, que le peuple pouuoit aise-
 mēt voir: faisant là vn beau presche, en exhortāt vn chacun à executer ce,
 quil auoit promis, qui étoit, de batailler pour la foy Chrétienne. Puis
 leur donna pleine absolution de leur pechés: disant ainsi pour toute
 conclusion, Or suz mes enfans, allons tous alaigrement en bataille: car
 Dieu sera pour nous. Cet homme sceut si bien dire, avec ses paroles au-
 tant magnanimes que pitoyables, que toute la compagnie prioit Dieu
 avec pleurs & larmes, que son bon plaisir fût, quil demeurassent tous en
 ce conflit. En ce mesme temps là la grand' armée des Mores passa au-
 pres de nous, tirant outre, & nôtre Capitaine avec deux nauires s'en alla
 au deuant, passant entre les deux plus grans nauires des Mores, & se
 saluerent l'un & l'autre à beaux cops d'artillerie: nôtre Capitaine feit
 cecy pour tenter la puissance de ces deux nauires, pource qu'ils auoyent
 plusieurs & diuers étendars deployés, étans capitainesses de toute l'ar-
 mée. Ce iour passa ainsi, sans faire autre chose: mais le matin ensuyuant
 les Mores commēcerēt à faire voyles, & aprocher de Canonor, mandās à
 nôtre Capitaine quil les laissāt passer, & acheuer leur voyage, & qu'ils ne
 vouloyēt combatre alencōrre des Chrétiens. A quoy le Capitaine respō-
 dit, que les Mores de Calicut auoyēt vsé d'une si grāde cruauté en son en-
 droit, qu'à sa requeste ils ne voulurēt iamais permettre aux Chrétiens (qui
 se retrouuerēt en Calicut,) sauscōduit pour reuenir en leur païs: mais en
 meirent à mort plus de quarātehuit, sans la dépouille & pillage qu'ils fei-
 rent, qui étoyēt de plus de quatre miles ducats, tāt en argēt, & armeures,
 qu'en autres biēs. Parquoy ma cōclusion est, q' passés si vo' pouués, mais ce
 ne sera sans premieremēt sentir que c'est de la puissance, vertu & noblesse
 des Chrétiens. Or biē, dirēt les Mores, puis que vous aués ainsi arresté, nous
 y acordōs: nôtre Mahōmet nous defendra de vous, Chrétiens. Ces paroles
 ne furēt pas plutōt prononcées, que les vns & les autres cōmēcerēt à ten-
 dre toutes les voyles, & trinquets, cōmençāt à venir noz Mores avec vne
 grād' fureur, pensans passer outre, nauigeās tousiours à huit ou dix miles
 près de terre: nôtre Capitaine ne voulut donner dedans, qu'ils ne fussent
 pres de la ville de Canonor, pourautant que le Roy de Canonor étoit là

*Harangue
magnani-
me du Ca-
pitaine en
chef de lar-
mée des Por-
tugués, aux
autres Ca-
pitaines, &
chefs.*

*Exhortatiō
d'un predi-
cateur.*

attendât l'issue de ce conflit, pour voir a uquel des deux la victoire auient droit, ioint que nôtre susdit Capitaine vouloit bien que l'on cogneût la magnanimité & vertu des Chrétiens: par quoy il ordôna q̄ l'on donât à dîner à tous, & qu'incontinēt apres chacū se preparât à cōbatre virilement: en quoy le Seigneur nous fauoriza tāt, qu'il nous enuoya le vêt à souhait. Et soudain apres le repas, le Capitaine cōmença à dire, Or sus mes freres, voicy l'heure, q̄ chacun de nous se doit môtrer bon Chrétien: en prononçant ces paroles, cōmāda dōner dedās les deux grās nauires des ennemis. Il me seroit impossible de vous raconter la diuersité des instrumēs, qui sonnoyēt d'un côté & d'autre, selō leur coutume, cōme cornets, trōpettes, clairs & autres semblables, tellemēt que tout trēbloit, ou que la fin du Mōde étoit venue. Nôtre Capitaine s'attacha vaillāmēt à la plus grosse nauire de ces Mores, & cōbienque par trois fois il fût repoulsé, si est ce qu'à la quatrieme, le grād vaisseau demeura attaché à noz chaisnes: & noz gēs de sauter dedās: ou se trouuerent six cens Mores, & là fut faite vne si grande meslée d'un côté & d'autre, partie espée à espée, partie main à main, qu'il y eut vne merueilleuse boucherie avec grād efusion de sang, tellemēt qu'il n'en eschapa vn seul de tous ces Mores. Nôtre Capitaine, à qui le cœur croissoit de cette premiere victoire, se ietta sur vne autre nauire des Turcs, qui étoit enchainée avec l'une des nôtres, ou il fit si biē son deuoir, qu'il meit au fil de l'espée plus de cinq cens Mores: lesquels cōme desesperés d'auoir perdu leurs deux meilleures pieces, vindrēt à enuironner noz voyles, tellement qu'vne de noz nauires auoit à se defendre contre quatorze ou quinze des leurs. C'étoit vn braue spectacle de voir noz gens en besongne, & entr'autres, vn preux & vaillant Capitaine nōmé lean Seran, lequel vous eussies perdu de veüe, tant soudain remuoit mains, pieds, bras & toute sa personne, rompant & enfonçant vn si grand nombre des ennemis, qu'il seroit impossible de le coucher par escrit, veu mesme-ment que par fois vous l'eussies veu enuironné de cinquante vaisseaux tant à rames, qu'à voyles, bien garnis d'artillerie, ce nōobstāt par la grace de Dieu, sa vertu acōpagnée d'un petit nōbre de gēs & d'armes, rāgea magnifiquemēt la superbe, & môstrueuse ostētation des ennemis, lesquels & de cōbatās, & de vaisseaux, & d'autres munitions étoyēt plus que nous: & dura cette bataille depuis le matin iusques à la nuit, tant dextremēt & heureusemēt cōduyte, que des nôtres n'en demeura occis que huit ou dix, & quelques autres blefsés. Or le brigātin, ou i'étois, assez éloigné des grās vaisseaux, fut incontinēt enuironné de quatre nauires des ennemis, nous poursuiuās de si pres, que fumes cōtrains nous retirer tous à la poupe, & eux de saillir dedās enuirō quatorze ou quinze de nōbre, & de gagner la place: mais nôtre Capitaine, nōmé Simō Martin, se rua sur ces chiens, les frotāt depiteusemēt de son espée trāchāte des deux côtés, en faisant cette oraison à Dieu, O Seigneur Iesus Christ, dōne nous victoire: ayde à ta foy: dōne secours aux seruiteurs de la foy: en prononçant ces paroles, il trācha la teste à six ou à sept: ce quietonna tellemēt la suyte, que vous les eussies veu

*Comence-
ment de ba-
taille entre
les Mores,
& Chrétiens
deuant Ca-
nonor.*

*Oraison du
Capitaine
Simō Mar-
tin en cōba-
tant.*

plus dextre à se ietter dehors, que animez à la bataille, aimans mieux se precipiter dans la mer, que passer par le fil de cette enuenimée espée. Les Mores se voyans en partie rompus, en partie étrillés d'une si étrangé mode feirent réfort de quatre barques: mais nôtre Capitaine, de rien moins ingenieux, que magnanime, leur ioua d'une gentille trouffe, qui fut telle. Il print vn baril, dans lequel on auoit autrefois tenu de poudre à Canon, & luy meit à la bouche vne piece de toile, qu'il tira des voiles, làgeançant si bien en rondeur, qu'elle sembloit vne pierre, puis chargea le doz du baril d'une poignée de poudre faisant mines à l'entour, cōme s'il eust voulu lacher vne bōbarde, tenāt tousiours le feu en la main, avec tels gestes, & cōtenance, que les Mores croyans que ce fût quelque grosse piece d'artillerie presté à les saluer, ils gaignerent le haut: & delà, nôtre Capitaine les voyāt retirés sur leurs limites, il s'en vint à la compagnie des Chrétiens, là ou il ne fut presque si tôt arriué, qu'il falut reprendre les armes cōtre ces chiens: lesquels furent frotés aussi rudement qu'au parauant, sans conter la proye que feimes sur eux, & de sept nauires chargées de sucre, espiceries, & autres riches marchādises, & neuf ou dix autres enfoncées à grand cops d'artillerie, entre lesquelles y en auoit vne toute chargée d'Elephans. Lors noz Mores voyans la mer leur porter tesmoniage par sa couleur rouge, de la cruelle défaite de leurs gés, ioint aussi q̄ nous auons ia prins le deux grās nauires Capitaines de leur armée, sans les autres vaisseaux enfoncés, se meirent en route, fuyant l'un deça, l'autre delà: les vns tirans contre terre, les autres errans par les plages de la mer, y eût il port, ou non. Nôtre Capitaine glorieux de cette victoire, qui étoit sans auoir perdu vn seul de tous noz vaisseaux, cōmença à rendre grace à Dieu, vsant de tels propos: Loué soit Dieu, & son fils Iesus Christ. Mes amis suyuons la victoire contre ces chiens, & soudain chacun se meit à les suyure: lesquels vous eussiés dit, à les voir fuir, qu'ils étoient poursuyuis d'une armée de cent nauires. Voilà en quoy nous employames la nuit: car la bataille nous auoit tenu depuis le matin iusques au soir. Le iour ensuyuāt, aucuns de noz gens, qui s'étoyēt reposé la nuit, vindrent à decouurir vne grand nauire flotant sur mer, apres laquelle ils feirent telle poursuite, qu'ils l'enuirōnerēt de tous côtés, tellement que ceux qui étoient dedans, desesperant de la victoire, & de leur vie, se precipitarēt dans la mer, & étoient en nombre d'environ deux ceñs personnes: lesquels ne laissames de poursuyure iusques en terre avec vn esquif, les assoumans de noz armes, qui étoient espées, lances, arcs, dards, & rondelles. Quelques vns d'entre eux nagerent plus de cinq ou six miles, tant desus leau, que dedans, contrefaisans quelquefois être morts, à fin deuiter les coups: & par fois, apres auoir lōguemēt demeuré dās la mer cōme noyez, tātôt vous les eussiés veu à vn ou deux traits d'arbalette pres, leuer la teste, & nager de toute leur force: & si tôt que nous aprochions deux pour les assoumer, ils s'enfonçoïēt dās la mer: tellemēt que vo⁹ eussiés dit, que cela se faisoit par vn vouloir de Dieu, de si lōg temps perseuerer à

Ruse du Capitaine Simon Martin.

Les Mores partie de-faits, partie mis en route par les Chrétiens.

Action de grace apres la victoire.

Mores dextres à la nage.

la nage: combien que à la par fin, leur nauire enfoncée, la plus par d'entre eux finit ses iours miserablement. Le matin ensuyuant nôtre Capitaine enuoya les galeres, le brigatin, & quelques autres petis vaisseaux pour voir les corps de ceux, qui étoient demeurés pour gage, & en trouua on, tât sus les riuages, que par les bords de la marine, qu'auisi dans les nauires prinſes par nous, iusques au nombre de trois miles six cens corps morts, sans compter ceux qui se ietterent dans la mer quâd nous les poursuyuions, lesquels étoient encor en plus grand nombre que les occis. Le Roy de Canonor apres la victoire, porta tesmoignage des Chrétiens: Aſſeurément, dit il, les Chrétiens sont gens vaillans, & belliqueux. Et des lors il commença à nous aimer, & à nous porter faueur: & à dire le vray, non sans cause: car ie me suis trouué en plusieurs grosses batailles, esquelles i'ay veu de merueilleux assauts, & horribles desconfitures: mais ie ne vey onques gens de si grand cœur, que sont ces Portugés. Le iour d'apres nous retournames vers nôtre Viceroy, qui étoit en Cochin, lequel print grand plaisir de nous voir victorieux de noz ennemis: car il étoit grand amy des Portugés. Or nous lairrons icy l'armée du Roy de Calicut, & retournerons à mes erres. Trois moys donq apres ces menées, le Viceroy me constitua facteur des marchans, office gentil, & de bon reuenu, lequel i'exerçay enuiron vn an & demy: mais quelque temps apres le susdit Seigneur menuoya à Canonor sur vn nauire, à la poursuite de plusieurs marchans de Calicut, qui venoyent à Canonor, & prenoyent leur saufconduit des Chrétiens, leur donnant à entendre qu'ils étoient de Canonor, & qu'ils vouloyent passer avec les marchandises, & nauires de Canonor: ce que n'étoit vray. Or auint en ce pendant que le Roy de Canonor, qui nous fauorisoit, alla de vie à trespas: & fut fait vn autre Roy, qui étoit autant nôtre aduersaire, comme son predecesseur auoit été nôtre amy: & fut estably par le Roy de Calicut, à force d'argent, & par violence: car il luy presta vingt & trois grosses pieces d'artillerie.

Le Roy de Canonor fait iugement des Chrétiens.

L'Auteur est créé fauteur des marchans.

De la guerre de Canonor, ou étoit la forteresse des Portugés: & de la paix, qui s'ensuyuit.



L'A N mil cinq cens & sept, & le vingtseptieme d'Auril, commença vne tresgrande guerre: laquelle dura iusques au dixseptieme d'Aoult. Maintenant vous entendrés que c'est de la foy Chrétienne, & quelle maniere de gens sont les Portugés. Vn iour auint, que les Chrétiens allans prendre de'au, furent assaillis par les Mores, à cause d'une grande hayne qu'ils leur portoyent: les nôtre ainsi mouchés à pied leué, se retirerent dans leur forteresse, qui étoit desia en assez bon ordre: & pour ce iour ne fut fait autre mal. Nôtre Capitaine, nommé Laurent de Britte, denonça ces nouuelles au Viceroy, qui pour lors étoit à Cochin: lequel tout soudain y enuoya vne compagnie de gens de guerre, bien en ordre, souz la charge du Seigneur Laurent: qui quatre iours en-apres se retira à Cochin: mais nous arrestames là pour repousser l'impet

l'impetuofité de ces chiens, & n'étions gueres plus de deux cens hommes de compagnie: n'vfans ordinairement d'autres viandes, que de riz, de nois, & de fucré: mais fur tout, nous auions grand' faute déau: tellement que nous étions contrains deux fois la femaine d'en aller querir à vn puy distant du chateau enuiron vn trait d'arbalette, & encor n'étoit poffible d'en recouurer finon à force d'armes: & ne venoyent iamais fur nous en moindre compagnie, que de trente miles hommes, aucunefois quarante, ou cinquante armés à la mode, que vous ay ia dit cy defus en parlant de Calicut, comme de d'arcs, lances, efpées, & rondelles, conduifant tousiours quād & eux, plus de deux cens quarante pieces d'artilleries, tant groffes, que menues. Or leur maniere de cōbatre étoit telle. Ils venoyent deux, ou trois miles à flot, portans diuerfes fortes d'instrumens, comme trompettes, clairons, cornets, tympanes, & cymbales, ayans aufsi plusieurs oftis pour faire de feu artificiel, & ainfi d'vne grande furie fe ruoyent fur nous, avec vne façon de faire fi étrange, & horrible, que ce eût été affez pour épouëtér vne plus grāde troupe de gens, que la nôtre: laquelle d'un cœur magnanime leur montra tel front, que iamais ne furēt fi hardis, que d'aprocher du chateau: encor qu'ils euffent le moyen de le battre tant par deuant, que par derriere, mefmement que par fois venoyēt fur mer cinquante, ou foiffante petites nauires chargées de ces Mores, non à autre intention, que de nous enclorre. Ce nonobftans tous leurs efforts, il ne paffoit iour de batailler, que n'en defeiffions dix, ou douze, & aucunefois quinze, ou vingt des leurs, mais non pas d'auantage, car incontinent qu'ils voyoient quelques vns de leurs gens morts, ils gaignoyent le haut le plus legerement du monde. Vne fois auint, qu'vne de noz pieces d'artillerie, nommée Serpēt, en defeit dixhuit des leurs en vn cop, fans que iamais il y demeurast vn feul des nôtres, grace à Dieu, tellement, qu'ils difoyent que nous auions le diable au corps, qui nous defendoit. Cette guerre dura depuis le vingtfeptieme de Mars, iufques au feizième d'Aouft, au temps qu'arriua l'armée des Portugués, fouz la charge du vaillant & cheualereux Capitaine, le Seigneur Tristan de Cugna, auquel, si tôt qu'il approcha de Canonor, nous feimes signes qu'étions prest à donner dedans: & foudain se meit apres, à faire armer tous les exquifs, & barquettes des nauires, & fans que nôtre Capitaine nous retint, incontinent qu'ils furent descendus en terre, nous mettions le feu dans Canonor. Je vous laiffe à penfer, quel contentement d'efprit ce nous fut, de voir tel fecours, veu mefmement que nous étions ia tant las, & fatigés, que nous ne pouuions plus tenir bon: ioint aufsi, que la plus part des nôtres étoient blessés: mais lors, que les Mores veirent nôtre armée tant bien equipée, renforcée, & en si bon ordre, ils ne feirēt faute d'enuoyer leur Ambassade deuers nous pour demander la paix: lequel se nommoit Mama Marical, le plus riche marchand de la ville: les nouvelles en furent foudain portées au Viceroy étāt pour lors en Cochin, qui ottroya la requeste des ennemis, à l'intention

*Les Mores
enuoyent
Ambassa-
de aux Por-
tugués pour
demander
la paix.*

tion seulement de plus aisément charger les nauires, & les renuoyer en Portugal. Quatre iours apres ce traitement de paix, voicy venir quatre marchans de Canonor, me cognoissans ia deuant que cette guerre fût commencée, lesquels muserent de tels propos: Nous te prions, ô facteur, de nous montrer vn de vôtre compagnie, qui de hauteur excède tous les autres d'une coudée, & qui a défait vn si grand nombre de noz gens, sans que iamais il fût frappé, tellement qu'il ne passoit iour qu'il n'en meît ius dix, quinze, ou vingt, des nôtres, de quoy les chefs de nôtre armée en furent tant piqués, qu'ils se banderent par fois quatre, ou cinq cens contre luy, & iamais homme de la compagnie ne le peut toucher en façon que ce soit. A quoy ie leur respondy, Messieurs, celuy que demâdés, n'est pour l'heure presente icy: il est allé à Cochin: pensant en moy mesme que l'auteur de ces brauetés & fais heroiques, n'étoit autre que nôtre Seigneur IESVS CHRIST, parquoy ie commençay à leur dire, Messieurs, tenés pour seur, que celuy que vous aués veu vous donner tant bien à doz, n'est point Portugués, mais plustost le Dieu, & Seigneur des Portugués, & non seulement deûx, mais aussi de tout le monde. L'un deûx lors me respondit, vrayemēt tu dis la verité, car il me souuient que noz Gentilhommes disoyent, que celuy n'étoit point Portugués, mais plustôt leur Dieu, & confessoient d'auantage, que le Dieu des Chrétiens, étoit meilleur que le leur: ce qu'ils n'auoyent encor si bien aperceu, qu'à cette fois: tellement qu'ils tenoyent la victoire des Portugués, comme vne chose diuine, & miraculeuse. Considerés icy quelles gens sont ces Mores, & la simplicité de leur esprit, qui souuentefois s'arrestoyent en nombre de dix, ou douze personnes, à regarder sonner nôtre cloche, estimans comme vn cas merueilleux de la voir ainsi branler, pour ce qu'ils voioyēt ceux, qui tiroyent la corde: & quand elle cessoit de sonner, ils se disoyent l'un à l'autre, Voyés cette cloche, comment elle parle, quand ils la touchent: & quand ils cessent de la toucher, elle perd incontinent la parole. Vrayement (disoyent ils) ce Dieu des Portugués est merueilleusement bon. Ils asistoyent quelque fois à nôtre messe, & lors que l'on montroit le corps de Iesus Christ, ie leur disoy, voyés, voila le corps de Dieu des Portugués, des Chrétiens, des Gentils, & de tout le monde. Et me respondoyent, vous dites vray: mais nous ne le cognoissons point, nous n'en auons iamais autant ouy parler. Par ce cy donq nous pouons iuger que ces Mores pechent plustôt par simplicité, & ignorance, qu'autrement: si est-ce qu'entre eux se trouuent de grans enchanteurs & nigromanciens: car ie les ay veu contraindre les serpens, lesquels par leur simple morsure faisoient mourir sur l'heure: & vous dy encor d'auantage, que ces Mores sont les plus habiles, & les plus dextres archiers, qui se trouuent en tout le Monde.

*Mores gēs
d'imbecilles
esprit.*

*Mores en-
chanteurs,
& nigromā-
ciens.*

De l'assaut

De l'assaut que donnerent les Portugues aux Pannaniens.



Pres ces choses ainsi conduytes & menées, comme aués entendu cy dessus, à la parfin, lors que le temps s'aprochoit de nous en retourner au país, dautant que le Capitaine commençoit à charger de marchandise ses nauires, pour tirer en Portugal, & pource que i'auois ia demeuré sept ans hors de ma maison, ioint aussi que souhaitois fort de porter à mes voyfins la cognoissance de la plus grand' partie du monde, que i'auois discouru, ie fu contrain de demander congé à mon Seigneur le Viceroy: de quoy il ne fait difficulté: vray est, que ce fut souz condition, que preallablement ie luy tiendrois compagnie là ou il pretendoit aller, comme verrés tantôt: de sorte, que sur l'heure il ordonna que toute sa compagnie fût armée tout à blanc, exceptés quelques vns, qu'il laissa en Cochin, en petit nombre: & ainsi tous mis en bon ordre, le vingtième de Nouembre en l'an que de fus, nous donna mes l'assaut au port des Pannaniens, ce iour mesme plantans les ancrs tout audeuant dudit port, & de la cité: puis le matin ensuyuant deux heures auant le iour, le Viceroy fait venir deuant luy tous les bateaux, esquifs, & nasselles de toutes les nauires, mettant dans ces vaisseaux toute son armée: & là commença à remonter, que cette ville faisoit plus de guerre, & portoit plus grand dommage aux Chrétiens, que ville qui fût en toute l'Indie: & pour cette cause il prioit toute la compagnie de prendre courage, & employer ses forces, à fin de ruiner, & sacager cette ville, qui étoit la peste des Chrétiens. Le Viceroy ayant mis fin à ses propos, le pere spirituel commence vn autre sermon avec vne parole si douce, & pitoyable, que la plus part de nous se mit à plorer, ayant en deliberation de laisser la vie en ce lieu pour l'honneur de Dieu, & protection de la foy Chrétienne, tellement qu'ainsi animés, nous commençames vn peu auant le iour à donner dedans, traitans d'une façon étrange ces Chrétiens, qui étoient en nombre plus de huit miles hommes, & nous enuiron six cens, pourautant que néumes aucuns secours de noz deux galeres, à raison de la mer, qui se trouua basse en cet endroit, & ne pouuoient approcher de la terre, comme les autres petis bateaux. Or le premier cheualier, qui faillit en terre, fut le vaillant Seigneur Laurent, fils du Viceroy. Le second bateau, qui print terre, fut celuy du Viceroy, dans lequel i'étoy. Du premier assaut il y eut vne cruelle bataille, à cause qu'en cet endroit l'entrée de la riuere se trouuoit fort étroite, & sur le bord de la terre y auoit vn grand nombre d'artilleries, desquelles toutefois nous conquestames iusques à quarante piéces, sans conter la prinse de soiffante quatre Mores, qui auoyent protesté de laisser la vie en ce lieu, ou d'emporter la victoire: car pour certain chacun d'eux étoit patron de nauire, ayant grand' quantité de diuerses marchandises, lesquelles ils ne pouuoient sauuer sinon en

Les Portugues assaillent les Pannaniens.

gaignant la victoire : & pour cette cause nous pensans étonner du premier assaut, ils nous saluerent d'un nombre infiny d'artillerie: mais Dieu nous y porta telle faueur, que des nôtres n'en demeura pas seulement vn, ains des leurs en mourut plus de cent soissante : mesme que le Seigneur Laurent en tua six en ma presence, vray est, qu'il receut deux mauuais coups: ie ne conte icy vn grand nombre des autres qui furent blessés en cette bataille, laquelle fut assez aspre pour si peu de temps qu'elle dura: car incontinent que nous eumes prin terre, ces chiens au lieu de tenir bon, gaignerent le haut: & pourautant que leau commençoit à caler, nous ne voulumes les poursuyure plus outre: mais nous meimes le feu dans treize de leurs plus grandes, & plus neuues nauires, à cause que fil à fil ils se multiplioyent, & augmētoyent leurs forces. Le Viceroy feit retirer toutes ses gens à la pointe, ou l'on étoit plus asséuré, creant là aucuns chevaliers, au nombre desquels il me constitua de sa grace, & le vaillant Capitaine le Seigneur Tristan de Cugna fut mon parrain: en apres commanda à tout le peuple de s'embarquer, qui ne fut sans preallablement mettre le feu à la plus part des maisons de ce lieu: tellement que par la grace de Dieu le tout vint à si bon port, que sans en perdre vn seul de nôtre compagnie, nous sauuames à Canonor: là ou nôtre Capitaine donna ordre de bien garnir de vituailles, & autres munitions noz nauires, à fin de nous en retourner en nôtre tant désiré pais.

*L'Auteur
est fait che-
valier.*

Liure de l'Ethiopie.

P R O E M E,



E V X, qui s'adonnent à escrire histoires, ou la situation des regions, & pais de l'vnivers, à l'intention d'auancer, & illustrer la Republique, ou bien, à fin de rendre leur nom immortel à la posterité, doyuent auoir en memoire les propos qu'ils ont obmis, ou bien differé en leurs premiers escrits, pour ce que là ne s'offroit le lieu, ou occasion d'en parler: autrement à bon droit pourroyent être notés par les Lecteurs, ou de negligence, ou d'oubliance. Or donq, puisque ainsi est, qu'au commencement de ce Liure ie me suis aquisit legerement de l'Ethiopie, il me semble n'être ny mal à propos ny inconuenient, d'en parler plus amplement à la fin de cette mienne peregrination, mesmement de plusieurs lieux, villes, Iles, & pais, que i'ay veu à mon retour, sans omettre les perils, & diuerses auantures, qui m'y ont acompagné.

Des

*Des diuerfes Iles trouuées en la mer Oceane meridionale
de l'Ethiopie.*



LE sixieme iour de Decembre en l'an que defus, nous reprimmes noz erres, tirans à la volte de l'Ethiopie, & passames le golfe, qui sont enuiron trois miles miles de chemin, & vimmes arriuer à l'Isle Monzambich, laquelle appartient au Roy de Portugal: mais encor premier que venir là, nous veimes plusieurs villes subiectes au dit Seigneur, esquelles il tient grosses garnisons, principalement en Melinde, qui est vn Royaume, & en Mombaza, que le dit Seigneur fait mettre à feu, & à sang: ayant aussi vne forteresse en Chiloa, outre ce qu'il en fait faire vne autre à Monzambich, sans conter celle, qui est en Cefala. Je ne toucheray maintenant rien des gestes du preux Capitaine le Seigneur Tristan de Cugna, lequel venant en Indie, print deux cités, assauoir Goa, Pode, & Braua, Ile tresforte, & Zacotara tresbonne, en lesquelles le Roy meit bonnes garnisons. Je me tairay de la guerre qui fut faite pour gagner ces places: car ie n'en pourrois parler à la verité, pourautant que ie n'y étoy pas. Je passe aussi outre plusieurs belles Isles, que nous trouuames par le chemin, entre lesquelles est l'Isle de l'Estuille de la Gumere, enuironnée de six autres Isles, riches en sucre, & gingembre, & en plusieurs & diuers fruits, le tout bon en perfection: aussi abondante en toute sorte de chair. Outre cette-cy, se trouue encor vne fort belle Isle nommée Penda, grandement amie du Roy de Portugal, & abondante en tout ce que l'homme pourroit souhaiter. Or pour retourner à Monzambich, le Roy de Portugal en tire vne grande quantité d'or, d'argent, & d'estain, que l'on y aporte de la terre ferme: & aussi en fait le pareil de l'Isle Cefala. Nous arrestames donq à Monzambich enuiron quinze iours, & là trouuames d'assez petite etendue, habitée de gens noirs, poures, mal garnis de viures, & encor ce peu qu'ils ont, vient de terre ferme, de laquelle ils sont prochains, ayans neantmoins vn bon port. Nous y allions quelque fois par la terre ferme en maniere de passe-temps, & pour voir ce pais habité de gens tous noirs, & tous nuds, exceptés que les hommes cachent leurs parties honteuses d'une escorce de bois, & les femmes portent vne feuille d'arbre deuant, & vne autre derriere: ayans tous les cheueux crespes, & courts, les leurs grosses comme deux doigts, le visage grand, les dans grandes & blanches comme nege: au reste, de leur naturel fort timides, principalement quand ils voyent d'hommes armés: Ce que cognoissans, pour leur iouer d'un beau tour, nous conclumes de nous mettre en equipage cinq ou six, bien armés, & embastonnés, avec belles harquebouses, en prenant vne guide dans la dite Isle, pour nous conduyre par le pais, tellement que chemina- mes vne bonne iournée sur terre ferme, là ou nous vimmes à rencon-

L'Isle Monzambich.

L'Isle Penda.

trer vn grand troupeau d'Elephans:& celuy qui les gardoit, print certain bois sec, & ardent, faisant tousiours flâmble, de laquelle ces Elephans étonnés, gaignoyent le haut, excepté vne fois, que nous trouuames trois femelles ayans leurs faons aupres d'elles, lesquelles nous donnerent la chasse iusques au pied de la montagne, ou nous nous sauuames, cheminans à trauers d'icelle plus de dix miles: puis descendimes en bas par l'autre côté, là ou nous commençames à decouurer plusieurs cauerues, esquelles les dits Noirs se retiroyent, qui ont entre eux vne terrible & sauuage mode de parler, laquelle à peine vous souroy-ie bien expliquer: ce neantmoins ie m'efforceray à vous le donner à entendre par exemple, le plus facilement que faire se pourra. Quand les mulatiers allans en Sicile veulent chasser deuant eux leurs mulets, ils mettent la langue souz le palais, & font vn cry étrange, avec certain bruit faisans par ce moyen cheminer plus viste leurs bestes: le semblable font ces gens icy, donnans la plus part à entendre leur intention par certains signes. Nôtre guide nous dit, que si nous voulions acheter de vaches, ou quelques beufs, qu'il nous en feroit auoir à bon marché: mais luy respondimes, que n'auions point d'argent, craignans, à dire le vray, qu'il neût intelligence avec ces canailles, qui nous eussent peutoyer la vie. A quoy il nous repliqua, qu'il n'étoit question d'argent, & qu'ils étoient plus chargés d'or, & d'argent que nous, mesmement que les mines ou il croissoit, n'étoient pas loing de là. Mais, dimes nous, puis qu'ils ne se soucient point d'argent, que voudroyent ils donq auoir en échange? Quelque petit cizeau, dit il: quelque petit couteau ou rasoir, ou bien quelques pieces de drap, ou de toile, & quelques petites sonnettes pour leurs enfans. Lors nous leur feimes promesse de leur bailler en troque tout ce que bon leur sembleroit, moyennant qu'ils vousissent conduire les vaches iusques ou sommet de la montagne. Ce que la guide nous promit impetrer d'eux: mais qu'il ne passeroyent outre, pourautant qu'ils n'auoyent acoutumé d'aller plus auant, & que nous eussions à regarder, ce que leur voulions donner. A quoy l'un de mes compagnons, qui étoit bombardier, commença à dire qu'il leur donneroit volontiers vn bon rasoir, & vne petite sonnette: & moy pour auoir de chair, me depouillay de ma chemise, disant ainsi: Et moy ie leur donneray cela. Lors nôtre guide, voyant noz offres, dit, Mais qui conduira en-apres tant de bétail iusques à la marine? auquel respondimes, qu'autant en eussions nous, comme en pourrions bien conduire. Or il print donq ma chemise, & le rasoir de mon compagnon, avec la petite sonnette, & deliura le tout à cinq ou six de ces bestes, leur demandant pour cela trente vaches, mais ils nous feirent entendre par leurs signes qu'ils n'en donneroyent que quinze: lesquelles luy dimes, qu'il prinse, & que c'étoit assez: car nous ne les voulions tromper: & fondain

ces Noirs conduysirent ces quinze vaches iusques au sommet de la montagne, nous allans avec eux : mais si tôt que fumes vn peu loing, ceux là, qui demorerent es cauernes, commencerent avec vne grande fureur, faire vn gros tintamarre: duquel fumes tellement étonnés, craignans qu'ils ne nous vinssent apres, que laissames là noz vaches, mettans tous la main aux armes: mais nous fumes mis hors de crainte par ceux qui cōduisoient les vaches. Et encor nôtre guyde nous assura dauantage disant, qu'ils se debatoient entre eux, qui auroit la sonnette. Et ainsi nous reprimmes noz vaches, & vimmes iusques au plus haut de la montagne ou les deux Noirs prindrent congé de nous, reprenans leur chemin. En descendant de la montagne, nous passames par vn bois, qui duroit pres de cinq miles: ou nous rencontrames vne partie des elephans, desquels auons parlé cy dessus: & en eumes telle frayeur, que la plus-part de noz vaches fut égarée, se retirant l'à, d'ou elles étoient venues: & ainsi avec ce peu, qu'auions de reste, nous sauuames dans l'île: ou nous feimes prouision des viures & autres choses necessaires pour nôtre armée, de là reprenans noz errres deuers le Cap de bonne Esperance, traueçans l'île de S. Laurent, distante de la terre ferme, huitanté lieûes: de laquelle, comme i'espere, en fera Seigneur & maitre le Roy de Portugal auant que soit long temps: car il en a ia prins deux villes, & mises à feu & à sang: & par ce moyen, sil plait à Dieu luy donner autant bonne yssue comme il a heureusement commencé & poursuiuy iusques icy, il me semble (par ce que iay peu voir tant en toute l'Indie, comme en l'Ethiopie) que ce sera le plus riche Roy de tout l'vniuers: ce qu'il merite tresbien: veu mesmement qu'il a tant fait par ses iournées, & diligences, que par toute l'Indie, & mesmement en Cochin, ne passe vn iour de feste, que dix ou douze Gentils & Mores ne reçoient le baptesme, se retirans à la foy Chrétienne: laquelle y croist & pullule de iour en iour à merueille, par la sollicitation dudit Roy: auquel Dieu a donné plusieurs triomphantes victoires, & deuous encor esperer que son regne s'auancera à l'auenir de bien en mieux.

Du Cap de bonne esperance.

Pour retourner à nôtre chemin, apres auoir passé le Cap de bonne esperance enuiron deux cens miles loing de là, voicy soudain se leuer de grans vens prouenans de l'île de S. Laurent, & d'autres prochaines, qui sont à la main gauche: & dura cette defortune par l'espace de six iours, de laquelle ce neantmoins eschapames par la sainte grace de Dieu: & apres auoir passé deux cens lieûes, nous fumes encor batus d'une pareille tempeste durans autres six iours, tellement que toute nôtre armée se separa, l'un allant d'un côté, l'autre d'autre comme gens esgarés: mais apres que cette fortune fut passée, nous eumes

touſiours la mer bounaſſe iuſques en Portugal. l'étois dans la nauire de Barthelemy Marchion Florentin, habitant de Liſbone : & ſ'appelloit ce vaiſſeau, S. Vincent: lequel portoit ſept miles quintaux deſpicerie de toute forte: & paſſames tout aupres d'une autre Ile nommée S. Heleine, ou nous veimes deux poyſſons, chacun deſux étant auſſi gros, comme vne grand' maiſon : leſquels toutes fois qu'ils venoyent ſur l'eau, la bouche ouuerte, & qu'ils hauçoient les ſourcils, ils ſembloyent vn homme armé de toute piece, lors qu'il leue la viſiere: & quād ils ſerroyent les yeux pour ſe remettre dans l'eau, ils reſembloyent auſſi à l'homme d'armes, lors qu'il vient à rabeſſer ſa dite viſiere : & pour certain, leurs yeux étoient plus gros que la teſte du plus materiel homme que l'on ſauroit trouuer, le front large de quatre pas: nageans d'une telle impetuofité, qu'ils nous épouuentoyent de forte, que fumes contrains de charger nôtre artillerie pour les déloger d'aupres de nous. Paſſans outre, nous trouuames

L'Ile S. Heleine. vne autre Ile, nommée l'Ascenſion, ou il y auoit certains oyſeaux gros cōme cannes, qui ſe venoyent poſer ſur nôtre nauire, tant ſimples & priués de leur naturel, qu'ils ſe laiſſoyent prendre à la main : mais quand on les tenoit, ils ſe montroyent merueilleuſement fiers & dépiteux : & auant que d'être pris, ils nous regardoyent cōme quelque choſe étrange ou miraculeuſe, pourautant qu'ils n'auoyent iamais veu homme, à cauſe qu'en cette Ile ne ſe trouue autre choſe, que d'eau, de poyſſons, & d'oyſeaux. Apres auoir paſſé ladite Ile, nous commençames à découurer l'étoyle Tramontane: combien que pluſieurs ſoyent de cette opinion, que qui ne voit la Tramontane, il ne peut nauiger que par le Pole Antartique : mais laiſſons les dire ce qu'ils voudront : ſi eſt-ce que nous nauigeames touſiours par la Tramontane, encor que ne viſions la dite étoyle, & que la Calamite face touſiours ſon operation & tire en tout temps contre le Pole Antique. Quelques iours enſuyuans


L'Ile l'Ascension. nous gagnames vn fort beau païs, qui eſt l'Ile des Aſtores, appartenant au magnanime Roy de Portugal : mais premierement nous veimes l'Ile de Piro, l'Ile de S. George, l'Ile des fleurs, l'Ile du Corbeau, l'Ile Gracieuſe, l'Ile du Faial, puis arriuames à l'Ile de la Tertièrre, ou nous demeurames deux iours : & ſont toutes ces Iles abondantes, en tous biens, que l'on ſauroit deſirer. Au partir de là, nous reprimmes noz erres, nauigeans à l'entour de Portugal, tellemēt que dedans ſept iours arriuames à Liſbonne, cité autant belle & riche, que i'en vey iamais: ou ie prin grād plaisir, meſmement pour être arriué en terre ferme. Et pour autant que pour lors le Roy n'étoit en la cité, ie l'allay trouuer à Almerin, qui eſt vn lieu vis à vis de Liſbone, & luy commencay à baiſer les mains: lequel me receut avec grādes careſſes, me retenāt par certains iours en ſa Cour, à fin de ſinformer de moy des nouuelles de l'Indie. Apres auoir demeure là quelques iours, ie luy montray la letre de cheualerie, que i'auois

receu

receu de son Viceroy en Indie, le priant que ce fût de son bon vouloir de la confirmer, signer de sa main, & marquer de son seel Royal. A quoy il ne feit refus, aprouant le fait de son Viceroy, & commandant métre deliuré vn priuilege, couché en parchemin, signé de sa main, confirmé du seel Royal, & mis es registres de la Cour. De quoy apres l'auoir remercié humblement, ie prin congé de sa Maïeste, tirant droit à la sainte cité de Romme.

∴

Fin des voyages de Loys de Barthele Bolognois.



NAVIGATION DE

IAMBOL ANTIQVE MAR- CHANT GREC,

*Extraicte des liures de Diodore Sicilian, & traduiete de langue
Grecque en Toscan, & de Toscan en Francois.*



NOUS auons maintenant à descrire & faire brieue narration de l'Isle trouuée en la grande mer Oceane, vers la partie Meridionale, des choses, que l'on dit estre en celle Isle, excedentes toute croyance, & aussi par quelle occasion elle fut premierement trouuée. Il fut vn nommé Iambol, de nation Grec, lequel des sa premiere enfance fut nourry & endoctriné es bonnes lettres. Mais depuys la mort de son pere (qui en son viuant auoit exercé la marchandise,) il suyuit le train paternel, & fut marchand. Suyuant lequel train de marchandise, en passant vne fois en celles parties d'Arabie ou croissent les espiceries, luy & tous ses compaignons furent prins par les brigandz. Et premierement en compaignie de l'un de ceux qui avec luy estoient esclaves, fut deputé pasteur à garder le bestial. Et depuis avec celluy mesme conseruiteur fut de rechef prins par les Noirs, & de là mené oultre les parties de l'Aithiopie prochaine de la mer. Ces deux compaignons estans estrangiers en ces longtaines regions furent choisis, selon la costume du pays, pour de leur corps faire expiation, c'est adire purgation des pechez du pays. Or la costume des Noirs habitans les costes maritimes de l'Aithiopie, laquelle ilz tenoient de tout ancien temps par les diuines voix, responses, & oracles de leurs Dieux, obseruée par vingt progenies, qui sont six cens ans, chescune progenie comptée pour trente ans, estoit de faire expiation publique, & purgation vniuerselle des pechez de tout le pays par deux hommes estrangiers à cela vouez & consacrez, en telle maniere. Ilz tenoient tousiours preste, vne barque petite, mais toutesfois de grandeur & façon conuenante, & assez apte à supporter la fortune, & la tourmente de la mer, que neantmoins deux hommes pouoient bien regir & gouverner, fournie de viures necessaires autant que pour six Moys pourroient suffire à deux hommes. Lesquels, selon le commandement de l'oracle, ils mettoient dans la barque les aduertissans, & leur enchargeans que selon le commandement de l'oracle ilz adressassent la barque vers la partie du Mydi, avec asseurance, qu'en

Proposition

Narration

*Iambol
Grec fils de
marchant*

*Costume
d'expiation
par corps
estrangier*

*Maniere
d'expiation*

ce faisant ilz s'en iroient en vne Isle tresheureuse, habitée de peuples humains, beningz, & paisibles, avec lesquels ilz viuroient en souueraine felicité. Ce que aduenant qu'ilz paruinssent sauues à ceste Isle fortunée, par le semblable les Aithiopiens maritims & leur pays se porteroient heureusement en vie paisible, & en toute humaine felicité par l'espace de six cens ans. Mais au contraire si ces deux hommes espouuetez par la longue traicte, hauteur, & tourmentes de la mer, retournoyēt arrieres, & ne parfaisoient leur voyage iusques à la dicte Isle de felicité, ilz les asseuroient que comme meschans, & criminelz hommes traistres & desloyaux, qui importeroient à toute leur nation & leur pays grandes calamités, & extremes malheurs, ilz seroient puniz de trescruelz supplices. Ces preparations faictes, & ces aduertissemens donnés les Aithiopiens mettēt les deux estrangiers aduenturiers dans la nauire, en les coronnant de chappelletz de verdure florie, & ainsi leur font prendre voile en haute mer, les recommandans à la bonne fortune. Et ce pendant ilz demeurent aucuns iours aux riuages de la mer, faisans festes, sumptueux sacrifices, & prieres pour la prospere nauigation de ceux ou ilz esperēt l'heur, ou malheur de leur contrée par le temps ensuyuant de six cens ans, par l'expiation de ces deux estrangiers & adueturiers hommes. Aduint doncques que Iambol, & son compaignon esclaves, pour la seconde fois prins des Aithiopiens, & mis pour expiation en la barque, furent transmis en haulte mer, vers le Myiour, ou apres auoir esté quatre Mois grandement trauaillez de terribles tourmentes & fortunes, en fin du quatriesme Mois furent par aduventure transportez en la susdicte Isle des bien heureux, laquelle estoit de forme ronde, ayant de contour cinq mille stades, qui valent enuiron 625. milles. A laquelle estans arriuez, aucuns des habitans leur venant au deuant, aydoient à mener la barque en terre, & à prendre port. Autres accourans pour voir s'esmeruilloient de la venue des deux estrangiers aduetureux & les receuoient en gracieuse humanité: leur cōmuniquans benignement tous les biens qui estoient en leur region. Les habitans de ceste Isle ne sont semblables ny en corps, ny en maniere de viure à ceux de noz pays. Car ia soit que tous soiēt de telle forme humaine cōme nous, si sont ilz de plus haute grandeur excedāt quatre coudees. Leurs os ployables cōme nerfz se flechissent & retournent cōme ilz veullent, ayans tous les membres du corps maniables outre mesure: mais beaucoup plus agiles, adextres, & plus robustes que les nostres, tellement que ce qu'ilz ont prins & tiennent en main, nul tāt fort soit ne leur peut desferrer des doigtz. Ilz ne sont aucunement peluz par tout le corps, & les mēbres, sinon au chef, aux sourcilz, & en la barbe mentonniere. Au reste ilz sont si poliz, que vn seul poil n'y apparoiſt tāt soit petit. En sōme ilz sont fort belles gēs, de bōne grace, belle prestāce, & merueilleusemēt biē cōposez & proportionnez de toutes les parties corporelles. Ilz ont les trouz des oreilles beaucoup plus larges, & plus ouuērs que nous. Et d'auantage sont dissemblables des gens de ce

*Enuoy de
Iambol.*

*Arriuee à
l'Isle.*

*Description
de l'Isle heu-
reuse.*

*Description
de gens.*

*Forme de
corps mer-
ueilleuse.*

*Corps poliz
sans poil.*

pays quant à la langue. Car la leur a ie ne say quoy de particulier, à eux concedé de nature, & ayde de leur propre esprit, laquelle au deffoubs est diuisée en deux parties iusques à vn certain endroict, en sorte que depuys la racine elle semble estre double. Par ainsi ilz ont diuersè maniere de parler, tellement que non seulement ils vsent de langage humain, mais aussi en voix articulée imitent les diuers chants des oyseaux, & generale-ment toutes varietes de voix, & de sons. Et ce que se trouue encore plus merueilleux, ils parlent d'une traicte de voix à deux personnes diuerses deux parolles ensemble, parfaictement, tant en respondât que en raison-nant bien à propos, de toute chose, & particuliere circôstance: faisans pa-rolle à l'un d'une partie de leur langue diuisée, & de l'autre tenans propos à vn second. On dict aussi leur air estre temperé, côme à ceux qui habi- tent soubs la ligne equinoctialle, si bien qu'ils ne sont tourmentés ne du chault, ne du froid excessif. Et toutes les saisons de l'an sont par la bonne temperie de l'air tousiours en parfaicte vigueur, vertu, & temperature de ciel & terre & air, telle que descript Homere disant.

Langue & parole double.

Imitation de voix.

Temperie d'air.

Perpetuelle equalite vernale.

Poire sur Poire on voit se faire meure

Là en tout temps, pommes sur pommes naistre :

Raisins aigretz estre en fleur à toute heure,

Deuenans doux, figues sur figues croistre.

Homere en l'Odysee.

Oultre ce lon dict que le iour y est perpetuellement egal à la nuyct: & que sur le poinct de myiour nul corps n'y fait ombre, le Soleil estant à droicte ligne perpédiculaire sur leurs testes. Ils vivent en cōmunautés & assemblées de parétages, qui toutesfois n'excedēt point le nombre de quatre cēs ensemble. Ils habitēt parmy les belles & florissantes prairies, la terre d'elle mesme, sans culture de labourage leur produisant grande abon- dance de bons & delicieux fruyts en toutes sortes, pour leur vie substan- ter. Car par la naturelle vertu de la feconde terre de celle Isle, & par la bonne tēperature de l'air qui la couure & enuirōne, tous bons grains, her- bages, & fruiçtaiges y naissent deus mesmes en trop plus grande affluen- ce qu'ils n'en ont besoin. En leur contrée prouiennēt en grande quantité certaines cānes produisantes abondāmēt aucuns grains semblables à pois blancs, lesquels recueillis ils arrosent par dessus deau tiede, tant qu'ils s'enflēt à la grosseur d'un œuf de colomb, puis desechés les pisent en paste, dont ils font pains cuyctz de tresbon goust, & excellente douceur. En la- dicte Isle sont aussi maintes belles & amples fōtaines. Desquelles les vnes coulent deaux chaudes, pour l'usage des estuues, baings, & lauemens à la mondice, netteté, & santé du corps. Les autres sont decoullante deaux tresfraiches & claires, de souueraine bonté, purité, & douceur au boire, moult profitables au rafraichissement, & à la santé des corps. Les gens de ceste Isle ont grande cure, & sont merueilleusemēt studieux de tou- tes doctrines & sciēces, mais sur toutes de l'Astrologie. Ils vsent de lettres propres à eux qu'ils ont en nombre vingthuiçt, selon la vertu & puissance

Perpetuelle equalite de iours & nuyctz.

Fertilité sans labour

Grain excellent pour pain.

Fontaines chaudes & froides.

Estude. Astrologie. Lettres de quadruple usage.

de signifier les diuers sons, voix, & articulations humaines, mais en figure de caractere, sont sept sans plus, chescune ayant quatre diuerses vertus, & signifiances de prononciation. Ilz néscriuent pas en trauers & à costé cōme nous, mais du hault de la carte en bas à droicte ligne descendante.

Mode d'escrire.

Longueité & santé.

Ilz sont hommes de treslongue vie: car ilz vieillissent iusques à cent cinquante ans, le plus souuēt sans sentir aucune maladie ny infirmité. Si aucun a fieure ou autre maladie corporelle, ou qu'il soit estorpié, ou en sorte quelconque debilité, & malhabitué de son corps, incontīnēt cōme personne inutile, & reprochable, & qui en viuāt a plus de mal, que de bien, ilz le cōtraignēt à mourir par vne rigoureuse Loy, qu'ils gardēt entre eux tresseueremēt. Ils viuent coustumieremēt iusques à certaine eage, laquelle terminee ils se donnēt mort volontaire par diuers moyēs, & sans crainte ne sentimēt de mal douloureux. Car par leurs terres croist vne espece d'herbe, sur laquelle si aucun se couche, iamais n'en releue, ains s'endort en vn doux sommeil mortel, & ainsi sans douleur trespasse. Les femmes ny sont point mariées, mais toutes cōmunes, & les enfās qui d'elles naiscēt pour enfās cōmuns sont receuz, & nourris par cōmune amour de tous.

Depeschés des malades

Mort volontaire sans douleur.

Sommeil image de mort.


Cōmunauté de femmes & d'enfans.

Les petits enfās le plus souuēt sont ostés d'entre les bras de leurs propres meres les allaitans, & changés à d'autres qu'on leur baille pour les leurs, affin qu'elles ne puissent recognoistre leurs propres enfās naturels, & se y affectionner plus que aux autres. Dont aduiēt que n'estant entre eux aucune ambition ne particuliere affection, ils viuent vnis en amitie & concorde sans aucune sedition. Oultre ce que dict est. En ceste Isle beatissime, sont certains animaux de forme petits, mais de substance corporelle, & vertu de leur sang fort merueilleux. Ils sont de forme ronde presque

'Amortissement d'affections.

Concorde.

Animaux merueilleux.



semblables à la tortue, & sur le dos sont croisez & signez de deux lignes jaunes en figure de croix d'or. A chascque bout desquelles lignes d'or croissantes, est vn œil, & vne oreille, tellement que en quatre pars & de tous costez ces animaux voyent, & oyent de quatre yeux, & quatre oreilles, & toutesfois n'ont que vne seule bouche, vn estomac, vn ventre, & entrailles vniques, ou descend ce qu'ilz mangēt. Ces bestes ont plusieurs pieds à l'entour de la circonferēce du corps, avec lesquels peuuēt cheminer de quelcque costé qu'elles veullent sans contourner leur corps. Et affermēt les habitans de ce pays le sang de ces animax estre de tant merueilleuse vertu, *Sang mediceal consolidatif.* que tout corps de chair taillé en pieces (moyennant qu'il y reste encore esprit & vie) sil est baigné au sang de celle beste, incontīnēt se reioindra, & la solution de continuité se reconsolidera, voire que vne main (par maniere de parler) couppée du bras, remise en son endroiēt à sang chaud, & playe nouvelle, se reprendra par application de ce sang bestial merueilleux. Semblablement les autres parties du corps, moyennāt que ne soyent des mēbres nobles & principaux, esquels la vie est cōtenue. Chascune cōmunauté & cōpaignie nourrist de tresgrandz oyseaux de nature estrange & diuerse & de hault & puissant vol, avec lesquels ilz font espreuē de quelle dispotion d'esperit serōnt à l'auenir leurs enfans petitiz. Car posans leurs enfans petitiz, sur ces grandz oyseaux, ilz les laschēt à haut vol. Et sil aduient que volans par le hault air les enfans portez par ces grādz & priuez oyseaux, se tiennēt fermes & assurez sans s'espouuenter: ilz les eleuēt & nourrissent. Mais silz se troublēt de paour, & sestonnēt du hault vol, ilz les iectent & delaisent cōme creatures stupides, defaillies de cœur, de vie peu durable, & qui iamais ne seront aptes ne cōuenables à aucune vertu d'esprit magnanime. En chascune cōmunauté & assemblée le plus ancien est tenu cōme Roy: & cōmande aux autres, qui tous luy obeissent. Puys quād il est paruenue au terme de vie de cent & cinquāte ans, luy mesme selon leur loy se priue de vie, & apres luy le plus vieil prēd la principauté. La mer qui celle Isle enuironne flotte & reflotte faisant grādz mouuemēs en accroissement & descroissement, & son eau au goust est cōme douce. *Eau marine douce.* L'estoille du North, dictē Transmontane, & plusieurs autres qui en nos climatz se monstrent, là n'apparoissent point. Et sauoir est que ceste Isle tāt bien fortunée, & de telle qualité, n'est pas seule, ains en ya sept de mesme grādeur, & d'egalle distance l'une de l'autre, les habitās d'icelles vsans de mesmes coustumes & mesmes loix. Lesquelz, cōbien qu'ilz ayent tresgrande abondance de tous les biens requis & necessaires à la vie humaine que la terre de soy mesme sans trauail leur produict: neātmoins ilz vsent modestement de telles delices, aimans la pasture simple, & cerchans à se nourrir autant que peut suffire à nature, non à volupté, māgeans chair & autres viandes tāt bouillies que rosties en leur simple nature, reiectās tous estranges goustz & saueurs, & appareilz que l'art de cuyfine à inuenté, *Sept Isles semblables* à si grande curiosité & varieté d'apprestz, & de tout cela sont & veullent *Continnence Religion naturelle.*

estre du tout ignorans. Ilz adorent Dieu, l'estimans estre celluy qui tout contient. Et en apres le Soleil, & tous les autres corps celestes. Ilz s'occupent & exercēt à pescher poissons, & prēdre oyseaux d'infinies & diuerses especes. En ces Isles aussi prouiennent de plain gré de nature, & sans culti-
Plantureu- se fertilité. uage plusieurs arbres fructiers comme oliuiers, & vignes, dont ilz tirent
Serpens sans venin & mēgeables. grande abondāce d'huyle, & de vin, & là se nourrissent serps tresgrandz
Vesture parrable & riche. mais nō veneneux ne nuisibles, & qui à personne mal ne font, desquelz la
 chair est de merueilleuse douceur, & pour ce en vsent en leur manger. Ilz
 se vestent & se font habillemens d'un fin lainage, doux & resplendissant,
 prins au mylieu des cannes, lequel amassans ensemble, & le zaignans en
 precieux sang des muricines cōques marines appellees Pourpres, en font
 tresriches & tresexcellens draps de purpurine couleur descarlate viue. Là
 aussi font maintz diuers animaux volans, rampans, & nageans, nō facile-
Diuersité d'animax. ment croyables pour estre hors de toute cōmune opinion. Les gens de ce
 pays obseruent vne certaine forme, & cōstante forme de vie, se contentās
 de māger vne seule viande par iour. Par ce que vn iour leur est determi-
Vnitē de viandes est salubre. né à manger poisson, l'autre à manger d'oyseaux, vn autre à manger chair
 de bestes terrestres, & quelque fois ilz vsent seulement d'oliues, de raisins,
 fructages, ou autres telles viandes simples & parables. Ilz s'adonnent aussi
Mutuel seruice. à diuers exercices, & mutuelz seruices de l'un vers l'autre. Les vns seruent
 volontairemēt, & liberalemēt aux autres, qui aussi leur rendēt la pareille.
 Aucuns peschent, autres exercēt les arts, partie se occupēt à certaines cho-
Seruice hu- main. ses duysantes à l'vsage cōmun de la vie humaine. Partie diceux (excepté
 les vieux) vacquent au seruice public, partissans entre eux par equalité
Seruice di- uin. proportionnée les œuures, & labeurs, chascun à son tour. Es iours solēnelz
 des festes, & aussi es sacrifices, ilz chantēt Pseaumes, & Hymnes à la louā-
 ge des Dieux, mesmement à l'honneur du Soleil à qui ilz ont dedié, &
 consacré eulx, & leurs Isles. Ilz enseuelissent les morts aux riuages de la
Sepultures. mer, faisans la fosse dens l'arene dont la mer est calée, & la enfouissent le
 corps mort, en le couurant d'un comble, affin que le flot de la mer retour-
 nant y apporte tousiours sable. Selon lequel flot de mer croissant ou de-
 scroissant ilz disent aussi que les cannes susdictes dont ilz recueillent les
 doux fructs se trouuēt ou plus pleines, ou plus vuydes cōme le plein ou le
 defin de la Lune. L'eau des fontaines chaudes est douce & saine, & main-
 tient tousiours sa chaleur sinon quelle soit meslée d'autre eau froide, ou
 de vin frais. En ces Isles tant heureuses nauigerēt Iambol & son compai-
Arriuée de Iambol & deschasse- ment. gnon, là transmis pour l'expiation des Aithiopiens, & apres y auoir prins
 terre, ilz y demourerent bien sept ans, mais finalement en furent chassēz
 hors par force, cōme meschans hommes, nourriz & acoustumez à mau-
 uaises meurs. Parquoy apres auoir calfretté vn Gallion, & fourni d'eau &
 de viures necessaires furent contrainctz à se despartir de là, ce quilz
 feirent, prenās la volte du leuant, tant que au quatriesme mois apres arri-
 uerent en Indie, & feirent scale en vne plaine areneuse. En ce voyage le
 Compaign

Compaignon de Iambol perit par vne fortune de tourmente qu'ilz heurent. Iambol ayant prins terre, s'adreça à vn village, & par les habitans de là fut conduict vers le Roy, estant lors à Palimbrotte, ou Alibrotte, cité esloignée & distante de la mer le chemin de plusieurs iournees. Lequel Roy portant grande affection aux Grecz, & faisant grande estime de leur doctrine, receut Iambol à grand honneur, & luy feit de grandz dons. Puy le feit acompaigner seurement iusques en Perse, & de là sauvement l'enuoier en Grece. Ou estant retourné ledict Iambol, à bon loysir & repos mit par escript ce qu'il auoit veu, & en laissa la memoire à la posterité tât de cecy que de plusieurs autres choses memorables, qu'il auoit veues & obseruees es Indes, qui auant luy n'auoyent iamais este cogneues des Grecz ne d'autres hommes d'Europe.

*Mort de compaignon.
Palimbrotte ville d'Indie.
Estime de grecque doctrine entre les barbares.
Retour de Iambol.*

DISCOVRS DE S. I.
BAPTISTE RHAMNVSIO
SVR LA NAVIGATION
de Iambol Grec, Marchant
tresantique.

*Pays natal
de Diodo-
re.*

*Le val au
diable.
Histoire de
Diodore.*

*Ordre histo-
rial.*

*Temps de
Diodore.
Perte de
liures.*

*Rapport
d'un Portu-
gallois gen-
tilhomme.*

*Malacha.
Cherfonnes
se dorée.
Somatre.*

*Image de
parfaite
republi-
que.*



DIODORE SICILIAN, Grec historiogra-
phe, nasquit en l'Isle de Sicile, en la cité d'Agyre,
à present nommee Sainct Philippe d'Agyron, au
Valdemon, qui est le val du diable. En son viuant
il escriuit en langue Grecque vne grande & mer-
ueilleuse histoire, contenât en abregé propos tout
ce que ont laissé en memoire tous les antiques
scripteurs, tât Grecz, que Latins, & Barbares. Or-
dissant le principe de son histoire des le commencemēt du Monde, selon
l'opinion des Gentilz, paruint en fin iusques au siecle de l'Empire
d'Auguste Cesar. Au temps & regne duquel il vesquit, son histoire fut
par luy diuisee en quarâte liures, desquelz par grāde aduventure n'en font
demeurez iusques à nostre temps que quinze enciers, & deux deuyz ad-
ioustés. Et pour autant que à la fin du second il a descript la nauigation
du Iâbol hōme Grec tresantique, lequel par diuerses fortunes, prin-
ses, captiuités, reprises & reuoz, finalement fut transporté à vne isle loin-
taine posée au dessoubz du poinct celeste equinoctial, & enuironnee de
la mer Indique. L'estimant non indigne d'estre leūe, me a semblé bon de
la transcrire apres tant d'autres nauigations precedentes: & ensemble ra-
compter tout ce que sur icelle i'ay autresfois ouy raconter à vn gentil-
homme Portugallois, homme fort studieux, & qui auoit prins grand tra-
uail aux bonnes lettres & peregrinations estrangieres, & qui merueilleu-
sement se delectoit en la Cosmographie. Icelluy noble Portugallois, pour
auoir demouré plusieurs ans es parties de l'Indie Oriētalle, mesmemēt en
la cité de Malacha, laquelle est au dessus de la dorée Cherfonnesse, Isle
ferme abondante en or & tous biens, & à l'encontre de l'Isle de Somatre,
parloit & deuisoit fort singulierement de tous ces pays estranges qui sont
situés au dessoubz du Cancre Tropicque vers le Meridional. Entre autres
choses, ce bon gentilhomme disoit auoir ferme opinion que la nauiga-
tion de Iambol a esté vraye, & que sans doute il arriua à ceste tresheu-
reuse & bien temperee isle droitement située soubz le Meridian equi-
noctial, de laquelle retourné en son pays de Grece, il laissa la memoire à
toute posterité. En quoy faisant luy tembla bō de feindre vne republique
la mieux ordōnée qui se pourroit imaginer, auoir esté par luy veūe en ces
pays estranges, desquelz n'estoit cognoissance q̄ iamais personne par le pas-
sé y eust esté, ne esperance que à l'auenir iamais hōme y deust aller, d'ond
il

il figura l'estat & l'Image de ceste parfaicte politique, grand nombre d'ans avant que le diuin Platon composast ses liures de la republique. Et pource selon la coustume des historiens de son temps ancien, le dict Iambol a mis parmi son histoire tant de narrations & descriptions fabuleuses des hommes & des bestes, à raison que ces antiques historiens n'estimoient point que leurs escripts deussent estre permanens en autorité & reputation, sinon que en quelque partie ilz ressemblassent aux Poetes, qui tousiours meslent la verité avec miracles fabuleux, & plaisantes merueilles incroyables. Et pour autant que veritablement & sans fable telles sont les regions situees soubz les Tropiques (ainsi que ledict gentilhomme Portugallois affermoit) & ainsi temperees, & d'un bon air inspirees, & toutes habitees & pleines de gens, & que par la temperie durable tout le cours de l'année, en toutes saisons y sont fruietz meurs, vers, & en fleur sur les arbres: il ne falloit point doubter que Iambol selon la conuenance de son recit, n'ayt esté en ces pays là. Disoit d'aduantage ce Noble Portugallois, à propos desdictes choses, que ayant leu la Poësie de Homere (qui par son antiquité a tousiours esté des tressages, & sauans hommes estimé, le premier Philosophe, & duquel toute la Philosophie a prins son origine) il trouuoit que ce diuin Poete auoit eu trespas de cognoissance de toute la terre, de ses situations & parties, & mesmeinent de celles regions qui sont situees soubz les Tropiques. Ce que l'auoit faict maintes fois penser à la description des merueilleux Iardins de Alcinoüs Roy des isles de Corfu, esquelz il dict que en toutes saisons de l'année, ne par froid, ne par chault, iamais les fleurs & fruyetz ne defaillent sur les arbres. Et que là iournellement spire vn doux vent Zephir, qui continuellement faict naistre, fleurir, & fructifier les arbres & plantes, & les fruyetz meurer d'ond surcroist la poire sur la poire, la pomme sur la pomme, le raisin sur le raisin, & la figue sur la figue y meurist, coniecturant que par ces beaux iardins ainsi figurez par Homere doiuent estre entenduz en plus secreete & profonde intelligéce les beaux & delectables lieux de ces heureuses isles par Iambol descriptes, lesquelles iusques à ceste heure n'auoient esté entendues. Et non obstât que l'office du Poete soit faire les choses contenues en ses descriptions si grandes, si estranges nouvelles, & merueilleuses, que elles semblent plustost fables incroyables, que narrations, ne vrayes ne vray semblables. Si est ce neantmoins que les bons & aguz espritz cognoissent bien la verité naturelle, ou historiale, estre par figure exprimee, & couuerte soubz telle fabuleuse forme de parole. Et pourtant il tenoit pour certain que par ceste telle plaisante description des Royaux iardins d'Alcinoüs le diuin Homere designoit en son idee, la temperie & douceur de l'air, la fertilité, & bonté de la terre de ces fortunées isles, qui sont subiacentes aux Tropiques, & à la ligne equinoctiale, conformant les parolles du Poete tant à propos que merueilles, aux prouenances, & aux saisons quil auoit veuës esdictz pays meridionaux

*Histoires en
ueloppées
de fables.*

*Homere
Prince de
Philosofie.*

*Iardins du
Roy Alcinoüs.*

*L'office de
Poete.*

naux. Mais pour retourner à l'isle de Iambol. On peut veoir en sa narration tant antique vne singuliere description de ce gros grain semblable à pois blancz, qui dens les cannes se tire pour faire le bon pain. Car d'icelluy grain encore auiourdhuy toute l'Aithiopie, & toutes les isles, & terre ferme de l'Indie occidentale se substantent, & l'appellent Mahiz, & les Portugallois l'appellent Zaburro. Lequel grain a esté veu en Italie de nostre temps pour la premiere fois. Voulant le susdiët Gentilhomme demonstrier à l'oeil sur quelle partie de l'Aithiopie fut laschée en mer & aux vens & a là fortune làdventureuse barque ou fut mis Iambol avec son compaignon: il se fait apporter vne Carte marine de navigation faicte par leurs Portugallois fort belle & singuliere. Et disoit que encore qu'il fust bien difficile de demonstrier propremēt en la carte les certains lieux de la description de Iābol, pource qu'il ne determinoit par propre nom, ne cité, ne lieu aucun: neantmoins y pouoit on venir en discourant par coniecture. Araison que presupposant, Iambol avec sa compaignie auoit esté prins la premiere fois en Arabie la felice, & en icelle faicte pasteur, & depuys la seconde fois auoit esté esclau des Noirs & mené en celle partie de l'Aithiopie qui est prochaine de la mer: il fault dire necessairement que ce captif pour la seconde fois fut passé par le destroiët de la mer rouge, & mené en celle partie de la haulte Aithiopie qui iadis estoit appellée Troglodytique, laquelle à present est habitée de plusieurs peuples qui là sont passez de l'Arabie & si est faicte fort ciuile, pour y auoir esté fondees plusieurs citez, chasteaux, & logis des grandz Seigneurs Arabes, Mahomettans, Maures Turcz, & Chrestiens de la terre Presteian. Et là ce Gentilhomme demonstroit ou passa Iambol la mer rouge, c'est a sauoir en vne bouche au mylieu de laquelle est vne Isle large, & esloignée de terre trois mille d'un costé & trois mille d'aultre, appellée Bebelmandel: qui es antiques se nomme l'Isle Diodore à douze degrez de hauteur, en tel degré qu'est le destroiët de mer ou elle gist. Depuys là, fault coniecturer qu'il fut mené à la cité de Zeia: laquelle selon l'opinion d'aucuns anciennement a esté clamée Emporion Aromatic, c'est à dire apport des espiceries: pour la commodité du port ou arriuoient toutes les marchandises de l'Aithiopie, comme auiourd'huy encore s'y font: mais les degrez de la haulteur de ceste Isle ne sont confinez. Ou bien vrayement pour se conformer à la parolle de Diodor, fault coniecturer, & dire, que Iambol fut conduiët plus long chemin par terre, tant qu'il passa finalement iusques au Royaume de Magada: qu'est au dessus de la marine d'Aithiopie tirant vers le Mydi à deux degrez de hauteur, que facilement on peut croire estre ce lieu que Ptolemée appelle Opone, à deux degrez d'altitude, & que en cest endroiët les Noirs ayans attendu le vent du Ponant qui vente & souffle là continuellement six mois tous les ans: auquel temps ilz laisserent aller la barque aduëtuse, avec Iambol & son cōpaignon, au voiage ordonné.

Et

Et quant à l'isle, ou quatre mois apres la barque laschée arriua l'estrangier Iambol, là pour expiation transmis ledit gentil homme en faisoit discours en telle mode: disant que ayant trouué par escript que ceste isle estoit de cinq mille stades de contour, & située soubz l'equinoctial, parquoy les iours y estoient tousiours egaux, & l'Ourse tramontane de nostre pol point ne s'y voyoit: par ce falloit bien dire, que ceste isle figurée par Iambol tant heureuse & riche, fust l'Isle de Somatra, par la raison qu'il monstroit appertement sur la carte. C'est que en departant des riuages maritims dessusditz de l'Aithiopie, & faisant droict cours à la volte du leuant soubz la ligne de l'Equateur, il ne se trouue nulle autre isle (au moins qui soit grande, & de nom) fors que celle de Somatra. Laquelle veritablement est la Taprobane nagueres en noz iours descouuerte. Bien y sont en ceste mesme traicte infinies isles, mais petites & desertes. Et si aucun venoit à faire doubte sur cela: comme se pourroit coniecturer que la renommée isle Taprobane, qui tant est grande, fust celle que Iambol dict estre seulement de cinq mille stades de contour? Ledit gentilhomme respõdoit, que Strabon commenteur grec, & auteur antique en parlât de la Taprobane disoit q̄ Onesicrit (qui fut vn des Capitaines d'armée de mer d'Alexandre le grand) la descript estre de la grandeur de cinq mille stades sans faire mention de la longueur, ny de la largeur: & quelle est loingtaine, & bien esloignée des peuples Prasiens habitans sur le fleuve Ganges, la distance de navigation à vingt iournées loing, auquel lieu les nauires ne pouoient pas aisement ne bonnement flotter, tant à cause des mauuaises voiles, & vens contraires, que pour n'y auoir fond de taille en celle mer qui en plusieurs lieux n'excede point six pas en profondeur, & en certains canaux & destroitiz est si profonde que nulle ancre ny peut prendre, dict aussi que au dessoubz de ceste isle tirans vers les Indes y a bien plusieurs autres isles: mais ceste plus que nulle autre est exposée vers le meridional. Semblablement dict Pline par l'autorité de Eratosthenes, que la Tabrobane est longue de sept mille stades, & large de cinq mille. Et apres continuant son propos, racompte que au temps de Claude Empereur celle Taprobane auoit esté descouuerte, & cogneue beaucoup plus grande que les precedens Cosinographes n'auoyent relaté, voire si grande quelle estoit reputée vn autre monde. Et que vn Roy de ladicte isle enuoya quatre ambassadeurs à l'Empereur Claude Cesar, desquelz le principal estoit nommé Rachias, lequel descourrit ce qui en estoit: ou fut considéré que ceux qui là nauigent ne se gouernent point par les estoilles, mais par le vol de certains oyseaux quilz laschèt en l'air, & les suyuent, pource aussi que vers eux estans Antipodes à nous ne se voit point nostre pole artic. En sorte quil appert par les parolles de Strabon & de Pline, Onesicrit, & Eratosthene que la Taprobane Isle en la mer Indique soubz l'equinoctial, n'estoit iadis par les anciens reputée plus spacieuse q̄ de cinq à sept mille stades: cest à scauoir

Somatra.

Taprobane.

Strabon.

Onesicrit.

Prasiens peuples.

Pline.

Claude Empereur.

Ambassadeurs du Roy de Taprobane enuoiées à l'Empereur de Rome.
Rachias.

auant

auant que sa grandeur fust descouuerte. Toutes lesquelles particularitez & conditions mesmes sont confirmées par les nauigations des Portugalois faictes nagueres & à present, cest auoir l'Isle de Somatre en la mer Indique estre tresgrande, & que la ligne equinoctiale trauese par dessus droict au mylieu. A quoy l'on peut cōprendre pour certain que l'Isle descrite par Iambol anciennement estoit la Taprobane. Laquelle à present est appelée Somatre, de laquelle disoit ce gentil hōme portugallois, quelle n'auoit point esté descouuerte sinon en celles parties de la marine, qui cōmencēt à cinq degrez sur la ligne vers le Maïstral, vent de north & descēdent par le Sciroc, vent du midy autres cinq degrez soubz la ligne vers le Pol Antartic: qui emportēt l'espace de soixāte milles, cest adire cinq mille stades ou enuiron. Et à la verité encore que Iābol s'efforceast de nauiger vers le Meridional, si fut il neantmoins transporté vers le leuant par ceste trauese du vent ordinaire du Ponant & en partie aussi par la fortune, & ainsi arriua es parties de ceste isle qui regardēt vers Occidēt, & qui sont soubz la dictē ligne. Et que cela soit vray Iambol mesme dict que de ces parties là ne se voit l'Ourse de nostre pole. Pource que l'orizon (cest adire le contour visible de la circonference des cieux) en cest endroit passoit par les deux poles du monde. Disoit d'aduantage ledict Gentil hōme, que

Zeilam Zeilam grande isle opposée à l'encontre du cap, ou chef de Comeri, qui est vne falaise ou promontoire meridional de la coste de Calicut: ne peut nullement estre celle isle que trouua Iambol. Car elle est à sept degrez sur l'equinoctial, auquel respect se peut veoir l'Ourse de nostre Pole. Les sept autres isles que l'on dict estre prochaines, & aux entours de ceste isle fortunée ou aborda Iambol, & de mesme grandeur, & de egalle distance l'une de l'autre sont grandz argumens de credence, que l'Isle par Iambol ainsi confinée est l'Isle de Somatre. Pource que d'icelle premierement est prochaine l'Isle appelée Giaua Maiore. De laquelle là dernière bourne n'a point encore esté descouuerte pource quelle est trop estendue. Puy celle qui est clamée Giaua Minore, item l'isle de Borneo, de Timor, & maintes autres, dictes les isles Mauluques. Qui est chose merueilleuse à penser, comme ia par tant de milliers d'ans on n'en a point eu de cognoissance, d'ond puy apres par succession de temps soyent venues en obly, & totale ignorance, & finalement en nostre temps de rechief descouertes & recogneues. Vne autre preuue y a encore bien apparente que Iambol arriua à Somatre. C'est que il narre, auoir esté chacé de ceste heureuse isle, comme melchant & mal nourry: & quatre mois apres auoir prins terre es palustres riuages de l'Indie ou par tourmente il fut iecté, qui à la verité est que departant de l'isle de Somatre, & nauigeant à l'aspect de la tramontane il s'en vint rendre droict à la bouche du fleuue Ganges, auourd'huy appelé Bengala: ou ce grand fleuue se desgorge dens la mer Meridionale à vingt & vn degrez sur l'Equinoctial. Et puy dict que de là il fut

Giaua maiore.

Giaua minore.

Borneo.

Timor.

Isles Mauluques.

Bengala bouche de Ganges.

fut

fut mené par terre à longue iournées iufques à la cité de Palimbrotte à vingt & fept degrez. Et pour autant que celle noble cité de Palimbrotte est en ces regions ville tresfameufe & de grande renommée, il ne fera hors de propos fi nous en deduifons aucunes chofes, qui fe retrouuent efcriptes es anciens auteurs Grecz, à peu pres semblables à celles qui font narrees es liures de noble Seigneur Meflire Marc Pole, ou il traëte de la noble cité orientale du Royaume de Catay. La cité de Palimbrotte, la derniere es parties d'orient est fituée (ainfi que lon diët) fur le grand fleuve Ganges, diët Phyfon, en cest endroit large de douze milles, & profond de vingt pas, & est la ville estendue tout au long de la riue du fleuve à la longueur de dix milles, & deux milles de largeur, toute ceincte & enuironnée de rampars de bois, cruelle, & entreforée de pertuys & de barbicanes, pour y pouoir affeurement tirer fagettes, fiefches, & traictz d'ars. Et de l'autre part y a vne tresprofonde fosse pour defenfe & forteresse, & aufsi pour receuoir les esgoutz, & les immondices de la ville. Le Roy de celle cité est tenu de se faire oultre son nom propre, appeller Palimbrot. Les peuples habitans ce pays là font appellez Prasiens. Et en celle region font des Tygres beaucoup plus grandz que les Lyons, & des Singes plus grãdz que chiens mastins, tous blãcz de pelage fort que la face qu'ilz ont noire. Là se tirent des mines aucunes pierres de couleur d'encens, qui se fondent en la bouche, ayans faueur de figues & de miel: voire encore plus douces. Et en celle region se trouuēt serpens volans longz de deux bracées, avec ailes membraneuses en forme de Chauuefouriz. Lesquels volent de nuyët: & font si mortellement veneneux, que silz laissent destiller vne goutte de leur vrine, ilz occient soubdainemēt l'animal fur lequel celle goutte tombe. Là font aufsi de grandz scorpions volans, fort dangereux, & y croiffent arbres de hebene en grande abondance. Les chiens qu'ilz nourrissent, font si aspres, & de telle fierté, que ayans prins aux dens quelque beste sauuage, iamais ne laschent prinse, sinon que incontinent on leur iecte de l'eau dans les narines, & font tant fors & adroictz, que quand ilz s'attachent aux mouftaches, ou aux babines de la beste, ilz la tiennent aux dens si perseueramment, que iamais ne la laschent tant qu'ilz la sentent estre morte. De la partie montueuse de celle region, sort vn fleuve appellé Silia, lequel ne porte chose aucune quelque legiere quelle soit, ains tout va à fond, & pour ceste cause il n'est point nauigeable.

Palimbrotte cité India ne.

Description de ville.

Murs de bois.

Tygres. Singes blancz.

Pierres douces mangées.

Serpens volans dangereux.

Scorpions

Chiens ardens.

Silia fleuve mort.

Vela tout ce que nostre petit esprit a peu extraire des anciens auteurs, & de la viue parolle du susdit gentilhomme Portugallois, sur le voyage de Iambol, ancien Grec marchand.

DISCOVRS SVR LA

PREMIERE, ET SECONDE

LETTRE DE ANDRE COR-

SAL FLORENTIN.

*Lettres de
Andre Cor
sal.*



S. Iules Speron.

*S. Damian
Goes.*

*Francisque
Alvarez.*

*Thomas
Giunete li-
braire Ve-
nitian.*

*Diligence
de l'impri-
meur.*

STANS paruenues en mes mains deux lettres de Andre Corfal, deduisantes la narration d'un voyage sur mer, entrepris & drecé pour conduire aux ports abordans les terres de l'Aithiopie, vn Armenian nommé Mathieu, Ambassadeur de Prestelan, avec vn Odoard Galuan semblablement ambassadeur du Roy Emanuel de Portugal. Et ayant en deliberation de faire icelles lettres imprimer à l'Estampe. La bonne aduétude voulut que ie les monstray à Magnifique Seigneur Iules Speron gentilhomme Padoan, personnage non moins aorné de bōnes lettres & doctrine, que de souueraine court oisie & humanité. Lequel sur ce me dit auoir autresfois entendu d'un certain gentil cheualier Portugallois, autresfois estudiāt à Padoe, nommé S. Damian Goes, cōme le voyage que feirent ou entreprendrent faire les deux ambassadeurs dessusdictz à la Cour de Prestelan grand Roy d'Aithiopie: auoit esté particulierement descript par vn Dom Francisque Alvarez, qui fut en leur compagnie. Et que en faisant imprimer ces deux lettres de Andre Corfal, au deuant dudiēt voyage d'Alvarez elles pourroient seruir d'un beau proheme, qui donneroit grande lumiere & intelligence à ceux qui liront la suycte en apres. Pour ce que plusieurs choses precedentes, l'expedition du voyage d'Aithiopie, passees en silences par lediēt Dom Francisque Alvarez, sont narrees amplement ellediētes lettres. Et que la copie d'un tel voyage se trouueroit vers le susdict Seigneur Damian Goes, sur les dernieres marches de Hollande: disant icelluy Sperone sauoir pour certain la gentillesse & courtoisie du Seigneur Damian Goes estre telle, que liberallement la donneroit, qui la luy enuoieroit demander. Pour laquelle cause, & affin que à si bon ceuure ne s'entreposast dilation, Messire Thomas Giunete (lequel pour plaisir faire aux gens studieux, n'a onques espargné, & n'espargnera iamais, ne les deniers ne les labeurs) delibera mander querir celle hystoire de la peregrination Aithiopique, laquelle apres auoir obtenu, & leué, luy fut diēt que le liure d'un tel voyage se

ge se

ge se retrouuoit imprimé en la cité de Lisbonne par ordonnance du Serenissime Roy de Portugal. Dond de rechef luy conuint necessairement mander encore querir, & prendre cest exemplaire Portugallois. Et ayant bien voulu conferer avec ceste copie, trouua y defaillir le proheme faict par le susdict Francisque Aluares, & en plusieurs lieux maintes regles defaillantes des choses dignes de cognoissance, outre les fautes des noms de plusieurs lieux, places, & dignitez des personnes, cōme pourra plus particulieremēt cognoistre & iuger quiconque voudra lire ceste nostre traduction en langue Italienne, & la conferer avec la description Portugalloise. Et affin que le droict fil de telle histoire ne fust entrerompue, ains se peust lire par continuelle teneur en toutes ses parties, Messire Thomas Giuncte, outre les lettres de Corsal apposees (comme est dict) pour proheme à l'histoire, a voulu adiouster à la fin en maniere d'epilogue lobedience que le prenommé Francisque presta, & presenta au grand Pontife Rommain Pape Clement septiesme en la cité de Boloigne lan 1532. au nom du Roy & Empereur d'Aigypse Prestelan avec lettres, par ce grand Seigneur escriptes à la Beatité Pontificalle. Et encore pour ne defaillir à rendre plus clair & plus ouuert (autant que faire le pourront les debiles forces de nostre esprit) le principe, & la cause de ce voyage, nous sommes pourpensez qu'il ne seroit mal agreable aux lecteurs, si en faisant ce discours estoit renouuellée la memoire de maintes choses memorables appartenantes à celle narration, & par plusieurs ans en leur endroict succedees, extraictes de l'histoire Portugalloise, ou est parlé de la vie & des faicts de leurs Roys & Princes, en partie aussi retirées d'un liure dudit Seigneur Damian Goes.

Il est donc à entendre que le premier qui commença à descouurer la marine autour de l'Aphrique fut le tresillustre Dom Henry enfant de Portugal. Lequel y enuoya en bon equipage de mer ses carauelles, qui luy viuant arriuerent quasi aupres des terres subiacentes à la ligne equinoctiale. Depuys par ordonnance d'autres Roys, principalement du Roy Dom Ian second de ce nom, outrepasserent iusques au lieu dict Chef de bonne esperance. Lequel fut ainsi appellé de ce nom. Pource que tous ceux qui auoient les années precedentes nauigé au long, & à l'endroict de celle coste, tenoient pour tout certain & assureé qu'elle s'estendoit vers le mydi iusques à l'autre pole antarctique,

*Obedience
& lettres de
Prestelan
au Pape
Clement
septieme.*

*Henry de
Portugal
premier de-
scouureur
des terres
neues.
Dom Ian
second.
Cap de bon
ne esperan-
ce.*

& desperoient d'y pouoir trouuer voye pour passer en l'Indie orientalle: mais quand abordez & ioinctz ilz furent audiect Chef ou promontoire, & eurent veu son contour reuolté vers le leuant, prindrent cueur à passer oultre, & pour ce le nommerent Cap ou Chef de bonne esperance.

*Benim
Royaume.
Isle Sainct
Thomas.
Colonie
Iuiue:*

Ce Roy fut le premier à qui fut portée la monstre de certain poyure prins au Royaume de Benim, au dessus de l'Aithiopie, & qui premierement feit habiter l'Isle Sainct Thomas, par auant inhabitée, solitaire, & pleine de bois, ou il enuoya vn grand nombre de Iuifz pour là demeurer & y cultiuer les sucres. Ce noble Prince estant de treshault & sublime esprit, & n'ayant autre pensément plausgrand sinon à chercher & trouuer le moyen comme il pourroit faire flotter ses carauelles & nauires de guerre en l'Indie orientalle, delibera de mander & enuoier par terre ses messages pour descouurer les pays maritimes de l'Aithiopie, Arabie, & Indie de la grandeur immense, & opulente richesse, desquelles il estoit ia bien informé tant par diuerles personnes qui là auoient esté, que par plusieurs liures des anciens, & mesmement par celluy du magnifique Missire Marc Paul gentilhomme Venitien, qui luy fut apporté en Lisbonne par le tresilstre infant Dom Pierre, alors qu'il fut en la cité de Venize, & disent les histoires Portugalloises qu'il luy fut donné pour vn trespingular present. Et que depuys que cediect liure fut traduit en leur langue en aduint si grande cause d'admiration, que tous les serenissimes Roys de Portugal s'enflammerent en ardent desir de vouloir faire descouurer les parties de l'Indie Orientalle, & mesme sur tous y fut affectionné le Roy Dom Ian. Qui pour telle deliberation mettre en effect, trouua deux hommes Portugallois qui sauoient parler & entendoient la langue Arabesque, & donna charge à l'un d'iceux d'aller Ambasladeur à celluy grand Prince des Noirs appellé en tiltre Prestelan: & à l'autre de descouurer premierement les costes marines de l'Aithiopie, & puy d'aller voir l'Isle d'Ormus, & les Royaumes & citez de la coste de l'Indie, ou prouient le poyure, & le gingembre. Alphonse de Paiua, qui estoit l'un des deux estant paruenue à la Cour de Prestelan, incontinent mourut. Et en son lieu y alla vn autre nommé Pierre de Couillan. Lequel au parauant estoit allé descouurer la terre de Calicut, & de toutes ces parties marines, puy de là estoit passé sur l'Aithiopie, & en fin arriué à Cefale ayant

*Marc Paul
Cosmogra-
phe.*

*Dom Pier-
re infant de
Portugal:*

*Dom Ian
Roy de Por-
tugal cu-
rieux de
chercher
pays.*

*Ormus no-
ble Isle.
Alphise de
Paiua.*

*Pierre de
Couillan.*

toufiours

touſiours donné aduis , & mandé aduertiffement au ſuſdiét Roy Dom Ian de tout ce qu'il auoit veu & deſcouuert, comme plus amplement , & particulièrement ſe peut lire au voyage que en à eſcript le preallegué Dom Franciſque Aluarez. Et pour ceſte cauſe ie n'en vueil dire autre choſe. Eſtant donc iceluy Pierre de Couillan en ladiète cour de Preſte-Ian, & depuys pluſieurs ans païſez (d'ond la cauſe eſtoit que iamais il ne peut obtenir licence de ſe départir) mourut lediét Roy de Portugal Dom Iam ſecond, & luy ſucceda le Roy Dom Emanuel, qui ſe fit flotter ſes carauelles & les armées de mer à l'entour de toute l'Aithiopie, & ſe ioignirent à l'Indie, ou par la vertu, proeſſe & vaillance de ſes bons Capitaines hommes tresexcellens au faiét de la guerre, & tresexpers en l'art militaire, obtint pluſieurs victoires es parties de la mer rouge, des goulphes de Perſe, & de l'Indie: tellement que pluſieurs Iſles & citez ſe rendirent à ſon obeiffance: & furent mandez pluſieurs & diuers Ambaſſadeurs à la Cour du grand Roy Preſte-ian, qui en ce temps eſtoit encore ieune adoleſcent en l'age de dixſept ans, nommé Dauid. D'ond aduint que la renommée de ces glorieuſes victoires fut de telle, & tant grande efficace, qu'elle eſmeut la Royne Helene mere du ieune Roy Dauid Preſte-ian (laquelle gouuernoit luy & tout le Royaume) en ſorte qu'elle delibera à toute fin d'enuoier vn ſien Ambaſſadeur en Portugal. Si trouua vn Chreſtien d'Armenie nommé Mathieu, homme pratic, & de grand faiét, & qui fauoit parler & entendoit diuerſes langues. Et afin de luy donner plus grand credit, elle voulut que avec luy allaſt vn ieune noir Abiſſin Aithiopien. Donc ces deux embarquez en vn port de la mer rouge feirent voile, & allerent en Indie, en la cité de Goa, en laquelle eſtoit le Seigneur Alphonſe de Alburqueque Viceroy. Qui les receut en gracieux accueil, & les ayant faiét monter ſur ſes nauires, les manda à

Lisbonne, ou paruenuz à la preſence du Roy Emanuel de Portugal, expoſerent la charge, & la commiſſion de leur Ambaſſade, & furent interpretées les lettres que mandoit la Royne Helene. D'ond telle eſtoit la teneur.

*Retenue
d'extragiers
es terres de
Preſte-ian.*

*Conqueſtes
Portugalloi
ſes es Loignes
graines regions.*

*Dauid ieune
Roy
Preſte-ian.
Helene mere
de Preſte-ian.*

*Mathieu
Armeniã.*

*Expedition
d'Ambaſſade
de Aithiopie.*

LETTRE DE LA ROY-
NE HÉLENE MÈRE DV ROY
DAVID PRESTE-IAN EMPE-
REVR DES NOIRS, A EMANVEL
Roy de Portugal en L'an

1509.

Inuocation.



U NOM de Dieu le PERE, LE FILZ, ET LE SAINCT ESPRIT, Qui est un seul en trois personnes, le salut, la grace & la benediction de Nostre Seigneur & redempteur IESVSCHRIST, filz de Marie vierge, né en la case de Bethleem soit sur nostre trescher & tresayme frere le Treschrestien Roy Emanuel Roy de Portugal, dominateur de la mer, & vainqueur des cruelz & incredules Mores.

Salutation
& benedi-
ction.

Nostre Seigneur Dieu te doit toute bonne fortune, & te doit victoire de tous ennemis, & que par les deuotes prieres des annunciateurs du redempteur Nostre Seigneur IESVSCHRIST, c'est a sauoir les quatre Euāgelistes, Saint Iean, S. Luc, S. Marc, & S. Mathieu tous tes Royaumes, & pays de toutes pars & de tous costez soient estenduz & prolongez, & par leurs saintes oraisons conseruez.

Narratio.

Nous te faisons sauoir (Nostre Trescher & tresbien aimé frere) que de la part de ton grand Capitaine Tristan de Cugna, sont vers nous venuz deux messagiers, l'un nommé Iean, qui se dict estre prestre, & l'autre semblablement Iean, surnommé Gomez, nous demandans viures, & gens de guerre. Pour laquelle cause ie ne me suis espargnée de vous enuoyer cestuy nostre Ambassadeur nommé Mathieu, frere en nostre seruice, avec congé, & licence du Patriarche Marc, qui nous dōne la benediction quand nous enuoyons aucun prestre en Hierusalem. A cause que icelluy est nostre pere spirituel, de nous, & de tous nos pays, Colomne de la foy de IESVSCHRIST, & de la tressaincte Trinite.

Cestuy nostre Ambassadeur Mathieu, par nostre ordonnance & commandement, a fait entendre à celluy vostre grand Capitaine (qui pour la foy de nostre sauueur Iesuschrist combat en Indie) cōme nous sommes promptz & appareillez à luy enuoyer viures & gens de guerre autāt que besoin luy sera. A cau-

Le Turc ou
Souldā des
Mamme-
lucz.

se que nous auons entendu que le Souldan Prince du Caire assemble & met sus vne grande armée pour venir & se ruer contre vos exercites. Et ce non pour autre cause, sinon pour se venger des dommages qui luy ont esté faitz,

Zeile de la
foy chrestie
ne.

(comme bien nous le sauons) par les Capitaines des gens de guerre que auez en Indie. Lesquelz bons Capitaines vostres, le Seigneur Dieu par sa sainte bonté daigne & vueille faire prosperer tousiours de plus en plus & de mieux en mieux, affin que finalement tous ceux qui ne croient en luy soient du tout en tout mis soubz le ioug. Et pource, contre les assaux de telz infideles ennemis,

ennemis, nous sommes pressez d'enuoyer bon nombre de gens d'armes qui feront estance aux destroitcz de la mer ou est le passage à la Mesque, c'esta sauoir à l'Isle de Bebbelmandel, ou bien (si plus commode vous semble) marcheront au port de Zidem, ou au Tor afin que finalement, & totalement soit mise en ruine & exterminée de dessus la face de la terre, ceste vermine de Maures infideles, & que les deuotz presens, & dons sacrez qui sont enuoiez & portez au saint Sepulcre ne soient par les chiens deuorez.

Promesse.

Or à present est aduenu le temps promis, auquel (comme ilz disent) Nostre Seigneur IESVSCHRIST, & sa Saincte mere & vierge MARIE ont predict, que es derniers temps, es pays de Francquie viendroit à naistre un Roy qui en peu de temps destruiroit & osteroit de desus la terre l'vniuersenation des Barbares, & Maures. Et maintenant à la verite nous voyons que ce est le temps present, auquel IESVSCHRIST promet à sa Bencite mere cela deuoir auenir.

Acomplissement de Prophete.

Toutes les parolles que de par nous vous portera Mathieu nostre Ambassadeur, estimez les estre dictes comme de nostre propre personne, & y adioustez foy comme à nous mesmes. Car il est un des principaux personnages de nostre Cour, & pource l'auons eleu pour vers vous le mander. De ceste credence nous eussions bien baillé la charge à vos messagiers, que deuers nous auez transmis: mais nous auons faict doubte que nos affaires ne vous fussent par eux assez bien exposees entierement selon nostre vouloir.

Credence.

Par cestuy nostre Ambassadeur Mathieu, nous vous enuoions une croix, laquelle sans aucune doubte est faicte d'une piece du bois auquel nostre Sauueur IESVSCHRIST fut crucifié en Hierusalem. Dont ceste piece de bois a esté apportée, & d'icelle auons faict tailler deux croix: desquelles l'une est restée en nos mains, & l'autre pour la vous presenter auons baillé à nostre Ambassadeur, attachée à un annellet d'argent.

Present de grand dignite, sans valeur de richesse.

En oultre. S'il vous venoit à plaisir de donner & ioindre par mariage legitime vos filles à nos filz, ou bien vos filz à nos filles, ce seroit chose tresagreable à nous, & à tous deux tresutile, & heureux commencement d'alliance fraternele. Parquoy à la verité nous desirons tresaffectueusement nous ioindre à vous par affinité nuptiale, ou à present, ou à l'auenir.

Requete d'alliance de noirs aux blancs.

Au reste le salut, & la grace de nostre sauueur, & redēpteur IESVSCHRIST, & de nostre tressaincte dame la vierge Marie soit estendue sur vous, sur vos enfans, filz & filles, & sur toute vostre maison.

Benedictio.

Oultre les choses susdictes nous vous faisons sauoir, & vous aduisons, que si prenons deliberation de cōiendre & unir nos forces, & puissance d'armes ensemble, pour faire la guerre aux ennemis infideles, nous aurons (moyennāt l'ayde de Dieu) forces bastantes, & suffisantes pour prestemēt destruire, & aneantir tous les ennemis de nostre saincte foy. Mais nos Royaumes & pays sont situez tant auant en terre ferme, & tāt estrangez de la marine, que par nul costé ne pouons mettre armée sur mer, sur laquelle n'auons aucune puissance: pour ceste cause

Declaratio de bon vouloir & grād pouoir.


nous

Roy de Por- nous seroit necessaire la conionction & alliance de vous, qui estes dond (Louan-
tugal puis- ge & grace en soit à Dieu) trespuissant sur tout autre en fait de guerre ma-
sant sur ritime. Le Seigneur Iesus Christ soit en vostre ayde comme tousiours il a esté.
mer: Car à la verité les grandes choses par vous faiçtes en Indie sont certainement
Reccoman- pluostoit miraculeuses que humaines. Et si vous voulez armer mille nauires de
dation des gèstes des guerre, nous vous donnerons à force viures, & vous fournirons toutes choses ne-
Portugal- loises Indes: cessaires à telle armée, en tresgrande abondance.

Coclusio en La teneur & interpretation de ceste lettre ouye, & entendue par le Roy
offre tres- Dom Emanuel, & assistance des Seigneurs de son conseil, ilz demourerent quel-
grande: que temps en suspens. Pource que les choses proferées au recit & exposition
de ladicte lettre leur sembloient estre trop grandes, & pour autant auoient
Ambassa- quelque suspicion qu'elles ne fussent bien vrayes. Et encore faisoient ilz doubte
de suspecte: que c'est Ambassadeur ne fust point venu par mandement de la Royne. Dela-
quelle doubtañce incontinent fut remplie toute la Cour. Non obstant depuys le
Entretien l'amytié de ceste Royne, pour se pouoir seruir des forces, puissances, faueurs &
d'alliâce ne cessure à commo- ditez d'un tel, & tant puissant Royaume, pour la reputation & entre-
Princes. tien des affaires siens en l'Indie & en la mer rouge: il eleut un sien Ambassa-
deur nommé Odoard Galuan, lequel ensemble avec l'Ambassadeur Mathieu il

Odoard expedia, & avec grandz & riches presens le manda avec une sienne armée en
Galuan Indie soubz le Capitaine Loupes Souares. Arriué que fut ledict Capitaine à Co-
Ambassa- chin, & donné ordre à se fournir de victuailles, il delibera de prendre volte
deur de Por- vers la mer rouge pour mettre en terre Mathieu, & Odoard Galuan Am-
tugal. bassadeurs d'Aithiopie, & de Portugal. Par ce mesme temps Andre Corsal se
Loupes So- trouua d'adventure à Cochin, & monta en mer avec ladicte armée. Lequel Cor-
wares Capi- sal a escript tout quant qu'est contenu en la seconde lettre, ou il se lit que l'ar-
taine d'ar- mée ne peut iamais faire scale ne prendre terre au port d'Erroe en Aithiopie au
mée de mer. dessus de la mer rouge, ains qu'ilz retornarent à l'Isle de Cameran, ou mourut

Andre Cor- Odoard Galuan Ambassadeur du Roy Emanuel de Portugal, & ainsi
sal. pour celle année, fut entreposée l'expedition de l'Ambassadeur
Mort de Mathieu. Et plus n'en escript le susdict Andre Corsal.
Odoard en l'isle de Ca- Ex deux lettres de luy extraictes si aucunes fau-
meran. tes sont trouuees, reiectez en la cause
Excuse. sur le mauuais & corrompu
exemplaire que nous
en auons peu
recouurer.



LETTRE D'ANDRE

CORSAL FLORENTIN, A

TRESILLVSTRE SEIGNEVR IVLIEEN DE

Medicis, escripte en Cochin, ville des Indes,

le vi. iour de Ianuier , en l'an

M. D. XV. touchant

ses voyages faitz

es dites par-

ties .

*Confrontée avec le Ptolemée, & traduite de Tuscan en Francoys
par le Seigneur Gabriel Symeon*

ΕΥΔΟΚΙΑΣ.




Monseigneur, ne voulant faillir à la promesse que ie vous feis en prenant congé de vous, i'ay bien voulu vous enuoyer ce petit discours touchant le voyage que i'ay fait aux Indes, lequel si ne sera si long comme vous voudriez, ie m'asseure toutesfois que vous prendrez en gré la bonne volonté, que i'ay tousiours eüe de vous faire seruice.

*Premier
voyage aux
Indes, & la
nature du
pol antar-
tic.*

Monseigneur, vous deuez entendre que apres que partismes de Lisbonne, nous eusmes tousiours le vent propice, & passant la ligne equinoctiale, arriuasmes en la latitude de trente sept degrez en l'autre Hemisphere à trauers du Cap de bonne esperance, qui est vn climat froid & fort subiect aux vents: & mesmes que en ce temps là le Soleil se trouuoit parmy les signes Septentrionaux, ou nous trouuasmes que la nuit estoit aussi de quatorze heures. Nous veismes audit lieu pareillement vn merueilleux ordre d'estoilles, lesquelles à l'opposite de nostre nort sans nombre se voyoyent virer ça & là: & apres auoir bien cherché le pol antarctic par l'hauteur des degrez, primmes le iour par le Soleil, & mesurames la nuit avec l'astrolabe, ou veismes deux petites nuées de moyenne grandeur, qui se voyoyent à l'entour du pole tantost bas, tantost hault, avec vne estoille au mylieu, qui pareillement se viroit loing

du pol onze degrez, & au deffoubs dicelle se monstroit vne croix merueilleuse au my-lieu de cinq estoilles, qui l'environnoyent (comme le Charriot faiët nostre pol) avec d'autres estoilles toutes virantes autour du pol, & loing dicelluy environ trente degrez, faisant leurs cours par l'espace de vingt quatre heures, avec vne si grande beauté & clarté, quil ny a signe celeste qui se puisse accompagner à cestuy.

Figure du Pol antartic:



*Second
voyage aux
Indes. & la
Proprieté
des lieux.*

Nous primmes apres nostre chemin vers septentrion, ayants desia commencé voir le Cap de bonne esperance, & arriuasmes à Monhambiqui, qui est vne Isle fort sterile & non trop grande, mais ioignante à la terre ferme, & ayant quinze degrez de latitude. En icelle habitent des Mahometistes, combien quelle soit sous l'obeissance du Roy de Portugal: ny autrement est proffitable; sinon que le port est assés bien assis & accommodé au voyage d'Inde. La terre ferme est habitée des hommes brutaulx, & semblablement toute la coste iusques à la mer rouge: & au Cap de bonne esperance ont vn mesme langage, & du Cap de bonne esperance iusques au Cap vert parlent differemment des Monzambiques. Toute ceste coste depuis le Cap

le Cap vert iufques à la mer rouge eft copieufe d'or, que lon porte à vendre à la mine de Cefalla, qui eft vne terre fubiecte au Roy de Portugal, prochaine à Monzambiquy, là ou l'on trouue quelque peu d'ambraquan & quantité diuoire. Eftants à Monzambiquy trouuames deux petites nauires Portugalloifes, qui venoyent de l'Isle de Saint Laurent tous contre à Monzambiquy, laquelle Isle eft des plus grandes, que l'on aye decouuert de nostre temps, & remplie de toutes fortes d'animaux fauages, de ris, & autres femences, defquelles viuent les habitans d'icelle. Elle eft aufi copieufe d'argent, d'ambraquan, de gingembre, de mellegiette, & cloux de giroffles, mais nō pas si bon que ceux des Indes. Il y a grande quantité de miel, de faffran, & de fucré, mais ils n'en vfont point, & n'est pas si bon que celuy des Indes, citrons, cedres, orenge, plusieurs riuieres & eaux douces, avec tout plein de beaux ports de mer. Les hommes font fort fauages, parlants autrement que ceux de Monzambiquy, mais ils ne font pas si noirs, combien qu'ils ayent les cheueux frifez. Les ports de mer font tenuz par les Maures, lesquels avec draps de cotton & autre marchandife viennent acheter les autres de ceste Isle, comme le demeurant en la cofte de Monzambiquy. L'on dit encores que pres d'icy il y a vne autre Isle appellée Oetacamban, que les Portugallois n'ont encores decouuerte, là ou il y a grande quantité d'argent: ce qu'est vray semblable, attendu que l'on en voit beaucoup manier à Monzambiquy, duquel lieu apres que nous fufmes partis fans nous élongner du vent Nort & Grec, & ayants tousiours le vent en pouppe, (car il y a icy six Moys vent de Ponant & de Libecio, & les autres six Moys Grec & Levant, qui feruent à reuenir des Indes, comme à y aler les deux autres.)

*Isle de
Saint Lau-
rent.*

*Oetacam-
ban Isle.*

Nous arriuafmes à Goa en vingt cinq iours: lequel chemin peut estre enuiron de mille cinq cens lieûes. Icy passames la deuzième fois la ligne equinoctiale, ayants le Soleil par zenit fans aucune ombre: & estants desia retournéz en nostre Hemisphère, trouuafmes six degrez de latitude, que d'en voir d'auantage n'est possible, à cause d'aucunes nuées prochaines à l'horizon, qui empeschent la veûe. En ce lieu des Indes enuiron cent cinquante lieûes, l'eau de la mer est blanche comme lait: ce que peut aduenir à cause de son fond, là ou le sable est blanc: mais là ou il est plus profond il se monstre de diuerses couleurs, comme celeste, & tantost blanc, tantost noir. Depuis trouuafmes aufi grande quantité de serpens, qui nous donnerent à cognoistre que nous estions en la cofte des Indes, lesquels serpens sont aportez en Hyuer par la pluye de terre iufques dans les riuieres. Ceste Isle de Goa ha de circuit enuiron sept lieûes & demye, & de leuation seize degrez, se ioignant avec la terre ferme appellée Paleacata, dont sort vne riuiere, qui se va rendre à la mer, comprenant ladicte Isle au my-lieu, de laquelle sont maistres les Portugallois depuis cinq ans en ça, que par le Seigneur Alfonse Dalbuquerque elle fut prinse par force, & grand nombre de Maures tuez, & les autres

*Troisième
voyage aux
Indes, & la
propiété des
lieux.*

*Mer de cou-
leur de lait.*

Isle de Goa.

*Fortereſſes
des Portu-
gallois aux
Indes.*

chassez en terre ferme. Et apres il y fait faire vne fort belle ville de la grandeur d'une demye lieue, enuironnée de bonnes murailles & fossez, remplie de maisons, avec les rues ordonnées comme les nostres, & vne fortteresse, laquelle me semble la meilleure place que les Portugallois ayent es Indes. Ceste terre est habitée de gentils, qui estants mieux traittez des Portugallois, que des Maures, sont amy des Chrestiens, & ont beaucoup d'orfeures les meilleurs des Indes. Le Seigneur du lieu estoit auparauant vn nommé Idelcan del Sabaio Roy Mahometiste, & de nation Turc. Homme hardi & Seigneur ausi de la terre ferme ou est Paleacate, avec lequel sen alerent plusieurs autres Capitaines de Turquie. Mais les hommes naturels de ce Royaume sont gentils, de belle apparence, & de couleur tannée, leurs habillemens sont tous faicts à la Turquie, & mesmes ceux des marchans, mais les autres à lapostolique. Ils ont vne espece de prestres appelez Bramyni, & autres, qu'ils nomment Nayci, estans couertes leurs parties honteuses d'un drap de cotton, & la reste du corps est tout vn. Ils sont gens de guerre, portants lances, arcs, espées & targues, & pour combattre sont estimez les meilleurs des Indes. Ils ont la terre fort fertile, & pleine de fruiets comme les nostres, mais de la sorte qu'ils sont aux Indes. Les animaux autant priuez que sauuages y sont en grande abondance, & dans terre ferme tigres & serpens dincroyable grandeur. Lon voit ausi parmi les riuieres plusieurs crocodiles ayans vingt pieds de longueur, qui bien souuent sortens de léau se nourrissent des bestes qu'ils rencontre au long des riuieres. L'Isle est assés grande, & tous les iours va augmentant, par la grande quantité de cheuaux, qui viennent d'Ormus, & de la mer de Perse, lesquels ils vendent à ceux de Paleacate, & au Roy de Narsinga, lesquels tous abordent en la dicte Isle, par ce que s'ils aloyent ailleur descendre, les Portugallois, qui sont Seigneurs de la mer, en seroyent marris, & prendroyent leurs biens & leurs nauires. Mais parauanture Monseigneur, vous serez esbahi d'entendre que lon vende vn cheual ordinairement à la mode de nostre pays quatre cens, cinq cens, & iusques à sept cens ducats, & bien souuent en passant lordinaire neuf cens, mille & deux milles. Et tout ce vient que le peage est grand, car pour l'entrée d'un cheual en l'Isle, ils payent quarante ducats de gabelle, tellement que cestuy an le Dace à vailu trente milles ducats, ce que a esté cause que l'année passée le Capitaine maieur passa en l'Isle d'Ormus avec vingt-cinq voiles & trois milles hommes de guerre: laquelle l'Isle est située en la mer de Perse, & layant prinse d'accord, tua le gouverneur dicelle, par ce qu'il auoit voulu trahir le Roy d'Ormus, & ordonné de tuer le susdict Capitaine, lequel apres y fait vne fortteresse, là ou il faut que tous marchans abordent, soyent Persiens, Arabes, ou Armeniens, & ne peuuent mener cheuaux des Indes, ny apporter espisseries, s'ils ne passent à Ormus, payans le Dace au Roy de Portugal: laquelle chose vient

*Pris des the-
naux des
Indes.*

toute

toute en augmentation du reuenu de Goa, en laquelle Monseigneur, ià veu tout plein de vieux edifices des Gentils, & cogneu que les Portugallois pour y bastir la ville de Goa, ont destruit vn temple fort ancien, appelé Pagode, en vne petite Isle qu'on nomme Dinary, bien pres d'icy, lequel temple deuoit estre magnifique, & enuironné de belles statues anciennes faictes d'une fort belle pierre noire, à ce que i'en ay peu cognoistre par icelles qui sont ruinées & tombées par terre, dont ie ne faudray de faire toute diligence d'en recouurer quelqu'une, & la vous enuoiray, sachant comme vous estes curieux & amateur des choses antiques.

Temple antique aux Indes, destruit.

En partant donc de Goa, nous allames tousiours au long de la coste vers midy, & aurriuasmes en vne ville nommée Batticala, ou l'on prend le tribut, que lon paye au Roy pour aler seurement par la mer, qui luy rend obeissance. De ce lieu est Seigneur le Roy de Narcinga de loy Gentile, & en deux lieux, l'un appelé Onor, & l'autre Braxabor, & s'y trouue grand nombre de gingembre, myrabolans, sucre, & riz, lesquelles marchandises sont chargées par la mer rouge, par Adem, & par Ormus, & à la dicte terre treize degrez de latitude, ayant du costé de Ponant la mer, du costé de Leuant la terre, & la coste deuers midy & septentrion. Ils ont quasi vn mesmes langage comme ceux de Goa, & au dessus de Batticala lon voit deux montaignes, desquelles sortent deux ruisseaux, qui vont tomber vers la mer, & par là ou ils passent tout au long de la montaigne, ils font deux chemin fort blancs & beaux à merueille. Lon appelle Conconi & Decam, en ce lieu tous ceux qui sont natifs du pays, & en Balagat & Commari, pres de Batticala commence le pays de Malabari, ou s'engendre le poiure: & ceux qui y demeurent ont vn langage diuers à ceux de Commari, & de Goa: lequel pays est limitrophe vers midy à Commari, que Ptolemée a nommé Pelura: & deuers Septentrion aux marez faictes par le Gange appelez Curmuma, & anciennement Messolli. Ledit lieu de Commari ha huit degrez de latitude, mais de Curmuma, ie n'en say rien encores. En partant donc de Batticala, nous allasmes à Canonor, ou les Portugallois ont faict vn fort chasteau, & bien garni de toutes fortes d'armes, & de là, le Roy vint visiter le nouveau Capitaine Maieur avec deux milles hommes Nairi ou plus, armez selon la coustume de Goa, portant audiect Capitaine vne chaine d'or remplie de rubis, & de perles, que lon estimoit enuiron mille escus. Ce pays de Canonor ha douze degrez & demy de latitude, duquel lieu allames en Calicut, terre principale & chef de tout le Royaume de Malabari. Le Roy en ce lieu s'appelle Can Murin, qui vault autant adire comme Empereur: & pour le vray ayant égard aux merueilleux edifices publicqs, temples, & palais Royaux, & les maisons particulieres de pierre, (non de paille comme aux autres lieux) lon peut cognoistre que ce a esté le membre principal de toutes les Indes, ou abordoyent tous les marchans de la mer Oceane, pour charger espisseries &

Le quatrième voyage aux Indes, & de la propriété des lieux.

Cinquième voyage aux Indes, & la propriété des lieux.

Description de Calicut.

autres marchandises, mais depuis que les Portugallois sont venuz aux Indes, ilz ont tousiours chargé en Cochin & Canonor, par ce que du commencement ils furent chassés & tuez en Calicut, là ou en Cochin ils furent bien receuz par le Roy, lequel ils ont fait depuis le premier Roy des Indes. Ce Roy de Calicut iusques à deux ans passez a fait la guerre aux Portugallois à la requeste des Mahometistes, lesquels comme le Roy veid aller en ruine, appointa avec le Capitaine Maieur, & luy permit de pouuoir bastir quelques forteresses en ses terres, lesquelles sont auourd-huy aux Portugallois. Ce mesme Roy alla aussi visiter le Capitaine avec plus de quatre milles Nairi, ou gentilshommes armez de lances, arcs, & targues, & luy donna vne chaine d'or semblable à l'autre, mais de plus grande valeur. Le pays de Malabary est fort temperé sans froid ou chault, fors deux heures du iour, estant le demeurant refroidi par le vent de la nuict, & du midy, en maniere qu'il ny eut iamais peste: comme par le Nairo, qui amene l'Elephant par dela, aura assez suffisamment entendu nostre Seigneurie.

*Confins &
limites des
Indes.*

Les Indes commencent depuis le detroit de la mer rouge, & vont iusques aux extremes regions Sinares. En icelles habitent & dominant les Maures, les Gentils, & les Portugallois, qui sont aujour-dhuy Seigneurs de la mer Oceane, commençant de Lisbonne, & de la mer particuliere de Indes, *Du Sino magno, & Gangetico, du sino Persico*, & du detroit de la mer rouge & mer Atlantique, esquels lieux, vont tousiours augmentans moyennant leur trauail & peine, car ils sont tous vnis ensemble, affectionnez à leur Roy, hardis en tous affaires, & sans crainte de pouuoir rien perdre, tellement que estans fortz redoutez en ce pays, il est quasi impossible qu'on leur face domage, mesmes que sans leur congé lon n'oseroit voyager par la mer, ayans tousiours l'armée prestee & forte, qui court par tout, tant deça que dela, & quant & quant ayans puissance sur tous ports, & forteresses, que le Seigneur Alfonse d'Alburquerque Capitaine passé, & homme excellent a fait faire. Mais quant à la ville d'Ormus, elle ha vingtsept degrez de latitude, environnée deuers midy, & Ponant, de l'Arabie heureuse, ou est le detroit de Baharem; & ou l'on pesche les perles, estant diuisée de ce costé là du pays de Perse prochain à Ormus, du costé de Septentrion par le fleue nommé Tigris, mais de Tauris avec le pays de Perse, & d'autre regions iusques à la mer, est Seigneur & Maistre Siech Ismael, que nous appellons Sophi, lequel dans terre ferme ha son pays limitrophe à celuy du Roy Sammacante, region à mon aduis des Parthes, & en ces terres de Perse lon trouue le lapis azuli, & les turquoises. Deuers le Soleil leuant ya la prouince de Carmanie deserte, qu'on dit maintenant Rasigut, pleine de larrons & de courfaires. Et entre Goa, & Rasigut, ou Carmanie, y a vne autre terre
appellée

*Siech
Ismael.*

*Lapis azuli
Turquoises.*

appelée Cambaia par ou le fleuve Indo entre dans la mer, laquelle est habitée des Gentils appellez Guzerrati, qui sont quasi tous marchans, & s'abillent vne partie à l'apostolique, & l'autre à la mode de Turquie, sans manger chose qui face sang, & ne consentent point que lon face mal à personne. Mais leurs viandes sont de lait & de riz, & autres choses qui n'ont point ny d'esprit ny d'ame, à l'occasion dequoy ils ont esté prins & subiuguez des Maures, sus lesquels domine vn Roy Mahometite : qui ha vne pierre de telle vertu, que en la mettant en l'eau, ou la tenant en la bouche elle oste la force à toute poison. Dauantage lon trouue en ce pays force Indaco, storax liquide, cornalines & chalcidoines, desquels l'on fait de belles pognées de dagues, car les hommes (qui sont oliuastres) ont fort bon esprit en semblable exercice. La region de Cambaye ha la mer deuers midy, Razigut deuers ponant, Paleacate a Soleil leuant, & vers septentrion le Roy de saint Marcant. Et le Royaume de Paleacate ha du costé de terre ferme le Roy de Narcinga premier & le plus riche de tous les autres Seigneurs des Indes. Il y a aussi trois autres forteresses au pays de Malabari, assavoir Canonor, Calicut, & Cochin, ou les Portugallois maintenant chargent les poiures & gingembres pour enuoyer en Portugal, ne voulans qu'ils soyent chargez pour ailleurs, & mesmes par Adem & par la Mecca affin qu'elles ne passent en Alexandrie, enuoyant tous les ans pour ce fait vne armée au destroit de la mer rouge, affin qu'il n'y passe point d'autres nauires, de maniere que lon sera contraint de s'aler fournir d'espisseries de Venise à Lisbonne. Les Seigneurs de Malabari sont tous Gentils, & la plus grand part des habitans Maures, aucuns autres Iuifs, & d'autres Chrestiens de Saint Thomas, comme tesmoignent aucunes eglises fort belles, l'une desquelles est prochaine à cinq lieuës de Cochin, & à neuf lieuës d'un lieu nommé Elongallor, & l'autre est assise en Colon, & sont seruiés par certains Armeniens, qui viennent des Indes. Vne autre de ces eglises est en Coromandel plus grande de toutes, ou l'année pafsée fut Pierre d'Andre Strozzi, qui ma dit que là est enterré Saint Thomas en vn vieux sepulchre de pierre, aupres duquel en a vn autre d'un Chrestien d'Ethiopie subiect de Prestre-ian, lequel aloit en sa compagnie, disant encores auoir veu certaines lettres grauées en la mesme eglise, qu'il ne sceut oncques entendre, & la forme d'un pied chaué en vne pierre de merueilleuse grandeur, faite par Saint Thomas. Aupres de Coromandel y a vne autre ville appelée Paleacate, & autrement Salaceni, là ou lon trouue grande quantité de pierres precieuses de toutes sortes, qui viennent partie de Pegu ou s'engendrent les rubis, & partie d'une isle qui est contre au cap de Commari appelée Zeilan, l'ateur de laquelle deuers midy est de six degrez & deuers septentrion huit : auquel lieu s'engendrent encores en plus grande quantité pierres precieuses, plus qu'en tout le demeurant des Indes, cōme saphiz excellens,

*Guzerrati.**Cambaye
region.
Razigut.**Sepulchre
de S. Tho-
ma.*

rubis, balaches, topasses, iacynthes, chrisolites, & grenats, que les Maures estiment beaucoup. Aucuns disent que le Roy de ce lieu ha deux rubis si beaux qu'ils ressemblent à vne flambe de feu, combien que ie pense que ce soyent plus tost carbouclés. Il y croist aussi la canelle & grand nombre d'elephans, qui sont vendus à diuers marchans des Indes, tandis qu'ils sont ieunes, affin de les apriuoiser plus facilement, les achetans à mesure d'un palme. Ptolemée toutesfois ne fait aucune mention de ceste isle, ny de douze isles qui sont à costé de Monzambiquy, alans tousiours vers Malacca sous l'equinoctial. Parquoy l'on a cogneu par la nauigation des Portugallois, qu'il a grandement failli en ses longitudes, commençant depuis les regions Sinares, iusques aux isles, qu'il appelle de bonne fortune: faillant aussi à la situation de Taprobane, comme vostre Seigneurie aura veu par la carte marine, que l'Ambassadeur du Roy Don Michel de Selua a porté à Rome. Plusieurs diamans aussi & ambranquen s'engendrent au pays de Paleacate, mais non pas si bons comme ceux de Narsinga, car ceux icy sont iaulnes, nonobstant que les Maures les prisent plus que les autres, auquel lieu ledict Pierre Strozzi en acheta vn vingtrois caras, qu'il porta à Lisbonne. Mais des emerauldes ie ne say ou ils s'engendrent toutesfois si sont ils autant prizez en ce pays, comme au nostre.

*Fortunate
insule.*

Le dernier chateau des Portugallois aux Indes est Malacca, terre autât ou plus grande qu'il s'en trouue au monde, là ou vont les nauires de Bengala, partans de la mer qui est pres Gange. En ce lieu de Bengala entre le fleue du Gange qui ha vingtrois degrez sous le tropic de Cancér. Ici viennent encores ceux du pays de Pegu, lequel confine par la coste avec le Royaume de Bengala & de Liqui. Et au Pegu l'on trouue plusieurs rubis, Benzui & Lacha, tenant de la partie de la coste Malacca, & par terre ferme Disurich, qui est Seigneur en terre ferme iusques à la Cina.

*Terre de
Malacca.*

La dernière terre deuers midy est Malacca, située au dessus de la ligne equinoctiale deux degrez, appelée Aurea Chersonesus, & Bengala & Pegu sont dominées par les Maures, & Malacca par les Portugallois, lesquels Maures ont tousiours guerre avec les Gentils de terre ferme: car combien que l'on ale depuis Malacca à l'isle de Sumatra, qu'ils disent estre Taprobane, toutesfois elle n'est pas encore toute decouuerte, à cause de sa grandeur. Là s'engendre grande quantité de poiure que l'on porte à la Cina, pays froid situé au dedans de sino magno, & là ou vient encores le poiure long, le benzui & l'or, que les habitans portent en Sumatra par Malacca, lequel lieu deuers midi regarde ceste isle située sous la ligne Equinoctiale, & du costé de Leuant se trouuent les isles appellées Molucques, ou s'engendrent les cloux de girofle, les noix muscades, & macis, & en d'autres le bois de l'aloë, & le sandal. Et prenant le chemin deuers Orient l'on trouue les hommes bien petits, estans aucuns d'opinion que ceste terre s'ale ioindre du costé de Leuant & de Midy avec la coste du Bresil, laquelle est si grande que l'on ne la pas encores toute decouuerte,

*Isles Mo-
lucques.*

ains

ains disent aucuns que deuers ponant ceste terre se va ioindre aux isles appellées les Anthilles du Roy de Castille, & avec la terre ferme dudict Roy. Lon va encores deuers septentrion, passant par le sino magno audict pays de Malacca querir les espisseries: lequel voyage ont acoustumé de faire les marchants de la Cina, portans avec eux musc, rubarbe, perles, estain, porcelaines, foyes, & draps ouurés de toute sorte, damas, satin, draps d'or, & autres choses de grand pris, par ce que là les hommes sont fort ingenieux, mais ont le visage laid, & les yeux petits, estats habillez & chaullez comme nous sommes. Et combien qu'ils disent estre Chrestiens, toutesfois ie crois qu'ils sont Gentils. L'année p'assée noz Portugallois allerent à la Cina, toutesfois les autres ne les laisserent descendre en terre, disans que leur coustume est telle, que nul estrangier entre en leurs maisons, mais nonobstant les nostres firent bien leur profit, vendans leur marchandise: & disent qu'il y a autant de profit à porter les espisseries à la Cina, comme de Portugal, estât là le pays froid & les espisseries requises: en sorte que depuis Malacca iusques à la Cina, alant vers septentrion, il n'y sauroit auoir que cinq cens lieuës. Le Roy de ce pays ne se laisse iamais voir ni parler, sinon à vn hōme seul, & si aucun de mande quelque chose, l'un le dit à l'autre, & l'autre à l'autre, iusques au cinquantième, qui est celuy qui parle au Roy. Quant aux forteresses de ce pays, le Capitaine Alfonse iusdict les a toutes basties à la mode des nostres, lequel nous trouuames aux Indes & en Ormuz, avec tout plein d'Ambassadeurs des regions circonuoisines, entre lesquels celuy du Sophy luy donna de beaux cheuaux, grand nombre de turquoises, & vne cimenterre fort riche, avec vn forreau d'or couuert de perles & de pierres precieuses, monstrant que son maistre desiroit grandement l'amytié du Roy de Portugal, & de tous les Chrestiens. Plusieurs de noz gens passerent en Perse, & furent en sa court honorablement receus, & emporterent de beaux presens, apres qu'ils eurent, auant qu'estre arriuez, cheminé trois mois par terre, ce pendant que Don Garzia de la Crognia neueu du Capitaine Maieur, faisoit son conte de passer le destroit de la mer rouge, pour combattre l'armée du Sultan, & faire vne forteresse ou en Dalacia, ou en Suachen, qui est vne isle sous le dixhuitième degré, ou s'embarquent les Religieux, qui passent d'Ethiopie en Hierusalem. Mais apres que ledict Capitaine eut laissé Ormuz, & qu'il s'en retournoit par les Indes avec seize voiles, il receut lettres de Melchias de Diupatam terre de Cambaia, par lesquelles lon luy mandoit qu'il s'en retournaist en Portugal, par ce qu'il y auoit vn autre Capitaine Maieur en sa place, & autres Capitaines de chasteaux, par lesquelles nouuelles il cogneut que son seruice nauoit esté agreable au Roy de Portugal, puis qu'il auoit renuoyé aux Indes aucuns prisonniers, que ledict Capitaine luy auoit enuoyé, & print de ce fait si grand desplaisir, qu'il

Isles Anthilles.

*Facon d'auoir audien
ce du Roy
des Indes.*

Suachen.

retom

retomba malade & mourut en sortant de la barque pour entrer en Goa, apres auoir trauaillé dix ans aux Indes & acheué de belles entreprinſes. Il y a maintenant icy quatre mille Portugallois, deſquels dans vn mois partiront mille pour aler à Ormuz, & de là à la mer rouge, pour empeschèr & garder que les autres nauires ne paſſent à la Mecca, & nous de ceſtuy an n'acheuerons ia noſtre vòyage, attendant que le Capitaine Maieur l'année qui vient, paſſera avecques toute l'armée pour rencontrer le Sultan, & faire vne fortereſſe en la mer rouge, mettant en terre aux ports d'Ethiopie les Ambaſſadeurs de Preſte-ian & du Roy, & nous en irons à la court dudiſt Preſteian, là ou ie prie à Dieu qu'il nous vueille conduire,

Monſeigneur, mon intention eſt de m'arreſter quelque temps en ce lieu, & d'enuoyer à voſtre Seigneurie la ſituation, noms, & diuiſions des terres Orientales, autant du Preſteian, comme du demeurant des Indes,

marchant en terre ferme prenans l'hauteur des villes, & terres antiques meſurées par Ptolemée. Laquelle choſe pour mieux

accomplir, i'ay touſiours avec moy laſtrolabe, & autres

choſes à ce faiſt neceſſaires. Qui fera l'endroit ou ie

prieray noſtre Seigneur me faire la grace, que

à mon retour ie trouue voſtre Sei-

gneurie en icelle proſperité quelle

deſire. De Cochîn aux Indes, le

ſixieme de Ianuier, mil

cing cens &

quinze.

SECONDE LETTRE

D'ANDRE CORSAL FLO-

RENTIN, A TRÈSILLVSTRE PRINCE LE

Duc Laurent de Medicis, touchant la navigation de la mer Rouge & de Perse, iusques à la ville de Cochin, au pays des Indes, escripte le xviii.

jour de Septembre,

M. D. XVII.



Onseigneur, vous pourrez auoir veu par le contenu de ma premiere lettre, escripte à la bonne memoire du Seigneur Iulien, comme la puissance des Portugallois aloit de iour en iour plus augmentant aux Indes. Parquoy voulant continuer mon propos, (selõ lobeissance que ie doibs à vostre Seigneurie, mesme que par les lettres, quil iuy à pleu m'escrire de si loing, elle m'en donne

encores plus grand courage) ie vous auertis, comme l'année palsée Ray-salmon & Amyrasen, Capitaines generaux de l'armée du Sultan, estans sortiz de la mer Rouge, estoient entrez dedans le port d'Adem, avecques vingt galeres & grand nombre de soldats pour passer aux Indes, & nous faire la guerre. Parquoy le Seigneur Lopes Soares nostre Capitaine Maieur, qui auoit esté empesché iusques alors à faire faire nouueaux nauires & galeres, fut contraint partir de Cochin le propre iour de Noël, avec quarante voiles bien equipées, d'armes & d'artilleries, entre lesquelles auoit vingt grosses nauires, huit galeres, & douze carauelles avec d'eux mille soldats Portugallois & sept cens Chrestiens de Malabari. Parmi laquelle armée arriuames à Goa, là ou primmes des viures pour vn an: & en partant de là, le huitième iour de Feurier mil cinq cens & seize, trauer-sames la mer des Indes iusques à lisle de Soquotora en vingt & deux journees, qui sont enuiron trois cens lieuz à la mode de Ponant. Ladite isle ha treize degrez de latitude, & ha la mer du costé de Leuant & de Midi, & deuers Ponant le cap de Guardafuni, laquelle est la derniere terre d'Ethiopie au commencement de la mer Arabique, loingtaine de lisle trenté lieues, & ayant de latitude douze degrez. Lequel lieu les Anciens ont appellé & appellent encores toute ceste coste le promontoire de Zinghi: mais deuers septentrion les confins de ladite

*Capitaine
du Sultan*

*Armée des
Portugal-
lois*

ladite isle font la coste de Fratacchi, à quarante lieuës de l'Arabie heureuse. Ceste isle de Soquotora ha de circuit quinze lieuës: & me semble que du tēps de Ptolemée elle fut incogneuë: ce que n'est pas grand merueille, considerant que les Anciens ne se elognoyent gueres de la terre. Elle est habitée des bergers Chrestiens, qui viuēt de laiēt & de beurre, de quoy ils ont grande abondance: & en lieu de pain ils mangent des dattes, & quelque peu de riz, que lon y aporte de dehors. Ils sont naturellement Ethiopes comme les Chrestiens du Roy Daud; ayants toutesfois les cheueux plus longs, noirs, & frisés. Leurs habillemens sont faits à la Moresque, assauoir vn drap seulement à l'entour des parties honteuses à la mode d'Inde & d'Arabie. Il n'ya aucun Seigneur naturel, mais sont les villes prochaines à la mer commandées par les Mores de l'Arabie Felice, lesquelz l'osterent petit à petit aux Chrestiens qui hantoient avec eux. La terre n'est point fertile, mais deserte, comme toute l'Arabie: & là sont montagnes de merueilleuse grandeur, avec plusieurs ruisseaux d'eau douce, & sang de dragon, qui est vne gomme d'un arbre engendrée en ces montagnes non trop hault, mais gros aiant l'escorce déliée, & la cime pointue comme vne pyramide, avec les fueilles taillées comme celles d'un cheſne. Et dici vient aussi l'aloë Soquoterino, prenant le nom de la mesme isle. Mais en la coste de la mer se treuue beaucoup d'ambracan, tout ainsi comme en l'Ethiopie, & depuis Cheffala iusques au cap de Guardafum, & de ceste isle de la mer Oceane. Ce pendant, Monseigneur, que nous estions en terre, i'ay veu vn animal, que les Auteurs nomment Cameleon, disants qu'il vit seulement d'air, & ne marche gueres viste, combien que à le voir il semble fort ioyeux. Sa grandeur est semblable à celle d'un Lisart verd, mais il ha le corps vn petit plus grand & les iambes plus haultes, fait à la semblance d'un bras d'homme, & tout au long de l'échine taché comme vne truitte, avec les yeux fort beaux & la queuë asses longue, & vn peu tournée: estant par conclusion rouge, bleu, & blanc, & mesmes sous le ventre: & n'ya point de faute qu'il change de couleur bien souuent, sans que autre couleur si aproche, Ce que i'ay fort bien obserué, & fait iugement que ce vient de la propre nature de l'animal, selon le plaisir ou desplaisir qu'il prend de pres ou de loing. En ceste isle sont plusieurs villes & maisons tissues de rameaux de dattes, & les Eglises basties comme celles des Mores, avec autels comme les nostres. Et n'y a pas long temps que les Portugallois y firent vne forteresse, tuans & chassants tous les Mores de l'Arabie heureuse. Mais par ce que le pays estoit sauage & sans aucun proffit, ladite forteresse fut abandonnée & mise par terre par les Mores, qui y retournerent, lesquels maintenant que sommes arriués s'en sont tous fuis aux montagnes: parquoy ie n'ay peu sauoir ny entendre chose de grande importance, sinon que les premiers habitans de ceste isle furent iadis conuertis à nostre foy par vn Apôstre de nostre Seigneur, & qu'ils ont en grande reuerence la croix, le dimanche

*Isle de So-
quotora &
sa nature.*

*Sang de
Dragon.*

*Descri-
ption du
Cameleon.*

che, & les autres festes, allans à l'église avec leurs femmes & enfans, combien qu'ils n'entrent dedans, se laissans gouverner par vn prestre, qu'ils appellent Abunna.

Après que nous eumes en ce lieu fait prouision d'eau, le quatrième iour de Mars nous reprimmes nostre chemin, & passames le dit Cap de Guardafuni à veuë d'Ethiopie, trauersans delà à l'autre costé de l'Arabie hereuse, iusques à ce que le quatorzième de Mars arriuames en Aden qui est loing à Soquotora cent vingt lieux, & ha treize degrez de latitude. Ce lieu est le port principal d'Arabie & d'Ethiopie, d'assez grande estendue, & à mon aduis le plus noble, riche, fort, & beau que i'aye veu, ou que i'espere voir en ces contrées. Car du costé de l'Arabie heureuse vers Septentrion au milieu d'une belle plaine sort vne montagne, qui va trouuer la mer à deux lieuës de là, de laquelle apres elle est enuironnée la plus grande partie, tellement qu'elle ressemble à vne Isle estant si droite du costé de Leuant, ou est vn port fort seur & beau, qu'il semble estre quasi impossible d'y pouuoir monter. Toutesfoys au pied dicelle l'on voit edificée ceste cité en forme d'un demy cerceau, & fortifiée d'un costé du dos de la montaigne, & de deux autres de la mer, là ou sont deux grandes tours qui la defendent de tous assauts: & au bout de la dite montagne tant d'un costé que d'autre se voyent vingtcinq petis chasteaux, ou tours garnies de pierres & autres choses pour la defence de la dite ville: en laquelle, comme aux autres d'Arabie & d'Ethiopie, prochaines à la mer, il ne pleut sinon au bout de cinq ou six ans vne fois: & nonobstant lon y trouue de bons fruits de toutes sortes, car les arbres se conseruent par l'humeur radical de la terre, & par la rosée qui y tombe du ciel en grande quantité: mais l'eau douce est aportée de terre ferme loing de la ville quatre lieuës. Auant que les Portugallois fussent maistres de la mer des Indes, il fouloit aborder en ceste ville grand nombre d'espisseries, drogues medicinales, senteurs, herbes de taneurs, pierres precieuses, draps de soye & cotton, & toutes autres marchandises que lon porte de Leuant: & d'yci passoyent en Arabie, en Surie, & Asie mineur, iusques dans les ports de Damas, & d'Aleppo, & de là l'on les distribuoit par l'Ethiopie. Toutefois la plus grande quantité estoit portée par la mer à Ziden, qui est vn port de la Mecche, à Suese, & autres ports du Caire prochains au mont Sinay, duquel lieu elles passoyent en Alexandrie, & de là en nostre Europe: tellement que ceste region de Malacca, Calicut, Ormuz, & Aden, ou telles marchandises abordoyent, estoit reputée la plus noble & riche d'Orient: côme en noz quartiers sont maintenant Venise & de deça le Caire. Mais depuis que les Portugallois y arriuèrent, étant failli le proffit & commerce des dites villes, les marchans Indiens ausi se retirerent à la terre ferme: ce que aporte grand preiudice au pays d'Inde, à Venise, & au Caire, puis qu'il faut que tout passe par les mains des Portugallois.

Incontinent que fumes icy arriués, nostre Capitaine en signe d'amytié,

*Cap de
Guardafuni.*

*Asiete de
la ville de
Guardafuni.*

salua le port avec son artillerie : parquoy les Ambassadeurs de Amir-mirigian, Gouverneurs de la ville, luy vindrent faire la reuerence, & remonstrer qu'ilz ne desiroient sinon la paix avec les Portugallois, en luy offrant viures & tout ce qu'il vouloit pour refrailchir son armée. Quant et quant luy dirent des nouvelles, que Amyrasen, l'un des deux Capitaines du Sultan estoit entré en terre ferme d'Arabie avec mil huit cens hommes blans, entre lesquels y auoit sept cens Harquebusiers & trois cens Archiers, qui auoient ia prins Zibi & Taësa, villes principales du Royaume d'Aden, & pillé innumerables richesses, desquelles ils payoient les autres soldats d'Arabie subiets à vn Seigneur d'icelle, grand ennemy du Roy d'Aden, de maniere qu'ils estoient ia prochains à Almacharana, forteresse remplie des tresors de plusieurs Roys d'Aden, & de si grande valeur, que affin de n'estre *Tresors des Roys d'Aden.* réputé menteur, ie ne l'ose escrire. Et combien que le Roy mesme y fist aller pour defendre son bien quatre vingt mil hommes de guerre, toutefois il ne pouoit resister à l'armée du Sultan, à cause des Harquebusiers & de l'artillerie. Ils dirent encores comme Rayssalmon, autre Capitaine du Sultan estoit entré dans le port d'Aden avec son armée, laquelle il auoit amené de lisle de Cameran dans la mer rouge, & avec mil deux cens personnes auoit combattu quinze iours la ville, & rompu vne partie de la muraille, toutefois que à la fin les Mameluches s'estoyent retirés & retournés à Ziden, sans faire autre chose. Le Capitaine adonc ayant honorablement receu ces Ambassadeurs, leur feit entendre, qu'il estoit fort marry de n'auoir rencontré la dite armée : mais qu'il auoit deliberé de l'alér trouuer iusques à Ziden, n'ayant afaire d'autre chose que d'un bon pilot ou Gouverneur bien expert en la mer, pour le conduire à Ziden : & que quant à la paix le Roy de Portugal ne faisoit la guerre sinon à ceux qui la vouloyent, ny denioit la paix à personne qui la luy demandoit : & que touchant ce point il en parleroit plus au long vn autre foys. Les Ambassadeurs ne furent si tost partis & retournés en terre, qu'ils reuindrent presentans au Capitaine quatre pilots, grande quantité de chair, de pain, & de fruits. Et ainsi partimes, & en vn iour & demy feimes trente lieuës, iusques à ce qu'arriuames au destroit de la mer rouge, situé au *Latitude du destroit de la mer rouge.* treizième degré de latitude : là ou trouuames vne isle appelée Bebel assez haute, mais sterile ayant de circuit deux lieuës, & estant vne lieuë loing de la terre d'Arabie & d'Ethiopie. Lon dit qu'il y auoit anciennement icy deux chaines de fer à trauers, qui empeschoyent l'entrée & sortie de la mer rouge : dans laquelle entrames le dixseptième iour de Mars, & primmes vne nauire de Cambaye, laquelle venoit de Zeila chargée de Turcs, Mameluches, marchandises & viures : mais la fortune voulut que la mesme nuit nous fumes surprins d'une tresgrande fortune de mer, tellement que perdimes ledit nauire, avec d'autres Indiens, *Fortune & perte des Portugalois.* qui

qui estoient en nostre compaignie, chargez des Chrestiens de Malabari, & vne fuste en laquelle estoient six hommes Portugallois, & allans ainsi par la mer rouge à veüe de plusieurs grandes isles inhabitables pour faute d'eau, meimes vingtcinq iours iusques au port de Ziden, & ce à cause des vents contraires: lequel chemin fut enuiron de deux cens lieuës. Et estant ia pres à huit lieuës du port, & pres à entrer dedans & combattre la ville & l'armée, la fortune de rechief voulut que le vent se tourna de poupe à prue, de sorte quil ne fut iamais possible de passer plus outre: ce que nous porta grand dommage, estant en ce temps là l'armée du Sultan depourueüe. Ce malheur causa encores que les Ambassadeurs de Preste-ian ne passerent plus outre. Et ainsi menés par la fortune deux iours, le vendredi saint perdimes vne grand'nauire de Malacca, qu'ils appellent en ce pays Giunco, ayans premierement fait sauter dans le nostre vn grand nombre de Chrestiens, qui venoyent de la Cina, & à la fin trouuames par l'hauteur du Soleil auoir detourné nostre voyage de trête lieuës; de maniere que n'ayant gueres d'eau, & ne sachant ou en prendre, & nous voyans beaucoup de gens, primmes le chemin vers l'isle de Cameran, comme le vent nous portoit: là ou le pilot faillant le chemin, nous amena en la couste d'Ethiopie, lointaine de l'autre d'Arabie trente lieuës, ayans deliberé d'entrer en l'isle de Suachen, qui est en vn bras de mer, ou les Chrestiens d'Ethiopie s'embarquent pour aller en Ierusalem, & estans ia soubz la latitude de dixhuit degrez iamais ne sceumes cognoistre la dicte isle: Pendant lequel tēps veimes vne nauire des Mores, qui y aloient aussi, lesquels nous assaillimes, mais ils s'en fuirent, & donnerent en terre laissant là la nauire: ior nous decendimes en terre pour chercher de l'eau, laquelle apres auoir fait plusieurs fossez & puyz, nous trouuames salée: dont retournames fort marriz & faschés au nauire.

*Necessite
de L'armée
des Portu-
gallois.*

Ayans ainsi perdu toute esperance de trouuer l'isle de Suachen, deliberames passer à Dalacie, qui est vne autre isle en la mesme couste, ou estoient autres foys abordez les nauires de l'autre Capitaine, qui estoit entré en la mer rouge, mesmes que l'Ambassadeur de Preste-ian nous sollicitoit à ce faire, nous asseurant que de là nous pourrions aler iusques au pays de son maistre, là ou nous serions secourus de tout ce, qui nous estoit necessaire. Toutefois en ce voyage nous ne trouuames rien, combien que souuent nous allimes en terre pour trouuer de l'eau. Estant en ceste misere, allames long temps comme perdus & desesperés, sinon de la misericorde de Dieu, nous asseurant Monseigneur, que ce estoit vne grande pitié que de voir mourir de soif si grand nombre de gens, & mesme ceux de Malabari, comme de plus petite complexion: d'autres mouroyent beuans de l'eau salée, d'autres du tout desesperés se iettoient dans la mer, prenant terre parmy ces isles inhabitables, d'autres deuenoyent aueugles, & les autres mouroyent comme chiens enragés. De ce malheur nous

*Grande misere
des Portu-
gallois.*

tombames encores en vn autre plus grand , car ayant laissé le droit chemin , qui estoit au long de la terre , nous primmes la haute mer par plus seure nauigation toute vne nuit:& au bout du iour nous trouuames environnés & bien empeschés parmi tout plein de rochiers & des isles : tellement que ne sachant le chemin ny pouuans retourner en arriere à cause du vent qui nous chassoit , & l'eau desia nous estans quasi du tout faillie , pensames sans aucune esperance estre perdus . Finablement apres auoir icy demeuré plusieurs iours(car il n'estoit possible de cheminer la nuit,& le iour falloit que le bateau allast au deuant du nauire pour sonder le fond de l'eau , & luy faire la scorte) nous trouuames certaines Isles plus grandes , ou la mer estoit encore plus large : & ayant là trouué quelques autres nauires venues de Dalacie pour pescher des perles, primmes quelque peu de courage , pensans estre prochains à ladite isle , moyennant la latitude de seize degrés que nous trouuames . Et ainsi cherchans d'aborder ausdits nauires, ils s'enfuyrent en vne isle asses grande , & nous fumes contraints, à cause de la nuit, nous elongner de terre iusques à lendemain au matin , que nous en trouuames loing quatre lieuës . Pendant lequel temps l'Ambassadeur nous montra Dalacie , avec tout plein d'autres isles , prochaines à la terre , & au port du Preste-ian en la coste d'Ethiopie au pied d'une grande montagne , appelée Bisan ou Vision, là ou est vn hermitage des Religieux & vne eglise dediée à Abraam, en laquelle demeure vn Euesque de saincte vie , appelé Abbuna Gebbra Christos, ensemble d'autres Religieux Obseruantins, prians nostre Capitaine d'aler là pour rafraischir son armée : ce qu'il ne voulut oncques faire , mais enuoya le bateau en lisle de Dalacie pour chercher d'eau douce , lequel alé & reuenu tout ioyeux , ayant prins vn petit nauire des Mores, qu'ils appellent Gelfa , nous porta nouuelles comme il auoit trouué en vne autre petite isle ioignante à celle de Dalacie, grande abondance d'eau & de bestail . Parquoy le premier iour de May nous primmes terre enuiron quatre cens hommes , rendant le pays seur , par ce que les Mores s'enfuirent trestous à Dalacie. Or estoit il aduenü que dans la dite Gelfa lon auoit prins vn More homme sage , lequel , apres luy auoir donné habillemens & draps de plusieurs sortes , enuoyames en Dalacie pour parler au Roy , & l'auertir que nous n'estions là descenduz pour luy faire dommage , mais pour prendre de l'eau & luy payer à sa volonté , & aussi pour attendre là nostre Capitaine Maieur , qui s'estoit egaré de nous par fortune de mer. Le Roy asseuré par ce More , nous enuoya ces Ambassadeurs , lesquels ayans recognu Mathieu Ambassadeur du Roy David , luy firent grand feste , nous offrant que le tout estoit à nostre commandement : de quoy nostre Capitaine les remercia bien fort , & les pria de nous enuoyer quelques viures , de maniere que le iour ensuiuant le Roy rescrit à l'Ambassadeur & au Capitaine , se reiouissant de leur venue par my tout plein de

de grands presens quil nous enuoya, comme lait, chair, & miel, monstrât d'auoir grande enuie de parler à nous, ce quil feit au bout de trois iours qu'il vint vers nous, accompagné de cinq cens hommes de pié, armés de certains dars, escus & arcs non gueres bōs, & quelques espées comme les nostres: entre lesquelles gens, les plus apparens estoient sus de chameaux & dormadaires, & cheuaux legers d'Arabie, avec plusieurs instrumens, & sons à la mode du pays. Le Roy étoit habillé à la Moresque, avec vne robe d'or, & de soye de diuerses couleurs, & au dessus de sa robe auoit vn drap à trauers à l'apostolique. Son aage ne passoit vintcinq ans, la couleur de sa chair estoit tanée bien oscure, comme la plus grande partie des Mores d'Arabie felice, iusques à la Mecche, & ses cheueux fort lons & frisez. A cette venue du Roy nous descendimes à terre avec nostre Capitaine, & tous sans armes en signe de plus grande amytié: toutefois les bateaux faisoient tousiours le guet pres du bord, de peur de quelque traison, selon la coustume des Arabes. Et apres plusieurs ceremonies, le Capitaine & l'Ambassadeur prièrent le Roy dénuoyer à Suachen, ou par mer, ou par terre, pour sauoir nouvelles de nostre armée, & luy en donner des nostres: ce que le Roy promit, & ayant enuoyé querir noz lettres aux nauires s'en retourna en sa terre. Parmi ce colloque nous feumes quelques nouvelles de l'estat du Roy Dauid, que nous appellons Preste-ian, & les Mores Sultan Aticiabasci, & trouuames que l'estendue de son Royaume comprend quasi toute l'Ethiopie interieure, & la basse Egipte. Les autres sont d'opinion que son domaine aille bien pres de Mamcongo, qui est vne terre à côté de Ghinea du Roy de Portugal: & quand il marche en campagne, il loge sous de pauillons & tentes de soye, & de draps de diuerses sortes, étant accompagné d'une quantité innumerable de gens tant à pié comme à cheual, tellement quil ne peut demeurer en vn pays plus de quatre Moys, à cause des viures, ny retourner au mesme lieu dont il part, sinon au bout de dix ans, à cause de la cherté des viures. Il se tient maintenant à Chaxumo, terre qu'autrefois a esté appellée Auxuma, mais le vocable est corrompu, comme celuy de Mercoé, Isle dans le Nil, qu'on dit maintenant Gueguere. Ils disent que ledit Seigneur est ieune de dixhuit ans, beau, la couleur de sa chair est oliuastre, & ne le peut on voir au visage, sinon vne fois l'an, ayant tout le reste du temps la face couuerte, ny moins veust que personne luy parle, sinon par le raport d'un truchement, & de trois ou quatre personnes. Les hommes naturels de la terre ont tous vne marque de feu, ainsi que l'on les voit à Rome, lequel signe ne font ia en lieu de baptesme, estans baptesés avec léau comme nous, mais seulement pour obseruer la coustume de Salomon, qui marquoit ainsi ses esclaves: de la lignée duquel l'on dit qu'est venu ce Roy d'Ethiopie, à cause d'une Royne, laquelle passant par là, deuint grosse, & acoucha d'un fils, duquel est venu ceste generation: qui ob-

*Habillemēt
du Roy de
Dalacie.*

*Royaume,
richesses, &
vie du Pre-
ste-Ian.*

*Isle de Me-
roc.*

ferue la loy antique & moderne, comme sortie de la maison d'Israël, acoustumant la circoncision, & le baptesme, & obseruant les festes des Apostres, des Saints, des patriarches, & prophetes du vieux & nouveau testament. Aucuns autres disent que là est vn aneau de Salomon, avec vne couronne, & vne chaire du Roy Dauid, tenue en grande reuerence. Sil plait à Dieu de m'amener iusques là, ie vous en diray à mon retour plus certaines nouuelles. En ceste Isle donc (qui ha seize degrez de latitude, vingt lieues de circuit, & prochaines sept lieues à la terre d'Ethiopie) nous demeurames vn Moys tout entier. Et combien que elle soit sterile, toutesfois lon y aporte d'Ethiopie force miel, millet, beurre, & quelque peu de blé, qui nous donna grand soulagement, avec le bestial, & leau douce, que nous y trouuames. Lesquelles commodités ont esté cause, quelle a esté ainsi frequentée: avec les perles qu'on y pesche, qui sont toutes au Roy. Lon les va pescher au fin fond de la mer avec vn fillet traînant, lequel apres qu'il est plein, il se tire dehors par le contrepoix d'une nauire. Et ainsi ils ont de coustume de faire en Cephalas, au long de la côte d'Ethiopie, dont l'on porte l'or de terre ferme, non loing de Monzambiquy. Et le semblable font en Baharen, qui est vne Isle en la mer de Perse, duquel lieu viennent les plus precieuses perles, & en plus grande quantité que d'autre part. Et ainsi font ils en l'Isle de Zeilan, au dessoubs de Dalacie cent lieues, ou s'engendrent encores les topasses, les hiacyntes, les rubis, les sapphis, ballaches, quelques carboucles, grenats, crisolites; & la meilleure canelle. Ceste Isle de Zeilan me semble estre la Taprobane & non Sumatra, combien que l'année passée j'ay escrit le contraire: mais ie cognois qu'en ce temps là Sumatra n'estoit encores decouuerte. Lon pesche les perles aussi par delà Malacca, au pays de Cataio ou de Cina, en certaines Isles de la mer grande, & toutes en vne mesme maniere. Mais retournant à nostre propos, vous deués entendre Monseigneur, que durât nostre demeure en Dalacia, l'Ambassadeur pria souuent le Capitaine d'enuoyer le bateau en l'Isle de Mazua, loing de nous cinq lieues seulement, pour estre informés de nostre voyage, & de l'armée d'aucuns Religieux, qui là demeurent en l'hermitage de la visio. Ce que le Capitaine ne voulut oncques faire, craignant quelque inconuenient, allant & venant d'un côté & d'autre, sous lequel propos ayant finalement deliberé de partir, pour aler en l'Isle de Cameran, & de là aux Indes, les Mores de Dalacia nous auertirēt, que l'armée estoit en ladite Isle de Cameran; & se voyās assurez quelle ne viendroit point en leur quartier, cōmencerēt à ne faire grand conte de nous, ny de nostre amytié. Mais bien tost apres arriuerent deux caruelles des nostres, enuoyées vers nous par le Capitaine Maieur, qui se doutoit que nous ne fussions perdus, & encores pour decouurer quelques ports des Chrestiens; & ainsi eumes nouuelles, que le iour mesmes q nous no^s separames de l'armée, estās prochains de la terre de Ziden, il aborda vne guelfe au nauire de nostre Capitaine

Comme lon pesche les perles.

Isle de Zeilan ancienement nommée Taprobane.

avecq

avec dixhuit Chrestiens de Grece, Corfu, Candie & Chio, & quelques Geneuois, tous bombardiers & maistres des galeres, disans que au commencement, que le Soldan commença à dresser son armée, ils furent prins dans les ports de Syrie, & enuoyés à Suez, pour faire & armer les galeres, mais qu'ils s'en estoient enfuis, donnans à entendre au Capitaine Mauro qu'ils tourneroyent à Suez, ayans deliberé de prendre vne grande nauire, auant que passer aux Indes, ou en Ormus aux fortresses des Chrestiens, & que maintenāt ayās veu nostre armée, ils estoÿt là venuz pour luy donner nouvelles, que la terre de Ziden estoit asses mal pourueüe, car ils n'y auoit plus que trois cens Mammeluches, & que Rayssalmon, l'un des Capitaines du Soldan, qui auoit tué l'autre, auoit mis en ordre deux galeres, pour passer au Caire vers le grand Turc, que lon dit maintenant estre Seigneur de l'Asie mineur, & de la Syrie: & que tous les autres Turcs, & Mâmeluchiens estoÿent égarés ça & là pour faute d'être payés, ayans laissé les galeres, & artilleries au long de la mer, comme ceux qui ne se doutoyt de nostre venue. Et que sur ces nouvelles le Capitaine Maieur desirant d'arriuer à Ziden, fut quinze iours voltigeant par la mer sans pouuoir iamais prendre port, à cause du vent contraire. Et de fait, du temps que nous veimes la terre de Ziden, à l'entrée de l'armée dans le port, Rayssalmon ayant esté auerti de nostre venue, eut loisir de pouruoir la ville d'artilleries & de gens de la Mecche, qui passerent en nombre plus de dix milles, de diuerses regions, là venuz en pelerinage: car de la Mecche iusques à Ziden il n'ya que douze lieües. Et incontinent qu'ils veirent nostre armée comparoistre, ils ne cesserent iour ny nuict de leur tirer contre. Parquoy fut deliberé par le conseil du Seigneur Lopes Soares de ne tenter la fortune plus outre, mettant en hazard toute l'armée des Portugallois, & le pays des Indes: mesmes qu'en ce temps s'enfuit vn esclauue valet de chambre dudit Rayssalmon & Chrestien natif du mont de Vis, qui auertit le Capitaine comme la ville estoit de toutes parts fortifiée, avec plusieurs autres secrets, & choses d'importance: & que là estoit venu vn Ambassadeur du Roy de Cambaye, par le conseil d'un Turc nommé Melquias, Seigneur de l'Isle de Diupatan & subiet audit Roy: lequel étant homme fin & cauteleux entretenoit d'un côté les Portugallois, & de l'autre le Soldan, desirant toutesfois la destruction dudit Seigneur, à l'aduantage des Portugallois, les sollicitant de passer le plus tost qu'ils pourroyent à Diupatan, car là il les ayderoit de viures, d'artilleries, de nauires, de boys, & d'hommes, & se viendroit ioindre à leur armée. Lesquelles choses sceües par le Capitaine Maieur, donna ordre de s'en aler, faisant premierement bruler trois grosses nauires, avec vn galeon de deux couuertes, iadis armées par les Mammeluches, quand ils furent en Aden: & ayant ainsi tout depeesché se vint rendre en l'Isle de Cameran, dont (comme i'ay dit) auoyent esté depeeschées lesdites carauelles, pour nous venir trouuer en Dalacie.

*Description
de l'Isle de
Ziden.*

Le Ziden (comme disent aucuns) est vne ville de l'Arabie deserte, ayant vingtdeux degrez & demy de latitude, ou est le port de la Mecche, fort renommé entre les Mores, lesquels l'appellent terre sainte, tout ainsi que la Mecche & Medina Talnabi, là ou est enterré Mahomet, auquel lieu vont en pelerinage de tous côtés ceux qui suyuent sa loy. La dite ville n'est pas trop grande, mais bien murée, & pleine de bastimens de pierre: bien est vray que du costé de la mer elle souloit estre sans murailles, mais ils commencerent à les y faire depuis que les Portugallois furent premierement à la mer rouge. Le pays est fort sterile & desert, comme les autres d'Arabie, on ny boit autre eau sinon celle que l'on porte de dehors chargée sus de chameaux comme en Aden, en Zeilan, & par toutes les autres villes prochaines à la mer. Ainsi depuis le Ziden iusques à la Mecche, a douze lieûes par terre, depuis la Mecche à Medina soixante: de Suez à Toro, ou s'assemble l'armée soixante aussy: de Toro au mônt Sinay prochain de Ziden deux cés: & de Ziden à Cameran cent septante. Or voulant le Capitaine Maieur donner ordre à faire ceste entreprinse, auoit enuoyé decourir les ports de Preste-Ian, laissant l'Ambassadeur avec les susdites caruelles: & nous autres allames à Mazua, vers vn port des Chrestiens appellé Ercoco, enuoyans de la vn massager à vn Roy Chrestien appellé Bernagas, vassal du Roy David, loing du port quatre iournées, & autant de la Vision, pour luy faire entendre la venue de leur Ambassadeur, & d'un autre enuoyé audit Sieur par le Roy de Portugal, l'auertiffans de ne se fier point des Mores de Dalacie, par ce qu'ils estoient traitres, desirans de se véger du dommage, qu'ils auoyent receu, & avec ceste resolution partimés par Cameran vers l'autre côté d'Arabie Felice, qui est loing cinquante lieûes de Dalacie, passant à veûe de plusieurs Isles, iusques à ce que au bout de quatre iours arriuames en Cameran, ou fumes ioyeusement receuz de nostre armée. Ceste Isle de Cameran, (comme i'ay dit) n'a de circuit que quatre lieûes: elle est prochaine à demye lieûe de la terre ferme, ayant quinze degrez de latitude. Il y a enuiron quatre ans qu'elle fut pillée, lors que nostre armée entra la premiere fois dans la mer rouge, avec le Seigneur Alonse Dalburquerque, qui y demeura quatre Moys: & par faute de viures tuerent tout le bestial, & couperent tous les arbres des dattes: & à la fin partans de là brulerent vne ville asses grande, peuplée, & bien riche, à cause que les nauires qui passoyent d'Aden à la Mecche, prenoyent tous de l'eau en ce lieu, lequel i'ay trouué le plus haut que pas vn des autres, tellement qu'il y mourut plusieurs de noz gens. Ce pendant retournerent les caruelles de l'Isle de Dalacie sans auoir accompli nostre deseing, à cause de leur mal gouuernement. Car aussy tost qu'ils nous veirent departir, estans bien pres au port d'Acoco, ils tournerét par Dalacie, & enuoyerent le More de Granata à terre pour parler au Roy, & luy dire qu'ils estoycnt là venuz par commandement du Capitaine Maieur, pour traiter la paix

*Description
de l'Isle de
Cameran.*

*Traison
d'un More.*

avec

avec ceux de l'Isle, mais il feit bien autrement, car le meschant promit de donner l'Ambassadeur & les carauelles au Roy de Dalacie : & d'autre part arriué deuers nous feit acroire quil auoit apointé avec ledit Roy, & que lon pouuoit aler & venir seuremēt, priant le Capitaine d'aler à terre : & mener l'Ambassadeur pour ratifier la paix qu'ils demandoyent : sous lequel propos voulant le Capitaine amener l'Ambassadeur avec luy, il luy feit responce quil n'estoit là venu pour aler en Dalacie entre les mains des Mores, ny moins pour ce fier d'un More de Granade, quil cognoissoit mieux que luy, & que quāt à luy il ne bougeroit des carauelles. Ce nonobstant les Capitaines mal conseillés, croyans aux paroles du More s'aprestoyent pour y aler, lors que ledit Ambassadeur les auertit de ny aler point, s'ils n'estoyent bien armés, & en bon equipage, commandant de tous faire acte, & sommation par le Greffier, ou secretaire de la nauire. De quoy les Capitaines ne feirent aucun conte, ains s'aprocherent à terre avec le batteau sans armes, & attendans que le Roy deust descendre en bas, leur faillit le flot de la mer qui va & vient de six en six heures, tellement que le batteau demeura là ce pendant que les Mores y arriuerent : & ayant entendu que l'Ambassadeur ny estoit point, cōmencerent à tirer force flesches contre les nostres, & prindrent le batteau, ou ils tuerent vn des Capitaines avec deux autres, tādīs que d'autre part aucuns qui auoyēt leurs espees commencerent à ruer sus eux, & feirent tant qu'ils reprindrēt leurs bateaux s'en retournās deuers les carauelles blesséz, & mal en point, & avec tel desordre s'en retournerent par Cameran, ne se souciant point de faire autre voyage. Le Capitaine Maieur fut fort marry de ce cas aduenue, & étant en doute en quelle part il deust prédre son chemin, suruint la mort d'Odoard Galusan, qui aloit en Ambassadeur pour le Roy de Portugal, vers le Preste-ian, ce que fut cause que l'on ne parla plus d'acheuer nostre entreprinssē. Nous fumes en Cameran iusques au douzieme iour de Iuin, pēdant lequel tēps abbatimes la forteresse faite par les Mameluches fort grāde & bastie à la mode de nostre pays, aupres de la mer, & là ou le Soldan auoit dependu dix milles saraffi, qu'est vne monnoye d'or qui vaut enuiron trois quars d'un escu, & est marquée de diuers coings selon la diuersité des terres de Perse & d'Arabie. En ce temps mesme iāy sceu de quelques Chrestiens, qui s'enfuirent de Ziden, comme il y auoit huit ans passés que le Soldan auoit cōmencé de faire son armée dans les ports de Suez, pres du Caire à trois iournées par terre, & que en tout ce temps là, il n'auoit seu faire que six galeres bastardes, & quatorze royales à faute de bois quil luy faloit faire amener du pays subiect au Turc, & du gouffre de Scandaloro aupres de Rhodes, de là en Alexandrie, & au Caire par le fleue du Nil, auquel lieu lon le met en œuvre, & apres le portēt sus des chameaux iusques audit port de Suez, disant que quād l'on tira de la mer ses galeres avecq leurs gens, artilleries & viures payés pour quatre Moy, le Soldan auoit depēdu huit cens milles saraffi, mesmes que

*Saraffi
monnoye
du Soldan.*

*Armée du
Soldan.*

leans estoient trois milles hommes, & chacune des six galeres bastardes portoit à la prouë vn fort gros canon appellé Bazilisque avec deux coleurines, & à la poupe deux autres, & à côté dumas deux canons: & chacune des quatorze galeres Royales auoit à la prouë deux coleurines, & vn canon, & autant à la poupe, & à côté vingt trois autres pieces d'artilleries: & que quant aux hommes il en y auoit mille trois cens qui estoient Turcs, mil Africains, & sept cens Mameluches reniez, entre lesquels estoient seulement mille harquebuziers. Etant ainsi l'armée presté, le Soldan enuoya Rayssalmon natif de Turquie vers Suez, homme fort hardi & expert à la guerre, lequel étant banni du grād Turc auoit long tēps esté coursaire en noz mers, luy ordonnant qu'il fust en cōpagnie de Amyrasen pour estre de ses Lieutanās generaux, donc Rayssalmon print charge des soldats, & l'autre de pouruoir ce qu'estoit necessaire pour l'armée. En cest accord ils partirent de Suez, & en huit iours arriuerēt à Tauro, & de delà à Ziden, ou ils prindrent force viures, & à la fin se fermerent à Cameran, auquel lieu le Soldan cōmanda qu'on feist la susdite forteresse, & leur cōmanda de ne passer plus outre sans son congé. Mais il aduint que en faillant les viures, & argent aux soldats, ils s'en alerent enuiron sept cens hommes, & s'enfuirent en vne montagne de l'Isle, faisant entendre aux Capitaines, qu'ils vouloyent estre payés, & auoir de quoy viure, ou que autrement ils mourroyent tretsous foubz ceste requeste. Les Capitaines feirēt tout leur effort de les pacifier, & sachans pour certain que le Roy d'Aden ne laissoit rien passer par terre ferme ou il estoit Seigneur, Amyrasen conclut avec Rayssalmon de passer au Royaume d'Aden avec vne partie des harquebuziers & archiers, desquels Rayssalmon auoit desia amassé plus de deux milles, par ce qu'il les payoit bien, & auoit fait prouision de beaucoup d'harquebuzes. Ainsi passa Amyrasen au Royaume d'Adē, en vn port qui est entre le detroit de la mer rouge, & Cameran, avec mille huit cens hommes: lesquels ayans défait avec l'artillerie grand nōbre de Mores, entrerent par force dans Zibid, qui est vne cité du Royaume grande, riche, & copieuse de tous biens; de laquelle ils demurerent maistres, & en apporterent grandes richesses, femmes, & cheuaux, apres y auoir tué vn frere du Roy. Partans de là ils alerent à Taësa, laquelle est vne autre asses bonne ville, toutesfois ils la prindrent assez facilement, par ce que les Mores s'enfuirent craignans les harquebuzes. Et ainsi qu'ils estoient là faisans grād chere, ils se mutinerent, demandans payes nouvelles au Capitaine, lequel se voulāt excuser fut par eux menasé d'estre mis en pieces. Sur ceste occasion il rescrit à Rayssalmon tout ce que luy estoit aduenu, qui ne luy feit aucune responce, sinon qu'ils seroyēt tous payés, mais qu'ils fussent de retour à Cameran: mais ils respondirent tresbien qu'ils ne vouloyent pas aler ny demeurer en autre ville qu'en icelle, d'où ils estoient natifs: de sorte qu'Amyrasen fut contraint de s'enfuir & retourner vers Rayssalmon: lequel voyant de iour en iour faillir les viures, sortit du detroit de la mer

rouge,

rouge, & se retira à Zeilan, qui est vne ville située en la côte d'Ethiopie. Les habitans dicelle craignans qu'ils ne leur aduint cōme aux autres, donnerent aux Capitaines dix milles saraffi, viures & gens pour fournir les galeres: lesquels incontinent apres partirent de là, prenant le chemin d'Aden, & étans au mylieu du gouffre d'Arabie, veirent vne grāde nauire de Malacca, à laquelle Rayssalmō dōna la chasse, & layāt prins chargée d'innombrables richesses, & marchandises, l'enuoya en Diupatan à Melchias, luy ordonnant de vendre tout, & renuoyer les nauires au detroit chargées de viures, de bois, de fer, & destouppes: le priāt aussi de s'en tenir tout prest pour donner à dos aux Chrestiens aussi tost que l'armée seroit là. D'autre costé Amyrasen passa avec l'armée en Aden, & arriué à terre cōmença à battre la ville, mais fortans les gens d'Aden dehors luy ostèrent sa piece par force, cē pendāt que Rayssalmon cōparut. Et apres auoir abbatu vne partie des murailles de la ville, descendit en terre, & reprit son artillerie avec d'autres quil y trouua: toutesfois ceux de la ville se defendirent si bien, quil fut contraint de s'en retourner avec son armée en Cameran, & de là à Ziden: ou sachāt les nouuelles, de la reuolte du Caire, les Capitaines eurent question ensemble, & Amyrasen s'enfuit à la Mecque, là ou il fut prins & réuoyé à Rayssalmon, qui luy faisant acroire de l'enuoyer au Caire vers le grand Turc, le fit ietter & noyer dans la mer, & luy s'en ala vers le grand Turc avec deux galeres: comme iāy desia dit vne autre fois. Nous adonc partant de Cameran pour aler aux Indes le trezieme iour de Iuin, & passant par le detroit de la mer rouge, (ainsi nommée ie ne scay pour quoy, n'étant en rien differēte à la couleur des autres) alames tousiours à côté de l'Ethiopie iusques à Zeilan, là ou arriués que nous fumes la veille de saincte Marie Magdelene, trouuames quelle estoit toute deporueüe, s'en étant enfuis plus de cinq cens personnes, dont aucuns vieux, qui étoient demeurés furent par nous tués, & les autres amenés cōme esclaves, cōbiē que nostre butin ne fut pas grād, ayās desia les habitans du lieu cachés & nous porté le meilleur de leurs bagues ailleurs. Ladite ville ha onze degrez & demy de latitude, & est bastie en lieu bas & sablonneux sans aucunes murailles: toutesfois elle est asses grāde & abondāte en blé, bestial & fruiçts tous diuers aux nostres: tellemēt q̄ de là lon porte grāde quātité de viures & de chair à Aden, & Ziden. Elle est aussi lointaine du detroit enuiron trēte lieües, auquel lieu souloyēt aborder plusieurs nauires d'Aden, & des Indes chargées de plusieurs marchandises, & principalemēt d'encens que lon aporte de Dufar, terre d'Arabie entre la mer de Perse, & d'Aden, avec poiure & draps qui vōt d'icy en Cafilā parmy les trains des chameaux iusques en Ethiopie, & ou sont les eglises des Chrestiens: toutefois ils ne font point de dōmage au marchans qui vont & qui viennent. Le Seigneur de Zeila & d'autres grandes terres du Royaume d'Adel, est Seigneur, vn Roy More appellé Salatru, lequel on dit estre sōrty de la lignée du Roy Daud, à cause d'une fille du Roy de

*Batterie de
l'Isle d'Aden.*

Mort d'Amyrasen General du Soldan.

Description de l'Isle de Zeilan.

*Prophetie
des Mores.*

*Oppiū The
baicum.*

*Description
du port de
Calayate.*

Zeila, iadis mariée à son pere. Nous sceumes des Mores par nous prins, que ledit Roy Salatru s'en estoit fuy en vne guerre dernièrement faicte contre les Chrestiens, & que vn sien Capitaine nommé Mafudei y auoit esté tué, apres qu'ils eurent brulé & pillé tout plein d'églises & de monasteres. Laquelle chose entendue par le Roy Dauid, l'auoit contraint de y aller avec vne grosse armée, Et ce fut la cause que, s'en étant le More enfuy, nous ne trouuames à Zeila personne qui fait teste. Desquelles nouvelles l'Ambassadeur de Preste-ian fut grandement ioyeux, luy étant aduis que le Roy ny trouueroit plus personnes pour luy contre dire, & que facilement il s'allieroit avec les Portugallois pour detruire entierement les Mores: lesquels disent auoir vne prophetie que la Mecque & Medina doiuent estre abbatues & desolées par les Chrestiens d'Ethiopie. Partans de Zeila pour aler vers Aden à l'autre côté d'Arabie, & trauersans la mer Arabique, nous y arriuames en huit iournées, là ou demeurames cinq iours sans deliberer ny de paix ny de guerre, par ce que les Mores, qui y étoient bien pourueus, & fauoient que nous auions perdu vne partie de noz gens, & l'autre estoit malade. Ce pendant vindrēt vers nous plusieurs Mores pour racheter aucuns de leurs esclaves, que nous auions prins à Zeila, & mesmes certains Sciriffi & Sciriffe, ainsi només à cause d'une lignée de Mores sortie de Mahomet, estimās grand peché s'ils fussent demeurez entre noz mains: & ainsi en furent plusieurs changez en moutons, en eau douce, & en fruits. Il y auoit pareillement en ce port quatre nauires chargées d'eau roze, raisins de Damas, amandes, & d'une autre drogue medicinale des Indes appellée Amfian, de laquelle les Mores font grand conte, & mesme les Gentils: lequel simple viēt en Ethiopie, & Arabie, & me semble que nous l'appellōs opiū Thebaicū, qui est venimeux, mais on le presente en petite quantité, & souuent pour mieux cōtēter les femmes. Et cōbien que lon charge ces marchandises dās le port d'Aden pour les porter aux Indes, toutesfois le Capitaine Maieur n'en voulut autremēt prédre. Mais le ppre iour de Sainct Laurēt partimes en intētion de passer à l'Isle appellée Barbara en la côte d'Ethiopie, pour rafraichir l'armée: & ainsi passames de rechef par la mer Arabique deuers l'autre côté, cōbien que n'y abordames point, à cause des mariniers, lesquels ne no^y voulurēt amener, ou ne sceurēt cognoistre le lieu: parquoy deliberames d'aler prédre de l'eau au Cap de Guardafuni, mais le vēt cōtraire nous enuoya ailleurs: dōt le Capitaine Maieur fut cōtraint retourner encōres vn coup à la côte d'Arabie, ou aucunes de noz nauires prindrēt le chemin d'Ethiopie au lōg de la côte pour chercher de l'eau. Finablement avec grand peine passans de la mer Arabique en la mer Oceanne, & estās ia pchains de Socotora & prest pour prédre port, le vent nous laissa, & fumes cōtraints de prédre autre chemin avec deliberatiō de passer en Ormus. En ce voyage nous eumes si grande faute d'eau, que plusieurs de noz gens y moururent, toutesfois il pleut à Dieu de mettre fin à noz travaux, & de nous conduire à Calayate, qui est vn port de l'Arabie heureuse pchain à la mer de Perse, & à l'Isle d'Ormus à cēt lieues, ou reposames quinze iours. Ce port de Calayate ha 22. degrez de latitude, & n'est gueres plus grand que Zeila. Les maisons y sont basties de chaut & de pier

res, mais la ville n'ha point de murailles, & les natifs dicelle s'ont Arabes en paroles, meurs & habillemens, ayans vn drap alétour des parties hôteuses, & en la teste vn turban fait à la Turque: cōbien q̄ les plus nobles sont abillés d'vne chemise ceinte asses lōgue, avec les maches larges: & vn bōnet long de gros feutre tané & pointu, cōme la mitre d'un Pape. Les femmes ont le visage couuert d'un drap de cottō nō gueres espés, azuré, & coppé au dessus des yeux cōme vne masque: & le demeurāt de leurs habillemens est fait cōme vne robe ouuerte, & deuant lōgue iusques au genoil, ayāt les manches larges, avec des chaufes à la marine iusques aux talons de diuerses couleurs, & sous le nez d'un costé vne petite pomme d'or enchassée dās la chair, & plus bas vn aneau ataché comme les buffles de nostre pays. Ceste terre de Calayate est fort sterile, cōme le demeurāt de l'Arabie: toutefois il y a qlques raisins, & grāde quantité de dattes, & biē peu d'autre semēce. Les hōmes plus riches se nourrissent de riz meslé avec qlque peu de fromēt, n'ayās faute aussi de burre & de laiēt, à cause du bestail, qui s'y trouue en grāde quātité. De ce port passe grād nōbre de cheuaux venās aux Indes, par ce qu'ils ne peuuent aborder ailleurs, cōme iāy desia dit vne autre fois. E d'ici enuoya le Capitaine Maieur vn siē neveu aux Indes, avec quatre nauires pour dōner ordre aux episseries qui doiuent cestuy an passer en Portugal: & luy mesmes s'en alla en Ormus avec son armée: & moy en vne nauire des Mores m'en allis voir aucunes terres d'Arabie, passant par la coste de Mascat & CorpSoucā, qui sont ports renōmés en ce lieu, iusques à ce qu'arriuames à Ormus quatre iours auāt q̄ l'armée. Ceste isle ha vingt sept degrés de latitude, cinq lieuës de circuit, & est lointaine à la terre de Perse deux lieuës, pays sterile & sec de forme triāgulaire, sans arbre, fruis, ou herbes d'aucune sorte, ayāt d'un costé certaines montagnes de sel asses haultes, & le demeurāt est pays plat, & la cité sus l'vne des pointes du triāgle deuers terre ferme sans aucune muraille, mais est biē peuplée, mesme d'etrāgers de Perse, d'Arabie & d'Indie, de couleur oliuaistre, & vestus de chemises lōgues au milieu d'un drap de soye, ou de cottō, & la teste enuironnée de turbās blās, & d'autres couleurs. Les femmes ont la teste couuerte & le visage avec vn drap de soye ou de cottō, de diuerses couleurs, & si grād qu'il va iusqs au pied: avec les ornemēs de la teste faits de voil sous les cheueux cōme burellez semblables à ceux, que nous voyons en nostre pays parmy les figures antiqs. L'air de ceste isle est fort sain en tout tēps & tēperé, cōme le nostre au prin tēps & en l'autōne: mais en hiuert il est froid plus qu'en autre lieu, pour estre decouuert, & subiect au pole, cōme pareillemēt en esté il est fort chaud, de maniere qu'il fault la nuyt dormir tout nud sus des galleries: ou ils ont trouué vn certain engin fait cōme la gueule d'vne cheminée, par laquelle le vēt entre par huit costés en leurs maisons, & rafraichit le lieu pour peu qu'il tire d'un costé ou d'autre. De ceste isle nous passames apres en terre ferme, qui est asses copieuse d'arbres & de aus douces, & là ou ils ont plusieurs maisons de plaisance, pour se rafraichir & faire grād chere. Et deués entēdre Mōseigneur, que ceste ville d'Ormus estoit iadis plus noble & excellente que Aden: car anciennement la traite

*Descriptio
de l'Isle
d'Ormus.*

des espifferies y estoit vniuerselle, passant de là par Balsera, qui est port & cité de Perse aupres de la riuière d'Eufrates, & de Balsera alant à Bagdad (cité de Mesopotamie) tousiours par la dite riuiere, & apres par terre en l'Asie mineur, en Damas & à Leppo: desquels lieux à la fin arriuoient en Europe, auãt que lon print le chemin d'Alexandrie. De ceste isle aussi l'on passoit en Armenie, Turquie, & par toutes les prouinces de Perse. Et combien que le port d'Alexandrie empescha quelque peu cestuy passage toutefois ceste isle a tousiours iusqu'aujourdhuy tenu bon & gardé son priuilege. Il est bien vray que la grande ignorãce & auarice des Gouverneurs dicelle (comme il aduient souuent en plusieurs autres lieux, là ou les Princes trop adonnés à leurs plaisirs, ne veulent entēdre quelquefois à leurs affaires se confians du tout sur la suffisance & loyaulté de leurs ministres qui n'en sont gueres pourueuz ny de l'une ny de l'autre) donnerent occasiõ à tout-plein de marchãs de s'en aller ailleurs, & ny retourner point, à cause des grandes pilleries qu'ils faisoient: & ont fait depuis deux cēs ans en ça, iusques à la venue du Seigneur Alfonso Dalbinquelque: lesquels Gouverneurs ayans retiré, acheté & assensé du Roy toutes ses traites, daces & gabelles, estoient deuenus si riches & puissans, qu'ils entreprindrēt la guerre contre leur Prince, vendans & donnans à leur plaisir (pour satisfaire à leur insatiable appetit,) tous estatz & offices à leurs mignõs, parēs, & personnes indignes: tellement que le Roy fut contraint y enuoyer ledit Seigneur Alfonso, lequel apres auoir rēdu l'isle tributaire de quinze mille sarrassi au Roy nostre Sire, & mis en pieces le Gouverneur dicelle, y fait la susdite forteresse, & enuoya à Goa douze Roys ou Gouverneurs de ceste isle prisonniers & auégles, leur ayant premierement fait creuer les yeux avec vn fert chaut. Ce lieu (cōme i'ay dit,) est fort abundant en pain, chair, fruis, & herbages, desquels sont rēplies toutes les places & tauernes, ou les viandes se trouuēt cōme lō veut toutes cuites ou crues: mais le viure est vn peu cher, pource qu'il viēt de lointains pays, cōme d'Arabie, Perse, & Mesopotamie. L'on y trouue aussi des cōfitures, cōserues, cōpostes, & eaux destillées de toutes sortes, avec medicines des simples à la mode d'Italie: & les hōmes mesmes Persiēs & Armeniēs sont fort liberaux, discrets, gracieux,

*La cause
du debat
entre le
Sophy & le
Turc.*

vertueux & sauans: & principalement en la doctrine du vieux testament. Quãt au Sophi, qui est Seigneur de Perse & d'aucunes terres d'Arabie, Turquie, & Tartarie, il est cōme i'en ay peu entēdre, du tout Mahōmetiste, sans auoir aucune conformité avec nostre foy. Et tout le debat qui est entre les Turcs & Mores d'Arabie & d'Afrique viēt à cause des cōpagnõs iadis de Mahōmet, qui estoient en grand nōbre, lesquels les Mahōmetistes disent auoir esté tous sauués & gēs de biē: & le Sophy à l'opposite dit qu'il n'ya que Haly gendre de Mahomet Ambassadeur & Prophete comme Mahomet, qui s'est sauué cōme luy, & que tous les autres sont prophetes faux: & pource font la guerre le Turc & luy l'un contre l'autre chacun pour sa foy, qui est biē assez pour nous faire rougir, en nous admonestãt cōmmē nous deuriõs chercher d'augmēter non destruire la nostre. Le

dit Sophi est fort incliné à l'amitié des Chrestiens, les congnoissans gens d'esprit, encores que les Persiens sont de bõne nature, entre les mains desquels i'ay veu toute l'histoire du Grád Alexandre, mais cõme chose rare, & entre les mains des grands Seigneurs, ie n'ay oncques sceu en retirer la copie. Les monnoyes d'Ormus sont saraffi, & demy saraffi d'or qu'ils appellent azar, avec vne autre sorte de monnoye d'argent, qu'ils nomment sadi. Ils ont encores vne autre maniere de monnoye si fine & si bonne, qu'elle court en Inde & Arabie comme en Perse : six pieces de laquelle d'argent en forme longue redoublée & frappée de deux costés des lettres Persiennes, font vn ducat : & s'appellent thangus. Or arriué que fut nostre Capitaine, le Roy d'Ormus acompagné des principaux de la ville, & de sa garde, le vint receuoir à la marine, estant habillé à la Persienne, avec vne robe longue à la Turque de veloux noir, avec quelques passemens d'or, & en la teste vn turban de soye alentour d'un bõnet d'or tiré en forme ronde, & fait à quarres, comme la moitié d'un meló : lequel bonnet le Sophi, (appelé Scieht Ismaël) a de costume enuoyer aux Seigneurs qui sont ses subiets & tributaires en signe d'amitié. Et en Ormus les seruiteurs du Roy ont quasi tous vn bõnet de laine rouge sur la teste, & les plus nobles de veloux, ou de damas de Perse, ou de drap d'or, comme il me souuient en auoir veu l'an mil cinq cens quatorze à certains marchans Persiens à Florence. Le Capitaine Maieur avec grand ioye fut receu & bien traité du Roy : & par toute l'isle l'on feist feste generale de nostre venue. La forteresse d'Ormus est asses grande & bien fondée & enuironnée de fortes murailles, avec quatre quarres & huit grandes tours, qui ont chacune sa canonniere. La moitié est enuironnée de la mer, & au milieu a vn chateau fort bien garni de toutes munitions, entre lesquelles sont quatre cisternes tousiours remplies d'eau douce, que lon porte de Perse. Le Roy quatre iours apres la venue du Capitaine, l'alla voir en sa forteresse, & luy donna vn fort beau cheual Persien, lequel avec son harnois fut estimé mille saraffi, & outre plus luy feist present d'une cimeterre damasquinée avec son fourreau & garnitures d'or, rempli de perles & pierres precieuses, & de plusieurs pieces de damas de Perse. Le lendemain ils monterent à cheual, & le Roy acompagné de cent cinquante cheuaux legers, & six cens hommes de pied, s'en alerét esbatre par l'isle, ou fumes festoyez quinze iours tous entiers, pendát lequel tēps y arriuerent plusieurs nauires de Baharé (qui est vne isle iointaine d'Ormus six iournées dās la mer de Perse, deuers le desert d'Arabie) & porterēt grand nõbre de perles, desquelles ló fait principale trafique en ce lieu, etāt Baharé subiette au Roy d'Ormus, lequel depuis les enuoya aux Indes par l'Arabie, & par la prouince de Perse, iusques en Turquie : tellemēt q̄ ie suis en doute si elles sont plus cheres en ce pays q̄ au nostre. Nous eumes aussi nouuelles qu'en vn port de terre ferme à dix lieuës d'Ormus estoýt arriués les carauanes de Syrie & de Tauristerre de Perse, pour leuer soyes, taffetas & damas, eau roze, cheuaux & autres choses

*Habillemēt
du Roy
d'Ormus.*

*Description
de la forte-
resse d'Or-
mus.*

*Presens
faits au
Capitaine
des Portu-
gallois.*

choses qui viennent de Perse pour les Indes: & aucuns marchans vindrent en Ormus, & acheterent plusieurs draps rouges nouveaux & vieux, pour faire des bonets à la mode susdite. Avec ceste carauane fut menée vne Once que le Roy d'Ormus bailla au Capitaine Maieur, pour l'enuoyer au Roy de Portugal, qui la demandoit pour le Pape. Apres lesquelles choses ayant le Capitaine laissé la forteresse bien garnie, nous partimes de là; & ayans suiuy par le destroit la coste de Perse, entrames en la mer d'Indie, ou primmes port en lisle de Goa, à quatre cens lieuës d'Ormus: lequel chemin feimes en trente iournées. Icy eumes nouuelles de dix grosses nauires arriüées de Portugal avec deux mil hommes, passés desia aux forteresses de Calicut & Cochin. Ce que nous donna grand ioye, & primmes incontinent le chemin de Cochin, ou arriuames au mois de Decembre vn an apres que nous en estions partis par mi les trauaux & peines, qu'aues entendues: desquelles ie remercie nostre Seigneur qui m'a sauüé & deliuré, attendu que tant de mes compagnons y sont demeurez morts, desquelz il ne sera iamais autre memoire.

Après le retour du Capitaine Maieur l'on ne fait autre chose que donner ordre à six nauires, qui doiuent partir par tout le mois de Ianuier pour aler en Portugal; deux desquels portent chacun deux mille bottes, & tous les autres huit cens, neuf cens & mille, portans au Roy cinquante mille quintaux de poivre, grand nombre de zingembre, canelle, cloux de giroffes, gomme, lacque, soye, de la cina, & sandal rouge, avec plusieurs autres richesses des particuliers. Plaise à Dieu de leur donner bonne fortune. Et apres ceste expedition partira bien tost vn Capitaine pour aler à la mer rouge, iusques au Cap de Guardafuni, avec six ou huit nauires pour passer apres en lisle d'Ormus, Vn autre aussi en sera depesché pour en la coste de Cambaye avec quatre nauires, & vn autre en la mer du Gange à decouurir le Royaume & ports de Bengala, ou il y a long temps que ne furent aucunes de noz nauires, & vn autre s'en ira à Malacca, & à la Cina, là ou lon dit que le Capitaine Maieur se trouuera luy mesme en psonne. Dieu laisse suivre ce que plus nous sera necessaire: car quāt à moy iay deliberé de chercher & voir diligemment tout ce pays, passant ceste année avec Pierre Strozzi, iusques à la maison de Saint Thomas à deux cens cinquante lieuës d'yci; & de là au port de Paleacate, au Royaume de Narsinga auquel lieu arriuent du Royaume du Peigu grand nombre de Rubis, Depuys avec certains Armeniens Chrestiens mes amys, ay deliberé de chercher la terre ferme, & là employer cinq ou six mois pour voir toutes les prouinces d'un si grand Royaume, tant renommé par ses richesses. Et à la fin par ledit Pierre Strozzi, lequel l'année qui vient veust retourner à la patrie, donneray plus amplement nouuelles à vostre Seigneurie de tout ce que i'auray peu cognoistre en ces lieux.

Fin de deux lettres d'Andre Corsal.

